


sc. sup. 23. pl. 3.







D. LUDOVICI HABERT,
Sacræ Facultatis Parisiensis Doctoris, Theologi,
& Socii Sorbonici,

THEOLOGIA

DOGMATICA ET MORALIS,

Ad usum
SEMINARII CATALAUNENSIS.

Planissima, Critica, & solidissima Methodo
conscripta,

Nunc verò

Ad usum totius Orbis litterarii

Post Editiones Parisiensem & Venetam
in Germania denuò recusa,

in VIII. TOMOS divisa,

plurimis Mendis sollicitè purgata.

TOMUS V.

Continens Tractatus

DE SACRAMENTIS IN
GENERE; DE BAPTISMO; DE
CONFIRMATIONE; ET
DE EUCHARISTIA.

Editio prima in Germania.

Superiorum Permissu



AUGUSTÆ VINDELICORUM,
Sumptibus MATTHÆI RIEGER, Bibliopolæ,
M DCC LI.





INDEX CAPITUM.

Tractatus DE SACRAMENTIS IN GENERE.

Caput I. *De Nomine Sacramenti, & varia
ejus acceptione.* Pag. 1

Cap. II. *De Definitione Sacramenti in genere.* 7

* 2

Cap. III.

INDEX CAPITUM.

Cap. III. *De Existentia Sacramentorum in diversis hominum statibus.* Pag. 13

Cap. IV. *De Differentia Sacramentorum veteris, & novæ Legis.* 19

Solvuntur Objectiones. 29

COROLLARIUM. 37

Cap. V. *Ex quibus partibus constant Sacramenta novæ Legis?* 38

Cap. VI. *De verbis, quibus Sacramenta novæ Legis perficiuntur.* 42

Cap. VII. *Utrum Christus Dominus determinaverit materiam & formam omnium Sacramentorum?* 49


Cap. VIII. *De Causa efficiente Sacramentorum novæ Legis.* 62

Cap. IX. *De Ministro Sacramentorum novæ Legis.* 65

Cap. X. *De intentione Ministri Sacramentorum.* 68

Cap.





INDEX CAPITUM.

Cap. XI. <i>De intentionis divisione.</i>	Pag. 73
Cap. XII. <i>Qualis intentio est necessaria in Ministro ad perficiendum Sacramentum?</i>	75
Cap. XIII. <i>Utrum ad veritatem Sacramenti sufficiat exterior Ministri intentio?</i>	80
Cap. XIV. <i>Utrum fides & probitas in Ministro requirantur ad Sacramenti veritatem?</i>	90
<i>Solvuntur Objectiones ex Traditione petita.</i> 100	
<i>Solvuntur Objectiones ex Scripturis petita.</i> 116	
Cap. XV. <i>Utrum peccatores Sacramenta licite conficiant?</i>	120
Cap. XVI. <i>Utrum liceat Sacramenta petere, & accipere ab improbis Ministris?</i>	128
Cap. XVII. <i>De subiecto Sacramentorum.</i>	133
Cap. XVIII. <i>De Sacramentorum novae Legis effectibus.</i>	240

INDEX CAPITUM.

Cap. XIX. *De Charactere.* Pag. 143

Cap. XX. *De numero Sacramentorum novæ Legis.* 252

Cap. XXI. *Utrum Ecclesia habeat potestatem instituendi Cæremonias?* 155

Tractatus DE BAPTISMO.

Caput I. *De nomine, existentia, & definitione Sacramenti Baptismi.* 170

Cap. II. *De materia Baptismi.* 182

Cap. III. *Quænam sit materia proxima Baptismi?* 185

Cap. IV. *Quænam sit forma Baptismi?* 195

Cap. V.

INDEX CAPITUM.

Cap. V. *Quis est Baptismi Minister in casu necessitatis?* Pag. 206

Cap. VI. *Quis est Minister Baptismi sollemnis?* 215

Cap. VII. *Quodnam est Baptismi subjectum?* 218

Cap. VIII. *Possuntne baptizari Judæorum & Infidelium infantes, invitis parentibus?* 225

Cap. IX. *De necessitate Baptismi.* 231

Cap. X. *Utrum Baptismus sanguinis, & Baptismus fluminis aliquando suppleant Baptismum fluminis?* 237

Cap. XI. *De effectibus Baptismi.* 244

Cap. XII. *De Dispositionibus ad Baptismum requisitis.* 258

Cap. XIII. *De Obligationibus Baptizatorum.* 268



Tractatus

DE

SACRAMENTO CONFIRMATIONIS.

Caput I. *De nomine & definitione Sacramenti Confirmationis.* Pag. 280

Cap. II. *Utrum Confirmatio sit novæ Legis Sacramentum propriè dictum?* 282

Cap. III. *De materia & forma Sacramenti Confirmationis.* 298

§. I. *Utrum manuum impositio sit essentialis materia Confirmationis?* 300

§. II. *Utrum unctio sit partialis materia Confirmationis.* 305

§. III. *Utrum mixtio olei & balsami, ac utriusque Episcopalis benedictio sint de necessitate Sacramenti?* 315

Cap. IV.

INDEX CAPITUM.

Cap. IV. <i>De Ministro Sacramenti Confirmationis.</i>	Pag. 318
§. I. <i>Utrum solus Episcopus sit ordinarius Confirmationis Minister?</i>	319
§. II. <i>Utrum Presbyter sit Confirmationis Minister extraordinarius?</i>	327
Cap. V. <i>De subjecto Sacramenti Confirmationis.</i>	335
Cap. VI. <i>De effectibus Sacramenti Confirmationis.</i>	337
Cap. VII. <i>Utrum conveniens sit Ritus Confirmationis?</i>	344
Cap. VIII. <i>Quæ dispositiones requiruntur ad Sacramentum Confirmationis?</i>	348
Cap. IX. <i>An, & quæ sit necessitas Confirmationis?</i>	354



Tractatus

DE

EUCCHARISTIA.

PRIMA PARS.

De

Eucharistiæ Sacramento.

- Caput I. *Utrum Eucharistia sit Sacramentum simul & Sacrificium?* Pag. 360
- Cap. II. *Quibus nominibus designatur Eucharistia?* 363
- Cap. III. *Quotuplici modo spectari potest Sacramentum Eucharistiæ?* 368
- Cap. IV. *Quænam est materia Sacramenti Eucharistiæ?* 382
- Cap. V. *Qualis panis, & quale vinum est materia Eucharistiæ?* 393
- Cap. VI. *Utrum panis Eucharisticus debeat esse fermentatus?* 395
- Cap. VII.

INDEX CAPITUM.

Cap. VII. <i>Utrum aqua vino sit admiscenda?</i>	Pag. 411
Cap. VIII. <i>Quænam est forma Eucharistiæ?</i>	422
Cap. IX. <i>Quis est sensus formæ Eucharistiæ?</i>	437
Cap. X. <i>Utrum Christus Dominus promiserit, Joan. 6. se daturum carnem suam in Sacramento Eucharistiæ?</i>	448
Cap. XI. <i>Utrum præsentia realis probetur ex verbis institutionis: Hoc est Corpus meum?</i>	470
Cap. XII. <i>Utrum præsentia realis habeatur ex Traditione?</i>	487
Cap. XIII. <i>Per quam actionem præsens sistitur Corpus Domini in Eucharistia?</i>	521
Cap. XIV. <i>Utrum Fide divina credendum sit Corpus & sanguinem Christi Domini existere in Eucharistia per transubstantiationem?</i>	531
Cap. XV. <i>Utrum Christus Dominus sit totus sub quahbet specie?</i>	544
Cap. XVI. <i>Quis est Minister Eucharistiæ?</i>	552
Cap. XVII. <i>Utrum ex præcepto divino Eucharistia sit omnibus administranda sub utraque specie?</i>	566
Cap.	

INDEX CAPITUM.

- Cap. XVIII. *Quodnam est Eucharistiæ subje-
ctum?* Pag. 587
- Cap. XIX. *Quinam sunt Sacramenti Eucharistiæ
effectus?* 595
- Cap. XX. *Quæ dispositiones in adultis requirun-
tur ad Eucharistiam dignè recipiendam?* 617.
- Cap. XXI. *Utrum sacra Communio debeat esse
frequens, aut rarior?* 633.
- Cap. XXII. *De necessitate Sacramenti Eucharis-
tiæ.* 643.
-

SECUNDA PARS.

De

Eucharistia, ut Sacrificium est.

- Caput I. *Quid est sacrificium?* 659
- Cap. II. *Quæ spectanda sunt in sacrificio?* 668
- Cap. III. *Utrum in vera Religione debeat esse
sacrificium propriè dictum?* 671.
- Cap. IV.

INDEX CAPITUM.

Cap. IV. <i>Utrum Eucharistia sit sacrificium propriè dictum?</i>	Pag. 680
Cap. V. <i>In quò sita est sacrificii Missæ essentia?</i>	689
Cap. VI. <i>Quomodo in consecratione intelligitur veri sacrificii essentia?</i>	703
Cap. VII. <i>De causa finali sacrificii Missæ.</i>	709
Cap. VIII. <i>Quinam sunt Missæ sacrificii effectus?</i>	715
Cap. IX. <i>Pro quibus offerendum est Missæ sacrificium.</i>	721
Cap. X. <i>Quomodo operatur Missæ sacrificium?</i>	734
Cap. XI. <i>Utrum extet aliquod præceptum offerendi Missæ sacrificium?</i>	751
Cap. XII. <i>Quando & ubi offerendum est Missæ sacrificium?</i>	758
Cap. XIII. <i>Quid observandum circa Altare, & ejus suppellectilem?</i>	771
<i>De Calice cum Patena.</i>	774
<i>De Mappis Corporalibus, & aliis linteaminibus.</i>	776
Cap.	

INDEX CAPITUM.

Cap. XIV. *Utrum Ecclesia mysticas vestes licite instituerit?* Pag. 779

Cap. XV. *Utrum ritus sacrificii sit probandus?* 783

De Cæremoniis. 784

De Ritu, quo nonnulla submissa voce dicuntur. 789

Nil in Liturgia superfluum, nihilve erroneum. 791

Cap. XVI. *Satisfit nonnullis difficultatibus circa ritum sacrificii Missæ.* 802

Cap. XVII. *De stipendio Celebrantibus concessio.* 804



Tra-



Tractatus
DE
SACRAMEN-
TIS
IN GENERE.

CAPUT PRIMUM.

De Nomine Sacramenti, & varia ejus
acceptione.

Q. I. **U**nde Nomen Sacramenti?

R. Deducitur vel à sacrando, quia
ad res sacras initiat, seu consecrat:
vel à secreto, quia rem arcanam continet. Hinc
D. Habert Theolog. Tom. V. A quod

quod apud Latinos est Sacramentum, apud Græcos mysterium dicitur.

Q. 2. Quotuplici sensu Sacramentum sumitur?

R. 1. Apud Auctores profanos sumitur 1. Pro pignore, quod olim à litigantibus in loco sacro depositum illi peribat, qui sua cadebat causa. 2. Pro juramento, quod per rem sacram supremo scilicet, invocato Numine fieri solet: Et idcirco qui per jusjurandum rei militari nomen dabant, Sacramentarii dicebantur.

R. 2. Apud Scriptores sacros & Ecclesiasticos Sacramenti nomen accipitur

1. Pro re arcana & latente, siue sacra sit, siue non. Sic Tobiae 12. *Sacramentum Regis*, (id est, secretum Regis) *abscondere bonum est*. Et Sapientiae 2. *Nescierunt Sacramenta Dei*, id est, consilia Dei secreta. Item Ephes. 1. *Ut notum faceret nobis Sacramentum voluntatis suæ*. Atque eodem sensu dicimus mysterium Trinitatis, Incarnationis, & cætera secretiora Religionis dogmata.

2. Pro signo rei sacrae, ut Ephesiorum 5. ubi de matrimonio, *Sacramentum hoc magnum est, ego autem dico in Christo, & in Ecclesia*. Id est, unio viri & mulieris est signum sacrae unionis Christi cum Ecclesia. Unde sanctus Augustinus Epistola 5. nunc 138. ad Marcellinum monet signa, cum ad res divinas pertinent, Sacramenta appellari. Et Lib. 10. cap. 5. de Civ. *Sacramentum*, inquit, *dicitur sacrae rei signum*. Quæ verba non definitionem continent, ut nonnulli Theologi existimarunt, sed nominis interpretationem, ut advertit Hugo Victorin. Lib. 1. de Sacramentis, part. 9. cap. 2.

3. Sumitur pro signo rei, non solum sacrae, sed etiam sacrantis: *Sacramenta*, inquit sanctus Thomas

Thomas 1. 2. q. 102. art. 5. *Propriè dicuntur illa, quæ adhibebantur in Lege veteri Dei cultoribus ad quandam consecrationem.* Et S. Augustinus Lib. 15. de Civ. Dei cap. 26. docet Sacramentis credentes initiari.

Q. 3. *Quo sensu sumitur hic nomen Sacramenti?*

R. Postremo, nempe pro signo rei sacræ initiantis, seu sacrantis.

Q. 4. *Quid est signum?*

R. Definitur à S. Augustino Lib. 2. de Doctr. Christ. cap. 1. res, quæ præter speciem, quam ingerit sensibus, facit in cognitionem alterius venire; sic fumus, qui obicitur oculis, deducit nos in cognitionem ignis.

Q. 5. *Quotuplex est signum?*

R. Duplex: Naturale, quod ex natura sua significat, ut fumus, qui naturaliter ignem demonstrat: & arbitrarium, quod ex instituto solum significat; sic hedera est signum arbitrarium, quia ex solo usu hominum vinum venale significat.

Q. 6. *Quotuplex est signum arbitrarium?*

R. Quadruplex. Primum est rememorativum, quod in memoriam revocat rem præteritam, sic Agnus Paschalis apud Judæos repræsentabat egressum eorum ex Ægypto. Secundum est demonstrativum, quod exhibet rem præsentem, sed occultam: sic cibus Eucharisticus demonstrat spirituales animæ refectionem communicantis. Tertium prognosticum, quod significat rem futuram, putà gloriam æternam: hoc sensu ingressus Summi Pontificis in Sancta Sanctorum adumbrabat Ascensionem futuram Christi Domini in cælum, Hebr. 9. Quartum commonitorium, quod admonet suscipientes proprii officii: sic circumcisio

carnalis monebat Judæos desideria carnis esse refecanda.

Porro hoc quadruplici modo Baptismus significare docet Apostolus. 1. Est repræsentatio præteritæ passionis & sepulturæ Christi: *An ignoratis, (inquit, Rom. 6.) quia quicumque baptizati sumus in Christo Jesu, in morte ipsius baptizati sumus? Consepulti enim sumus cum illo per Baptismum in mortem.* 2. Exhibet nobis spirituales regenerationem & salutem, *salvos nos fecit per lavacrum regenerationis, ad Tit. 3.* 3. Vitam æternam figurat, Rom. 6. vers. 5. *Si enim complantati facti sumus similitudini mortis ejus, simul & resurrectionis erimus.* 4. Admonet baptizatum quomodo vitam instituere debeat, ibid. vers. 4. *Consepulti enim sumus cum illo per Baptismum in mortem, ut quomodo Christus surrexit à mortuis per gloriam Patris, ita & nos in novitate vitæ ambulemus?*

Q. 7. *Estne essenziale omni Sacramento, ut ista quatuor significet?*

Novatores affirmant omne Sacramentum, si-
ve novæ, si-ve veteris Legis esse signum rememo-
rativum divinæ promissionis, quam non solum in
memoriam revocat, sed etiam confirmat: unde
secundum eos Sacramenta dicenda sunt potius si-
gilla & pignora, quam signa practica; quia in eo-
rum sententia sola Fides justificat, quod confuta-
vimus Tract. de Gratia, ubi de Justificatione.
Contra hunc errorem

R. Non esse de essentiali ratione Sacramenti,
quod sit signum rememorativum; nam ordina-
tio Levitarum in veteri Lege erat verum Sacra-
mentum, cum esset signum rei sacræ initian-
tis, quamvis res præteritas in memoriam non re-
vocaret.

Q. 8. *Quid igitur Sacramentum in genere essentialiter significat?*

R. Essentialiter est signum demonstrativum gratiæ, & cujusdam sanctitatis.

Probatur; Quia Scriptura & sancti Patres constanter docent Sacramenta sanctificare, justificare, initiare, & consecrare: *Salvos nos fecit per lavacrum regenerationis*; ad Tit. 3. *Qui manducat hunc panem, vivet in æternum*; Joan. 6. *Inponebant manus super illos, & accipiebant Spiritum Sanctum*; Act. 8. *Si enim sanguis hircorum & taurorum, & cinis vitulæ aspersus inquinatos sanctificat ad emundationem carnis, quanto magis sanguis Christi, &c.* Hebr. 9. Ex quibus patet, Sacramenta esse signa alicujus sanctitatis, sive interioris, ut in nova Lege; sive exterioris & legalis, ut in veteri.

Q. 9. *Quid est sanctitas interior, quidve exterior & legalis?*

R. Sanctitas interior est ipsa gratia sanctificans, per quam anima interiorius renovatur, efficiturque justa, sancta, & Deo grata. Exterior vero seu legalis, est exterior consecratio & initiatio ad cultum divinum. Primam sanctitatem esse effectum Sacramentorum novæ Legis, posteriorem verò Sacrificium veteris, infra probabitur.

Q. 10. *Estne essenziale cuilibet Sacramento, sive novæ, sive veteris Legis, aliquam efficere Sanctitatem?*

R. Negant quidam Theologi, contendentes, Sacramentum ex sua ratione generica esse signum tantum gratiæ interioris; quod verò eam producat vel non producat, pertinere ad differentiam specificam. Sed probabilius videtur Sacramentum in genere esse signum practicum & efficax ali-

cujus sanctitatis, siue interioris, si pertineat ad novam Legem, siue exterioris, si ad veterem; adeo ut nullum sit Sacramentum, quod non producat ex se aliquam sanctitatem. Et ratio est, quia Sacrificia, cæremoniæ, & figuræ veteris Testamenti erant signa gratiæ dandæ in novo: cur autem non fuerint Sacramenta propriè dicta, alia ratio non potest afferri, nisi quod nullam sanctitatem conferrent. Ergo essentiale est cuilibet Sacramento, quod sit signum practicum alicujus sanctitatis.

Sequitur ex hac responsione, Sacramentum in genere esse univocum respectu Sacramentorum novæ & veteris Legis, utpote quæ habeant non solum idem nomen, sed etiam rationem nomine significatam planè eandem. In eo enim conveniunt quod sint signa practica sanctitatis: differunt verò, quatenus vetera producebant solam sanctitatem exteriorem & legalem, nostra verò interiorem, quæ longè est nobilior. Sic homo & brutum univocè conveniunt in ratione generica animali: differunt verò per differentias proprias & específicas, nempe per rationalitatem & irrationalitatem.

Dices: sanum est nomen analogum respectu coloris, pharmaci, & animalis; quia ratio sanitatis diversimodè illis competit: idè enim color dicitur sanus, quia sanitatem animalis significat, & pharmacum sanum, quia illam efficit: animal verò ita denominatur, quia formaliter illam continet. Ergo à pari Sacramenti nomen est analogum respectu Sacramentorum veteris Legis & novæ; illa enim significabant tantum gratiam sanctificantem, quam nostra efficiunt. Sanctitas au-
tem

tem legalis, quam producebant, erat mera figura sanctitatis interioris.

Nego paritatem; quia ex dictis Sacramenta veteris Legis præcisè non erant Sacramenta, eo quodd sanctitatem interiorem significarent; aliàs Manna figura gratiæ per Eucharistiam conferendæ, & transitus Maris rubri, signum remissionis peccatorum in Baptismo obtinendæ, dicenda essent Sacramenta. Itaque erant Sacramenta; quia directè sanctitatem legalem significabant, & conferebant. Licèt autem illa sanctitas exterior adumbraret sanctitatem interiorem, ad eam tamen unicè non referebantur, nec ab ea denominationem accipiebant; per se enim verè initiabant, & consecrabant Judæum ad cultum divinum, adeò ut Judæus denominaretur mundus & Sanctus à consecratione in se facta, non verò à sanctitate aliquando conferenda per Christi Sacramenta, sicut color dicitur sanus per ordinem ad sanitatem animalis.

Q. II. *Nonne Sacramenta veteris Legis sanctitatem interiorem significabant?*

R. Immediatè significabant sanctitatem legalem, cujus erant causa: mediatè verò sanctitatem interiorem, quatenus initiatio & consecratio exterior in Lege veteri erat signum sanctitatis interioris, quam etiam consequabatur Judæus, non quidem vi signi exterioris, sed merito suæ devotionis, & perfectæ dispositionis.

C A P U T II.

De Definitione Sacramenti in genere.

Exponemus hìc duntaxat definitionem Sacramenti

menti in genere; quia Sacramenta in specie defini non possunt, priusquam eorum differentias específicas asseruerimus contra Pseudo-Reformatos, quibuscum graves controversias habemus circa notionem Sacramenti tum in genere, tum in specie spectati.

Lutherani igitur & Calvinistæ ex præstructo principio, quo omnes eorum errores nituntur, nempe hominem sola fide justificari, hanc definitionem conficiunt, Sacramentum est externum symbolum, seu testimonium, quo Deus conscientijs nostris promissiones suas obsignat ad sustinendam fidei nostræ imbecillitatem.

Refellitur hæc definitio 1. ex Scriptura, quæ nullibi docet, Sacramenta esse mera signa, seu sigilla, & testimonia divinæ promissionis; sed expressè asserit in Lege nova sanctificare, justificare, renovare, & regenerare, ut patebit ex dicendis, ubi de efficacia Sacramentorum novæ Legis. 2. Quia Baptismus nullam in parvulis fidem actua-lem excitat, utpote qui omnis cognitionis sint expertes, ac proinde dici non potest per Baptismum sustentari in eis fidei imbecillitatem.

Q. 1. *Quomodo itaque definitur Sacramentum in genere?*

R. Rectè definitur, signum sensibile, sacrum, & permanens gratiæ, institutum à Deo ad nostram sanctificationem.

Dicitur 1. *signum*; quia ducit nos in cognitionem rei alterius, nempe gratiæ, & sanctificationis: *Sacramentum*, inquit S. Chrysostomus Hom. 7. in 1. ad Corinthios, *aliud oculis, aliud menti exhibet.*

Dicitur 2. *sensibile*, id est externum, & sensibus subiectum; quia ex S. Thoma 3. p. q. 60. art. 4.

art. 4. homo anima & corpore constans debet per res sensibiles pervenire ad cognitionem intelligibilem. *Si incorporeus esses, ita & incorporea dedisset tibi Deus dona; sed quoniam corpori anima conser-
ta est, in sensibilibus intelligibilia tibi præbet,* ait Chrysostomus Hom. 83. in Matth. Deinde Sacramentum est symbolum distinctionis, & Religionis, *in nullum autem nomen Religionis,* inquit S. Augustinus Lib. 19. contra Faustum cap. 11. *seu verum, seu falsum coagulari homines possunt, nisi aliquo signaculorum, vel Sacramentorum visibilibus consortio colliguntur.*

Dicitur 3. *sacrum*, id est, cujus usus sit actus religiosus & ad cultum Dei pertinens. Hujus conditionis defectu lignum vitæ in statu innocentiae, Israelitarum per Mare rubrum trajectio, Manna, Serpens æneus, aqua fluens de petra, non erant Sacramenta; quia licet significarent gratiam nobis per Christum conferendam, non referebantur ad cultum Dei, sed usus eorum erat merè profanus; lignum enim vitæ erat ad conservandam vitam naturalem: Serpens æneus ad curanda vulnera per serpentes ignitos inflictæ: transitus Maris rubri ad fugiendos insequentes Ægyptios. Manna ad alendum & aqua de petra ad depellendam sitim Populi Israelitici.

Dicitur 4. *permanens*; quia cùm Sacramenta sint symbola distinctionis & Religionis, tamdiu durare debent, quamdiu Religio. Hinc immolatio Isaac, illapsus Spiritus Sancti sub forma Columbæ in Baptismo Christi, & sub forma linguarum ignearum die Pentecostes, insufflatio Christi in Apostolos, Joan. 20. & lotio pedum, Joan. 13. non fuerunt vera Sacramenta; quia non erant signa permanentia.

Dices 1. in lotionem pedum à Christo Domino celebrata reperitur quicquid pertinet ad rationem veri & propriè dicti Sacramenti. In ea siquidem cernitur ritus externus à Christo Domino institutus, promissionem habens gratiæ; *si non laveris te*, inquit Christus, *non habebis partem mecum*; & præceptum observandi illam cæremoniam: *exemplum enim dedi vobis*, inquit, *ut quemadmodum ego feci vobis, ita & vos faciatis*.

Confirmatur ex S. Bernardo, qui sermone 1. de Cæna Domini annumerat lotionem pedum inter novæ Legis Sacramenta: *Vis autem nosse*, inquit, *quia pro Sacramento illud est, non pro solo exemplo factum, illud attendo, quod Petro dictum est, si non laveris te, non habebis partem mecum. Aliquid igitur latet, quod necessarium est ad salutem . . . unde sciinus, quia ad diluenda peccata, quæ non sunt ad mortem, & à quibus plenè cavere non possumus ante mortem, ablutio ista pertineat? Ex eo planè, &c.* similia habent auctor Tractatus de ablutione pedum inter opera S. Cypriani, & S. Ambrosius Libri de initiandis cap. 6. & Libri 3. de Sacramentis c. 1. Ergo.

Nego antecedens: in illo enim humilitatis exemplo Christus Dominus nobis solum commendavit charitatis & humilitatis officia erga fratres. Minæ Petro intentatæ spectant ejus inobedientiam, nec gratiæ promissionem ad salutem consequendam continent, ut patet vel ex eo quòd Christus agnoscat Petrum esse mundum totum, ac proinde non damnandum defectu lotionis, sed debitò obedientiæ. Deinde per lotionem pedum S. Bernardus loco cit. & alii communiter intelligunt peccatorum venialium remissionem,

nem, quæ certè non ita est necessaria, ut sine ea Justus privandus sit regno cœlorum.

S. Ambrosius (tamen auctor est Librorum de Sacramentis) scribit quidem illam ablutionem non esse tantum ad humilitatis exemplum, sed etiam ad mysterii significationem. Verum facile ex illius contextu colligitur hæc verba non intelligenda de Sacramento propriè dicto, sed de cæremonia Ecclesiastica numeranda inter sacramentalia, quæ effectum spirituales habent, ut dicitur cap. ultimo hujus Tractatus; 1. quia illa cæremonia observabatur erga Catechumenos ante Baptismum, quo tempore non erant capaces Sacramenti propriè dicti, 2. quia auctor hujus Libri agnoscit Ecclesiam Romanam caput & matrem omnium Ecclesiarum illam cæremoniam omittere, nec propterea reprehendendam existimat. Addo hunc Ecclesiæ Romanæ morem, teste sancto Augustino tract. 58. in Joan. multas Ecclesias fuisse secutas: imò Can. 48. Concilii Eliberitani, initio quarti sæculi, prohibitum fuisse lavare pedes Neophytorum. Ex quibus patet, mandatum Christi Domini non esse intelligendum de illa cæremonia, sed de officiis charitatis, & humilitatis, ut notat sanctus Augustinus cit. tract. 58. in Joan. Et revera mos erat in Oriente hospitum lavare pedes, ut legitur Gen. 18. & 19. & 1. ad Tim. 5. ubi Apostolus vult examinandum antequam eligatur vidua, *si Sanctorum pedes lavit*. Denique, secundum interpretationem Sanctorum Patrum, lavamus pedes proximi, cum ejus imperfectiones patienter sustinemus, & ea, quæ in nos delinquit, facile condonamus, & sic corruunt objectiones ex sancto Bernardo, & ex aliis Patribus petita.

Con-

Confirmatur solutio auctoritate universalis Ecclesiæ, quæ optima Scripturæ interpres, verba Christi Domini de officio charitatis tantum intellexit, & à pluribus sæculis lotionem pedum ad litteram non servat.

Dices 2. Baptismus Joannis erat Sacramentum : atqui Baptismus Joannis non fuit signum permanens : ergo ad rationem Sacramenti non requiritur ut sit signum permanens.

Nego maj. Baptismus enim Joannis erat nuda cæremonia, & exterior professio pœnitentiæ. *Ego quidem*, inquit Matth. 3. *baptizo vos in aqua in pœnitentiam*, id est, in signum quo profitemini vos serio pœnitere, & præparari ad recipiendum eum, qui post me venturus est.

Dicitur 5. *interioris gratiæ* ; qua essentialè est omni Sacramento significare gratiam interiorem, sive immediatè, ut nova, sive mediatè, ut vetera Sacramenta. Hujus conditionis defectu imagines Sacramenta non sunt, cum gratiam non significant.

Dicitur 6. *institutum* : quia Sacramentum est signum arbitrarium, nec naturaliter significat, sed ex instituto ; neque enim aqua in Baptismo significat ex natura sua purgationem animæ à peccatis, neque species panis in Eucharistia refectiorem animæ. Advertit tamen S. Augustinus Epist. 98. aliàs 23. Sacramentum habere aliquam similitudinem cum effectu, quem producit ; *si enim non haberent*, inquit, *omnino Sacramenta non essent*.

Dicitur 7. *institutum à Deo*, sive immediatè, sive mediatè ; quia solus Deus potest Sacramentis virtutem dare conferendi gratiam : qua de causa
 tonsura

tonfura clericalis, aqua benedicta, & cæteræ cæremoniæ, quæ sunt humanæ institutionis, non sunt vera Sacramenta.

Dicitur denique, *ad nostram sanctificationem*; constat enim ex dictis capite præcedenti vim productivam alicujus sanctitatis, sive internæ, sive externæ esse essentialem omnibus Sacramentis, in quocumque hominum statu extiterint. Hinc sacrificium non est Sacramentum; quia primariò non ordinatur ad sanctificationem hominis, sed ad supremum Dei dominium agnoscendum.

CAPUT III.

De Existentia Sacramentorum in diversis hominum statibus.

Q. 1. *Quotuplex numeratur hominum status?*

R. Quadruplex. Primus dicitur innocentiae, qui duravit à creatione primi hominis, usque ad ejus lapsum. Secundus naturæ, qui cœpit à lapsu primi hominis, usque ad Legem scriptam sub Moyse. Dicitur autem naturæ, non quòd homines solo naturæ ductu regerentur; certum est enim neminem posse rectè vivere, & salutem consequi sine gratiæ Salvatoris auxilio; sed idcirco dicitur status naturæ, quia homines per illud tempus sine Legis scriptæ adminiculo, sed sola Dei inspiratione regebantur. Tertius est status Legis scriptæ, qui à Lege per Moysen data, usque ad Christum Dominum, Legis Evangelicæ Auctorem duravit. Quartus est status Legis Evangelicæ, in quo vivimus, qui permanebit usque ad consummationem sæculi.

Q. 2.

Q. 2. *Fueruntne Sacramenta in statu innocentiae?*

R. Non fuerunt in statu innocentiae, colligiturque ex silentio Scripturae & Traditionis, quae nusquam meminerunt alicujus Sacramenti in illo statu, quod signum evidens est nullum reverà existisse. Deinde cum homo in statu innocentiae soli Deo perfectè subjiceretur, congruum erat ut gratiam immediatè ab illo acciperet; pœna enim peccati est & exercitatio necessaria ad domandam hominis superbiam, quòd nunc rebus inferioribus subdatur, v. g. aquis baptismalibus, si sanctificationem velit consequi.

Dices 1. Matrimonium Adami cum Eva institutum fuit in statu innocentiae; atqui matrimonium illud vocatur ab Apostolo, Eph. 5. *magnum Sacramentum*. Unde S. Aug. Lib. de Nuptiis & Concupiscentia, docet tria bona matrimonii, scilicet prolem, fidem, & Sacramentum futura fuisse in Paradiso; Ergo.

Distinguo majorem, institutum fuit matrimonium in Paradiso in usum naturæ, hoc est, ad propagandos homines, Concedo: institutum fuit in ratione Sacramenti, subdistinguo: Sacramenti improprie dicti, quatenus erat signum rei sacrae figuratae, nempe conjunctionis Christi cum Ecclesia, Concedo maj. Sacramenti proprie dicti, hoc est sacrantis suscipientes, Nego maj. Neque enim Adamus & Eva sanctificati, aut initiati sunt ad cultum divinum per illam conjunctionem.

Similiter distinguendæ sunt minor, & auctoritates in ejus confirmationem adductæ; quam Apostolus loco citato non loquitur de matrimonio Adami, sed de matrimonio, quod celebratur in Lege Evangelica, ut patet ex ejus
con-

contextu. 1. Enim indicat Apostolus aliquod matrimonium præsens, *Sacramentum hoc*, inquit, quod non cadit in matrimonium Adami jamdudum præteritum. 2. Addit *magnum est . . . in Christo, & in Ecclesia*; quod manifestè denotat Sacramentum, quod tempore Apostoli celebrabatur.

In eodem sensu latiori & minùs proprio, lignum vitæ, & somnus Adami dicuntur Sacramenta, propter mysticas significationes, nempe lignum vitæ figurabat sapientiam, de qua Prov. 3. dicitur: *Lignum vitæ est his, qui apprehenderint eam, & qui tenuerit eam, beatus.* Sed à Deo producta erat hæc arbor ad conservandam vitam naturalem. Item somnus Adami, ad mentem sancti Augustini, adumbrabat mortem Christi in cruce pendentis. *Dormiente Adamo, fit Eva de latere: mortuo Christo, lancea perforatur latus, ut supereffluant Sacramenta, quibus formatur Ecclesia.*

Dices 2. naturale est homini ex rebus sensibilibus ad invisibiles assurgere. Ergo Sacramenta conveniebant statui innocentiae.

Distinguo anteced. ex rebus sensibilibus, quæ naturaliter deducunt in cognitionem spirituum, sicut existentia creaturarum demonstrat existentiam Dei, Conc. quæ non ex natura sua, sed ex solo Dei instituto significante res spirituales, Nego anteced.

Dices 3. si durasset status innocentiae, cæteri homines, æquè ac Adamus, peccare potuissent: ergo præsto eis esse debuit aliquod remedium.

Respondeo cum hac de re nihil sit revelatum, quis enim cognovit sensum Domini? Rom. 11. fortè Adamo perseverante, posterius ejus fuissent in gratia

tia confirmati. Fortè si aliqui ex eis peccassent, absque misericordia, peccati sui pœnas, sicut Angeli, luissent. Denique supposito quòd Deus peccantibus remedia præparasset, illa non pertinuis-
sent ad statum innocentiae, à quo illi supponun-
tur excidisse.

Dices 4. fuisset Religio in statu innocentiae : atqui ex sancto Augustino homines in nullum no-
men Religionis coadunari possunt sine aliquo si-
gnaculorum visibilium consortio : Ergo.

Concessa majore, respondeo ad min. coadu-
nandos homines in illo statu per Sacrificia, per
quæ homo non creaturis inferioribus, sed soli
Deo subjicitur.

Q. 3. *Fueruntne Sacramenta in statu naturæ?*

R. 1. Neque ex Scriptura, neque ex Tradi-
tione quidquam in eam rem discimus. Circum-
cisio quidem instituta fuit exeunte statu naturæ,
nempe tempore Abrahami; sed non tam pertinet
ad statum Legis naturæ, quàm ad statum Legis
scriptæ, quæ tunc temporis concipiebatur; erat
enim Circumcisio sollemnis professio Legis Mosai-
cæ, juxta illud Apostoli Gal. 5. *Testificor . . . om-
ni homini circumcidenti se, quoniam debitor est universæ
Legis faciendæ.*

R. 2. Ex S. Augustino Lib. 5. contra Julian.
c. 11. *Non est credendum ante circumcisionem famulos
Dei (quandoquidem eis inerat mediatoris fides in carne-
venturi) nullo Sacramento ejus opitulatos parvulis suis,
quavis, quid illud esset, aliqua necessaria causa Scriptu-
ra latere voluerit.* S. Augustinum secuti sunt au-
ctor de Vocatione Gentium Lib. 2. cap. 23. San-
ctus Gregorius Lib. 3. Moral. cap. 3. Venerabilis
Beda Lib. 1. in Luc. cap. 8. S. Bernardus Epist. 77.
Innocen-

Innocentius III. capit. *Majores*. S. Thomas in 4. dist. 1. q. 1. art. 2. quæstiunc. 3. ad 2. & alii communiter Theologi.

Q. 4. *Quale fuit illud remedium pro parvulis?*

R. Fuit professio Fidei in Christum venturum, aliquo signo sensibili expressa, per quam parvuli Deo à parentibus, vel ab aliis offerebantur & consecrabantur. *Superioribus temporibus*, inquit S. August. Lib. 2. de Nuptiis & Concupisc. c. 11. *Omnino latuit Sacramentum justificationis ex fide; eadem tamen fides mediatoris saluos justos faciebat antiquos, pusillos cum magnis.*

Dices: ex S. Gregorio Lib. 4. *Moralium* cap. 2. *Quod apud nos valet aqua baptismatis, hoc egit apud veteres, vel pro parvulis sola fides, vel pro majoribus virtus sacrificii.* Eadem habet S. Thomas 3. p. q. 70. art. 4. ad 2. *Non requirebatur*, inquit, *aliquod signum protestativum hujus fidei.* Ergo professio fidei non exprimebatur aliquo signo sensibili.

Distinguo antecedens, sola fides, hoc est solus fidei actus exterior, Concedo: solus actus fidei interior, Nego antecedens; nam cum per illam fidem parvuli initiarentur ad verum Dei cultum, & coadunarentur in unum nomen Religionis, professio illa debebat exprimi aliquo signo sensibili. Sed ad mentem S. Gregorii & S. Thomæ, hoc discrimen erat inter fidei professionem pro parvulis, & professionem, quam adulti pro se emittebant, quod ad professionem illam Adulti cæremonias, putà sacrificia adhiberent, cum professio pro parvulis nuda esset, & nullis cæremoniis vestita.

Q. 5. *Quenam erat illa fides, an charitate formata & perfecta, an informis, qualis reperitur in peccatoribus?*

D. Habert Theolog. Tom. V.

B

R. 1.

R. 1. Ad mundandam maculam peccati, five originalis, five actualis requirebatur in Adultis fides charitate formata, adeoque professio illa non operabatur in eis, nisi ex opere operantis. Quia privilegium est Sacramentorum novæ Legis, ut per se & virtute propria, seu, ut loquuntur Theologi, ex opere operato justificent, & sanctificent.

Ergo, inquires, fides illa non erat verum Sacramentum, respectu adultorum, cum in eis nihil per se efficeret; essentialia verò sit ex dictis cuilibet Sacramento, ut sit signum practicum sanctitatis.

Nego sequelam; operabatur enim per se sanctitatem legalem, consecrabatque fidelem ad verum Dei cultum.

R. 2. Ad mundandam maculam peccati originalis in parvulis, sufficiebat actus fidei informis; quia ex S. Thoma in 4. dist. 1. q. 2. art. 6. ad 2. *Fides parentum non justificabat infantem, in quantum erat actus personæ, sed quatenus respiciebat suum objectum, nempe Christum Dominum, quod erat medicina totius naturæ, in quo habebat quandam similitudinem cum Sacramentis nostris, in quantum justificabat ex objecto quasi ex opere operato, non autem ex opere operantis.*

Q. 6. *Extiteruntne Sacramenta in Lege scripta?*

R. Dubium non est quin extiterint; videmus enim in veteri Testamento multa signa sensibilia divinitus instituta ad sanctificationem populi Israelitici, nihilque frequentius in Conciliis, & sanctorum Patrum scriptis, quàm comparationes Sacramentorum veteris Legis cum Sacramentis nostris.

Q. 7. *Quot extiterunt Sacramenta in veteri Lege?*

R. Plura

R. Plura extitisse docet S. Augustinus Lib. 19. contra Faust. cap. 13. *Prima Sacramenta*, inquit, *quæ observabantur & celebrabantur ex Lege, prænuntiativa erant Christi venturi, quæ cum suo adventu Christus implevisset, ablata sunt . . . & alia sunt instituta virtute majora, utilitate meliora, actu facilia, numero pauciora.* Et reverà præter Circumcisionem, Agnum Paschalem, & consecrationes tum Sacerdotum, tum Levitarum, quamplurima in toto Libro Levitici recensentur Sacrificia, quæ erant ut plurimum Sacramenta, utpotè, quæ non solum essent instituta ad recognoscendum supremum Dei dominium, sub quo respectu erant Sacrificia, sed etiam ad expiandum & sanctificandum populum, qua ratione erant Sacramenta, ut patet ex definitione Sacramenti in genere. At cum de singulis Sacrificiis judicari non possit, an fuerint instituta, etiam ad sanctificationem Hebræorum, certò definiri non potest quot fuerint Sacramenta Legis scriptæ.

Nullus revocat in dubium, an extent Sacramenta in nova Lege, sed gravis controversia nobis est cum Novatoribus. 1. Circa numerum Sacramentorum, de quo dicemus capite penultimo hujus Tractatus. 2. Circa virtutem, & efficaciam Sacramentorum, de qua nunc dicendum.

CAPUT IV.

De Differentia Sacramentorum veteris & novæ Legis.

1. I. *Differuntne Sacramenta veteris, & novæ Legis?*

B 2

R. I.

R. I. Negari non potest differre saltem ritu externo ; nam Circumcisio & Agnus Paschalis alio ritu peragebantur in Lege veteri , quàm Baptismus & Eucharistia in Lege Evangelica.

Sed gravis est controversia Catholicos inter & Heterodoxos, utrùm virtute , & efficacia differant. Hi ex falso suo principio , nempe *solum fidem justificare* , omnibus Sacramentis tum novæ , tum antiquæ Legis vim sanctificandi adimunt , nullamque eis efficaciam concedunt , nisi ad excitandam , & sustinendam fidem suscipientis , cum hoc solo discrimine , quòd nostra Sacramenta aptiora sint ad fidem roborandam, utpotè signa expressiora : *Sophistica scholæ*, inquit Calvinus Lib. 4. Instit. cap. 4. §. 14. & 17. *tradiderunt Sacramenta novæ Legis conferre gratiam , modo non ponamus obicem peccati mortalis : quæ sententia dici non potest , quàm sit exitiosa Certè diabolica est. Quamobrem fixum maneat , non esse alias Sacramentorum , quàm Verbi Dei , partes.*

Nihilominus ut Catholicis imperitis fucum faciant , & Sacræ Scripturæ , sanctorumque Patrum textus eludant , magnificis verbis nostra Sacramenta præ veteribus extollunt ; quamvis de iis humilia admodum sentiant. 1. Inquiunt, nostra facilia sunt. 2. Christum Dominum habent Auctorem, eumque claritus annuntiant. 3. Celebrantur alio ritu , & quidem efficaciori , etsi non ad producendam gratiam, tamen ad excitandam & ob signandam fidem promissionum.

Verùm hæc discrimina spectant tantum circumstantias accidentales , & ritum exteriorem, minimèque cadunt in ipsam naturam , & essentiam Sacramentorum nostrorum. Quid enim refert

fert ad essentiam Sacramenti, quodd sit à Christo auctore, si Christus majorem ei non indidit virtutem? Quid interest parvuli, quodd Baptismus significet Christum non jam venturum, ut circumcisio, sed de facto venisse, aut celebretur ritu significantiori, & magis idoneo ad excitandam fidem; cum parvulus ista non percipiat? Pura fictio est quorundam Lutheranorum, parvulum in administratione Baptismi elicere actum fidei: gemitus & clamores, quos emittit dum baptizatur, si eorum ratio haberetur, essent signa ipsum abnuere fidem, & gratiam Baptismi. Quod de parvulis asserimus, idem dicendum de ægris adultis, quibus Concilium Carthag. IV. Can. 76. an. 368. præcipit dandam absolutioem, & Eucharistiam, etiamsi usum rationis amiserint. 3. Denique si Sacramenta nostra eo solum sunt efficaciora veteribus, quodd perficiantur ritu aptiori ad excitandam fidem, minoris sunt virtutis, quàm lectio Evangelii: tum quia promissiones divinæ in illo clariùs exprimuntur, tum quia in mente adversariorum Sacramenta testimonium accipiunt à Verbo Dei scripto. His & similibus rationibus permotus Ludovicus le Blanc, Verbi Divini Pseudo-Minister deseruit in hac parte suum Prophetam Calvinum, agnovitque in suis thesibus Sedannensibus, Sacramenta novæ Legis esse per se causam instrumentalem sanctitatis. Quare

R. 2. De fide est, Sacramenta novæ Legis differre à veteribus non solum externo ritu, sed continere gratiam, quam significant, eamque conferre ex opere operato non ponentibus obicem. Ita enim definiit Concilium Trid. Sess. 7. Canonibus sequentibus.

B



Can. 2.

Can. 2. *Si quis dixerit ea ipsa novæ Legis Sacramenta à Sacramentis antiquæ Legis non differre, nisi quia cæremoniæ sunt aliæ, & alii ritus externi; anathema sit.*

Can. 6. *Si quis dixerit Sacramenta novæ Legis non continere gratiam, quam significant, aut gratiam ipsam non ponentibus obicem non conferre; quasi signa tantum externa sint acceptæ per fidem gratiæ, vel justitiæ, & notæ quædam Christianæ professionis, quibus apud homines discernuntur fideles ab infidelibus; anathema sit.*

Can. 8. *Si quis dixerit per ipsa novæ Legis Sacramenta ex opere operato non conferri gratiam, sed solam fidem divinæ promissionis sufficere; anathema sit.*

Q. 2. *Quid est Sacramentum justificare ex opere operato?*

R. Sensus est, Sacramentum ipsum, seu applicationem signi exterioris non quidem naturaliter; & tanquam causam principalem, physicè (ut falsò nobis imponunt Novatores) sed ex instituto & meritis Christi per se, tanquam per causam instrumentalem, habere vim & efficaciam ad producendam gratiam sive moraliter, sive physicè, in suscipiente disposito tamen, si sit adultus.

Nec movere nos debet quod obijciunt Novatores, illum loquendi modum esse barbarum, & contra Grammaticæ regulas; Ecclesia quippe illas plerumque spernit, non curans quanta eloquentia, sed quanta evidentia doceat; nam, ut ait S. Augustinus, *quid potest clavis aurea, si aperire quod volumus non potest? aut quid obest lignea, si potest?* Esto modus ille loquendi sit novus, & à Scholasticis inventus, meritò tamen Ecclesia illum consecravit, cum sublata omni æquivocatione tam clarè distinguat virtutem Sacramenti à fide susipientis.

Dixi

Dixi 1. *sive moraliter, sive physice*; quia mera est Scholæ quæstio, an Sacramenta novæ Legis moraliter, aut physice producant gratiam, quam neque Innocentius Tertius in Concilio Lateranensi IV. neque Eugenius Quartus in decreto pro Armenis, neque Concilium Tridentinum ullatenus attigerunt.

Dixi 2. *disposito*; Quemadmodum enim ignis v. g. quamvis ex se, naturaque sua vim habeat comburendi, nihilominus prærequirit dispositiones in ligno, sine quibus non comburet; ita & Sacramenta novæ Legis, licet per se efficacia, non operantur tamen, nisi in fuscipiente adsint fides, pietas, & cæteræ dispositiones prærequisitæ. Quod tam aperte declarat Concilium Tridentinum, ut mirari liceat frontem Novatorum, calumniantium Ecclesiam Romanam salutem polliceri fuscipientibus Sacramenta, etiamsi fide, & pietate careant.

Dixi 3. *Si sit adultus*; Quia Sacramenta novæ Legis nullam in infantibus prærequirunt dispositionem; si enim voluntas primi parentis potuit eis nocere, cum nondum usum haberent propriæ voluntatis, convenientissimum fuit pietatem & sollicitudinem sanctæ matris Ecclesiæ prodesse eis etiam non cooperantibus.

Q. 3. *Quis sensus hujus propositionis, Sacramentum producit gratiam ex opere operantis?*

R. Sensus est, Sacramentum ex se non habere virtutem & efficaciam; sed totum fructum, qui à fuscipiente percipitur, tribuendum esse ejus fidei, & devotioni.

Q. 4. *Quid Concilium Tridentinum in laudatis Canonibus proponit fide credendum?*

R. 1. Fide credendum præcisè docet, Sacramenta novæ Legis 1. differre plusquam ritu externo à Sacramentis veteribus. 2. Gratiam continere, eamque conferre ex opere operato non ponentibus obicem.

R. 2. Concilium non attingere quæstionem, utrùm Sacramenta veteris Legis producerent, vel non producerent gratiam, an ex opere operantis, aut ex opere operato, ac proinde intactam relinquere sententiam tum Magistri Sententiarum scribentis Libro 4. distinct. 1. Sacramenta veteris Legis (excepta Circumcisione, quam putat datam in remedium peccati originalis) à Deo imposita fuisse in servitutem, non in justificationem: tum Hugonis Victorini Lib. 1. de Sacramentis part. 8. & sancti Bonaventuræ in quartum dist. 1. docentium instituta fuisse illa Sacramenta ad significationem futurorum, & efficiendam justitiam exteriorem; per accidens autem & secundariò, nempe ratione fidei justificasse, etiam ex opere operantis.

R. 3. Ex iis Canonibus facilè colligi mentem Concilii fuisse, Sacramenta vetera non produxisse gratiam ex opere operato. Etenim Can. 2. declarat nostra Sacramenta differre à veteribus non solo ritu externo: differunt ergo virtute, & efficacia. Atqui non differrent, si vetera, sicuti & nova, conferebant gratiam ex opere operato; ergo ad mentem Concilii, Sacramenta veteris Legis non habent per se, & ex opere operato vim justificandi, sed solum justificarunt ex opere operantis. Et hæc est sententia sancti Thomæ 3. part. qu. 62. art. 6. & omnium ferè Theologorum, quibus adhærendum est; maximè cum eam doceat

Cate-

Catechismus Rom. part. 2. num. 27. & Eugenius IV. illam credendam Armenis proposuerit in suo decreto post Concilium Florentinum ann. 1439. tanquam doctrinam Ecclesiæ Romanæ.

Q. 5. *Quomodo probatur Sacramenta veteris Legis non produxisse ex opere operato sanctitatem interiorem?*

R. Probatur 1. ex Scriptura. Apostolus quippe in Epistola ad Galatas, & ad Hebræos disertè docet Sacramenta, & sacrificia veteris Legis fuisse elementa egena & vacua, nec potuisse auferre peccata, solumque valuisse ad emundationem carnis, id est, ad munditiem legalem, denique fuisse reprobata ob suam inutilitatem. Verba ejus sunt cap. 4. vers. 9. Epist. ad Galat. *Quomodo convertimini iterum ad infirma, & egena elementa, quibus denuò servire vultis?* Cap. 7. vers. 18. ad Hebr. *Reprobatio quidem sit præcedentis mandati, propter infirmitatem ejus, & inutilitatem.* Porro si tota Lex fuit infirma, & inutilis ad mundandam conscientiam, etiam antequam abrogaretur per Evangelii prædicationem, à fortiori sacrificia, & Sacramenta, quæ in Lege continebantur tanquam pars in toto. Et cap. 9. vers. 9. ejusdem Epistolæ expressis verbis tradit vetera Sacramenta produxisse sanctitatem exteriorem, non verò interiorem, *juxta quam (Legem) munera & hostiæ offeruntur, quæ non possunt juxta conscientiam perfectum facere servientem, solummodo in cibus, & in potibus, & variis baptismatibus, & justitiis carnis, usque ad tempus correctionis impositis, ubi Apostolus manifestè loquitur de Lege ante, non verò post ejus abrogationem.* Et vers. 13. ejusdem capituli, *si enim, inquit, sanguis bircorum, & taurorum, & cinis vitulæ aspersus inquinatos sanctificat ad emundationem carnis* (en san-

Etas legalis) *quantò magis sanguis Christi, qui per Spiritum Sanctum semetipsum obtulit immaculatum Deo, emundabit conscientiam nostram ab operibus mortuis?*

Probatur 2. ex Patribus.

S. Basilius Lib. de Spiritu Sancto cap. 14. scribit tantam esse differentiam inter Sacramenta vetera & nostra, quanta inter somnia, & veritatem, & inter umbras, vel imagines, & ea, quæ vera sunt.

Sanctus Chrysostomus Oratione de Baptismo Christi: *Judaica, inquit, expiatio nequaquam à peccatis liberabat, sed à corporis sordibus tantum; nostra verò talis non est; nam & à peccatis liberat, & animam abstergit, & spiritus gratiam largitur.*

S. Augustinus in Psalm. 73. *Sacramenta novi Testamenti, inquit, dant salutem; Sacramenta veteris promiserunt Salvatorem.* Et quæst. 25. in Lib. Num. *Si per se attendantur Sacramenta vetera, nullo pacto possunt mederi; si autem res ipsæ, quarum hæc Sacramenta sunt, inquirantur, in iis inveniri poterit curatio peccatorum.*

Q. 6. *Unde colligitur Sacramenta veteris Legis produxisse gratiam interioriorem ex opere operantis?*

R. Colligitur 1. ex Scriptura, Gen. 4. vers. 1. ubi sic habetur: *Respexit Dominus ad Abel, & ad munera ejus, ad Cain verò & ad munera illius non respexit: quæ verba expendens Apostolus cap. 11. ad Hebr. vers. 4. sic scribit: Fide plurimam hostiam Abel, quàm Cain, obtulit Deo, per quam testimonium consecutus est esse justum: ergo vetera sacrificia justificabant per fidem offerentium: Pro peccatis, inquit S. Thomas 1. 2. qu. 103. art. 2. Offerebantur sacrificia quædam in veteri Lege, non quia ipsa*

ipsa sacrificia à peccato mundarent ; sed quia erant quædam protestatio fidei , quæ à peccato mundat. Item 2. Machab. cap. 12. Judas misit Jerosolymam offerri pro peccatis mortuorum sacrificium.

Colligitur 2. ratione Theologica : tunc actus religiosi Deo grati sunt , & meritorii gratiæ , quando fide & charitate exercentur : atqui offerre sacrificium & recipere Sacramentum sunt actus religiosi à Deo in Lege præscripti : Ergo cum fide & charitate exercebantur , Deo grati erant & apud illum meritorii gratiæ , quam significabant , & promittebant. Hinc Levitici 1. vers. 17. dicitur : *Holocaustum est , & oblatio suavissimi odoris Domino.* Et Rom. 2. vers. 13. *Factores Legis justificabuntur.*

Q. 7. *Quomodo probatur Sacramenta novæ Legis producere sanctitatem interiorem ex opere operato ?*

R. Probatur 1. generatim ex allatis textibus tum Scripturæ , tum sanctorum Patrum , quibus demonstravimus Sacramenta vetera fuisse egena & vacua , nostra verò plena & efficacia : illa extitisse figuram & umbram , ista esse corpus , seu rem ipsam & veritatem : priora promississe Salvatorem , posteriora dare salutem.

Probatur 2. speciatim de singulis Sacramentis.

De Baptismo habetur Joan. 3. *Nisi quis renatus fuerit ex aqua , & Spiritu Sancto , non potest introire in regnum Dei.* Hic per Baptismum datur Spiritus & nova nativitas , quod S. Joannes Baptista negat de suo Baptismo : *Ego quidem , inquit Matth. 3. baptizo vos in aqua in pœnitentiam . . . ipse (Christus) vos baptizabit in Spiritu Sancto.* Marci 1. Baptismus Joannis dicitur Baptismus *pœnitentiæ in remissionem peccatorum* , ubi remissio peccatorum non tribuitur immedia-

immediatè Baptismo Joannis, sed pœnitentiæ; ut moneamur illud baptisma non remisisse peccata nisi ex opere operantis; at non ita de Baptismo Christi, nam ex Apostolo cap. 3. ad Titum, *salvos nos fecit per lavacrum regenerationis.*

De Confirmatione legimus Actuum 8. *Imponebant (Apostoli) manus super illos, & accipiebant Spiritum Sanctum.*

De Eucharistia Joannis 6. *Caro enim mea verè est cibus . . . qui manducat meam carnem, & bibit meum sanguinem . . . vivet in æternum.*

De Sacramento pœnitentiæ Joannis 20. *Accipite Spiritum Sanctum, quorum remiseritis peccata, remittuntur eis, & quorum retinueritis, retenta sunt.*

De extrema Unctione Jacobi 5. *Si in peccatis sit (infirmus) remittentur ei.*

De Ordine 2. ad Tim. 1. *Admoneo te, ut resuscites gratiam Dei, quæ est in te per impositionem manuum mearum.*

De Matrimonio expressè quidem non legitur in Scriptura quòd gratiam conferat, sed colligitur tum ex cap. 5. Ephes. ubi dicitur magnum Sacramentum; tum ex Traditione, ut suo loco exponetur.

Nec dicant adversarii hæc dici de Sacramentis, quatenus ritus exterior excitat fidem, quæ immediatè remittit peccata. Namque 1. ex ipsis non licet addere Verbo Divino, maximè quando additio non tam est explicatio, quàm corruptio Scripturæ: textus autem allati nihil continent de fide promissionum, sed totam efficaciam tribuunt ritui exteriori. 2. Primis sæculis, quibus concedunt adversarii Verbum Dei fuisse purè prædicatum, Ecclesia ministrabat parvulis Baptismum

& Eucharistiam, & adultis decumbentibus, etiamsi usum rationis amisissent, ut constat ex Conc. IV. Carthag. cit. cap. 4. nec S. Jacobus, dum præscribit ungendos infirmos in remissionem peccatorum, requirit ut mente sani sint. Denique primis illis temporibus Ecclesia admisit Baptismum, Ordinationes, & alia Sacramenta ab hæreticis collata, qui sana fide carebant: ergo vel his solis exemplis constat Ecclesiam primis sæculis docuisse Sacramenta Evangelica per se immediatè operari.

Solvuntur Objectiones.

Objicies 1. Scripturæ eodem prorsus modo loquuntur de Sacramentis antiquis ac de nostris: ergo par in utrisque virtus. Probatur anteced. 1. sicut Jacobi 5. de extrema Unctione dicitur: *Orent (Presbyteri) super eum & oratio fidei salvabit infirmum*; sic legitur Levit. 4. & 5. de sacrificiis, *rogabitque pro eo Sacerdos & dimittetur ei*: & Hebræor. 5. *Omnis namque Pontifex ex hominibus assumptus ut offerat dona, & sacrificia pro peccatis*. 2. Actuum 8. refertur de Confirmatione, quòd per impositionem manuum Fideles accipiebant Spiritum Sanctum; & de Josue similiter habetur Deuteron. cap. ult. *repletus est Spiritu sapientiæ; quia Moyses posuit super eum manus suas*. Item de Saule primo Regum cap. 10. legitur, mutatum esse in virum alium virtute unctionis per Samuelem ministratæ.

Distinguo anteced. Eodem modo loquuntur absolutè & universaliter, Nego antec. nullibi enim legitur in Scriptura de Sacramentis nostris, sicut

sicut de veteribus, quòd sint egena, vacua, infirma, & inutilia elementa: Eodem modo loquuntur aliquando, subdistinguo, respectu munditiæ legalis, quam conferebant ex opere operato, Conc. Respectu munditiæ interioris, & gratiæ sanctificantis, Nego anteced. & consequent.

Confirmatur responsio 1. ex Apostolo, qui cap. 9. ad Hebræos seipsum explicat, & textum Levitici in objectione citatum exponit, nempe Pontificis orationem valuisse tantum ad eluenda peccata legalia, seu immunditias legales; *Si enim sanguis hircorum*, inquit, *inquinatos sanctificat ad emundationem carnis*, &c. de peccatis verò propriè dictis subdit cap. 10. *impossibile enim est sanguine taurorum & hircorum auferri peccata.*

Confirmatur 2. ex S. Augustino, qui qu. 25. in Librum Numerorum notat sacrificia vetera offerri solita tantum pro peccatis ignorantiae, nulla vero pro peccatis superbiæ, seu malitiæ: *quod genus peccati*, inquit, *non dixit Moyses ullo genere sacrificii purgare oportere, tanquam insanabile judicans illa duntaxat curatione, quæ per sacrificia gerebatur.*

Ad secundum & tertium textum in confirmationem prolatos respondeo hujusmodi textus non esse ad rem; nec enim manus impositio facta à Moyse super Josue, nec unctio Saulis per Samuelem collata erant Sacramenta; cum non essent ritus sacri & permanentes, sed quædam cæremoniæ transeuntes, quæ pertinebant ad gratiam miraculorum non infrequentem apud Israelitas.

Instabis: Scriptura disertè tradit hominem justificari per fidem, *arbitramur enim*, inquit Apostolus, Rom. 3. vers. 28. *justificari hominem per fidem sine operibus*

operibus Legis : ergo necesse est dicere hominem non justificari per Sacramenta, nisi velimus Apostolo contradicere.

Distinguo anteced. Per fidem, tanquam per dispositionem ad Sacramenta cum fructu percipienda, Conc. Per fidem simpliciter, quæ excludat Sacramenta, Nego anteced. Scribit enim Apost. cap. 3. ad Titum : *Salvos nos fecit per lavacrum regenerationis.*

Objicies 2. Apostol. 1. Cor. 1. monens Christianos, ne neglectis bonis operibus, nimium confidant in Baptismo, & in Eucharistia, proponit exemplum Judæorum, qui perierunt, licet eandem escam spiritualement nobiscum manducaverint, & eundem potum spiritualement biberint, *bibebant autem*, inquit, *de spiritali consequente eos petra* ; *petra autem erat Christus.* Unde S. Augustinus in Ps. 77. *Idem in mysterio Judæorum cibus & potus, qui noster.* Ergo si Judæi eandem escam spiritualement, & eundem potum nobiscum habuerunt, procul dubio Sacramenta eorum erant ejusdem virtutis spiritalis cum nostris.

Respondeo 1. locum illum non esse ad rem, manna enim, & aqua de petra scaturiens non erant Sacramenta, ut dictum est cap. 2.

Respondeo 2. distinguendo antecedens, ex Apostolo Judæi eandem escam manducaverunt, & eundem potum biberunt inter se, Concedo : nobiscum, Nego anteced. aliàs Discipulus loqueretur contra Magistrum, qui expressis verbis Joannis 6. vers. 32. distinguit manna ab Eucharistia, *non Moyses*, inquit, *dedit vobis panem de cælo, sed Pater meus dat vobis panem de cælo verum . . . ut si quis ex ipso manducaverit, non moriatur.* v. 50.

Scopus

Scopus ergo Apostoli est detertere Christianos à fornicatione, & aliis peccatis, exemplo Judæorum, qui licet omnes singularibus Dei beneficiis fuerint cumlati, per mare insigni miraculo transferint, eadem esca & eodem potu usi sint; plures tamen ex illis in peccatum lapsi prostrati sunt in deserto. Unde concludit Apostolus duriora Christianos manere, si carne Christi saginati, & sanguine ejus potati, efficiantur idololatæ & fornicarii, sicut & Judæi. Obvius & apertus erit sensus legenti caput integrum.

Porro manna, aqua de rupe scaturiens, transitus maris, & columna, quæ erat nubes per diem & ignis per noctem, dicuntur spiritalia propter significationes mysticas; manna enim præfigurabat Christum Dominum panem verum nobis de cælo missum, transitus maris Baptismum, in quo merguntur peccata; aqua scaturiens è rupe percussa, Spiritus Sancti dona, quæ nobis fluxerunt à Christo in cruce percusso, columna viam Judæis demonstrans, fidem prælucentem Christianis ad patriam cœlestem pergentibus.

Ad confirmationem ex S. Augustino petitam respondeo distinguendo, idem Judæorum cibus & potus, qui noster significatione, Concedo: idem virtute & efficacia, Nego. Addit enim sanctus Doctor, *significatione idem, non specie; quia idem ipse Christus, illis in petra figuratus, nobis in carne manifestatus.*

Instabis i. ex eodem S. Augustino virtus omnium Sacramentorum est gratia: ergo omnia Sacramenta sunt virtute paria.

Distinguo antecedens, virtus major, vel minor, Concedo: eadem, Nego anteced. nam ex
citato

citato libro contra Faustum *vetera Sacramenta promittebant Salvatorem, nostra verò dant salutem, hoc est illa sanctificabant ratione fidei, & ex opere operantis, ista virtute signi, & ex opere operato.*

Sic intelligendus S. Leo, ferm. 2. in die Pentecostes, ubi sic loquitur, *sine hac gratia nulla sunt instituta Sacramenta, nulla sunt celebrata mysteria, ut eadem semper fuerit virtus Charismatum, quamvis non eadem fuerit mensura donorum.* Totus enim ibi est S. Pontifex ut ostendat SS. Patriarchas, Prophetas, Sacerdotes eodem spiritu, quo Apostolos, afflatos fuisse; adeo ut mysterium Pentecostes non fuerit (verba ejus sunt ferm. 3. de Nat.) *inchoatio muneris, sed adjectio largitatis: nec minùs adepti sint, qui credidere Christum promissum, quàm qui susceperunt donatum.* At quomodo Abraham, Samuel, Daniel, cæteri Prophetæ tantam sanctitatem consecuti sunt? Certè non efficacia Sacramentorum & sacrificiorum, utpotè quæ essent egena & vacua elementa, sed virtute fidei in Christum Dominum.

Instabis 2. Augustinus c. 11. lib. 2. de nup. & concupisc. & cap. 14. lib. 4. contra Donatistas scribit Circumcisionem id parvulis contulisse, quod nunc confert Baptismus. Ergo.

R. 1. Circumcisio, quamvis in lege Mòysis fuerit præcepta, tamen non est ex Moyse, sed ex Patribus, Joan. 7. v. 22. quare non est confundenda cum Sacramentis Mosaicis, sed revocanda ad Sacramenta Legis naturæ, quæ Concilium Tridentinum non comprehendit in Canonibus citatis de Sacramentis novæ & veteris Legis ut relinqueret Theologis liberam opinandi facultatem circa Circumcisionem, quam plures existi-

marunt per se remisisse peccatum originale in parvulis.

R. 2. S. Augustinum videri sensisse Circumcisionem esse institutam ad delendum peccatum originale. Duo autem traxerunt S. Doctorem in illam sententiam, scilicet error, qui irrepsit in Codicibus Græcis, quibus utebatur, & Pelagianorum pertinacia in negando peccato originali, à qua, ut eos removeret, efficax videbatur Circumcisionis præceptum, prout describitur in iisdem Codicibus; sic enim habent c. 17. Gen. v. 14. *Masculus, cujus præputii caro circumcisa non fuerit octavo die, delebitur anima illa de populo suo, quia pactum meum irritum fecit.* Ex quibus verbis sic ratiocinabatur S. Doctor. Parvulus non circumciscus octavo die damnandus est propter irritum pactum: quodnam autem pactum? certè non pactum initum cum Abrahamo; parvulus enim præcepti capax non est: ergo non potest intelligi nisi pactum, quod pepigit Deus cum Adamo, in quo omnes prævaricati sunt; atque ideo damnandi, nisi aliquo salutari remedio adjuventur, qualis post Christum est Baptismus, & ante illum Circumcisio juxta S. Augustini sententiam, cujus autoritate permoti Patres ipso posteriores, communiter docuerunt institutam fuisse Circumcisionem ad delendum peccatum originale.

At verò Patres S. Aug. antiquiores, unanimi consensu tradiderunt Circumcisionem datam esse solum in signum distinctionis, non ut justitiæ opus, ut loquitur S. Justinus in Dialogo cum Tryphone. *Non per eam justificabatur homo, inquit S. Irenæus, sed in signo data est.* Item Tertul. lib. contra Judæos cap. 3. sic scribit: *Providens Deus quod*

quod hanc circumcisionem in signum, non in salutem, esset daturus, &c. Et S. Chrysoſt. hom. 7. in Geneſim, ad juſtitiam, inquit, *ipſa circumciſio nihil contulit*. Similia habent S. Cyprianus lib. contra Judæos, S. Ambroſius epiſt. 72. & lib. de Abrahamo cap. 4. S. Hieronymus in cap. 3. ad Galatas.

Hanc poſtერიorem ſententiam tandem amplexus eſt S. Thomas 3. p. q. 70. art. 4. ubi mutavit quod ſcripſerat in 4. diſt. 1. q. 2. art. 4. *In Baptiſmo, inquit, confertur gratia ex ipſius virtute Baptiſmini In Circumciſione autem non conferebatur gratia ex virtute Circumciſionis, ſed ex virtute fidei Paſſionis Chriſti.*

Duo itaque, juxta Angelicum Doctorem, in Circumciſione ſunt attendenda. Primum eſt ipſummet circumciſionis ſignum in Abrahamo inſtitutum. Secundum eſt profeſſio fidei in Meſſiam venturum, quam diximus à Deo inſpiratam in ſtatu naturæ ad delendum peccatum originale; quamque uſque ad Chriſti Domini adventum permaſſiſſe fatendum eſt: cùm non eſſet aliud remedium apud Judæos pro fœminis, & parvulis maribus ante octavum diem decedentibus. Porro ex dictis conſtat non fuiſſe ſignum determinatum ad emittendam illam profeſſionem, ſed potuiſſe fieri pro parvuliſper quolibet nutus, & pro adultis per ſacrificia qualiacumque. Unde poſtquam inſtituta eſt Circumciſio, illa communiter uſi ſunt parentes ad profitendam illam fidem pro parvuliſ. Et ita in Circumciſione revera deletum fuit peccatum originale, non quidem virtute Circumciſionis, quia ad hoc non fuit inſtituta, ſed virtute profeſſionis fidei, quæ in illo ritu emittebatur pro parvuliſ; cui ſententiæ adhærendum probatur

1. Ex Scriptura, Genes. 17. ubi in Hebræo, & in Vulgata editione legitur simpliciter : *Masculus, cujus præputii caro circumcisa non fuerit, delebitur anima illa de populo suo*, ubi omittuntur duo illa vocabula (octavo die) quæ S. Augustinus legebat in codice Græco non sano ; quibusque nitabatur ejus sententia. Unde corridente fundamento, superstructam opinionem corruere quoque necessum est. Itaque juxta veram lectionem hujus textus, præceptum Circumcisionis dirigitur ad adultos sub pœna capitis, si pactum Circumcisionis irritum fecerint, hoc est, si se aut suos circumcidere neglexerint. Quod autem is sit proprius sensus Scripturæ, colligitur tum ex contextu citati capitis, tum ex cap. 4. Exodi, ubi Dominus ob neglectam Circumcisionem in filio Moïsis, non infantem, sed patrem voluit occidere. Præterea Apostolus c. 3. & 4. epist. ad Romanos, totus est ad probandum non Circumcisionem, sed fidem justificasse ; ait enim c. 3. *quæ utilitas Circumcisionis?* tum subdit, *multum per omnem modum, primum quidem, quia credita sunt illis (Judæis) eloquia Dei.* Hoc præcipuum munus circumcisionis in mente Apostoli ; nec Verbum addit, ex quo colligere liceat eam remisisse peccatum, quod est quid longè majus. Imò capite seq. ex professo probat Circumcisionem non habuisse hanc efficaciam. *Beatus vir, inquit, cui non imputavit Dominus peccatum ; beatitudo ergo hæc in Circumcisione tantum manet, an etiam in præputio? . . . non in Circumcisione, sed in præputio.* Legenda sunt hæc duo capita.

2. Circumcisio non applicabatur mulieribus, nec maribus ante octavum diem, ad quem sanè multi non perveniebant morte præoccupati.

Item

Item per quadraginta annos, quibus Judæi commorati sunt in deserto, omiſſa eſt Circumciſio, Joſue 5. v. 5. quid ita? niſi quia, cùm tantum eſſet inſtituta ad diſtinguendum genus Abrahæ ab aliis nationibus, inutilis videbatur, quamdiu Judæi in deserto omnibus ſeparati manſerunt.

R. 3. Poſſe utcunque conciliari ſententiam S. Auguſtini cum oppoſita, ſi dicatur in Circumciſione deletum fuiſſe peccatum originale, non vi ritus externi, qui ad hunc effectum non fuit à Deo inſtitutus; ſed ratione profeſſionis fidei, ut ſupra docebat S. Thomas.

COROLLARIUM.

Ex dictis tum in hoc capite, tum in duobus præcedentibus, Sacramenta veteris & novæ Legis definiri poſſunt per differentias ſpecificas hoc modo.

Sacramentum veteris Legis eſt ſignum ſenſibile ſacrum, à Deo permanenter inſtitutum ad producendam per ſe ſanctitatem legalem, ſolumque ſignificandam interiorem. Hæc definitio convenit etiam Sacramentis Legis naturæ.

Sacramentum novæ Legis eſt ſignum ſenſibile, ſacrum, à Chriſto Domino permanenter inſtitutum, ad producendam per ſe & ex opere operato ſanctitatem interiorem.

In duobus ergo potiffimum differunt Sacramenta nova à veteribus. 1. quia ſunt inſtituta à Chriſto Domino, ut infra probabitur, 2. quia gratiam ſanctificantem & juſtitiam conferunt ex opere operato.

Cæterum, cùm res ſenſibiles & materiales poſſint dupliciter conſiderari, ſcilicet metaphyſicè,

hoc est, secundum genus & differentiam: & physicè secundum partes physicas, ex quibus essentialiter constant; duplex est quoque earum definitio: homo v. g. methaphysicè definitur animal rationale, physicè verò totum compositum ex anima rationali, & corpore organico; sic duplex est Sacramenti definitio, alia secundum genus & differentiam, quales sunt mox allatæ definitiones: alia secundum partes, ex quibus componitur. Quamvis enim sacramentum non sit totum propriè physicum, cum partes ejus non sint substantiales, incompletæ, & realiter unitæ, nec faciant unum per se, est tamen unum morale conflatum ex quibusdam partibus, de quibus jam dicendum.

CAPUT V.

Ex quibus partibus constant Sacramenta novæ Legis?

Advertes quæstionem esse de Sacramentis novæ Legis: etenim de illi solis deinceps dicturi sumus, cum nihil examini subjiciendum super sit circa vetera Sacramenta. Igitur ad propositam quæstionem.

R. Eugenius IV. in Decreto sæpius citato, sic definit: *Omnia Sacramenta tribus perficiuntur, videlicet rebus tanquam materia, verbis tanquam forma, & persona Ministri conficientis Sacramentum cum intentione faciendi quod facit Ecclesia, quorum si aliquod desit, non perficitur Sacramentum.*

Dicitur i. *perficiuntur*, non verò constant aut componuntur, quia Minister & ejus intentio non ingrediuntur compositionem Sacramenti; sed sunt

sunt quid Sacramento extrinsecum, pertinent-
que ad ejus causam efficientem, de qua inferius.

Ergo Sacramenta novæ Legis ex duobus tantum constant; scilicet rebus tanquam materia, & verbis tanquam forma.

Dicitur 2. *omnia Sacramenta*; quod intelligendum est de Sacramentis novæ Legis. Licet enim essentiale sit omni Sacramento cujuscunque status constare ex rebus, cum omne Sacramentum necessario sit signum sensibile; tamen necesse non est, ut omne Sacramentum constet verbis; multa siquidem in Lege veteri, ut Circumcisio, Gen. 17. ritus agni Paschalis, Exod. 12. consecrationes Pontificum & Sacerdotum, lib. Lev. c. 8. celebrabantur absque præscripta verborum forma; quia verba sunt signa expressiora, minimèque convenientia statui Legis veteris, in qua mysteria sub umbris latebant. Negari tamen non potest quin in celebratione quorundam Sacramentorum verba adhiberentur, nam Lev. 5. & 6. præcipiuntur preces in Sacrificiis pro peccato.

Dicitur 3. *rebus tanquam materia, verbis tanquam forma*: & hoc per analogiam ad compositum physicum, in quo pars imperfectior & minus determinata, dicitur materia; & actus, quo determinatur materia ad tale esse, dicitur forma. Materia ligni v. g. ex se indifferens est & indeterminata, vel ad formam ignis, vel ad formam ligni aut cineris, & consequenter ad hoc vel illud esse; determinatur autem per formam ignis ad esse ignis, & per formam ligni ad esse ligni. Similiter aqua ex se indifferens est, vel ad abluendum, vel ad refrigerandum, sive ad emol-

liendum; sed determinatur ad ablutionem significandam per verba: *Ego te baptizo.*

Q. 2. *Quotuplex est materia?*

R. Duplex remota, circa quam versatur actio Ministri, ut aqua in Baptismo, peccata in Sacramento Pœnitentiæ: & proxima, quæ est usus materiæ remotæ, ut ablutio.

Q. 3. *A quo tempore Theologi Sacramentorum nostrorum partes appellant materiam & formam?*

R. Ex quo Philosophia Aristotelis in Scholas Theologiæ penetravit. Qui enim scripserunt ante Guillelmum Antissiodorenses, qui primus legitur hanc loquendi rationem usurpasse circa ann. 1215. ritum externum Sacramenti, vel formam, id est, formulam Sacramenti, vel materiam, sive rem Sacramenti appellaverunt: quanquam S. Aug. per rem Sacramenti solet intelligere effectum Sacramenti; unde distinguit inter Sacramentum & rem Sacramenti.

Dices: Apostolus 1. ad Timot. 6. præcipit ut devitemus profanas vocum novitates.

R. 1. Voces illas nihil habere profani. 2. Apostolum loqui de novitatibus, quas Hæretici inducunt ad oppugnanda fidei dogmata. Addit enim, & *oppositione falsi nominis scientia.* Sunt autem, inquit S. Aug. tract. 97. in Joan. & *doctrinæ Religionis congruentes verborum novitates, adversus impietatem Arianorum novum nomen homousion Patres crediderunt.*

Q. 4. *Quomodo probatur omnia Sacramenta novæ Legis constare rebus & verbis, seu materia & forma?*

R. Probatur 1. ex Scriptura, de Baptismo habetur Ephes. 5. v. 26. *mundans (Ecclesiam) lavacro aquæ in verbo vitæ.* Unde S. August. tract. 80. in Joan. *accedit verbum, inquit, ad elementum, &*
fit

fit Sacramentum. Detrahe verbum, quid est aqua, nisi aqua? De Confirmatione, Actuum 8. *Oraverunt pro ipsis, ut acciperent Spiritum Sanctum . . . tunc imponebant manus super illos.* De Eucharistia Matth. 26. *Accepit Iesus panem . . . deditque . . . & ait . . . hoc est Corpus meum.* De Extrema unctione, Jacobi 5. *orient super eum, ungentes eum oleo.*

Probatur 2. ex constanti Ecclesiæ Traditione, quæ semper res sensibiles, & aliqua verba ad conficienda Sacramenta adhibuit.

Dices 1. Eucharistia non constat verbis tanquam forma.

Distinguo, Eucharistia in facto esse, seu secundum ejus esse permanens, Concedo: Eucharistia in fieri, Nego. Perficitur enim per verba Christi Domini.

Dices 2. Matrimonium non perficitur verbis, cum à mutis validè contrahatur.

R. Si Sacerdos est minister hujus Sacramenti (quod expendetur suo loco) profert verba benedicendo sponsum & sponsam quæ habent rationem formæ: si ipsi contrahentes sunt ministri hujus Sacramenti, nutus, quibus muti exprimunt suum consensum, habent rationem verborum & formæ.

Dices 3. in Sacramento Pœnitentiæ non inveniuntur nisi verba, nimirum absolutionis, & confessionis.

Respondent Tridentini Patres sess. 14. c. 3. actus pœnitentis esse quasi materiam hujus Sacramenti; quia absolutio Sacerdotis proximè versatur circa illos actus, tanquam circa propriam materiam, illosque determinat ad significandam remissionem peccatorum.

Nec dicas aliquando absolvi ægrotum, qui cum usu rationis careat, & omni sensu nullum producit actum; nam supponitur antea produxisse, nec retractasse, sicque actus præteriti moraliter conjunguntur cum verbis absolutionis.

CAPUT VI.

De verbis, quibus Sacramenta novæ Legis perficiuntur.

Controversia est Catholicos inter & Pseudoreformatos, num verba, quibus perficiuntur Sacramenta, sint consecratoria; an concionalia tantum & promissoria. Catholici primum constanter asserunt, Hæretici contra pertinaciter negant. *Vulgò dicunt inquit Calvinus lib. 4. Institut. cap. 14. §. 7. constare Sacramentum verbo & externo signo, verbum intelligere debemus, non quod sine sensu & fide insusurratum solo strepitu, velut magica incantatione consecrandi elementi vim habet . . . promissionem intelligamus, quæ clara voce à Ministro prædicata, plebem eò manu ducat, quò signum tendit ac dirigit.*

Q. 1. Quid est verbum promissorium & concionatorium?

R. Est verbum promissionem aliquam continens, quod per modum concionis profertur ad excitandam audientium fidem & devotionem.

Q. 2. Quid est verbum consecratorium?

R. Est verbum, quod ordinatur non præcisè ad erudiendam plebem, cum sæpius ignoto idiomate proferatur; sed ad sanctificandum & consecrandum tum materiam, puta aquam in Baptismo, quatenus accedente verbo percipit virtutem sanctifi-

ificandi; *detrahe enim verbum*, inquit S. Augustinus cit. tract. *quid est aqua, nisi aqua?* tum ipsum suscipientem; verbum enim & materia simul juncta ipsum consecrant & sanctificant.

Q. 3. *Quare Novatores volunt verba Sacramentorum non esse nisi promissoria & concionalia?*

R. Quia in eorum mente non justificamur per applicationem signi sacramentalis, sed per solam fidem promissionum Christi, ex quo principio erroneo & hæretico sequitur alius error, nempe verba sacramentalia non habere alium effectum, quam excitare fidem promissionum, ac proinde debere pronuntiari eo modo, qui aptus sit ad generandam fidem, & obsequenda promissa.

Q. 4. *Quomodo probatur, verba sacramentalia verè esse consecratoria, non verò promissoria, & concionalia?*

R. Probatur primò iisdem argumentis, quibus c. 4. ostendimus Sacramenta novæ Legis non esse instituta præcisè ad fidem promissionum obsequandum; sed ad sanctificandum per se & ex opere operato suscipientem; illa enim verba verè sunt consecratoria, quæ per se, & ex opere operato consecrant & sanctificant suscipientem sacramentum, si obicem non ponat: atqui verba Sacramentorum novæ Legis materiæ conjuncta per se, & ex opere operato consecrant & sanctificant suscipientem. Ergo.

Majorem concedunt adversarii: est enim ex ipsis terminis nota; minor probata manet ex dictis cap. 4. de efficacia Sacramentorum novæ Legis.

Concio quidem prærequiritur respectu adultorum, juxta illud Matth. 28. *Docete omnes gentes, baptizantes eos*, ut disponantur per fidem, & alios actus à Concilio Trid. recensitos, sess. 6. c. 6. sed non est

est pars Sacramenti, ut constat vel solo exemplo parvulorum, quibus, dum baptizantur, foret inutilis ejusmodi concio, cum eam nec audire possint, nec intelligere.

At, inquit Calvinus, intelligent, cum ad ætatem adultam pervenerint.

Contrà 1. si non perveniant morte præoccupati, nunquam intelligent, nec credent, & tamen non frustra baptizatos confitetur. 2. In ejus sententia concio non est minus essentialis Baptismo, quàm aqua. Ergo sicut nullus esset Baptismus, si aqua non attingeret corpus infantis: ita, si nec concio ejus auditum afficeret.

Nec dicat Calvinus, concione attingere auditum astantium; nam 1. validus esset Baptismus collatus ab infideli ministro sine testibus. 2. nec fides, nec infidelitas testium prodest aut obest suscipienti Baptismum.

Probat 2. è Scriptura, quæ constanter vocat verba sacramentalia, benedictiones, invocationes, nusquam conciones. De Baptismo habetur Actuum 22. vers. 16. *Exurge, & baptizare, & ablue peccata tua invocato nomine ipsius*, nimirum Christi. Hinc communiter à Sanctis patribus verba baptismalia dicuntur invocatio Sanctissimæ Trinitatis. De Confirmatione habetur Act. 8. *Oraverunt (Apostoli) pro ipsis ut acciperent Spiritum sanctum*. De Eucharistia, 1. ad Corinth. 10. *Calix benedictionis, cui benedicimus, nonne communicatio sanguinis Christi est?* De Extrema unctione, Jacobi 5. *Orent super eum, ungentes eum oleo in nomine Domini*.

Objiciunt 1. illud 1. Petri cap. 3. ubi Apostolus loquens de arca, in qua pauci, id est octo ani-

mæ

mæ salvæ factæ sunt, subdit, quod & vos nunc similis formæ salvos facit Baptisma, non carnis depositio sordium, sed conscientiæ bonæ interrogatio in Deum. Ubi notat Lutherus in textu Græco pro interrogatione haberi pactum seu stipulationem: Ergo verba Baptismi sunt ad excitandam fidem promissionum Dei, & confirmandum pactum, quod anima init cum Deo.

Nego consequentiam; locus enim citatus obscurissimus dupliciter exponi potest. 1. ita ut Apostolus probet ex testimonio conscientiæ, jam post Baptismum pacatæ, nostrum lavacrum longè differre à purificationibus Judæorum, in quibus sordes carnis solum deponebantur, cum in Baptismo peccata verè ablui testetur tranquillitas conscientiæ, & fiducia quam habet ad Deum, 2. ita ut notet Apostolus responsiones seu sponsiones, quæ à primis sæculis solitæ sunt fieri à baptizando. *Sub Antistitis manu*, inquit Tertullianus lib. de Corona Militis cap. 3. *contestamur nos renuntiare diabolo, & pompæ, & Angelis ejus.* Inde Baptismus solet vocari à Sanctis Patribus, *sponsio salutis*, qua initiandus confidenter renuntiat Satanæ, omnibus ejus operibus & pompis, polliceturque se deinceps Christo adhæsurum. Quid autem ex hac explicatione elicere possunt Novatores in gratiam sui erroris? Imò caput illud Apostoli nobis arma suppeditat ad illum confodiendum; docet enim expressis verbis Baptismum nos salvare, sicut arca ex aquis diluvii octo animas liberavit. Porro arca non per fidem promissionum, sed per se ipsam familiam Noe liberavit: Ergo.

Obijciunt 2. multos Sanctorum Patrum textus, ubi Sacramenta dicuntur signacula, pignora, arrhæ

arrhæ. Deinde ex Sancto Ambrosio, lib. de initiandis cap. 5. *aqua baptismi sine prædicatione divinæ Crucis, ad nullos est usus futuræ salutis.* 3. S. Hieronymus in caput 5. Epist. ad Ephes. exponens illud Apostoli, *Mundans (Ecclesiam) lavacro aquæ in verbo vitæ*, docet verbum vitæ esse doctrinam. 4. S. Augustinus, tract. 80. in Joan. quærens unde ista tanta virtus aquæ, ut corpus tangat & cor abluat respondet totum fieri per verbum, non quia dicitur, sed quia creditur, de quo Dominus ait: *Jam vos mundi estis, non propter Baptismum, quo loti estis, sed propter verbum, quod locutus sum vobis:* Ergo.

Respondeo ad singula.

Ad primum, fatemur Sacramenta novæ Legis esse signacula significantia & obsignantia, res sacras, pignora & arrhas promissionum divinarum; Deus enim in nostris Sacramentis exhibet quæ promisit: in Eucharistia v. g. dat carnem, quam dandam promiserat Joan. 6. in Baptismo confert Spiritum sanctum, in quo baptizandos fideles præmonuerat ejus Præcurzor, Matth. 3. Sed nullus Sanctorum Patrum scripsit ista nobis conferri in Sacramentis, quatenus fidem excitant per verbum concionale.

Ad secundum S. Ambrosius loquitur de benedictione præparatoria fontis baptismalis, cujus benedictionis meminit etiam S. Cyprianus epist. 69. in qua hæc habet: *Oportet mundari & sanctificari aquam prius à Sacerdote, ut possit Baptismo suo peccata hominis, qui baptizatur, abluere.* Non quod hæc benedictio sit de necessitate Sacramenti; sed ita loquuntur Sancti Patres, ut probent Sacramenta haurire suam efficaciam ex Passione Chri-

Christi, qui invocatur in hac benedictione. Potest etiam dici ipsum Baptismum esse prædicationem Crucis; quia signum est mortis & sepulturæ Christi Domini; *in morte ipsius* (Christi) *baptizati sumus*, ait Apostolus Rom. 6.

Ad tertium, opus illud non est S. Hieronymi, sed Pelagii Hæretici, ut monet S. Augustinus lib. 3. de peccatorum meritis c. 1. & lib. de peccato originali cap. 21. quanquam auctor hujus libri, quisquis ille sit, non loquitur de Baptismo, sed de animarum purgatione in genere, quæ fit communiter per doctrinam.

Ad quartum, 1. ex Facundo lib. 9. cap. 5. quemadmodum calumniantium Hæreticorum est ex dubiis & obscuris, quæ certa & manifesta sunt malè interpretari, ita solitum est prudentiæ ac pietati Catholicæ, ex indubitatis atque evidentibus firmare ambigua, & latentia declarare. Quare juxta hanc regulam, opponimus S. Augustini textus luce clariores obscurissima in objectione citatos. Primus petitur ex cap. 10. lib. 3. de Baptismo, ubi sic scribit: *Non est aqua profana & adultera, supra quam Dei nomen invocatur ... Baptismus Christi verbis Evangelicis consecratus, & per adulteros & in adulteris sanctus est.* Quibus verbis S. Augustinus manifestè docet, verbum in Baptismo esse consecratorium. Secundus ex tract. 80. in Joannem. *Hoc verbum fidei, inquit, tantum valet in Ecclesia Dei, ut per ipsam offerentem, benedicientem, tingentem etiam tantillum mundet infantem, quamvis nondum valentem corde credere.* Ergo ex S. Augustino verbum, quo aqua concipit virtutem, non est concionatorium, sed consecratorium. Unde

Respon-

Respondeo 2. distinguendo, verbum in Baptismo mundat, non quia dicitur, sed quia creditur, id est, non quatenus est quid naturale, & sonus transiens, sed quatenus est verbum Christi supernaturale, sola fide apprehensibile, Concedo: *aliud enim est*, inquit S. Doctor, *sonus transiens, aliud virtus manens*. Quatenus actu creditur quod per verbum significatur, Nego. S. enim Augustinus totus est ut probet nec infidelitate ministrantis, nec defectu rationis in infante impediri effectum Baptismi.

Instabis: verbum quod mundat in Baptismo juxta S. August. est idem ac verbum, quod locutus est Christus Apostolis: atqui verbum illud est concionale, non consecratorium; Jesus enim ipse non baptizabat, Joan. c. 4. ergo reverà verbum in Baptismo est concionale.

Distinguo maj. idem est verbum, nempe Christi Domini, sed diverso modo administratum, Concedo: Eodem modo administratum. Nego maj. & conseq. Scopus itaque S. Doctoris est ostendere per verbum Dei, quod Apostolus vocat verbum fidei, Rom. 10. omnia sanctificari, sive dum prædicatur in concionibus, sive dum per illud invocatur Dei nomen in Sacramentis.

Urgebis ex S. Augustino eo loci, Apostoli non propter Baptismum, sed propter sermonem quem eis locutus fuerat Jesus, mundi erant: ergo Baptismus non per seipsum mundat, sed per concionem.

Nego consequentiam. Mundat enim Baptismus, sed eos solos, qui non ponunt óbicem; unde cum inter Apostolos jam baptizatos, Judas infidelis reperiretur, rectè advertit S. August.
Chri-

Christum Dominum non dixisse, mundi estis, quia baptizati; Judas enim propterea non erat mundus, sed propter sermonem, quem locutus sum vobis, hoc est, quia permansistis omnes præter Judam in sermone meo.

Objicit denique Calvinus in cap. 5. epist. ad Ephelios, speciem esse quandam magicæ incantationis, certa quædam verba demurmurare lingua incognita super elementum mortuum.

Respondeo ex S. Hieronymo, epistola ad Ctesiphontem, *non necesse habet convinci, quod sua statim professione blasphemum est.* Quid enim magis impium & blasphemum, quàm tribuere magicæ incantationi, quod à Deo institutum est? An Christus Dominus fuit similis incantatori, quando quinque panes benedixit in deserto, Joan. 6. quando ad salivam, qua linivit linguam furdi & muti, & digitos, quos misit in auriculas ejus, verbum adhibuit, *Epheta*, quod est, *aperire*, Marc. 7. An Pontifex Hebræorum, dum congerebat maledictiones super aquas amarissimas, Num. 5. aliquid magicum submurmurabat?

CAPUT VII.

Utrùm Christus Dominus determinaverit materiam & formam omnium Sacramentorum?

Lutherus lib. de captivitate Babylonica, docuit Baptismum, urgente necessitate, posse conferri lacte, & quocumque alio liquore; sed postea retractavit errorem, utpote contrarium expressis Evangelii verbis, Joan 3. *Nisi quis renatus fuerit*
D. Habert Theolog. Tom. V. D ex

ex aqua, &c. Theodorus Beza etiam censuit, ubi deest usus aut copia panis & vini, rectè celebrari Eucharistiam in communi cibo & potu, qui supplet vicem panis & vini. Sed contrahunc errorem

R. 1. De fide est Christum Dominum determinasse saltem in genere omnium Sacramentorum materiam & formam.

Probatur, quia de fide est, Christum Dominum instituisse omnia novæ Legis Sacramenta, ita enim definivit Concilium Tridentinum sess. 7. can. 1. & ex dicendis, ubi de causa Sacramentorum, amplius patebit: ergo & partes eorum essentielles, nempe materiam & formam instituit; quid est enim Sacramentum, nisi materia & forma simul junctæ; atqui instituisse partes essentielles Sacramentorum, idem est ac eas designasse, saltem in genere, hoc est præscripsisse Apostolis, ut uterentur signis aptis ad significandos hos & illos effectus, ad quos producendos instituta sunt Sacramenta.

R. 2. Christus Dominus quorundam Sacramentorum, nempe Baptismi & Eucharistiæ, materiam & formam determinavit in specie.

Probatur è Scriptura, Joan. 3. *Nisi quis renatus fuerit ex aqua, &c.* Matth. 28. *Euntes ergo docete omnes gentes, baptizantes eos in nomine Patris, &c.* nec refert quòd Christus non dicat expressè inter baptizandum pronuncianda esse hæc verba, nam ex constanti Ecclesiæ Traditione, certum est quòd pronuntiari debeant; neque ob aliam rationem Ecclesia rejecit Baptismum quorundam Hæreticorum, putà Cataphrygum & Paulianistarum, cum aliorum reciperet, nisi quia illi non utebantur verbis Evangelicis, sine quibus non potest
confe-

consecrari Baptismus ex S. Augustino lib. 1. de Baptismo cap. 25. De Eucharistia quoque habetur Luc. 22. *Accepto pane (Jesús) gratias egit. . . & dedit eis, dicens: Hoc est corpus meum; tum subdit, hoc facite in meam commemorationem.*

Advertes autem formam prædictorum duorum Sacramentorum à Christo fuisse determinatam, non materialiter ratione phrasidis & idioma-tum, sed formaliter & ratione sensus, validus enim est Baptismus à Græcis collatus, his verbis: *Baptizetur servus Christi in nomine Patris, &c.* quia idem significat forma illa, ac; *Ego te baptizo in nomine Patris, &c.*

R. 3. Certum est formas aliorum quinque Sacramentorum non ita determinatas fuisse, sed Christum reliquisse Ecclesiæ determinandum, quæ oratio adhiberetur pro Confirmatione, Ordinatione, & extrema Unctione, quæve proferrentur verba pro Sacramentis Pœnitentiæ, & Matrimonii, modò per ea sufficienter exprimerentur effectus illorum Sacramentorum, Græci enim aliis verbis, quàm Latini, confirmant & ordnant.

Extat autem celebris controversia inter Theologos, utrùm omnium Sacramentorum materiam Christus in specie determinaverit? Plures enim, ut Magister sententiarum, Alexander de Hales, S. Bonaventura, S. Thomas in quartum dist. 3. q. 1. art. 12. Et ex recentioribus, Bellarminus, Franciscus Hallerius Doctor Sorbonicus & Episcopus Cabellionensis, Joannes Morinus opinantur Christum Dominum speciatim determinasse materias & formas eorum Sacramentorum, quæ cùm in terris degeret, non solum instituit, sed etiam contulit; cæterorum verò nonnisi generatim,

ratim, ac reliquisse Apostolorum & Ecclesiæ arbitrio delectum rerum & verborum, quæ apta essent ad significandum Sacramenti effectum: ita tamen ut, postquam alicubi Ecclesia specialius elegit unam materiam aut formam præ alia irritum sit Sacramentum, ea neglecta, unde in illorum sententia, si Latinus in Ordinatione utatur Græcorum materia, nulla erit Ordinatio. Sed opposita sententia multis ex capitibus verior & præferenda videtur. Quare ad propositam in hoc capite quæstionem

R. 4. Omnium Sacramentorum materia à Christo Domino speciatim est determinata.

Probatur 1. ex Scriptura, ubi materia aliorum Sacramentorum, quàm Baptismi, & Eucharistiæ, legitur in specie determinata; namque manus impositio pro Confirmatione assignatur Act. 8. his verbis, *tunc imponebant manus super illos*, & pro Ordinatione tum Diaconorum, Act. 6. *orantes imposuerunt eis manus*, tum Presbyterorum & Episcoporum. 1. ad Tim. 4. *Noli negligere gratiam quæ est in te, quæ data est tibi . . . cum impositione manuum Presbyteri*. Item oleum pro extrema Unctione, Jac. 5. *ungentes cum oleo in nomine Domini*. Confessio peccatorum pro Sacramento pœnitentiæ, Joan. 20. Unio viri cum muliere, seu mutuus utriusque consensus pro Matrimonio, Ephes. 5. *Erunt duo in carne una; Sacramentum hoc magnum est*.

Probatur 2. ex constanti usu utriusque Ecclesiæ Latinæ & Græcæ, quæ semper adhibuit in omnibus Sacramentis materias in Scripturis designatas; Græci enim & Latini manus imponunt confirmandis & ordinandis; ungunt infirmos, confes-

confessionem peccatorum excipiunt à pœnitentibus, celebrantque Matrimonia cum mutuo contrahentium consensu, unde corruiť oppositæ sententiæ fundamentum. Ideo enim citati Theologi in eam descenderunt; quia ipsis visum est contra rei veritatem, Latinos & Græcos in administratione Confirmationis & Ordinationis diversas adhibere materias, quod verum non est.

Confirmatur ex Concilio Trid. sess. 21. c. 2. ubi declarat hanc potestatem perpetuò in Ecclesia fuisse, ut in Sacramentorum dispensatione (salva illorum substantia) ea statueret, vel mutaret, quæ suscipientium utilitati magis expedire judicaret. Agnoscit ergo Concilium Ecclesiam nihil posse mutare circa substantiam, seu partes essentielles Sacramentorum.

Confirmatur iterum, si Ecclesia accepisset potestatem instituendi & mutandi materiam & formam Sacramentorum, non magis dici possent Sacramenta esse institutionis divinæ, quàm leges, quas identidem Ecclesia auctoritate Christi sancit: atqui leges sic sancitæ simpliciter dicuntur institutionis humanæ: ergo & Sacramenta ita dici deberent, quod est absurdum, & valida Novatoribus contra Ecclesiam suppeditaret argumenta. Præferenda itaque est sententia affirmans Christum Dominum omnium Sacramentorum auctorem, etiam singulorum materias in specie determinasse.

Dices 1. ex dictis. Formæ omnium Sacramentorum non sunt in specie à Christo determinatæ; ergo nec materia.

Nego consequ. ratio disparitatis est voluntas auctoris Sacramentorum, qui eorum materiam, non verò formam ita determinavit, idque constat

tum ex Scriptura, quæ designat materias, non verò formas singulorum Sacramentorum; tum ex constanti usu Ecclesiæ sacrarum Scripturarum interpretis, quæ semper iisdem materiis, non verò iisdem formis, quamvis eundem sensum exprimentibus, singula Sacramenta consecravit. Congrua tamen hujusce diversitatis potest hæc afferri ratio, quòd res non ita pendent ex usu hominum, ac verba.

Dices 2. ex Decreto Concilii Tridentini, Sacramentum Pœnitentiæ nullum est, nisi Sacerdos delegatus fuerit ab Episcopo approbatus; atqui talis approbatio non erat necessaria ante Concilium ad valorem Sacramenti: ergo Ecclesia addidit aliquid pertinens ad substantiam Sacramenti.

Distinguo majorem, ita ut ex hoc decreto talis Sacerdos non approbatus, sit incapax jurisdictionis exercendæ, Concedo majorem: ita ut stante illo Decreto, libertatem habeat jurisdictionis, Nego majorem. Itaque verum est etiam nunc, sicut ante Concilium Sacerdotem habentem jurisdictionem, sive ordinariam, sive delegatam validè absolvere; cum enim Christus Dominus ita instituerit, Ecclesia non potest quidquam in eo mutare. Sed cum à Pastoribus pendeat concedere vel negare jurisdictionem, Concilium declaravit Sacerdotem non habentem curam animarum, esse incapacem jurisdictionis, nisi prius fuerit approbatus ab Episcopo ad excipiendas confessiones sæcularium.

Dices 3. Ecclesia mutavit materiam Sacramenti Matrimonii; namque ante Concilium Trid. contractus sine testibus & præsentia Parochi validus erat: nunc autem ex ordinatione
Conci-

Concilii absolutè est irritus : ergo Ecclesia potest mutare materiam Sacramentorum.

Distinguo conseq. potest mutare indirectè & præsuppositivè , Concedo : potest mutare directè & formaliter , Nego conseq. Quemadmodum enim, qui substantialiter corrumpet aquam, posset dici mutare indirectè & præsuppositivè materiam Baptismi, quia corrumpet id quod poterat esse materia idonea ad baptizandum ; sic Ecclesia effecit, ut qui erat olim contractus validus, jam non sit validus ; apponendo nimirum novas solemnitates, sine quibus non erit verus contractus. Sed penes Ecclesiam non est ut contractus validus non sit materia Sacramenti Matrimonii, & aqua vera non sit materia Baptismi ; quia Christus Dominus utramque materiam instituit.

Dices 4. Eugenius IV. in Decreto pro institutione Armenorum ; probante Concilio Florentino, docet materiam Confirmationis esse chrismationem ; Ordinationis verò traditionem Libri Evangeliorum pro Diaconis, & Calicis cum patena pro Presbyteris, nulla facta mentione impositionis manuum, quam in his Sacramentis adhibebant Apostoli, cit. cap. Act. 8. & 1. ad Tim. 4. ergo Ecclesia mutavit materias quorundam Sacramentorum.

Respondeo 1. Decretum illud non esse reverà Concilii Florentini œcumenici, cum jam recessissent Græci, approbatumque esse ad summum ab Episcopis, qui Florentiæ remanserant.

Respondeo 2. Non posse colligi ex hoc Decreto Ecclesiam Latinam in Ordinatione Diaconi &

Presbyteri locò impositionis manuum substituisse Libri & Calicis porrectionem. Vel enim Decretum supponit mutationem illam jampridem fuisse factam, vel novam inducit: atqui neutrum dici potest: Ergo.

Non primum, constat enim manuum impositionem in Ecclesia Latina fuisse materiam Diaconatus & Presbyteratus usque ad tempus illius Decreti, & quidem solam usque ad decimum sæculum; id, inquam, constat ex Concilio Carthaginiensi IV. quod celebratum est quarto exeunte sæculo: tertio enim Can. recensens materias singulorum Ordinum, solius impositionis manuum meminit pro Diaconis & Presbyteris, porrectionis verò instrumentorum pro inferioribus Ordinibus: ex Concilio Meldensi nono sæculo prohibente Corepiscopis ordinare Presbyteros & Diaconos, quia ordinantur per manus impositionem, quæ pertinet ad solum Episcopum: ex antiquis Sacramentariis, ubi pro materia Presbyteratus & Diaconatus sola manuum impositio agnoscitur: ex Amalario & aliis auctoribus, qui nono sæculo scripserunt ex professo de rebus liturgicis; hi omnes solam manuum impositionem agnoscunt materiam Presbyteratus & Diaconatus. A nono quidem sæculo legitur instrumentorum porrectio, non usurpata pro manuum impositione, sed adjecta manuum impositioni, quæ semper religiosissime, & cum solemnitate retenta est usque ad tempus citati Decreti. Imò legitur apud Hugonem à S. Victore, lib. de Sacram. c. 12. & apud Magistrum Sentent. in 4. dist. 24. porrigi solitum calicem Presbyteris in signum potestatis jam acceptæ

ptæ per manuum impositionem præcedentem. Ergo usque ad Eugenium IV. cit. Decreti auctorem, porrectio instrumentorum non erat, nisi cæremonia accidentalis adjecta manuum impositioni, tanquam materiæ essentiali, ac proinde cit. Decreto non fuit declaratum Ecclesiam Latinam mutasse materiam ordinationis.

Neque etiam secundum dici potest, nempe citato Decreto factam esse illam mutationem: tum quia illud Decretum non est definitio Concilii Florentini, nec ad omnes Ecclesias directum, sed ad particularem Armenorum Ecclesiam; tum quia ab eo tempore nihil mutatum fuit in ordinationis ritu, utpote qui perficiatur sicut ante Decretum, per solemnem impositionem manuum cum porrectione instrumentorum & aliis cæremoniis accidentalibus.

Confirmatur ex Concilio Tridentino sess. 23. can. 4. ubi dicit anathema ei, qui dixerit Episcopum ordinantem frustra dicere, *Accipe Spiritum Sanctum*. Porro ista non profert Episcopus, nisi dum manus imponit Diaconis & Presbyteris. Ergo mens Concilii est Sacramentum perfici, per illam actionem Episcopi, ac proinde porrectio instrumentorum non proponitur Armenis in Decreto cit. tanquam essentialis materia ordinationis.

At, inquires, credibile non est Eugenium IV. qui in illo Decreto suscepit instruendos Armenos, proponere solam materiam accidentalem ordinationis, maximè cum aliorum Sacramento-
rum materias essentielles designet.

Imò credibile est, & omnino credendum Summum Pontificem in re tanti momenti non defini-

niisse sine adminiculo Scripturæ sacræ, & divinæ Traditionis, vel potius, repugnante sacra Scriptura, & divina Traditione, Ecclesiam posse mutare substantiam Sacramentorum, quod negat Concilium Tridentinum cit. cap. 2. sess. 21.

Neque verò laudatum Decretum habendum est pro unica regula, quam Armeni sequi teneantur in Sacramentorum celebratione, 1. quidem, quia Eugenius ad illam Græcos non adstrinxit; non enim porrigunt illi instrumenta ordinandis. 2. Quia in illo Decreto Summus Pontifex non meminit ordinationis Episcopi. Unde si Armenis illi Decreto insistendum fuisset tanquam unicæ suæ regulæ, non haberent apud se Episcopos. Summus itaque Pontifex in illo unionis Decreto proposuit Armenis, & quæ ad fidem pertinent, ut ea crederent; & quæ ad disciplinam, non quidem ut in omnibus ea observarent, relictis propriis ritibus, sed confitentur esse legitima, nec verbo Dei contraria.

Instabis; dici potest instrumentorum porrectionem in Ecclesia Latina, à decimo sæculo sensim introductam, tum evasisse materiam necessariam ante Concil. Florentinum, cum universaliter & ubique fuit recepta.

Nego, posse dici cum aliqua verisimilitudine Sacramentum hætenus validum, absque expressa Ecclesiæ definitione evadere irritum eo ipso, quò cæremonia adjecta ut accidentalis fuit universaliter recepta. Quis v. g. dixerit unctionem, quæ nunc ubique adhibetur in consecratione Episcoporum, & in ordinatione presbyterorum, esse materiam ordinationis necessariam?

Major

Major est difficultas circa chrismationem, quæ fit in Confirmatione, utrùm scilicet sit materia essentialis hujus Sacramenti; quia à prioribus Ecclesiæ sæculis adhibita est tam à Græcis, quam à Latinis. Sed commodius id expendetur in tractatu de Confirmatione. Supposito autem quòd sit accidentalis, quæ respondimus pro ordinatione, æquè valent pro Confirmatione.

Q. 2. *Mutatio substantialis, sive materiæ, sive formæ Sacramenti redditne irritum Sacramentum?*

R. Affirmativè, sequiturque ex præcedenti responsione; quia forma, aut materia substantialiter mutata, non est forma aut materia, quam Christus Dominus instituit & determinavit; acetum v. g. non est vinum à Christo designatum pro materia Eucharistiæ.

Q. 3. *Quandonam censetur forma, aut materia substantialiter mutata?*

R. Forma substantialiter mutatur, quando ex mutatione, transpositione, adjectione, aut deductione verborum non remanet idem sensus. Mutatur verò accidentaliter tantùm, si sensus idem remaneat. Hinc si Arianus inter baptizandum diceret, in nomine Patris majoris, &c. additio illa omninò corrumpere sensum formæ, irritumque redderet Baptismum, ut declaravit Conc. Nicæn. I. quia non exprimeret sanctissimæ Trinitatis mysterium, quod exprimendum Christus instituit Matth. 28. Si verò minister post invocationem sanctissimæ Trinitatis sequentia verba adderet, & *beata Virgo te adjuvet*; mutatio esset solum accidentalis, ratusque esset Baptismus, quia staret idem sensus. Similiter materia mutatur substantialiter, quando transmutata est in aliam speciem

ciem & naturam, ut si vinum fiat acetum; vinum enim non est ejusdem speciei, & naturæ cum aceto. Mutatur verò accidentaliter quando remanente eadem natura & specie, nonnulla ejus corrumpuntur accidentia, ut si vinum sit solum accensum, nec omnino acetum.

Q. 4. *Mutatio accidentalis irritatne Sacramentum?*

R. Minimè, nisi fiat animo inducendi novum errorem; quia cum tali mutatione reperiuntur materia & forma à Christo institutæ.

Illicita tamen est hæc accidentalis mutatio, præsertim si fiat auctoritate privata; est enim & contra Sacramenti reverentiam, & Ecclesiæ prohibitionem, Canon. 13. sessione 7. Concilii Tridentini.

Dixi: *Nisi fiat animo inducendi novum errorem.* Namque Zacharias Summus Pontifex interrogatus à S. Bonifacio Moguntino octavo sæculo, quid factu esset opus circa baptizatos his verbis; *ego te baptizo in nomine Patriæ, Filiæ, & Spiritus sanctæ*, respondet Epist. 6. citata cap. *Retulerunt*, distinct. 4. de Consecratione, quòd si ille, qui baptizavit, non errorem introducens aut hæresim, sed pro sola ignorantia Romanæ locutionis infringens linguam, baptizans, dixisset, *ego te baptizo*, &c. non possumus consentire ut denuò baptizetur.

Advertes autem duo requiri, ut intentio inducendi novum errorem irritet Sacramentum, quorum si alterutrum desit, ratum nihilominus erit Sacramentum. Primum, ut sensus formæ sit reverà ambiguus; nam si sit apertus, & intentio prava, non officiet Sacramento, ut patet ex Baptismo ab Arianis collato, qui licet pravè sentirent,

rent, docerentque Filium non esse æqualem Patri, atque eo sensu verba Baptismi proferrent; attamen validus erat Baptismus ab eis collatus; quia nihil immutabant circa formam, cujus sensus nihil habet ambigui. Secundum, ut error Ministri ita exterius exprimat, verbaque ambigua in talibus circumstantiis proferantur, ut nonnisi pravo sensu intelligi debeant. Ergo balbutiens, qui corruptè pronuntiat formam, validè conficit Sacramentum; quia ex communi hominum usu forma sic expressa idem significat, quod alia prolata ab eo, qui non est balbus.

Q. 5. *Licetne uti materia dubia in Sacramentorum administratione?*

R. 1. Si certa non suppetit quando ministrandum est Sacramentum ad salutem necessarium, urgetque periculum mortis, Minister licitè potest, imò debet adhibere materiam dubiam; quia Christus Dominus Sacramenta instituit tanquam remedia in animarum salutem: atqui prudenter dubia remedia applicantur, ubi desunt indubitata, cum ex usu illorum remediorum spes nonnulla salutis nascatur.

R. 2. Grave est peccatum uti materia dubia, cum certa haberi potest.

Probatur 1. ex S. Augustino lib. 1, de Baptismo cap. 3. *Graviter peccaret, inquit, in rebus ad salutem animæ pertinentibus, vel eo solo, quòd certis incerta præponeret.*

Probatur 2. auctoritate Innocentii XI. & Cleri Gallicani, qui damnarunt sequentem propositionem, *non est illicitum in Sacramentis conferendis sequi opinionem probabilem de valore Sacramenti, relicta tutiore; nisi id vetet lex, conventio, aut periculum damni*

nni incurrendi; hinc sententia probabili tantum utendum non est in collatione Baptismi, Ordinis Sacerdotalis, aut Episcopalis.

Probatur 3. ratione: quia talis materia dubiam reddit Sacramenti veritatem, quod fieri nequit sine gravi ejusdem Sacramenti injuria & sacrilegio. Advertant ergo Pœnitentiæ Ministri quot criminibus se implicant, qui ad solam pœnitentium confessionem attendunt, & eos promiscuè absolvunt, nulla habita ratione contritionis; quam non solum dubiam, sed prorsus nullam deprehenderent, adhibita diligentia, quam debet Sacramentorum Minister.

CAPUT VIII.

De causa efficiente Sacramentorum novæ Legis.

Q. I. *Quotuplex potestas assignari solet à Theologis circa Sacramenta novæ Legis?*

R. Triplex, prima dicitur auctoritatis, estque principalis & independens, nullique communicabilis creaturæ, utpotè essentialiter dependenti, nec competit Christo Domino, nisi ratione divinitatis.

Secunda dicitur potestas excellentiæ, quæ quidem instrumentalis est, sed instrumenti cum divinitate conjuncti, estque propria Christi ut hominis, propter unionem hypostaticam humanitatis cum Verbo.

Tertia est purè ministerialis, nec extenditur nisi ad ministranda Sacramenta jam divinitus instituta.

Triplex est ergo causa efficiens Sacramentorum novæ legis, prima & quidem principalis est solus Deus, ut constat ex dictis circa definitionem

nem Sacramenti in genere: Secunda est Christus Dominus, ut homo est: Tertia est Minister Christi in Sacramentis administrandis.

Q. 2. *In quibus consistit potestas excellentiæ?*

R. Quatuor complectitur dotes: Prima quòd Sacramenta operentur per meritum illius, cui competit illa potestas: 2. Quòd ad invocationem nominis illius celebrentur: 3. Quòd ipse habeat potestatem Sacramenta instituendi, & de facto instituerit: 4. Quòd Sacramentorum effectum solo voluntatis nutu, & independentem à quocumque ritu externo conferre possit.

Q. 3. *Potestas excellentiæ potestne communicari puræ creaturæ?*

R. 1. Non potest communicari quoad omnes effectus; nulla enim creatura potest de condigno mereri alteri remissionem peccatorum, nec pro eis plenè satisfacere; quia ad hoc requiritur meritum infinitum, cujus capax non est pura creatura, ut docent Theologi ubi de Incarnatione.

R. 2. Non repugnat potestatem excellentiæ communicari puræ creaturæ quoad reliquos effectus. Ita S. Augustinus tract. 5. in Joan. his verbis: *Potuit Dominus noster Iesus Christus, si vellet, dare potestatem alicui servo suo, ut daret Baptismum tanquam vice sua, & transferret à se baptizandi potestatem, & tantam vim daret baptismo translato in servo, quantam vim haberet Baptismus datus à Domino. Hoc noluit ideo, ut in illo spes esset baptizatorum, à quo se baptizatos agnoscerent, noluit ergo servum ponere spem in servo.*

Q. 4. *Estne de fide Christum Dominum instituisse omnia novæ Legis Sacramenta?*

R. 1.

R. 1. Est de fide Christum Dominum, five immediatè & per se, five mediatè & per Ecclesiam omnia Sacramenta novæ Legis instituisse; ita enim definivit Concil. Tridentinum sess 7. cap. 1. *Si quis dixerit Sacramenta novæ Legis non fuisse omnia à Jesu Christo Domino nostro instituta . . . anathema sit.* Probatur; ille instituit, five immediatè, & per se, five mediatè, per Ecclesiam, omnia Sacramenta, qui materiam & formam omnium Sacramentorum determinavit, five speciatim, five generatim: atqui Christus Dominus omnium Sacramentorum materiam & formam five speciatim, five generatim determinavit: Ergo.

Major evidens est ex ipsis terminis, minor verò probata manet ex cap. præced.

R. 2. De fide est Christum Dominum immediatè & per se instituisse aliqua Sacramenta, Baptismum scilicet & Eucharistiam; quia eorum materiam & formam in specie determinavit, vt constat ex cap. præced.

R. 3. Non est de fide Christum Dominum immediatè & per se instituisse omnia novæ Legis Sacramenta, quia ex dictis præced. capite non est de fide, eum determinasse in specie omnium Sacramentorum materiam & formam; nec Concilium Tridentinum inseruit citato canone adverbium (immediatè) ne videretur damnare quorundam Theologorum sententiam, qui ante & post ipsum Concilium docuerunt, & docent, Christum Dominum reliquisse arbitrio Ecclesiæ determinandas materias & formas multorum Sacramentorum.

R. 4. Verisimilius est Christum Dominum immediatè, & per se instituisse omnia Legis novæ
Sacra-

Sacramenta; quia ex dictis citato capite præcedenti omnium Sacramentorum materiam in specie determinavit.

CAPUT IX.

De Ministro Sacramentorum novæ Legis.

Q. 1. *Quis est Minister Sacramentorum novæ Legis?*
 R. Solus homo, est contra Lutherum, qui lib. de Missa privata docet Angelos, & dæmones posse legitimè administrare Sacramenta.

Probatur 1. ex Scriptura, ubi videmus solis hominibus Christum Dominum dedisse potestatem ministrandi Sacramenta, Matth. 28. *docete omnes gentes, baptizantes eos, &c.* Luc 22. *hoc facite in meam commemorationem.* Joan. 20. *quorum remisistis peccata, &c.* Constat autem ex Traditione hæc dicta esse hominibus ad exclusionem Angelorum, *iis datum est*, inquit S. Joannes Chrysostomus libro 3. de Sacerdotio, *ut potestatem habeant, quam Deus optimus maximus neque Angelis, neque Archangelis datam esse voluit; neque enim ad illos dictum est*, quæcunque ligaveritis, &c.

Probatur 2. Sacramenta novæ Legis constant verbis humano modo prolatis, quæ ita ab Angelis efformari non possunt. Si ergo veræ sunt historiæ, in quibus refertur, nonnullos extraordinariè Sacramenta ab Angelis percepisse, ceperunt illi Sacramentorum effectus sub aliquibus signis, quæ non erant vera Sacramenta.

Et certè status viatoris continetur in conditionibus, quas sancti Patres in Ministro exigunt. Videtur Apostolus eum viatoris statum præsup-

ponere, Hebr. 5. ubi ait hujusmodi debere esse *Ministrum*, qui ex hominibus assumptus *condolere possit iis, qui ignorant & errant, &c.*

Q. 2. *Quilibet homo Christianus habetne potestatem ministrandi Sacramenta?*

R. Minimè, excepto Baptismo in casu necessitatis, ut infra dicitur, est etiam contra Lutherum libro de abroganda Missa, ubi sic habet: *Sacerdos in novo præsertim testamento non fit, sed nascitur: non ordinatur sed creatur*, quem errorem damnavit Concilium Tridentinum his verbis, sessione 7. can. 10. *Si quis dixerit Christianos omnes in verbo, & omnibus Sacramentis administrandis habere potestatem; anathema sit.*

Probatur 1. ex Scriptura, in qua legimus ad hoc munus quosdam præ cæteris esse electos & deputatos, Ephes. 4. *Ipse dedit quosdam quidem Apostolos alios autem Pastores & Doctores, ad consummationem sanctorum, in opus ministerii*, 1. Corinth. 12. *numquid omnes Apostoli? numquid omnes Doctores?* Joannis 20. non omnibus Christianis, sed solis Apostolis dictum est, *quorum remiseritis peccata, &c. & Matth. 18. quæcumque solveritis, &c. denique Jacobi 5. inducendi sunt Presbyteri ad ungendos infirmos.*

Probatur 2. ex perpetua Ecclesiæ Traditione. In Concilio Nicæno I. generali irrita est declarata ordinatio Ischiræ; quia Colluthus, qui manus ei imposuerat, non erat Episcopus. Presbyter non potest ordinare, ex S. Hieronymo, & ex Concil. Meldenfi.

Dices, 1. Petri c. 2. dicitur omnibus Christianis, *vos autem genus electum, regale sacerdotium; ergo omnes Christiani sunt Sacerdotes.*

Distin-

Distinguo conseq. Sunt Sacerdotes improprie, quomodo & Reges ad offerendas spirituales hostias, id est, bona opera, quo sensu dicitur Ps. 50. *Sacrificium Deo spiritus contribulatus*, & laudes Dei vocantur Osee 14. vituli labiorum, Conc. Sacerdotes proprie, Nego conseq. Enimverò S. Petrus desumpsit verba in objectione laudata ex cap. 19. Exod. vers. 6. ubi diriguntur ad omnes filios Israel, quos certè Lutherus non dixerit fuisse omnes Sacerdotes proprie dictos, cum negare non possit hunc honorem fuisse delatum solis filiis Aaron, qui eo titulo constanter restiterunt, 2. Paralip. cap. 26. Regi Osia, dum præsumpsit offerre incensum Domino, *non est*, inquiunt, *tui Officii*, *Osia*, *ut adoleas incensum Domino, sed Sacerdotum*.

Nullius est momenti quod opponit Lutherus, omnes Christianos esse fratres, & membra Christi Domini, qui est proprie Sacerdos; nam fratres, maximè adoptivi, non gaudent eodem honore, quo primogenitus. Nec omnia membra ejusdem corporis eundem habent actum, ex Rom. cap. 12. vers. 4.

Q. 3. *Minister estne proprie causa saltem instrumentalis effectus Sacramentorum?*

R. Est reverà; dicitur enim remittere peccata, Joannis 20. dare gratiam per impositionem manuum; 1. ad Tim. 4. Unde sic licet argumentari: ille reverà est causa efficiens alicujus effectus, per cujus actionem effectus ille primò, & per se produci-
tur, atqui per actionem Ministri, puta ablu-
tionem & unctionem, gratia per se immediatè produci-
tur: Ergo.

Excipiendum tamen est Sacramentum Eucharistiæ, quod non consistit in usu sicut cætera;

ideoque gratia in eo producitur remotè tantum per consecrationem, quæ est actio Ministri, proximè verò per corpus Christi sub speciebus panis.

Q. 4. *Quæ requiruntur ex parte Ministri, ut legitimè Sacramentum perficiat?*

R. Tria, nempe intentio, fides, & probitas.

CAPUT X.

De intentione Ministri Sacramentorum.

Q. 1. *Quid hic intelligendum nomine intentionis?*

R. Intelligitur deliberata voluntas faciendi aliquid, putà Sacramentum.

Dixi, *deliberata*; nam voluntas non exit in actum, nisi prævia cognitione, & rationis judicio juxta illud; *ignoti nulla cupido*. Atque ideo nulla intentio in dormiente, nec in amente, quia nullus rationis usus: item homicidium est præter intentionem in eo, qui occidit hominem, putans occidere feram: neque etiam mater haberet intentionem conficiendi Sacramentum, si ablundo fordes corporales infantis diceret: *Fili, lavo te in nomine Patris, & Filii, &c.* quia non cogitaret, nec cogitasset de Sacramento conficiendo. Idem dicendum de Sacerdote antiquiore, qui docens juniorem ritum Sacrificii Missæ, accipit panem, profertque verba consecrationis; quia totus est ad repræsentandum, non verò ad faciendum quod facit Ecclesia, nec in mentem ejus venit offerre sacrificium. Hæc ex Philosophia.

Q. 2. *Estne necessaria Ministro illa intentio ad veritatem Sacramenti, adeo ut sine illa non perficiatur Sacramentum?*

Nega-

Negavit Lutherus ; sic enim loquitur duodecimo art. ex his quos Leo X. damnavit, *si Sacerdos non serio, sed joco, (ideſt, cum intentione tantum repræſentandi myſterium) abſolveret, ſi tamen credat pœnitens ſe eſſe abſolutum, veriffimè eſt abſolutus.* Eadem tradit libro de captivit. Babylon capite de Baptiſmo. Verum ſub anathemate damnata eſt hæc doctrina in Concilio Tridentino ſeſſ. 7. can. 11. his verbis : *Si quis dixerit in Miniſtris, dum Sacramenta conficiunt, & conferunt, non requiri intentionem ſaltem faciendi quod facit Eccleſia ; anathema ſit.* Præiverat Martinus V. in poſtrema Concilii Conſtantiensis ſeſſione anno 1418. & Eugenius IV. in decreto pro Armenis anno 1439. ubi, *Sacramenta, inquit, tribus perficiuntur, materia, forma, & perſona Miniſtri cum intentione faciendi quod facit Eccleſia.* Quare.

R. De fide eſt intentionem Miniſtri neceſſariam eſſe ad perficiendum Sacramentum. Patet ex citato can. Concilii Tridentini. Probatur autem Concilii definitio, 1. ex Scriptura, 1. ad Corinth. 4. *Sic nos exiſtimet homo ut Miniſtros Chriſti, & diſpenſatores myſteriorum Dei,* Matth. 7. *nolite dare ſanctum canibus,* Joan. 20. *quorum remiſeritis peccata, remittuntur eis, & quorum retinueritis, &c.* ubi mittuntur Apoſtoli non tanquam nuntii, qui ſimpliciter perferant obſignatum mittentis mandatum, ſed tanquam diſpenſatores & procuratores, qui prudenter & fideliter gerere debeant negotia domini ſui, ac proinde cum intentione propriè dicta, & ita SS. PP. intellexerunt cit. text.

Probatur 2. ratione : Adminiſtratio Sacramentorum debet eſſe humana actio ; ad quid enim Chriſtus Dominus ſolos conſtituiſſet homines Sa-

cramentorum Ministros, nisi ut humano modo agerent? atqui non est humana actio, nisi fiat voluntariè & cum advertentia rationis: Ergo, &c.

Dices 1. medicamentum prodest ægroto, etiam si præter intentionem, aut etiam per jocum detur: atqui Sacramenta sunt animæ medicamenta: Ergo, &c. Confirmatur. Verbum Dei etiam si non seriò prædicetur, in animabus tamen audientium nonnunquam operatur.

Distinguo major. Medicamentum quod non consistit essentialiter in actione humana, qualia sunt omnia medicamenta corporea, Concedo: quod essentialiter consistit in actione humana, quæ non potest perfici sine intentione, Nego. Unde patet responsio ad confirmationem, verbum enim Dei per se est operatorium independentem ab actione, & consequenter ab intentione hominis.

Instabis: Minister Sacramentorum est instrumentum Christi, nec agit nisi virtute illius: atqui non requiritur intentio instrumenti, sed sufficit intentio causæ principalis: Ergo, &c.

Distinguo majorem; Instrumentum liberum, quod debet agere cum prudentia, Concedo: Instrumentum inanime, Nego majorem: Christus autem ex dictis misit Apostolos, ut eorum successores tanquam dispensatores & procuratores, qui consilio & sapientia gererent quæ dedit illis in mandatis.

Dices 2. S. Alexander Episcopus Alexandrinus ratum habuit Baptismum jocosè collatum à S. Athanasio adhuc puero: item S. Genesius validè fuit baptizatus per mimum, qui in theatro mysteria Christianorum derisorie repræsentabat coram Diocletiano. Hinc S. Augustinus libro 7. de-

de Baptismo capite 33. docet, integritati Baptismi non officere, si fallaciter detur, additque se non audere idem affirmare de Baptismo mimicè & derisorie dato, sed de suo illum calculo approbatum, si esset in Concilio Episcoporum, qui eum errantem possent in rectam viam reducere. Imò tract. 5. in Joan. positivè asserit Baptismum ab ebrioso collatum esse validum.

R. Ad singula.

Ad primum. 1. Non est verisimilis historia, quam de S. Athanasio solus Rufinus texuit, & ex illo Socrates & Sozomenus, tum quia nullo probati auctoris testimonio nititur, sed incerta admodum fama, *ferunt*, inquit Rufinus: tum quia laudati historici diversimodè factum illud narrant: variatio autem illa est indicium falsitatis, tum quia S. Alexander creatus est Patriarcha Alexandrinus anno 311. quo tempore Sanctus Athanasius puer esse non poterat; cùm annis quatuordecim post, nempe circa ann. 325. suffectus sit in locum S. Alexandri, qui obiit paulò post Concil. Nicænum; mores enim illius sæculi non ferebant, ut Presbyter ordinaretur ante trigèsimum ætatis annum, teste S. Hieronymo epist. 62. quantò minus Episcopus & Patriarcha, præsertim primæ Sedis Orientalis, qui vix annum 25. attigerat, supposita veritate historiæ? Nec Ariani & Athanasii hostes infensissimi defectum illum prætermisissent utpotè qui S. Pontificem falsis criminationibus opprimere, atque è sede expellere conspirant.

2. Vera sit illa historia, pueri in ludis suis nonnunquam seriò imitantur quæ à majoribus fieri conspiciunt, & hanc mentem, seu intentionem in puero Athanasio deprehendit S. Alexan-

der; ex eo quòd non promiscuè ablueret infideles & jam baptizatos, sed solos Catechumenos, exploratis priùs per varias interrogationes eorum dispositionibus.

Ad secundum. Baptizatus est sanctus Genesius per Baptismum vel flaminis, hoc est, perfectam contritionem; vel sanguinis, non verò per Baptismum aquæ mimicè collatum, qui est plane invalidus.

Ad tertium. Per fallaciam & fictionem intelligit sanctus Augustinus defectum debitæ dispositionis; qualis esse potest in Hæretico. Unde apud illum fictè accedere ad Baptismum, non est animo derisorio, sed cum indebitis dispositionibus accedere.

Fatendum tamen est, S. Doctorem propendisse in sententiam nostræ oppositam; sed noluit quidquam definire antequam difficultas expendetur in Episcoporum judicio, in quo dubia sua deponeret. Porro tanti Doctoris exemplo moveri deberent Novatores ad obsequendum definitioni Concilii Tridentini.

Cæterum alia est ratio ebriosis, id est, hominis ex habitu in ebrietatem propensi, alia hominis actu ebrii, id est, qui vino actu madet; ille enim cum sit compos rationis, Sacramenta valide ministrare potest: hic verò minime, uti declarat sanctus Cornelius summus Pontifex de Novatiano Hæretico ordinato ab Episcopis crapula oppressis: qui adumbrata & inani manuum impositione Episcopatum ei tradiderunt. Referatur ejus Epistola ad Eusebio lib. 6. hist. Ecclesiasticæ, cap. 43.

CAPUT XI.

De Intentionis divisione.

Q. 1. *Quotuplex est intentio?*

R. Dividitur 1. generatim in directam & reflexam.

Directa est intentio, qua quis deliberatè vult administrare Sacramentum; seu facere quod facit Ecclesia, adeout administratio sit objectum immediatum illius intentionis.

Reflexa est, qua quis reflectens super administrationem jam directè intentam, novo & distinctiori modo vult eandem administrationem, ut est Sacramentum, vel ritus ab Ecclesia frequentatus.

Q. 2. *Quotuplex est intentio directa?*

R. Duplex, alia dicitur operis, alia finis.

Intentio operis est, qua quis vult simpliciter ipsam administrationem, seu cæremoniam ab Ecclesia frequentatam, nec cogitat de ejus virtute aut effectu, qui est sanctificatio suscipientis, imò fortè illam existimat inutilem & superstitiosam.

Intentio finis est ea, qua quis intendit sanctificationem suscipientis Sacramentum.

Q. 3. *Quotuplex est intentionis operis?*

R. Duplex: alia dicitur interior, seu mentalis: alia exterior.

Exterior est ipsa actio deliberatè facta, juxta ritum ab Ecclesia præscriptum:

Interior est voluntas seriò faciendi actionem exteriorem, & observandi ritum Ecclesiæ; potest enim fieri, ut quis exteriùs videatur seriò facere quod facit Ecclesia, cùm tamen intus in corde intendat duntaxat mimicè illud repræsentare; &

quod pejus est, baptizare in nomine dæmonis, vel Idoli, licet exterius dicat: *Ego te baptizo in nomine Patris*, &c.

Q: 4. *Quotuplex est intentio interior?*

R. Sextuplex assignari solet, nempe actualis, virtualis, habitualis, interpretativa, absoluta, & conditionata.

Actualis intentio est ea, qua quis actu vult conficere Sacramentum, v.g. baptizare.

Virtualis est actio, quæ fit virtute præcedentis actualis intentionis, quæ quamvis præterierit, censetur tamen moraliter manere, quatenus virtute illius agens, seu Minister operatur. Exemplum esto in Sacerdote, qui ingressus est ad altare cum actuali intentione consecrandi, sed paulò post distrahitur, evanescitque illa intentio ex infirmitate humana, vel etiam ex quadam negligentia, prosequitur tamen sacrificium, cæremonias perficit, verba consecrationis profert virtute actualis intentionis, quæ præcessit; unde actiones ex illa emanantes dicuntur intentio virtualis.

Habitualis intentio, est propensio, seu inclinatio voluntatis acquisita per actus sæpius repetitos, putà per frequentem Sacramentorum administrationem. Hæc intentio potest remanere in dormiente, amente, aut ebrio.

Interpretativa, est dispositio voluntatis, quæ talis est, ut interpretemur aliquem consensurum aut facturum, si res proposita in ejus mentem veniret, vel de ea moneretur. Sic dicitur fidelis adultus, ex vi morbi rationis usum amisit, habere intentionem interpretativam recipiendi Sacramenti

menti Extremæ-Unionis, quamvis de eo nunquam cogitaverit, quia ex ejus antea acta vita colligimus eum tantum beneficium expetiturum, si rationis esset compos.

Absoluta intentio, est voluntas absoluta, qua simpliciter, & sine modificatione Minister vult conficere Sacramentum: conditionata verò, qua vult sub conditione tantum, v. g. si non es baptizatus, *Ego te baptizo*; si es verè pœnitens, *Ego te absolvo*.

CAPUT XII.

Qualis intentio est necessaria in Ministro ad perficiendum Sacramentum?

R. 1. **R**eflexa non est necessaria: tum quia ex nullo sacræ Scripturæ textu, aut sanctorum Patrum testimonio colligi potest ejus necessitas: tum quia Minister sine ea potest prudenter & humano modo, imò & cum pietate implere suum Ministerium. Quis enim credat eum sine recta intentione, & sine fructu adesse Sacrificio Missæ, qui audito ultimo signo, properavit ad Ecclesiam, sollicitus ne seriùs adveniret, non reflectens se recta mente accedere? Deponant ergo scrupulos, quibus cruciantur nonnulli Ministri, quasi illis defuerit sufficiens & recta intentio, quia absque reflexione festinarunt ad baptizandum, aut absolvendum perclitantes.

R. 2. Non requiritur intentio finis Sacramenti, hoc est sanctificationis. Ita S. Thomas in 4. dist. 6. quæst. 1. art. 2. & in 3. parte Summæ qu. 64. art. 6. ad 2.

Probatur 1. quia ex dicendis Hæretici possunt valide

validè administrare Sacramenta, etiamsi negent in eis inesse ullam sanctificandi virtutem.

Probatur, 2. ex Patribus: sanctus Augustinus Epist. 98. aliàs 23. sic scribit ad Bonifacium. *Nec illud te moveat, quod quidam non ex fide ad Baptismum percipiendum parvulos ferunt, ut gratia spiritali ad vitam regenerentur æternam; sed quòd eos putant hoc remedio temporalem retinere vel recipere sanitatem: non enim propterea illi non regenerantur, quia ab ipsis hac intentione offeruntur.* Enimverò Sacramenta agunt ad modum causarum naturalium. Sicut ergo ignis comburit stipulam, velit nolit qui illum admovet; sic & Sacramenta independenter à voluntate Ministri sanctificant per virtutem à Christo Domino ipsis inditam: *Neque enim justum est, inquit Sanctus Chrysostomus, homil. 85. in Joan. propter alterius malitiam ad salutem nostram accedentes offendi.*

R. 3. Intentio habitualis non sufficit; quia est sine advertentia rationis, cum possit reperiri in dormiente, amente, & ebrio. Nec dicas sanctum Thomam 3. p. q. 64. art. 3. docere habitualement intentionem sufficere ad perfectionem Sacramenti: nam S. Doctor, sicut antiquiores Theologi, intentionem virtualement vocat habitualement: ut patet exemplo, quod citato loco proponit, nempe Sacerdotis accedentis ad baptizandum, cum intentione faciendi quod facit Ecclesia, docetque perfici Sacramentum ex virtute primæ intentionis, etiamsi in ipso exercitio cogitatio Sacerdotis ad alia rapiatur.

R. 4. Interpretativa intentio multò minùs sufficit, quàm habitualis, ad conficiendum Sacramentum; quia non tam est intentio, quàm dispositio ad intentionem concipiendam.

Dices:

Dices : Sufficit ad recipiendum Sacramentum ;
Ergo & ad illud ministrandum.

Nego conseq. Ratio disparitatis est, quòd recipiens Sacramentum passivè se habeat, ministrans verò activè : Minister autem, utpotè agens rationale, non potest agere rationabiliter, seu humano modo, absque intentione, ut dictum est.

R. 5. Intentio actualis, quamvis optima, atque idèò optanda, non est necessaria, sed virtualis sufficit. Ita S. Thomas loco mox cit.

Probatur. Ea sufficit intentio, ex qua Minister agit humano & rationabili modo : atqui Minister ex intentione virtuali agit humano & rationabili modo ; neque enim est in potestate hominis viatoris ita cohibere mentem, ut nunquam divagetur, continuoque actu cogitet de opere, præsertim diuturniore, quod deliberata voluntate semel aggressus est, v. g. ut decurrat integrum Psalterium, remanente pietatis actu, ex quo suscepit decurrendum : transit ille actus formaliter sumptus, etiam in viris piissimis, sed remanet in virtute, quatenus verborum prolatio, genuflexio, &c. sunt effectus piæ intentionis, quæ præcessit. Similiter Pastor ex intentione baptizandi infantem, in templum pergit, dumque parat necessaria ad Baptismum & cæremonias prosequitur, mens aliò abstrahitur, nec actu cogitat de Sacramento, quod administrat, idque vel ex infirmitate humana, vel ex negligentia, integrum tamen ritum observat virtute præcedentis intentionis. In hac hypothesisi, esto defectus adsit pietatis & religionis in Pastore, nihil tamen deest Sacramento : doleat ob negligentiam, si quæ sit, sed nihil circa Baptismum repetat.

R. 6.

R. 6. Intentio conditionata, sive de præterito, v. g. *Si non es baptizatus, ego te baptizo*, sive de præsentis, *si es contritus, ego te absolvo*, non irritat Sacramentum; quia talis intentio transit in absolutam: adeout sensus ejus sit, *quia non es baptizatus, ego te baptizo*. At cum intentione conditionata de futuro contingenti, v. g. *Ego te absolvo, ea conditione, quod restitutus sis*, non stat Sacramentum; quia talis conditio suspendit consensum, seu voluntatem Ministri, donec impleta sit conditio.

Advertes tamen hujusmodi conditiones de futuro ut plurimum non esse nisi modos, qui non suspendunt consensum, ut dictum est de contractibus; Confessarius v. g. monendo pœnitentem ut caveat à lapsu, declarat se ei concedere absolutionis beneficium ea conditione quod non relapsurus sit; tum absolutè formam pronuntiat: *Ego te absolvo*, &c. in hac hypothese non censetur absolvisse sub conditione, sed solum præscripsisse modum pœnitenti, qua mente, quove proposito Sacramentum recipere debeat.

Q. 2. *Licetne conditionem aliquando addere ad verba sacramentalia, v. gr. Si non es baptizatus, ego te baptizo?*

R. Per septem priora Ecclesiæ sæcula usus hujus formæ conditionalis fuit omninò incognitus, sed absolutè baptizandos, de quorum Baptismo dubitatur, decernunt Concilium V. Carthagin. anno 398. S. Leo quinto sæculo epist. ad Rusticum, & sanctus Gregorius septimo sæculo; lib. 12. epist. 32. ad Felicem: *Hoc vos: inquit sanctus Gregorius, ritè tenere debetis, quod nos ab antecessoribus nostris traditum accepimus, ut quoties tam de Baptismo aliquorum, vel Confirmatione, quàm de Ecclesiarum consecratio*

secratione dubitatio habetur, & nec scriptis, nec testibus certa ratio habetur, utrum baptizati, vel confirmati, sive Ecclesiæ consecratae sint, ut baptizentur tales ac confirmentur, atque Ecclesiæ canonicè consecrentur; ne talis dubitatio ruina fidelibus fiat, quoniam non monstratur iteratum, quod non certis indiciis ostenditur ritè peractum.

Ufus ergo formæ conditionalis primò innotuit VIII. sæculo, habeturque lib. 6. Capitularium can. 184. sed non fuit universaliter usurpatus: Alexander III. qui sedit anno 1159. illum præscripsit his verbis, relatis extra. de Baptismo, cap. 2. *Si baptizatus es, non te baptizo: sed si nondum baptizatus es, Ego te baptizo in nomine, &c.* Concilium tamen Londinense an. 1200. nullius conditionis meminit: *Si dubitetur, inquit can. 3. sacrorum Canonum Statuta sequentes statuimus, ut conferatur (Baptismus) quia non dicetur iteratum, quod non scitur fuisse collatum, ideoque baptizentur expositi, de quorum Baptismo dubitatur, sive inveniuntur cum sale, sive sine sale.* Ex quibus patet usum formæ conditionalis non ubique invaluisse, nisi à decimo tertio sæculo, primò quidem in collatione Sacramentorum, quæ imprimunt characterem; postmodum verò in collatione aliorum Sacramentorum, præsertim. pœnitentiæ, & ita præscribunt communiter Libri rituales.

R. 2. Forma conditionalis non debet usurpari, nisi in legitimo & prudenti dubio de veritate Sacramenti, dignitas enim Sacramentorum exigit ut non exponantur iterationi planè inutili. Prudens autem non erit hujusmodi dubium, nisi prævio diligenti examine, an Sacramentum, de quo dubitatur, validè fuerit collatum.

Quæ

Quæ hæcenus diximus de varia intentione, quæ potest esse in Sacramentorum Ministro, certa sunt apud omnes Theologos; sed gravis est quæstio circa externam intentionem capite sequenti expendenda.

CAPUT XIII.

Utrum ad veritatem Sacramenti sufficiat exterior Ministri intentio?

Est ferè extra controversiam Concilium Tridentinum ita definiisse contra Novatores, intentionem faciendi quod facit Ecclesia esse necessariam ad veritatem Sacramenti, ut non attigerit quæstionem, in qua versamur, num scil. intentio illa debeat esse interior, an verò exterior sufficiat? Namque 1. Salmeron è Societate Jesu, quem Paulus III. ad Concilium miserat, ut in eo, nomine ipsius, Theologum ageret, multis probat disputatione secunda, 3. partis in epist. S. Pauli, exteriorem intentionem sufficere, eamque ipsam esse, quam Concil. Tridentinum declaravit necessariam. 2. Ambrosius Catharinus Episcopus Minoritanus, qui in eodem Concilio sedit cum aliis Patribus, post conditum Canonem 11. sess. 7. de necessitate intentionis Ministri, anno scilicet 1547. opusculum suum Romæ edidit anno 1562. in quo asserit, nemine reclamante, intentionem externam sufficere, imò Julius III. illum ad Campensem Archiepiscopatum transfudit, quem sanè honorem ei non contulisset, si eum Concilio refragari fuisset arbitratus. 3. Cardinalis Palavicinus è Societate Jesu, lib. 12. cap. 10. suæ Historiæ scribit

Can.

Can. 9. sess. 14. non esse expunctam Catharini sententiam, & aliorum opinantium sufficere in Ministro voluntatem seriò agendi, nec obesse Sacramento, nisi jocus *quem*, inquit, *Sacramentum suscipiens cognoscere potest*. Et in hac parte concordat cum Soavi, qui suam Historiam, stante adhuc Concilio, adornavit.

Nec aliud Eugenius IV. in suo Decreto præscripsit Armenis, ut colligere est ex S. Antonino, qui tempore Concilii Florentini Ecclesiæ Florentinæ præerat Antistes; nam in 3. parte suæ Summæ titul. 15. §. 10. duas proponit opiniones tanquam probabiles circa intentionem Ministri; alteram, quòd interior sit necessaria: alteram, quòd exterior sufficiat.

Cùm ergo proposita quæstio ad Scholam pertineat, dividit Theologos in oppositas sententias, quarum prima statuit intentionem exteriorem sufficere, habetque plures Patronos ex veteribus Scholasticis, & ex recentioribus celebres Scholæ Parisiensis, & aliarum Academiarum Professores. Altera in Scholis communior, etiam ante Concilium Tridentinum, negat sufficere intentionem exteriorem, contenditque iterandum Sacramentum, si in Ministro defuerit interior.

Quis autem Judex in hac controversia, in qua graves Theologi hinc & inde pro sua sententia magna contentione pugnant, nisi ii, quibus dictum est Matth. 18. *Quæcunque solveritis super terram; erunt soluta & in cælo?* Nam privatus judicium suum non impunè proferet: si enim steterit pro opinione negante, ab altera parte suggillabitur, ut nimium timidus, & in ea parte Theologiæ, quam positivam vocant, parùm versatus: si verò affir-

D. Habert. Theolog. Tom. V. F man-

mantem amplectatur, in aliorum offensionem incurret, traduceturque tanquam fautor opinionis saltem materialiter hæreticæ.

Quapropter Clericis, quibus in hoc opere servimus, iatis nos facere arbitramur, si eos, stante illa opinionum contrarietate, firmaverimus in praxi, quam ubique receptam experti sumus, ut quoties agitur de Sacramento, v. g. Baptismo, aut Matrimonio iterando, nihil agatur inconsulto Episcopo. Quid verò in hac materia respondere debeat? nostrum non est docere eos, quos Deus nobis Pastores & Magistros præposuit. Veruntamen quia per tempus aliquando non licet recurrere ad Prælatum,

Viam tutam & certam inimus, & sine præiudicio pacis & veritatis ad propositam quæstionem,

R. In praxi omninò tenenda est sententia negans intentionem exteriorem sufficere ad veritatem Sacramenti.

Probatur unico syllogismo. Licitum non est in negotio salutis, & speciatim in Sacramentis conficiendis sequi opinionem probabilem, relicta tutiori: atqui opinio negans intentionem exteriorem sufficere, est tutior: imò sola tuta est, & secura: Ergo omninò est tenenda.

Major negari non potest: est enim in Jure Canonico, & in Conc. Viennensi expressa quoad primam partem, & definita quoad secundam ab Innocentio XI. anno 1679. ac demum à Clero Gallicano, qui anno 1700. expendens hancce propositionem cum tribus aliis, *non est illicitum in Sacramentis conferendis sequi opinionem probabilem de valore Sacramenti, relicta tutiore, &c.* sic censuit: *doctrina his propositionibus contenta est respectivè falsa, absurda, perniciofa, erronea, probabilitatis pessimus fructus.*

Minor

Minor probatur efficaciter. Illa opinio sola est secura, quæ est communior in Scholis, quam plures Ecclesiæ particulares proponunt tanquam regulam in praxi observandam: atqui opinio, de qua hic sermo, est ejusmodi: Ergo.

Minoris duæ sunt partes.

Prima pars, nempe quòd hæc opinio sit in Scholis communior: probatur ex testimonio Magistri Sententiarum, seu Petri Lombardi, quem oppositæ sententiæ Patroni pro se laudant; de eo quippe refert S. Antoninus, §. 10. jam citato, quòd agnoverit sententiam negantem sufficere intentionem exteriorem, esse communioem, & tutiorem. Illud ipsum agnoscitur in Scholis hodiernis.

Secunda pars constat ex Missali Rom. auctoritate Clementis VIII. edito, in cujus Rubricis, ut vocant, hæc præscribitur regula à celebrantibus observanda circa intentionem: *Si quis habeat coram se undecim hostias, & intendat consecrare solum decem, non determinans quas decem intendit, non consecrat, quia requiritur intentio.* Cumque nobis fuisset dictum, ejusmodi regulam esse expunctam è Missali Parisiensi, quatuor Missalia illius Ecclesiæ consulimus à totidem Pontificibus edita, primum à Francisco de Gondi: secundum ab Harduino de Perefix: tertium à Francisco de Harlay; quartum ab Eminentiſſ. Cardinale de Noailles, qui singulari pietate nunc eidem præest Ecclesiæ: & in quolibet eorum similem regulam celebrantibus præscriptam reperimus, nec dubium est quin in plerisque Missalibus aliarum Diœcesum eadem habeantur. Jam verò quis contra hanc regulam opponere præsumet contradictoriam, tanquam in praxi tutam?

Confirmatur responsio decreto Alexandri VIII. qui an. 1690. in generali Congregatione Inquisitionis, damnavit propositionem asserentem: *Ministrum Baptismi, qui exteriorem ritum plenè observat, Sacramentum conficere, licèt aliud (puta jocum) intus in corde gerat.*

Dices 1. ex S. Chrysostomo, libro 85. in Joannem: *Sacerdos linguam & manus præbet; neque enim justum est propter alterius malitiam, ad salutem nostram accedentes offendi.* Et Sanctus Augustinus lib. 7. de Baptismo, cap. 52. *nequaquam, inquit, dubitare habere eos Baptismum, qui ubicunque, & à quibuscunque illud verbis Evangelicis consecratum sine sua simulatione, & cum aliqua fide accepissent.* Et tract. 5. in Joann. *non exhorreat columba ministerium malorum, respiciat Domini potestatem. Quid tibi facit malus Minister, ubi bonus est Dominus? Quid te impedit malitiosus præco, ubi benevolus est Jdex?* Atqui multum noceret malus Minister, si supposita necessitate internæ intentionis, eam abjiceret: Ergo.

Distinguo majorem, non nocet malitia Ministri, quæ non excludit voluntatem conficiendi Sacramenti, Concedo: quæ excludit, Nego majorem. Nonne enim malitia Sacerdotis, qua nollet baptizare parvulum animam exhalantem ipsi noceret?

Instabis: Concilium Nicænum I. probavit Baptismum Arianorum, qui, cùm crederent Filium esse creaturam, sanè non intendebant baptizare in nomine Sanctissimæ Trinitatis, nec proinde facere quod facit Ecclesia.

Prætereà Concilium Rothomagense an. 1581. Rhemense, & Turonense anno 1583. prohibent, ne abjurantes hæresim Calvinianam, iterum baptizentur, quamvis non desit ratio dubitandi num

Pseu-

Pseudo-Ministri à quibus baptizati sunt, habuerint intentionem faciendi quod facit Ecclesia? tum quia detestantur tanquam superstitiosos, ritus in Ecclesia Romana, (quæ sola vera est Ecclesia) observari solitos, creduntque Sacramenta in ea esse adulterata: tum quia subsannant quæ Concilium Trid. decrevit de necessitate intentionis. Quin Molanus Theologus & Professor Lovanien-sis tract. 4. c. 3. testatur, se fuisse expertum in illis Pseudo-Ministris intentionem internam aliquando defuisse. Ergo Ecclesia intentionem internam non requirit.

Nego consequentiam. Quamvis enim Hæretici errent vel circa divinitatem Filii, vel circa essentiam Sacramentorum, nihilominus omnes intendunt facere quod Christus instituit, quodque observat Ecclesia ab ipso fundata, quæcunque tandem illa sit, ac proinde Sacramenta verè conficiunt, modò ritum, & formam externam non vitient.

Ad experientiam Molani responderi potest, eum perfectiorem exegisse intentionem, quàm requirat Ecclesia; vix enim fieri potest, ut Calvinianus, qui cum advertentia baptizat, nolit facere cæremoniã, quàm scit observari in sua secta, tanquam à Christo institutam. Porro Ecclesia non aliam requirit intentionem, ut ratum sit Sacramentum.

Dices 2. Illa sententia tuta est in praxi, quam Principes Scholæ, & alii insignes tum Theologi, tum Canonistæ communiter amplexi sunt: atqui ejusmodi est sententia negans necessitatem intentionis interioris; eam quippe tenuerunt 1. Magister Sententiarum, lib. 4. distinct. 27. 2. Albertus

Magnus in 4. dist. 6. art. 1. ubi solvens anxietatem, quæ nasci potest ex intentione Ministri in corde occulta, sic respondet, *exprimitur generalis intentio in verbo baptizandi, & illa expressio sufficit ad intentionem Ecclesiæ.* 3. S. Bonaventura in 4. dist. 3. art. 2. *judicandum est*, inquit, *secundum expressionem oris.* 4. Innocentius IV. qui obiit circa medium 13 sæculi, sic habet in caput primum de Baptismo: *non requiritur quod baptizans sciat quid sit Ecclesia, nec quod gerat in mente (modò exterius exprimat) facere quod facit Ecclesia. Imo si contrarium gereret in mente, id est, non facere quod facit Ecclesia, sed tamen facit, quia formam servat, nihilominus baptizatur, dummodò baptizare intendat.* Innocentio adstipulatur Angelus à Clavasio circa ann. 1290. *Opinio Innocentii*, inquit, *mibi placet*, 5. S. Thomas 3. p. qu. 64. art. 8. dubitanti de intentione Ministri sic respondet ad secundum: *Est inquit, duplex opinio. Quidam enim dicunt, quod requiritur mentalis intentio in Ministro, quæ si desit, non perficitur Sacramentum At melius dicunt, quod Minister Sacramenti agit in persona totius Ecclesiæ, cuius est Minister. In verbis autem quæ profert, exprimitur intentio Ecclesiæ, quæ sufficit ad perfectionem Sacramenti, nisi contrarium exterius exprimatur. Ergo.*

Nego min. Nam ex ipsomet Magistro Sententiarum, opinio, quam propugnamus, erat ejus ætate communior & in praxi tutior, quemadmodum refert S. Antoninus loco supracit. Idem fatetur Paludanus pro opposita sententia laudatus in 4. dist. 6. qu. 2. S. Bonaventura nullatenus favet oppositæ sententiæ. Loco enim in objectione cit. non agit de intentione conficiendi Sacramentum, quam necessariam definierat, quæstione præcedenti; sed de fide baptizantis, quam dicit

nec

nec obesse, nec prodesse baptizato, sed solam fidem Ecclesiæ, quæ expressione oris manifestatur.

Innocentius IV. duplicem intentionem distinguit in Ministro, aliam operis, seu Sacramenti conficiendi, aliam effectus per ipsum opus seu Sacramentum producendi. Posteriores duntaxat negat necessariam, ut legenti patebit; affert enim exemplum Saraceni, qui rogatus baptizat non credens per immersionem aliquid fieri nisi madefactionem (ut loquitur) nec intendit baptizare secundum intentionem petentis Baptismum, id est, ut Baptismus operetur justificationem. Si tamen conferre intendant, quod alii baptizantes censuerunt, verè est baptizatus, qui rogavit; Sed, inquit, *si hoc non intenderet, non esses baptizatus.*

Sanctus Thomas art. 8. in objectione laudato non modò sententiæ oppositæ non patrocinator, quin nostram duplici ratione confirmat. Prima quidem, quia Minister Sacramentorum non movetur ut *instrumentum inanimatum*, quod inquit, *non habet . . . intentionem respectu effectus, sed loco intentionis, est motus quo movetur à principali agente.* Sed *instrumentum animatum . . . non solum movetur, sed . . . quodammodo movet se ipsum, in quantum sua voluntate movet membra ad operandum, & ideo requiritur ejus intentio, qua se subjiciat principali agenti.* Ergo ex S. Thoma Minister Sacramentorum debet subjici Christo; nec subicitur, nisi quatenus intendit facere quod Christus instituit. Secundam affert rationem; quia quæ sunt præter intentionem, sunt casualia: atqui Sacramenta non sunt casualia: ergo non perficiuntur præter intentionem, multò minùs contra intentionem Ministri. Unde S. Doctor concludit art. 10. Ministrum, qui

agit per jocum etiam interiorē, non conficere Sacramentum. *Intentio Ministri, inquit, potest perverti dupliciter, uno modo respectu ipsius Sacramenti, puta cum aliquis non intendit Sacramentum conferre, sed derisorie aliquid agere. Et talis perversitas tollit veritatem Sacramenti, præcipue quando suam intentionem exterius manifestat. Quæ cum ita clara sint, ut obscurari nequeant, superest, ut cum iis concilientur verba nobis opposita.*

Sanctus itaque Thomas loco in objectione laudato, vult duntaxat satis esse ad veritatem Sacramenti, si Minister voluntariè, & seriò faciat quod scit Christum instituisse, atque in illa operatione externa præsumi, & intelligi interiorē ejus voluntatem, quemadmodum in eo, qui deliberatè mendacium profert, vel se inebriat, intelligitur voluntas peccandi, quamvis non habuerit intentionem mentalem, seu expressam & distinctam, qua intus in corde dixerit, *volo peccare*. Ad peccandum enim, sicut ad Sacramentum conficiendum, sufficit intentio confusa & implicita. Et ita interpretari licet Albertum Magnum, & alios Veteres, cum scribunt exprimi generalem intentionem in verbo baptizandi, illamque expressionem sufficere ad intentionem Ecclesiæ.

Instabis: ideo S. Thomas, & alii antiquiores Scholastici, excludunt necessitatem intentionis interioris, ne Fideles sint anxii circa Sacramentum susceptum: atqui non tollerent eorum anxietatem, si præter opus externum requireretur Ministri intentio etiam confusa, & implicita; quia subest semper timendi locus, ne reverà defuerit: Ergo.

Nego

Nego min. quia non sunt timenda pericula remotiora, quæ vix contingunt. Sic absque periculo idololatriæ adoramus Hostiam, & sine anxietate pœnitens credit impertitam sibi fuisse absolutionem, quamvis absolutè fieri potuerit ut Sacerdos consecrans, aut absolvens, formam, quæ alta voce non profertur, integram non expresse-rit. Atqui longè facilius contingere potest Ministrum non proferre debitam formam, quàm carere voluntate faciendi quod sub oculis nostris liberè & feriò facit, plusque timendum à perduto Ministro, magicis fortè artibus dedito, ne in ritu externo quid essentielle de industria omittat, quàm ne intentionem veritati Sacramenti contrariam concipiat.

Q. Quid si impius ille Minister postmodum pœnitens confiteatur se consecrasse ad magica exercenda, & intendisse baptizare in nomine dæmonis, non in nomine Christi, debentne continuè censeri irrita illa Sacramenta?

Respondeo minimè; quia distinguenda est duplex intentio, quarum altera, & quidem sufficiens ad Sacramentum perficiendum, cum tanta impietate consistere potest. Prior dicitur intentio operis à Christo instituti, quod est Ministri finis proximus; posterior est intentio effectus per ipsum opus producendi, qui est finis remotus, & dependens à fine proximo.

Si scelestus ille Minister caruit priore intentione, & intus in corde proposuit non facere, sed exterius repræsentare duntaxat quod Christus instituit, & observatur apud Christianos, irrita sunt illa Sacramenta, ut patet ex dictis. Si verò intentio operis à Christo instituti non defuit, illudque Minister, quamvis perfunctoriè & ex officii

necessitate, perfecit cum detestanda tamen intentione abutendi Sacramento ad magica, & diaboli, non Christi characterem imprimendi, valent illa Sacramenta: quia ex S. Thoma cit. art. 10. perversa illa intentio est quid consequens ipsum opus, seu Sacramentum: pervertit quidem opus, *in quantum est opus Ministri*: in eo quippe est horrendum sacrilegium; *non autem in quantum est opus Christi*, cujus effectum impedire nequit. Sacramenta enim operantur ad instar causarum naturalium, quæ si applicentur subjecto disposito, effectum necessariò producant ignis v. g. stupæ admotus, velit nolit admovens, illam incendit, & Baptismus cum intentione operis collatus necessariò justificat, si suscipiens non ponat obicem, imprimitque characterem Christi, non obstante prava Ministri intentione imprimendi characterem diaboli. Cum autem non cujusvis sit ista utpote difficilia, discutere & enucleare, sequitur, quod jam præmonuimus, consulendum Episcopum, ut moris est, quando agitur de iterando Sacramento Baptismi, Confirmationis, & Ordinis.

CAPUT XIV.

Utrùm fides & probitas in Ministro requirantur ad Sacramenti veritatem?

Negarunt tertio sæculo S. Cyprianus Episcopus Carthaginensis, S. Firmilianus Episcopus Cæsariensis in Cappadocia, & plures magni viri, rata esse Sacramenta ab Hæreticis collata, baptizatosque ab eis rebaptizabant. Hunc errorem initio quarti sæculi extenderant Donatistæ ad omnem pecca-

peccatorem, sive publicum, sive occultum, ut refert S. Aug. lib. 2. contra Cresconium, cap. 28. Sed argumentis Catholicorum convicti restrinxerunt ad solos peccatores publicos, ex eodem S. Doctore lib. 2. contra Parmenianum capite 12. Donatistas secuti sunt XII. sæculo Apostolici Valdenses, Albigenes; sub finem decimi quarti Hufitæ; & decimo sexto Anabaptistæ. Contra hos omnes

Respondeo 1. de fide est, pietatem in Ministro non requiri ad Veritatem Sacramenti.

Probatur 1. ex Conciliis. Constantiense damnavit sub anathemate errores Wiclefi, cujus hic erat art. 4. *Si Episcopus vel Sacerdos, est in peccato mortali, non ordinat, non conficit, non consecrat, non baptizat.* Item Concilium Tridentinum sess. 7. can. 12. sic statuit: *Si quis dixerit Ministrum in peccato mortali existentem, modò omnia essentialia, quæ ad Sacramentum conficiendum, aut conferendum pertinent, servaverit, non conficere Sacramentum, anathema sit.*

Probatur 2. auctoritate S. Augustini, qui multos libros in hanc rem conscripsit. Sufficiat nunc referre quod scribit tract. 5. in Joan. *Baptisma, inquit, tale est, qualis est ille, in cujus potestate datur, non qualis est ille, per cujus ministerium datur non exhorreat Columba ministerium malorum, respiciat Domini potestatem. Quid tibi facit malus Minister, ubi bonus est Dominus? . . . quod dabatur à Paulo, & quod dabatur à Petro, Christi erat, & quod datum est à Juda, Christi erat. Dedit Judas, & non est baptizatum post Judam: dedit Joannes, & baptizatum est post Joannem; quia qui datus est à Juda, Christi erat; qui autem datus est à Joanne, Joannis erat . . . non timeo adulterum,*

verum, non ebriosum, non homicidam, quia Columbam attendo, per quam mihi dicitur, hic est qui baptizat . . . aqua ad areolas vehitur in canali lapideo nihil generans, hortis tamen plurimam confert fertilitatem; solis vel etiam lucernæ lux cum per cænosa diffunditur, nihil inde sordium contrahit. Et lib. 3. contra Cresconium c. 8. agricolæ sordes non impediunt quin ager ab eo excultus fructum ferat.

R. 2. De fide quoque est, in Ministro fidem non requiri ad veritatem Sacramenti: ita definit Concilium Tridentinum expressè de baptismo sess. 7. can. 4. his verbis: *Si quis dixerit Baptismum, qui etiam datur ab Hæreticis in nomine Patris, & Filii, & Spiritus Sancti, cum intentione faciendi quod facit Ecclesia, non esse verum Baptismum; anathema sit.*

Q. 2. Quare Tridentinum rem expressè non definiit de Ministro aliorum Sacramentorum, sed solius Ministri Baptismi meminit?

R. 1. Quia Sacramenta Pœnitentiæ & Matrimonii, cum consistant in materia morali, speciali modo subjacent Ecclesiæ dispositioni. Enimverò Sacramentum Pœnitentiæ institutum est per modum judicii, quod sane est quid morale: ad iudicium autem exercendum imprimis jurisdictio ita necessaria est Ministro tanquam Judici, ut sine ea absolutionis sententiam validè non ferat. Hanc autem jurisditionem conferre vel denegare prorsus est penès Ecclesiam. Unde si hæretico Ministro eam deneget, vel jam concessam revocet, verum erit dicere Sacerdotem sine fide Sacramentum Pœnitentiæ ministrare non posse.

Similiter Matrimonium est species quædam contractus, qui ut validus sit requiruntur certæ solemnitates ab Ecclesia determinatæ vel determinan-

minandæ : sicut ergo Ecclesia sanxit nullum esse ejusmodi contractum inter consanguineos, v. g. in quarto gradu ; ita sancire potest irritum fore, si Catholicus cum Hæreticis contrahat, sicque necessaria erit fides ad Matrimonium celebrandum.

R. 2. Quia nonnulli Theologi docent Sacramentum Confirmationis & Ordinis consistere in ritu morali, ac proinde Ecclesiam posse quasdam conditiones apponere, putà fidem & probitatem in Ministro, sine quibus Sacramenta illa irrita erunt ; suamque sententiam probant auctoritate multorum Conciliorum, in quibus statuitur baptizatos ab hæreticis, atque ideò confirmatos, cum antiquitus Baptisma, Confirmatio simul administrarentur, si ad Ecclesiam redeant, recipiendos esse cum manuum impositione & unctione, quod secundum illos Theologos Sacramentum Confirmationis designat. Ita ferè Maldonatus Societatis Jesu, q. 1. de Confirmatione, & Joannes Morinus Congregationis Oratorii, lib. 9. de Pœnit. c. 11. Item Ordinatos ab Hæreticis, Schismaticis & Simoniacis, plura Concilia non agnoscunt tanquam Sacerdotes aut Episcopos, nisi prius manuum impositioni subjiciantur (hoc est, ut interpretatur laudatus Morinus exercitatione 4. de sacris Ordinationibus c. 1.) nisi iterum ordinentur, & ad suam sententiam confirmandam, profert auctoritatem omnium ferè Canonistarum, & plurium Theologorum, præsertim verò Magistri Sententiarum in 4. dist. 13. Petri Pictaviensis lib. 5. Sententiarum cap. 13. imò duo illi Theologi cum Hugone Victorino in Summa tract. 6. c. 9. censuerunt Eucharistiam ab Hæreticis aut Excommunicatis non posse confici, utpote quæ
fit

fit signum unionis, quam solvunt Hæretici & Excommunicati. Hanc autem posteriorem sententiam, utpote singularem, fat ex se ruituram, quin jamdudum extinctam Tridentinum neglexit: fatisque ei visum est docere sess. 22. c. 1. Hostiam, quæ in altari offertur, nulla indignitate aut malitia offerentium inquinari posse.

Ex his patet, salva fide, posse dici Hæreticum, Excommunicatum, & impium Ministrum nonnulla Sacramenta conficere non posse; cum omnes Catholici id fateantur de Hæreticis, & Excommunicatis non toleratis, quoad Sacramentum Pœnitentiæ, propter rationes mox allatas.

Licet autem opinio citatorum Theologorum, qui propositionem ad Confirmationis & Ordinationis Sacramenta extendunt, fundamento careat, Tridentinum tamen illam reliquit intactam, maximè cum illi Theologi in dogmate Catholico conveniant, nempe ex institutione Christi, defectum pietatis & fidei in Ministro non nocere veritati Sacramentorum, sed ex sola Ecclesiæ dispositione, quæ dispositio cum non possit habere locum circa Baptismum, cujus Ministri extraordinarii possunt esse non solum Hæretici ab Ecclesia præcisi, sed etiam Pagani, de solo Baptismo expressè Concilium rem definiit.

Q. 3. Fides & probitas Ministri requiruntur ne ad veritatem aliorum Sacramentorum?

R. Neque ex institutione Christi Domini, neque ex dispositione Ecclesiæ fides & probitas Ministri requiruntur ad veritatem ullius Sacramenti, excepto Pœnitentiæ Sacramento, de quo supra.

Q. 4. Quomodo probatur hæc responsio?

R. 1. Non potest evidenter probari ex Scripturis. Ita Sanctus Augustinus lib. de unitate Eccle-

clesiæ cap. 19. *Fortè dicis, inquit, lege mihi quemadmodum Christus suscipi jusserit eos, qui ab Hæreticis transire ad Ecclesiam volunt; hoc apertè neque evidenter ego lego, nec tu Cum hoc nusquam legatur, credendum est testimonio Ecclesiæ quam veram esse Christus testatus est.* Et lib. 1. contra Cresconium c. 33. *Quamvis hujusce rei certè de Scripturis Catholicis non proferatur exemplum, earundem tamen Scripturarum etiam in hac re à nobis tenetur veritas, cum hoc facimus, quod universæ placuit Ecclesiæ, quam ipsarum Scripturarum commendat auctoritas.*

Duo tamen potissimùm Scripturæ testimonia proferuntur. Primum, Circumcisio celebrata à Samaritanis, qui erant Hæretici, & à Judæis separati, nunquam fuit repetita, nec Christus ullum veteris legis Sacramentum reprobavit propter malitiam ministrantium. Secundum: Judas, qui numeratur inter non credentes (Joan. 6.) validè baptizavit.

Verùm etsi hujusmodi argumenta probabilia sint, tamen rem non evincunt.

Ad primum enim respondetur diversam esse rationem & institutionem Sacramentorum veteris & novæ Legis, nec paritatem esse quærendam in factis, quæ pendent à libera auctoris voluntate, ut videre est in duobus sequentibus argumentis à paritate ductis. Character non erat necessarius in Ministro ad celebrandum ritum Agni Paschalis: ergo neque etiam nunc ad conficiendam Eucharistiam. Item Minister excommunicatus non toleratus validè non absolvit in Sacramento Pœnitentiæ, ergo nec alia Sacramenta conficere potest: sive in veteri, sive in nova Lege.

Ad secundum, 1. non legimus omnes & singulos

los Discipulos baptizasse ; sed generatim habetur Joann. 4. quòd Discipuli Christi baptizabant : potuit autem Christus cavere ne Judas oculos habens , & aliis curis detentus , baptizaret. 2. Esto, baptizaverit ; tamen certum non est ipsum baptizasse postquam fidem amisit. 3. Etsi baptizaverit jam infidelis, Scriptura non refert Baptismum ab illo collatum non fuisse iteratum. Denique infidelitas Judæ erat occulta, & soli Christo nota : quæstio autem est de Hæreticis publicis, & ab Ecclesia separatis. Certum autem est Judam non baptizasse postquam à Christo recessit.

R. Itaque 2. probatur efficacissimè ex constanti Ecclesiæ Traditione, quæ semper rata habuit Sacramenta ab impiis & Hæreticis collata , modò ritum à Domino præscriptum observarint.

1. Quoad Baptismum, S. Stephanus summus Pontifex, qui Martyr occubuit tertio mediante sæculo, traditionem & consuetudinem Ecclesiæ opposuit Sancto Cypriano rebaptizanti tinctos ab Hæreticis. *Si quis, inquit, à quacunque hæresi venerit ad nos, nihil innovetur nisi quod traditum est, ut manus illi imponatur in pœnitentiam.* Hæc verba refert Sanctus Cyprianus epist. 74. ad Pompejum Episcopum Sabratensem. Cùm autem hujus Traditionis initium non inveniatur : rectè concludit S. Augustinus, eam ab Apostolis descendere, l. 2. de Baptismo cap. 7.

Decretum Sancti Stephani confirmarunt plura Concilia celebrata posterioribus sæculis. Primo loco occurrit Arelatense l. ann. 314. can. 8. his verbis : *Placuit ut si ad Ecclesiam aliquis de hæresi venerit, interrogent eum symbolum ; & si perviderint eum in Patre, & Filio, & Spiritu Sancto esse baptizatum,*

zatum, manus tamen ei imponatur, ut accipiat Spiritum Sanctum. 2. Concilium Nicænum I. quod est primum Generale anno 325. hæc habet can. 19. *De Paulianistis, qui deinde ad Ecclesiam confugerent, statutum est, ut omnino rebaptizentur: si in Clericorum numero erant . . . rebaptizati ordinentur à Catholicæ Ecclesiæ Episcopo.* Hæc autem statuit Concilium de Paulianistis; quia non baptizabant in nomine Patris, &c. Unde collegerunt Patres, Baptismum ab hæreticis collatum in forma præscripta, secundum mentem Concilii non esse repetendum. *Synodus quoque Nicæna, inquit S. Hieronymus in Dialogo contra Luciferianos, omnes Hæreticos suscipit, exceptis Pauli Samosatani discipulis.* 3. Concilium Carthaginense III. anno 397. idem statuit cap. 38. *Illud, inquit, suggerimus mandatum nobis, quod etiam Capuensi plenaria Synodo videtur statutum; (anno scilicet 389.) non liceat fieri rebaptizationes & reordinationes.*

Ad eandem Ecclesiæ fidem tuendam libros integros scripserunt quarto sæculo contra Donatistas rebaptizantes, Optatus Milevitanus, & S. Augustinus. Cum autem jactarent Donatistæ Patronum habere S. Cyprianum egregium Ecclesiæ Doctorem & Martyrem, respondet S. Augustinus, magistrum esse excusandum: tum quia pacem & unitatem servavit: tum quia quæstio de Baptismo Hæreticorum nondum erat discussa; at verò discipulos esse damnandos, cum schisma fecerint, & veritas, jam omnibus discussis ambagibus, plenario Concilio fuerit confirmata: ita lib. 2. de Baptismo cap. 9.

Quodnam verò sit illud plenarium Concilium in mente S. Augustini dissentiunt Theologi: aliis videtur Nicænum I. quia non aliud erat plenari-

rium totius orbis Christiani, cùm scriberet S. Augustinus. Alii contra probabilius contendunt fuisse Arelatense I. tum quia in illo Concilio damnati sunt Donatistæ, & eliquata est controversia de Baptismo, ex S. Aug. concione 2. in Psal. 36. In Nicæno verò nihil est circa Donatistas, nec quæstio de Baptismo fuit agitata; sed simpliciter definitum baptizatos à Paulianistis formam Baptismi corrumpentibus, esse rebaptizandos: tum quia Arelatense Concilium dici potest totius orbis Christiani plenarium; cùm ad illud confluerint Episcopi, non solum ex Gallia: sed ex Hispania, Italia, Britannia, & Africa, quanquam nunc desint eorum subscriptiones.

Quoad Confirmationem, testis est Optatus lib. 7. contra Parmenianum, Ecclesiam admisisse illud Sacramentum ab Hæreticis collatum; sic enim scribit: *Numquid nos exterminamus oleum vestrum, ut nos muscas morituras appelletis? quod vestrum est, apud nos est; & si à vobis ad nos aliquis transitum fecerit, sic à nobis servatur, quomodo à vobis dimittitur? Quomodo dicitis; quia nos sumus muscæ morientes; suavitatem olei corrumpentes, cùm post vos nihil tale fecerimus?*

S. Aug. lib. 5. de Baptismo cap. 19. ex eo quòd concederet S. Cypr. homicidam & alios peccatores in Ecclesia Sacramenta conficere, & ad eorum invocationem Spiritum sanctum dari, his verbis argumentatur ad hominem, ut ajunt, *Quomodo aquam mundat, & sanctificat homicida? quomodo benedicunt oleum tenebræ? Si autem Deus adest Sacramentis, & verbis suis per qualeslibet administrentur, & Sacramenta Dei ubique recta sunt, & mali homines, quibus nihil profunt, ubique perversi sunt . . . cur ad verba, quæ procedunt ex ore homicidæ, possit tamen Deus oleum sancti-*

sanctificare, & in altari, quod posuerunt Hæretici, non possit, nescio.

Avitus Viennensis Episcopus, qui anno 527. hominem exuit, respondet epist. 24. Stephano Lugdunensi interroganti, quomodo Donatista pœnitens recipiendus esset, *manus impositionem personæ, de qua scribitis, adhibete quam constat si reverà in supradicti schismatis professione versata est, cum ministerio Baptismatis, etiam chrismate consignatam; quibus verbis Avitus apertè declarat Confirmationem à Donatistis collatam non esse repetendam.*

3. Quoad Ordinationes: eas ab Hæreticis validè conferri agnovit Concilium Nicænum I. c. 8. in quo hæc de Novatianis habentur; quòd si inter eos qui ab istis ad Ecclesiam Catholicam redeunt, fuerit Episcopus, non sit privandus Sacerdotii dignitate. Et hoc Decretum ab universali Ecclesia susceptum fuisse tanquam regulam certissimam; testatur S. Hieronymus Dialogo contra Luciferianos; *Nicæna Synodus, inquit, Episcopo Novatianorum, si conversus fuerit; Presbyterii gradum servat. Cùmque Luciferianus admitteret Baptismum ab Arianis collatum, rejiceret verò Ordinationem, ex concessis S. Doctor sic urget: Si in fide sua baptizato baptizans (Arianus) nocere non potuit & in fide sua Sacerdotem constitutum constituens (Arianus) non inquinavit. Arianus baptizat, ergo Episcopus est. Eadem ratione Episcopum ab Arianis recipio, qua tu recipis baptizatum.*

Juxta Nicænum Decretum susceperunt ordinatos ab Hæreticis Concilium Alexandrinum, præfide S. Athanasio anno 392. Ephesinum generale III. anno 431. actione 7. & Nicænum II. quod est septimum generale octavo sæculo, actione 1.

Item S. Augustinus lib. 2. cap. 10. contra Cresconium, asserit hanc fuisse in Africa consuetudinem, ut cum suis Ordinibus Donatistæ pœnites reciperentur epist. 93. aliàs 48. num. 46. ad Vincentium Donatistam, *Ex Catholica . . . Ecclesiâ, inquit, sunt omnia Dominica Sacramenta, quæ sic habetis & datis, quemadmodum habebantur & dabantur . . . priusquam inde exiretis. Non tamen ideò non habetis, quia ibi non estis, unde sunt quæ habetis . . . Nobiscum . . . estis in Baptismo, in Symbolo, in cæteris dominicis Sacramentis.* Quæ S. Augustini verba extenduntur ad omnia Sacramenta, de quibus posset esse controversia. Sed cùm de tribus recensitis solùm in Ecclesiâ sit disputatum, de cæteris nihil addemus.

Solvuntur Objectiones ex Traditione petitæ.

Objicies 1. ex dictis, quæstio de veritate Sacramenti ab Hæreticis collati, sola Traditione, & constanti usu Ecclesiæ elucidari debet: atqui ab initio nascentis Ecclesiæ, Sacramenta ab Hæreticis collata fuerunt semper rejecta: ergo reverà sunt rejicienda, & pro nullis habenda.

Minor probatur

1. Can. 45. & 46. Apostolorum, pœna depositionis imponitur Episcopo & Presbytero, qui Hæreticorum Baptismum, vel sacrificium admiserit.

2. Agrippinus Episcopus Carthagenensis, quadraginta annis ante S. Stephanum, irritum declaravit Baptismum ab Hæreticis collatum, cui sententiæ Tertullianus Presbyter ejusdem Ecclesiæ adhæsit: tempore autem Sancti Stephani, S. Cypria-

Cyprianus eandem sententiam propugnavit contra Sanctum Stephanum, eamque in duobus Conciliis confirmavit. Nec pluris facienda est Sancti Stephani opinio: tum quia in errore opposito ipse summus Pontifex versabatur, nempe Baptismum omnium Hæreticorum esse recipiendum, etiam si in forma peccarent; tum quia consuetudini quarundam Ecclesiarum, qua nitebatur, opponerent: Sanctus Cyprianus Traditionem Ecclesiæ Africanæ, & Sanctus Firmilianus Episcopus Cæsariensis in Cappadocia, consuetudinem totius Ecclesiæ Orientalis, Synodos Iconiensem & Synadensem, & plures Episcopos Asiaticos rebaptizantes eos, qui ab Hæreticis revertebantur; hinc excommunicationis sententiam contra rebaptizantes, tanquam injustè latam à Stephano contempserunt, intemperanterque ejus zelum reprehenderunt non solum Cyprianus & Firmilianus; sed & Sanctus Dionysius Alexandrinus, apud Eusebium lib. 7. Hist. cap. 14. qui Sixto Stephani successori mitiora suavit consilia: tum denique quia quarto etiam sæculo clarissima Ecclesiæ lumina, S. Athanasius Alexandrinus, Cyrillus Jerosolymitanus, & Basilius Magnus, nullatenus moti auctoritate Sancti Stephani, Decretum Cypriani & Firmiliani de Hæreticis rebaptizandis secuti sunt.

3. Posterioribus sæculis, qui ordinati sunt ab Hæreticis, Schismaticis, & Simoniacis, dicuntur nihil accepisse, eorumque ordinationes prorsus rejectæ fuerunt; nam ex Sigeberto tom. 1. Historiæ ad annum 761. Constantino invasore Sedis Romanæ ejecto, oculisque privato, Stephanus IV. in Synodo ex Episcopis Italiæ & Galliæ con-

gregata, omnia à Constantino ordinata ordinat, præter Baptismum & Chrisma: & Urbanus II. undecimo exeunte sæculo in Epistola, quæ refertur à Gratiano in Decreto causa prima q. 7. cap. 24. de Daiberto à quodam Nezelone simoniacè ordinato sic scribit: *Daibertum ex integro Ecclesiæ necessitate ingruente Diaconum constituimus, quod non iterationem existimari censemus; sed tantum integram Diaconi dationem; quoniam qui nihil habuit, nihil dare potuit.*

Nego min. & ad singula in ejus confirmationem adducta respondeo.

Ad primum. Canones, qui circumferuntur sub nomine Apostolorum, non sunt illorum opus, cum contraria eorum doctrinæ contineant, & sæculo sanctorum Cypriani & Firmiliani fuerint omninò incogniti, aliàs in defensionem suæ sententiæ haud dubiè illos protulissent. Sunt ergo collectiones diversorum Conciliorum particularium. Canones autem in objectione citati, excerpti sunt ex Synodis Iconiensi, & Synadensi, quæ sine ambiguitate cedere debent Concilio plenario totius orbis, ut loquitur S. Aug. lib. 2. de Baptismo c. 3.

Ad secundum. Consuetudo admittendi Baptismata, ab Hæreticis collata, quam Sanctus Augustinus loco citato agnoscit ab Apostolis descendere, non vixit in sola Italia, sed & in Africa, & Oriente, testibus S. Cypriano & Firmiliano; nec negavit S. Cyprianus summum Pontificem Stephanum pro antiqua consuetudine pugnasse; sed eam appellabat veterem errorem.

Falsissimum est autem S. Stephanum approbasse omnium Hæreticorum Baptismata, quovis ritu celebrata; constat enim ex S. Firmiliani ep. quæ

quæ est 75. inter Cypriani ep. S. Stephanum de folis Hæreticis baptizantibus in nomine Patris, & Filii, & Spiritus sancti, fuisse locutum, *illud quoque absurdum*, inquit Firmilianus, *quod non putant querendum esse quis sit ille qui baptizaverit, eò quod qui baptizatus sit, gratiam consequi potuerit, invocata Trinitate nominum Patris, & Filii, & Spiritus sancti, . . . at quis est qui hoc aut defendat, aut credat, quod invocatio hæc nominum nuda sufficiat ad remissionem peccatorum?* Similia scribit S. Cyprianus ep. 74. ad Pompejum, his verbis: *Cur in tantum Stephani fratris nostri obstinatio dura prorupit, ut etiam de Marcionis Baptismo, item Valentini, & Appellis, & cæterorum blasphemantium in Deum Patrem contendat filios Dei nasci, & illic in nomine Jesu Christi dicat remissionem peccatorum dari, ubi blasphematur in Patrem, & in Dominum Deum Christum?* Ubi supponit S. Cyprianus, ideo S. Stephanum ratum habuisse Baptismum Marcionis, Valentini, & Appellis; quia in nomine Christi, & sub invocatione sanctissimæ Trinitatis illum conferebant. Hæc sanè testimonia præferenda sunt auctoritati Benedicti XII. qui adhuc Cardinalis, 14. sæculo scripsit Stephanum & Cyprianum in oppositos errores incidisse. Quasi verò universa Ecclesia, quæ tota in duabus illis partibus continebatur, erraverit. Frustra objiciunt Blondellus Calvinista: & nonnulli Theologi orthodoxi, Stephanum non distinxisse inter hæreticos, quorum multi formam Baptismi non servabant, sed omnium Baptisma recipiendum sanxisse. Etiam Cypr. & Firmilianus verba summi Pontificis non intellexerunt, nisi de Hæreticis, qui baptizabant in nomine Christi, & sub invocatione Sanctissimæ Trinitatis, ut pat-

tet ex cit. illorum epist. Ex ipsis terminis quibus Stephanus in suo Decreto usus est, *nihil innovetur, nisi quod traditum est*, patet, quæ fuerit ejus mens, nempe ipsi ratum non fuisse aliud Baptisma, quàm quod Traditio probaverat, quæ sanè non aliud quàm verbis Evangelicis præscriptaque à Christo formula collatum probavit.

At, inquires, Stephanus decrevit admitti debere Baptisma, ubicunque collatum fuisset. Si quis, inquit, à quacunque hæresi venerit ad nos, &c. Ergo apud ipsum valuit Baptismus etiam cum forma corrupta collatus.

R. Has voces, Si quis à quacunque hæresi, &c. his aliis, quas subjecit S. Pontifex, *nihil innovetur, nisi quod traditum est*, restringi ad Baptisma, quod Traditio probaverat, uti modò dicebamus.

Controvertitur autem, an S. Stephanus de facto excommunicaverit S. Cyprianum & Firmilianum, vel intra minas se continuerit?

Firmilianus quidem videtur colligere latam à Stephano fuisse excommunicationis sententiam, ex eo quòd Cypriani nuntios non solum ad colloquium non admiserit, sed etiam caverit, ne Romæ hospitio reciperentur. Quamobrem durioribus hisce verbis cit. epist. Stephanum alloquitur. *Lites & dissensiones quantas parasti per Ecclesias totius mundi? peccatum verò quàm magnum tibi exaggerasti, quando te à tot gregibus scidisti? exscidisti enim te ipsum, noli te fallere; siquidem ille verè est Schismaticus, qui se à communione Ecclesiasticæ unitatis apostatam fecerit, dum enim putas omnes à te abstinere posse, solum te ab omnibus abstinuisti.*

Sed contrarium visum est Sancto Augustino, qui sic scribit lib. 5. de Baptismo cap. 25. *Stephanus*

phanus etiam abstinendos putaverat, qui de suscipiendis Hæreticis priscam consuetudinem convellere conarentur: ille (Cyprianus) autem quidem ipsius difficultate per-motus, & sanctis charitatis visceribus largissimè præditus in unitate cum eis manendum, qui diversa sentirent. Ita quamvis commotius, sed tamen fraternè indignarentur, vicit tamen pax Christi in cordibus eorum, ut in tali disceptatione, nullum inter eos malum schismatis oriretur. Ex quibus verbis patet, Stephanum non actu & de facto communionem scidisse, sed scindendam putasse, nullumque inter ipsum & Cyprianum ortum esse schismatis malum, quod sanè apertum & perniciosum extitisset, si excommunicationis gladio divisi, in opposito dogmate obfirmati permanissent. Igitur Stephanus non ideò negavit colloquium & hospitium Cypriani Legatis, quia pro excommunicatis eos habebat; sed quia no-lebat adduci in controversiam dogma fidei jam à se definitum, cavebatque vigilantissimus Pastor, ne diutiùs Romæ commorantes, gregem sibi commissum errore suo inficerent: Dura ac acerbiori agendi ratione opus esse censuit, ut Orientales & Africanos ad praxim traditione Apostolica in-nixam revocaret. Nec fingere licet Cyprianum & Firmilianum ante mortem errorem deseruisse; duo enim obstant. Primum Donatistæ quarto sæculo, Cypriani auctoritate schisma suum excu-sabant, ipsumque habere Magistrum & Patro-num gloriabantur: Ergo S. Cyprianus sententiam suam non mutaverat; aliàs, ipso Judice, Dona-tistæ damnandi fuissent. Secundum, S. Basilus, qui post centum annos & ampliùs à morte Fir-miliani ad regimen Ecclesiæ Cæsariensis assumptus est, rebaptizandi morem à prædecessore in Ec-clesia

clesia sua invecum ex parte amplexus est, ut mox dicetur; ex quo necessariò colligitur, S. Martyrem non correxisse pristinam sententiam.

At, inquires, qui fieri potuit tantos viros, quos Ecclesia colit ut Sanctos spretis monitionibus Summi Pontificis, in errore suo usque ad mortem perseverasse?

R. Quidam è recentioribus respondent, beatos illos Martyres cum suis collegis Episcopis existimasse controversiam pertinere ad disciplinam, quæ si universalis Ecclesiæ lege firmata non fuerit, ita liberum est cuilibet Episcopo eam in sua Diœcesi vel retinere, vel immutare, ut propter eam novitate accusari non possit. Sicut ipse S. Cyprianus non duxit cogendos suos Suffraganeos adhærere suæ sententiæ; ita non existimavit in hac parte morem gerendum Pontifici Romano, quamvis Primatum ejus non inficiaretur.

Verùm S. Doctor non ignoravit quæstionem de veritate Baptismi prorsus spectare jus divinum, non verò disciplinam Ecclesiasticam; totus enim est in colligendis Scripturæ textibus ad elucidandam motam difficultatem, probandumque ex institutione divina Baptismum ab Hæreticis collatum esse prorsus irritum. Cùm autem alii aliter hac de re sentirent, nec veritas satis esset eliquata, ut loquitur S. Aug. usus est ea libertate, quam aliis Episcopis permisit vir pacis & unitatis amantissimus, ut singuli observarent quod verius ipsis videretur; constat enim ex Epistolis tum Cypriani, tum Firmiliani, plures Episcopos sive in Africa, sive in Oriente, admisisse Baptismum ab Hæreticis collatum.

Ad

Ad auctoritatem Agrippini & Tertulliani ejus Presbyteri,

R. Cum non præcesserint Sanctum Cyprianum, nisi quadraginta annis, sintque antiquissimi, quos S. Doctor appellet pro sua sententia, inde arguitur ejus novitas, & confirmatur antiquitas Traditionis, pro qua S. Stephanus fortiter pugnabat.

Ad tertium, quidam ducti auctoritate S. Hieronymi lib. de Scriptoribus Ecclesiasticis, putant S. Dionysium consensisse S. Cypriani dogmati. Verum duo contrarium suadent. Primum, quia nunquam Cyprianus & Firmilianus gloriati sunt Patrono tam celebri, non solum ob eminentiorem sedem, sed etiam ob egregias virtutes & singularem doctrinam. Imò S. Basilius Epistola canonica ad Amphilochem c. 1. testatur S. Dionysium admisisse Baptismum quorundam Hæreticorum, qui Pepuzeni seu Montanistæ dicebantur. Secundum, quia Sanctus Dionysius mediatorem egit pro Sanctis Cypriano & Firmiliano apud Sanctum Stephanum, ut ipse testatur Epistola ad Sixtum ejus successorem, cujus Epistolæ fragmentum refert Eusebius lib. 7. cap. 5. Historiæ. Qualis autem mediator, si ipsemet in eodem quo Orientales laborabant, errore versatus fuisset? Hortatur quidem Summum Pontificem, ut mitius agat, neque unitatem gladio excommunicationis scindat, cum periculosum sit in odium, & in invidiam conjicere tot Episcopos ab ipso dissentientes, ut loquitur in epistola ad Philemonem Ecclesiæ Romanæ Presbyterum citato libro Eusebii. Ad summum ergo Dionysius censuit excusandos, donec quæstio maturius examinaretur;

retur; & ita visus est S. Hieronymo propendere in sententiam S. Cypriani, circa quam tamen hærebat, cum Sixtum consuluerit quid facto esset opus, circa quendam ab Hæreticis jamdudum baptizatum.

Quæ autem fuerit mens Sancti Athanasii ambigitur. Etenim oratione tertia contra Arianos, dicit vanum planè & inutile Arianorum Baptisma; *sicuti*, inquit, *creatura diversum quiddam est à filio, ita diversum quiddam à vero Baptismate est quod ab illis existimatur dari, tametsi nomen Patris & Filii simulent se nominare.* Et infra, comparat Baptisma Arianorum cum Baptismate Paulianistarum, quod prorsus irritum erat, cum illi Hæretici in forma peccarent. Attamen idem Sanctus Doctor in citata Synodo Alexandrina, quam celebravit anno 362. decrevit cum cæteris Episcopis, redeuntes ad unitatem Ecclesiæ Episcopos, Presbyteros, & Diaconos recipiendos cum honoribus, imprimis qui in veteri Ecclesiæ communione fuerant, ut habetur in Epistola Synodica; quibus posterioribus verbis refelluntur qui volunt in Concilio agi tantum de iis, qui jam ordinati in Ecclesia ad hæresim defecerant; illi quidem inprimis recipiuntur cum honoribus, sed non illi soli, ut referunt Socrates lib. 2. hist. cap. 1. & Sozomenus lib. 4. cap. 28. Huic autem sententiæ consensit totus Occidens, ex Hieronymi Dialogo contra Luciferianos.

Videtur ergo S. Athanasius existimasse, questionem illam pertinere ad disciplinam, hoc est Christum Ecclesiæ potestatem reliquisse apponendi condiciones in Ministro Sacramentorum mutandas pro vario rerum statu.

Quodd

Quòd autem S. Basilius fuerit in illa sententia, colligitur ex cit. c. 1. Epistolæ canonice ad Amphilochem, ubi clariùs loquitur, quàm ut verba ejus ad sensum S. Stephani detorqueri possint, sicut conantur nonnulli recentiores; *quoniam*, inquit, *nonnullis Asiaticis omninò visum est propter multorum æconomiam & dispensationem eorum* (Catharorum seu Novatianorum) *Baptisma suscipi, suscipiatur.* Subdit de Baptismo Encraticarum, dicitque rejiciendum, quia de illo nihil statutum: si tamen hæc praxis obesset tranquillitati & paci Ecclesiæ, concedit talem recipi Baptismum.

Quod spectat S. Cyrillum Jerosolymitanum, fatemur illum fuisse in sententia rebaptizantium: *unus Dominus*, inquit in Præfatione ad Catecheses, *una fides & unum Baptisma, nam soli Hæretici rebaptizantur, siquidem prius illud non erat Baptisma.*

Ex his patet, quæstionem de Baptismo Hæreticorum non fuisse ubique elucidatam & terminatam, nisi sub finem sæculi quarti, ac proinde controversiam illam turbasse Ecclesiam per ducentos ferè annos; ratio autem cur tamdiu fuerit agitata, ea est, quòd Concilium Arelatense I. celebratum in Galliis anno 317. ad notitiam Orientalium non venerat. Concilium verò Nicænum definierat tantum can. 8. pœnitentes Novatianos cum honoribus suis esse recipiendos. Can. verò 2. rejiciendum Baptisma Paulianistarum; quia formam à Christo præscriptam non servabant. Inde sequitur quidem Baptismum aliorum Hæreticorum, qui non peccabant in forma, esse recipiendum; sed Cyrillus Jerosolymitanus, Basilius, & alii, id non colligebant.

Objicies 2. Multò post quartum sæculum rebaptizandi dicuntur iidem Hæretici, quorum Baptisma quarto sæculo admittebatur, nam S. Hieronymus Dialogo contra Luciferianos negat Cerinthianos, Ebionitas, & Manichæos fuisse rebaptizatos. Gennadius verò quinto sæculo scribit lib. de Dogmatibus Ecclesiasticis cap. 22. aliàs 52. Montanistas, Manichæos, & alios hujusmodi iterùm baptizari. Imò Concilium Constantinopolitanum anno 688. admittit omnes canones Apostolorum, & Synodos à S. Cypriano celebratas, in quibus reprobatum Baptisma Hæreticorum.

R. 1. Diversitas illa tribuenda non est versatili Ecclesiæ disciplinæ, sed inconstantiae Hæreticorum, præsertim eorum, qui de Trinitate malè sentiebant; hi enim pro variis locis & temporibus ritum Baptismi mutabant, & in eo errorem suum identidem exprimebant; & hoc supponit Gennadius loco citato: *Illos, inquit, qui non Sanctæ Trinitatis invocatione apud Hæreticos baptizati sunt, baptizari debere pronuntiamus, ut sunt Montanistæ, & Manichæi, &c.* Ergo Manichæi tempore Gennadii formam Baptismi non servabant, cum eam servarent tempore sancti Hieronymi.

R. 2. Concilium illud Constantinopolitanum vocatur à Vener. Beda, libro de sex ætatibus, Synodus Erratica, fuitque conventus quorundam Episcoporum Orientalium in Trullo hoc est in Palatio Imperiali habitus, qui indiscriminatim antiquos canones, etiam eos, qui hæreses continebant, collegerunt, hanc autem collectionem, ex Anastasio Bibliothecario in Præfatione Versionis Concilii VIII. Generalis ad Joannem VIII. Sum-

Summum Pontificem, nec Ecclesia Rom. nec Patriarchales Ecclesiæ admiserunt.

Ad quartum, Ordinationes Hæreticorum, Schismaticorum, Simoniacorum, & Intrusorum, dicuntur irritæ, quoad jus officii & ministerii exercendi, Concedo: quoad characterem, Nego: Atque ut distinctio minus violenta, sed omninò ad sensum Conciliorum, & sanctorum Patrum appareat, attendendus est hodiernus loquendi modus in hypothesi, quòd quis per simoniam, aut per vim potiatur Sede Pastoralis, ordineturque ab Episcopo extraneo, mercede conducto, aut fortè apostata; nonne communis Catholicorum vox est, quòd talis sacrilegus non sit Sacerdos, non sit Episcopus, nec Pastor; quòd vana, irrita, & sine effectu sit ejus ordinatio; quia cum nihil haberet, qui ordinavit, nihil etiam dare potuit? Quid ita? Quia nullum prorsus jus habet obeundi munia Sacerdotalia, aut Pastoralia, non agnoscitur ut Sacerdos, neque ut Pastor; & si quid ex Ordinatione sua præsumat, reprobat ut illicitum, aliquando etiam ut irritum & nullum, nempe si sit actus jurisdictionis. Porro non alia mente locutos fuisse Patres in objectione laudatos, affirmare cogunt momenta allata pro Ordinibus non iterandis.

Instabis 1. Urbanus II. in epistola citata, testatur, se sequi sententiam Damasi Summi Pontificis, qui reprobavit Ordinationes celebratas à Chorepiscopis, qui Episcopi non erant, sed quidam Decani rurales: atqui ordinati à non Episcopis, neque characterem, neque officium acceperunt; ergo laudatus summus Pontifex censuit Daibertum nequidem accepisse characterem

Ordi-

Ordinis, ac proinde ipsum Sacramentum eidem conferendum.

Resp. 1. Difficilem reverà esse Urbani II. Epistolam, nonnullosque Theologos spuriam suspicari; aliàs Urbanus II. non solum cum Leone IX. Clemente II. & Nicolao II. sed etiam secum pugnaret, utpotè qui in Synodis Romana & Placentina statuerit admittendas Ordinationes ab Episcopis Simoniacis celebratas, quando sine simoniæ conscientia fuerant susceptæ.

Resp. 2. Distinguendo maj. Testatur se sequi sententiam Damasi quoad aliquid, Conc. quoad omnia, quasi neque characterem, neque jus ministerii agnoverit sicut Damasus, Nego maj. Itaque Urbani verba intelligi debent pro subjecta materia, de qua illius sæculo controvertebatur. Porro quæstio non erat, an Episcopus, qui pro pecuniæ pretio Ordines conferebat, characteris Ordinem retineret, nullus enim id negare ausus est; sed utrùm sic ordinati in officio Sacerdotali essent tolerandi? posterius negat Summus Pontifex, non prius, aliàs nec ordinatos sine simoniæ conscientia suscepisset, sicut reverà suscepit in Romana & Placentina Synodis. Ergo cum Nezelo, licèt Episcopus simoniacus, characterem haberet, potuit illum Daiberto conferre, quamvis omni jure Episcopali & Sacerdotali ob simoniam privatus, nullum jus Daiberto conferre potuerit. Cæterùm hîc non tam universalis Ecclesiæ causam, quàm ipsius Urbani II. agimus; detur enim quòd ipse in hac parte erraverit, ut nonnulli contendunt, quid posset ejus auctoritas contra auctoritatem tot Summorum Pontificum & Conciliorum, etiam universalium, à quibus Sum-

Summum Pontificem defecisse credendum non est, dum argumenta suppetunt, quibus excusetur?

Instabis 2. allati in objectionem textus ita distinguunt inter Baptisma & Ordinationem, ut redeuntes ex hæresi sine iterato Baptismo, manus impositionem cum unctione apud Orientales, & sine unctione apud Occidentales accipiant. Ordinati verò, si benignius cum ipsis agatur, sacrationem ordinationem percipiant, & sic ministrent: ergo secundum antiquam & constantem Ecclesiæ Traditionem, retenta veritate Baptismi apud Hæreticos collati, Confirmatio & Ordinatio iterabatur.

Nego consequentiam.

1. Namque triplex est manus impositio, alia reconciliatoria, alia confirmatoria, alia ordinatoria. Porro pœnitentes, sive in hæresim, sive in aliud grave peccatum lapsi fuissent, substernebantur manuum impositioni, quæ dicebatur reconciliatoria. Unctionem, sive chrismationem baptizatis in hæresi addebant Orientales, ut per eam adumbrarent Spiritus Sancti gratiam, quæ non nisi in Ecclesia Catholica confertur. Quod autem neque illa manus impositio, neque unctio esset iteratio Sacramenti, sive Ordinis, sive Confirmationis, patet 1. ex allatis momentis in confirmationem sententiæ Catholicæ. 2. Ex eo quod æqualiter subjicerentur manuum impositioni ex hæresi revertentes, sive fuissent in Ecclesia Catholica ordinati, sive ab Hæreticis promoti. 3. Quia Episcopi & Presbyteri qui fuerant à Photio schismatico ordinati, atque ideo à Concilio VIII. generali rejecti, quasi nihil ab Ordinatore suo accepissent, postea à Joanne VIII. consentientibus

Græcis, absque nova Ordinatione admissi sunt. Quodd autem unctio non pertineret ad Sacramentum Confirmationis, sed ad meram Ecclesiasticam cæremoniam, probatur 1. quia non adhibebatur ab Occidentalibus, sed à solis Orientalibus. 2. Quia cum Legati Nicolai I. nono sæculo iterum in Bulgaria confirmarent quos reperiebant confirmatos à Presbyteris Græcis, hac ducti opinione, quodd Presbyteri nequidem extraordinariè hoc Sacramentum conficere valeant, Photius vehementer exarsit, Epistolamque encyclicam ad Orientales Episcopos scripsit, ut Latinos in odium traheret, quodd Confirmationis Sacramentum contra morem antiquorum Patrum, & universalis Ecclesiæ, iterarent; ex quo patet usque ad nonum sæculum constantem fuisse Traditionem, etiam apud Orientales, Sacramentum Confirmationis, quamvis apud Schismaticos collatum, non posse iterari, ac proinde eos Confirmationem non iterasse, dum ab hæresi revertentes ungebant. Legati quoque, ut culpam diluerent, reposuerunt se Confirmationem ab Episcopis, quamvis Schismaticis collatam, non iterasse, sed à solis Presbyteris; nescientes Græcorum morem, secundum quem apud eos Presbyteri confirmant, quod Ecclesia Latina multò post in Concilio Florentino toleravit.

Negandum tamen non est, Novatianos pœnitentes cum Sacramento Confirmationis fuisse receptos; quia illi Hæretici, ut excusarent auctorem suæ Sectæ, qui nondum confirmatus, & ut exprobrant sancti Patres, Semi Christianus, ab Episcopis ebriis Episcopus Romæ ordinatus est, Sacramentum Confirmationis tanquam inutile negligebant.

2. Ecclesia semper observavit, sicut etiam nunc observat, discrimen Baptisma inter & Ordinationem; eo enim ipso, quo suscipitur re-
dux ab hæresi, necessario admittitur ejus Baptisma cum omnibus ejus juribus, quæ in eo consistunt, ut liceat ipsi cum omnibus aliis Fidelibus communicare, officiis divinis, & præsertim Missæ sacrificio interesse, & Sacramenta percipere. Contra verò, si in hæresi, aut per simoniam fuerit ordinatus, non suscipitur ejus Ordinatio, non admittitur ad sacrum ministerium, non gaudet Clericorum privilegiis, habeturque tanquam lacijs.

Confirmatur I. ex Innocentio I. Summo Pontifice, qui epist. 23 Baptismum & Ordinationem iterari prohibet; & tamen vult revertentes ab hæresi, sive laicos, sive Clericos suscipi per manus impositionem. 2. Ex Petro Damiani auctore undecimi sæculi, qui in opusculo sexto *Gratissimus* nuncupato, contendit ex Decreto Concilii Nicæni I. Hæreticos non ordinari, sed manuum impositioni subijci. Huic impositioni manuum docet S. Fulbertus Episcopus Carnotensis epistola 25. suo sæculo, hoc est, undecimo adjici solitam fuisse quandam benedictionis formulam cum instrumentorum & vestimentorum Sacerdotalium porrectione, quæ cæremonia dicebatur sacratio Ordinatio.

Contendendum tamen non videtur circa ordinationes nunquam peccatum fuisse, præsertim sæculo X. admodum infelici, quo Sedes Apostolica aliquando tyrannicè occupata est à flagitiosis hominibus, quales Baronius pingit Stephanum VII. & Sergium III. qui nonnulla contra ca-

nones & Ecclesiæ regulas attentarunt. Quin, & Petrus Damiani in opusculo citato, cui titulus est, *Gratissimus*, scribit Leonem IX. sanctissimum Pontificem, undecimo mediante sæculo, dum ferveret adhuc controversia circa Ordinationes, quosdam iterum ordinasse, fortè ad cautelam, & majoris securitatis gratia. Satis nobis est, quòd ex Traditione constet Sacramenta Baptismi, Confirmationis, & Ordinis ab Hæreticis & Simoniacis collata esse valida, nec iteranda.

Solvuntur Objectiones ex Scripturis petitiæ.

Jam observavimus quæstionem, in qua versamur, non ex Scripturis, sed ex Traditione posse resolvi. Nihilominus S. Cyprianus, & alii rebaptizantes, quibus Ecclesiæ consuetudo vetus error videbatur, plures Scripturæ textus à proposito prorsus alienos congerebant, quos expendere necesse est. Itaque

Objicies 1. illud Psalmi 140. *Oleum peccatoris non impinguet caput meum*: Ergo, rejiciendum est oleum Confirmationis, cùm à peccatore ministratur.

Nego conseq. Eo enim loci non agitur de Sacramentis, sed de adulationibus peccatorum, quibus justus se deliniri non patitur. Solutio patet ex ipso contextu; sic enim legitur: *Corripiet me justus in misericordia, & increpabit me; oleum autem peccatoris non impinguet caput meum.*

Objicies, 2. Eccl. 34. vers. 4. habetur: *Ab immundo quid mundabitur?* Et vers. 30. *Qui baptizatur à mortuo, & iterum tangit eum, quid proficit lavatio illius?* Atqui peccator est immundus, & vel-

veluti foetidum cadaver, cum privetur vita spiritali: ergo inquinat quemcunque tetigerit, nedum mundet.

R. 1. Textus illos non esse ad propositum: in priori quippe agitur de somniis, quæ cum sint mendacia, verum docere non possunt, quemadmodum immundus res alias mundare nequit. In posteriori verò sermo est de eo, qui se purificat à legali immunditia contracta ex actu cadaveris (Levit. cap. 11.) moxque iterum se polluit tangendo mortuum, & ita nihil proficit illi prior lavatio: quod accommodari potest iis, qui sunt instabiles in bono, nec perseverant.

R. 2. Distinguendo maj. cum S. Augustino, Ab immundo & mortuo quis mundabitur tanquam à causa principali, ut si nomine dæmonis aut idoli Baptismus conferatur, Conc. Ab immundo & mortuo, tanquam à causa instrumentali, subdistinguo: quis mundabitur, si adhæreat hæresi & impietati causæ instrumentalis, & ministerialis, Conc. Si non adhæreat, ut si in casu necessitatis baptizetur ab hæretico; cujus hæresim detestatur, Nego maj. Porro sive Petrus, sive Judas baptizet in nomine Christi, ubique Christus per Ministrum baptizat, & virtute sua baptizatum sanctificat.

Objicies 3. Christus, Matth. 7. ait: *Non potest arbor mala bonos fructus facere*; Atqui peccator est arbor mala, Sacramentum verò fructus bonus: ergo peccator Sacramentum conficere non potest.

Confirmatur: Nemo dat quod non habet, atqui peccator nec gratiam, nec Spiritum Sanctum habet: ergo pretiosa illa dona conferre nequit.

Distinguo majorem : Non potest bonos fructus facere virtute propria, & tanquam causa princeps, Concedo : Virtute aliena, & tanquam causa instrumentalis, Nego majorem ; namque Deus prædicatione pessimi Ministri nonnunquam peccatores corrigit, infirmos confirmat, & fortiores perficit : *Nonne*, inquiunt Ministri infideles, *Matth. 7. in nomine tuo prophetavimus, & in nomine tuo dæmonia ejecimus ?* Uvæ quidem non colliguntur ex spinis, sed ex vite, interdum tamen colliguntur in spinis, quæ vitem sustentant.

Ad confirmationem similiter respondeo distinguendo majorem, nemo tanquam fons & causa princeps dat quod non habet, Conc. Tanquam causa instrumentalis, Nego maj. Nonne ferra-menta in manu Medici, dant sanitatem, quam non habent ? *Transit aqua ad areolas, ut canali lapideo nihil generet, sed tamen hortis fructum plurimum affert*, inquit sanctus Augustinus tract. 5. in Joan.

Instabis ; instrumentum non agit, nisi sit conjunctum causæ principi : atqui hæretici, & peccatores non sunt Christo conjuncti, sed ab ipso separati : Ergo.

Distinguo major. Nisi sit conjunctum conjunctione minus perfecta, quæ fit in Ministris Sacramentorum per gratiam gratis datam, Conced. Nisi sit conjunctum conjunctione omnimoda & perfecta, quam gratia sanctificans efficit, Nego maj. Similiter distinguenda est minor, & neganda consequentia. Namque Caiphas, licet impius, motione Spiritus Sancti prophetavit.

Objicies 4. *Peccatores Deus non audit*, Joan. 9. ergo frustra Minister Baptismi, aut cujusvis Sacramenti illum invocat.

Respon-

Respondet S. Augustinus lib. 2. contra Parmenian. hæc verba non esse Christi, sed cæci, cujus oculi cordis nondum patebant, ut intelligeret Deum audivisse orationem Davidis, Manassis, Publicani, & aliorum pœnitentium.

Distingui etiam potest, & quidem ad mentem illius cæci, Deus peccatores non audit, ad patranda miracula in cōfirmationem falsæ doctrinæ, Concedo. Non audit ad remissionem peccatorum, ad confirmandam veritatem, & ad Sacramenta perficienda, Nego : Cæcus itaque validissimo argumento urgebat Phariseos blasphemantes Christum Dominum esse peccatorem; nimirum, inquebat ille, si violaret sabbatum, & adversus Deum loqueretur, Dei nomine & invocatione miraculum tam evidens non edidisset.

Objic. 5. De Sacramento Extremæ Unctionis habetur Jacobi 5. *Oratio fidei salvabit infirmum*, atqui in hæreticis non potest esse oratio fidei, ut qui fide careant : ergo oratio, quam fundunt infirmum ungentes, non potest illum salvare.

Distinguo majorem : Oratio fidei objectivè sumptæ, Concedo : Formaliter sumptæ, Nego majorem : Fides formaliter sumpta est ipsemet actus, quo quis formaliter credit; ejusmodi autem actus non est in hæreticis. Fides verò objectivè sumpta, est objectum credendum, quo sensu dicitur verbum fidei, mysterium fidei, quia hæc sunt fide apprehendenda. Porro hæretici possunt & proferre orationem fidei, & prædicare verbum fidei, & explicare mysteria fidei, in quibus non errant.

CAPUT XV.

Utrùm peccatores Sacramenta licitè conficiant ?

Constat ex capite præcedenti hæreticos, & peccatores Sacramenta validè conficere.

Quæritur autem an etiam licitè ?

R. Una est Theologorum sententia, Ministros Ecclesiæ graviter peccare, si in statu peccati mortalis Sacramenta conficere præsumant.

Probatur 1. ex Scriptura, Levitici 21. v. 6. *Sancti erunt (Sacerdotes) Deo suo, & non polluent nomen ejus; incensum enim Domini, & panes Dei sui offerunt, & idè sancti erunt. Et cap. 22. v. 2. & 3. Caveant ab his, quæ consecrata sunt filiorum Israel, & non contaminent nomen sanctificatorum mihi Omnis homo qui accesserit de stirpe vestra ad ea quæ consecrata sunt . . . in quo est immunditia, peribit coram Domino, ego Dominus.* Gravis autem illa pœna necessario supponit grave peccatum, alioquin injusta videretur.

Nec dicas leges illas spectare duntaxat veteris legis Sacerdotes, & cæremonias legales. Namque textus laudati luculenter probant Deum munditiam in suis Ministris ita severè exigere, ut iis extrema minitetur, qui cum aliqua macula accesserint. Cùm autem nostra mysteria longè sacratio-
ra, & augustiora sint legalibus : *Quanto magis putatis, inquit Apostolus Hebræorum cap. 10. deteriora mereri supplicia, qui Filium Dei conculcaverit, & sanguinem Testamenti pollutum duxerit, in quo sanctificatus est, & spiritui gratiæ contumeliam fecerit ?* Hinc idem Apostolus Timotheum & Titum monet curandum
impri-

imprimis, ut Episcopi, Presbyteri, & Diaconi ministrent in conscientia pura: Oportet Episcopum irreprehensibilem esse, 1. Tim. 3. v. 2. Oportet Episcopum sine crimine esse, sicut Dei dispensatorem, Tit. 1. v. 7. Et de Diaconis, 1. Tim. 3. v. 10. Probentur primam & sic ministrent, nullum crimen habentes.

Probatur 2. Traditione.

S. Augustinus tract. 5. in Joan. sic scribit: Ego dico, & omnes dicimus (nota hanc fuisse omnium sententiam) quia justos esse oportet. Et lib. 2. contra Parmenian. cap. 10. Omnia Sacramenta, cum obsint indignè tractantibus, profunt tamen per eos dignè sumentibus.

S. Gregorius lib. 1. Epist. 24. Necesse est, inquit, ut munda sit manus, quæ diluere sordes curat, scriptum namque est: Mundamini, qui fertis vasa Domini.

Nicolaus I. ad consulta Bulgarorum cap. 7. Non potest aliquis, inquit, quantumcunque pollutus sit, Sacramenta divina polluere, quæ purgatoria remedia cunctarum contagionum existunt; nec potest Solis radius per cloacas, & latrinas transiens, aliquid contaminationis exinde attrahere mali bona ministrando se tantum lædunt, & certè cerea fax accensa, sibi quidem detrimentum præstat, aliis verò in tenebris lumen administrat, & unde aliis commodum exhibet, inde sibi dispendium præbet. S. Bernardus lib. de conversione ad Clericos cap. 17. ait: Væ Ministris infidelibus, qui necdum reconciliati reconciliationis alienæ negotia apprehendunt.

Gregorius IX. tit. de temporibus ordinat. cap. Quæsitum, sic de peccatoribus decernit, Monendi sunt, & sub interminatione divini judicii obtestandi,

ut in testimonium suæ damnationis in susceptis suis Ordinibus non ministrarent. Et tit. de cohabitatione Clericorum, cap. Quæsitum, de peccatoribus occultis sic habet: *Verum etsi quemlibet pro mortali peccato quoad seipsum constet esse suspensum, non debet tamen in officiis vitari.*

Rituale Romanum jussu Pauli V. editum, ita præscribit: *Sacerdos, si fuerit peccati mortalis sibi conscius, (quod absit) ad Sacramentorum administrationem non audeat accedere.*

S. Carolus Borromæus in Institutionibus: *Pastoribus, inquit, omnisque Sacerdos, cujus est Sacramenta administrare, meminisse debet sancta se tractare, omni-que ferè temporis momento paratum esse oportere ad tam sanctæ administrationis munus. Quamobrem is, cum alios per Sacramenta purget, atque illuminet, hoc maxime studebit, ut ipse vitam purè, castè ac religiosè agat, mentemque item & animum ab omni peccati labe purum, adjutrice Dei gratia, conservet diligenter. Nam etsi Sacramenta divinam quidem virtutem, quæ illis inest, nunquam amittant; tamen impurè ea ministrantibus æternam mortem afferunt.*

S. Thomas, cui adstipulatur omnis Theologorum turba; 3. part. quæst. 64. art. 6. hæc habet: *Non est dubium, quin mali exhibentes se Ministros Dei & Ecclesiæ in dispensatione Sacramentorum peccent. Et quia hoc peccatum pertinet ad irreverentiam Dei & contaminationem Sacramentorum quantum est ex parte ipsius peccatoris, (licet Sacramenta secundum se incontaminabilia sint) consequens est, quodd tale peccatum ex genere suo sit mortale.*

Mirare ergo temeritatem cujusdam in celebri Academia Professoris, qui ante aliquot annos discipulis suis tradidit (ut testantur ejus scripta quæ

quæ in manus nostras devenerunt) incertum esse, & dubium, num Minister Sacramentum conficiens in statu peccati mortalis, peccet mortaliter.

Dices: Sancta sanctè tractantur, si reverenter, & cum intimo Religionis sensu; qui etsi maculam peccati mortalis non expungat, voluntatem tamen peccandi excludit; quis enim dixerit, v. g. Canonicum peccati mortalis conscium peccare mortaliter; quod in Choro Officium Divinum cum aliis attentè & devotè persolvat? Ergo nulla ratio evincit Ministrum ex eo præcisè peccare mortaliter, quòd Sacramentum conficiat in statu peccati mortalis.

Distinguo anteced. Sancta sanctè tractantur, aliqua, Conc. Omnia, etiam sacratione ad quæ Minister est consecratus, & ab Ecclesia specialiter deputatus, qualia sunt Sacramenta, Nego antecedens.

Distinguo etiam consequ. Ergo nulla ratio evincit seclusa traditione, & Ecclesiæ auctoritate, transeat: nulla ratio conjunctim cum traditione, & Ecclesiæ auctoritate, Nego consequ. Itaque quamvis rationi sit admodum consentaneum, ut augustiora Religionis nostræ mysteria tractentur cum conscientia ab omni peccati mortalis labe pura, quæstio tamen est, utrùm hac de re existat præceptum naturale sub mortali obligans, quam ingredi superfluum est, cum constet hanc esse universalis Ecclesiæ traditionem ab Apostolis usque ad nos transmissam, & ubique servatam, adversus quam disputare insolentissimæ est insanix, ut loquitur S. Augustinus.

Q. Un-

Q. Unde repetitur gravitas culpæ Ministri, qui peccati mortalis conscius Sacramentum conficit?

R. Alii eam repetunt ex dignitate Sacramentorum novæ Legis, & excellentia gratiæ sanctificantis, quam ex opere operato producant; quia horrendum est nimis, inquit, tam pretiosum gratiæ donum fluere per canalem infectum, & quavis cloaca sordidiorem.

Hinc concludunt illi Theologi, ejusmodi Ministrum sine novo peccato mortali sacramentalia, putà, consecrationes Ecclesiæ, benedictiones chrisinatis, aquæ, &c. conficere, Evangelium & Epistolam solemniter decantare, verbum Dei prædicare; quia per ejusmodi gratia sanctificans non confertur, saltèm ex opere operato. Quin ex iis Theologis addunt nonnulli eundem Ministrum graviter non peccare, si Eucharistiam jam confectam ministret, cùm Sacramentum non conficiat, nec gratiam sanctificantem proferat, nisi remotè & eo modo, quo laicus, qui Eucharistiam alteri porrigeret: contra verò non excusandum à peccato mortali, etiamsi in necessitate sine solemnitate baptizet, nisi fortè ob ignorantiam, quæ laicum in hoc casu excusare potest.

Verùm, etsi ratio ista peccatum mali Ministri valdè exaggeret, adæquata tamen non est: tum quia citato cap. *Quæsitum*, non solum Sacerdotes conscii peccati mortalis, sed etiam inferiores Clerici sub interminatione divini judicii arcentur à suis ministeriis: atqui ministeria inferiorum Clericorum non producant gratiam ex opere operato: Ergo. Tum quia sacrificia & Sacramenta veteris legis, quæ erant signa egena & vacua munditiam in Sacerdotibus prærequirebant, etiam sub pœna capitis.

Quare

Quare ad propositam quæstionem

R. Cum S. Thoma hic qu. 64. art. 6. & aliis communiter Theologis. Ratio adæquata, cur malus Minister Sacramenta administrans peccet mortaliter, repetitur tum ex sanctitate Sacramentorum novæ Legis, tum ex ejus consecratione & speciali deputatione ad sacra ministeria. Namque 1. in ejusmodi ministerio se habet, ut divinum, & vivum instrumentum, quo Christus utitur ad aliorum sanctificationem: ergo tenetur se conformare principali agenti, ut sit sanctus, sicut ille sanctus est: *Quæ enim participatio justitiæ cum iniquitate? aut quæ societas luci ad tenebras? quæ autem conventio Christi ad Belial?* 2. Corinth. 6. 20. ex hominibus assumptus est, ut debitum Deo cultum nomine totius Ecclesiæ exhibeat, legatum apud eum agat, iræ ipsius veluti murum sese opponat, supplicationes fidelium offerat, & postulata illis impetret. Quanta autem indignatio, quod servus peccati, mancipium diaboli, homo exosus Deo tam grave, tamque honorificum munus suscipiat, mediatorem se constituens pro sancta & gloriosa Christi sponsa?

Atque ex hac ratione deducitur,

Primò lethaliter peccare, qui conscii peccati mortalis, non solum Sacramenta conficiunt, sed qui jam confecta ministrant, putà Eucharistiam; qui Evangelium, vel Epistolam solemniter in Ecclesia decantant; qui Sacramentalia exercent, quales sunt benedictiones aquæ, chrismatis, tonsura clericalis, &c. qui conciones habent ad plebem; qui præsent officiis divinis, & vota fidelium ad Deum præferunt; quia in his omnibus agunt ut Ministri consecrati, & ad illa officia deputati.

putati. Ita sanctus Thomas in 4. distinct. 24. qu. 1. art. 3. quæstiuncula 5. *Quicumque, inquit, cum peccato mortali aliquod sacrum Officium pertractat, non est dubium, quin illud indignè faciat. Unde patet quòd mortaliter peccat. Et in responsione ad quartum, quandocunque exhibet se in aliquo actu, ut Ecclesiæ ministrum, mortaliter peccat.*

Suarez tamen disput. 16. sect. 3. ubi illa ministeria sacra sigillatim expendit, & alii Theologi non pauci negant ejusmodi consequentiam ex præmissa ratione necessariò sequi, contenduntque irreverentiam mali ministri in sacris ministeriis, excepta confectioe Sacramenti, & Eucharistiæ administratione, esse ad summum venialem. Sed in hac opinioum contrarietate, sententia sancti Thomæ, & ejus scholæ videtur in praxi sequenda, cum pro opposita nec ratio evidens, nec auctoritas sufficiens militet; nam ex dictis ubi de regula morum, in dubiis quæ salutem spectant, quod tutius est amplectendum, dicente Scriptura: *Qui amat periculum, in illo peribit, Eccli. 3. versic. 27.*

Dixi: *Excepta confectioe Sacramenti, circa quam nulla est controversia, & Eucharistiæ administratione;* Namque idem Suarez disput. 72. sect. 4. multis probat communem esse Theologorum sententiam peccare mortaliter Sacerdotem, qui illam administrat in statu peccati mortalis. Imò laudat nonnullos Theologos, ut Adrianum, qui docent malum Ministrum non sine novo peccato mortali, hoc Sacramentum tangere; quod ipse non audet negare, si sermo sit de Sacerdote, qui pro officio suo tangit illud Sacramentum, vel immediate, ut ab uno in aliud vas mutet, vel mediate,

defe-

deferendo illud in processione. Addit etiam cit. disput. 16. de Diacono & Subdiacono ministrantibus ad altare in statu peccati mortalis, sententiam esse probabilem nec contemnendam eos peccare mortaliter propter momenta supra allata, quamvis oppositam probabiliorem existimet, modò tamen, inquit, consuetudinem & animum non habeant sic ministrandi, alioquin facile non essent excusandi à peccato mortali; *quia illa consuetudo, vel propositum videtur oriri ex quodam contemptu, vel formali, aut virtuali*; ita ille, ut quisque intelligat quàm periculosum sit sacris ministeriis defungi sine conscientia pura.

Quod spectat inferiores Clericos, Acolythos scilicet, & Clericali tonsura initiatos, communis est Theologorum sententia, & ferè certa (addit Suarez loco citato) ejusmodi Clericos non incurere reatum peccati mortalis si conscii culpæ gravioris ministrent; quia juxta hodiernum Ecclesiæ usum quæ sunt Acolythorum, Lectorum, & Ostiariorum, exercentur à Clericis sola tonsura insignitis, sæpissimè etiam à Laicis in habitu Clericali; ac proinde qui in iis hodie ministrant, non censentur agere tanquam Ministri consecrati, & ab Ecclesia specialiter deputati. Meminerint tamen præsertim qui ad sacra illa ministeria sunt ordinati, gravissimorum verborum, quibus eos Pontifex, dum inaugurarentur, contestatus est: *Studete susceptum officium dignè implere. Et infra: Tunc etenim in Dei sacrificio dignè vinum suggeretis & aquam, si vos ipsi Deo sacrificium per castam vitam, & opera bona oblatis fueritis.* Quod omnes eo accuratius præstare debent, quòd sacratiora Ministeria exhibent, quàm ii, de quibus scriptum est Levit.

vit. 21. vers. 19. *Homo qui habuerit maculam, non offeret panes Deo suo, nec accedet ad ministerium ejus.* Et vers. 23. *Intra velum non ingreditur, nec accedat ad altare, quia maculam habet, & contaminare non debet sanctuarium meum. Ego Dominus, qui sanctifico eos.*

Secundo, ex eodem principio deducitur peccatorem, qui privatim & in casu necessitatis baptizat, non peccare mortaliter; quia in illo opere non se exhibet ut publicum Christi Ministrum, & ab Ecclesia specialiter deputatum: *In articulo necessitatis, inquit sanctus Thomas cit. art. 6. ad tertium, baptizando non peccaret in casu, in quo etiam laicus posset baptizare; sic enim patet quoddam non exhiberet se Ministrum Ecclesie; sed subveniret necessitatem patienti. Secus autem est in illis Sacramentis, quæ non sunt tantæ necessitatis sicut Baptismus.*

Ergo graviter peccaret Sacerdos, qui conscius peccati mortalis, in casu necessitatis conferret Sacramentum Pœnitentiæ, vel Extremæ-Uctionis; quia actus ille est semper proprius Ordinis Sacerdotalis nec potest competere laico.

CAPUT XVI.

Utrùm liceat Sacramenta petere & accipere
ab improbis Ministris?

R. I. **N**on licet, nisi adsit sufficiens petendi necessitas.

Probatur 1. auctoritate sancti Thomæ in 4. dist. 24. quæst. 1. art. 3. quæstiuncula 5. ad 3. ubi sic habet: *Præter necessitatis articulum non esset tutum, quoddam eum (Pastorem) induceret ad aliquod sui ordinis*

ordinis exequendum, durante tali conscientia, quod ille in peccato mortali esset, quam tamen deponere posset, quia homo in instanti à divina gratia emendatur.

Ergo in mente Sancti Doctoris duo concurrant necesse est, ut illicitum sit ab improbo Ministro Sacramenta petere, aut recipere. Primum, nulla debet esse petendi, aut suscipiendi necessitas. Secundum, constare debet Ministrum esse malè dispositum, & cum prava dispositione ministraturum, alioquin in dubio præsumendus est bonus; nisi enim moveant indicia moraliter certa, *charitas . . . non cogitat malum*, 1. Corinth. cap. 13. Certa autem indicia vix haberi possunt nisi Minister versetur vel in diuturna consuetudine, vel in proxima occasione peccati, si v. g. Pastor sit ebriosus, concubinarius, & manifestè ineptus ad munera pastoralia, &c.

Probatur 2. ratione; quia illicitum est, & contra legem naturalem communicare peccatis alienis, & sine causa ponere fratri nostro scandalum, hoc est, præbere illi occasionem ruinæ: *Ne ponatis offendiculum fratri, vel scandalum*, ait Apostolus, Rom. 14. vers. 13. atqui qui sine necessitate petit Sacramentum à malo Ministro, inducit illum ad peccandum; qui verò ab illo Sacramentum suscipit, communicat cum ipso in re mala, ejusmodi quippe administratio est sacrilegium: Ergo.

R. 2. Licet Sacramenta petere, & suscipere ab improbo Ministro, si adsit sufficiens petendi, & suscipiendi necessitas.

Probatur 1. auctoritate Nicolai Primi, qui ad consulta Bulgarorum, utrùm à Sacerdote,
D. Habert Theolog. Tom. V. I qui

qui five comprehensus est in adulterio, five de hoc sola fama respersus est, deberent Communionem suscipere; sic respondet: *Ab eo, usquequod Episcoporum judicio reprobetur, Communio percipienda est; quoniam mali bona ministrando, se tantum laudant.*

Probatur 2. ratione; Quia licet propter honestum finem, puta ad subveniendum propriæ, vel alterius necessitati, five corporali, five spiritali, expetere ab alio rem per se bonam, quamvis ille ex malitia nonnisi malè prævideatur concessurus, ut patet ex dictis Tom. 4. part. 3. cap. 14. de Usura, & Tract. de Justitia & Religione, cap. 6. de juramento, ubi probavimus ex sancto Thoma & S. Augustino, licitum esse in casu necessitatis multum, vel juramentum petere ab eo, quem prævidemus, vel sine usuris non mutuaturum, vel per falsos deos juraturum; non enim tenemur cum gravi nostro incommodo & detrimento, privari iis quæ nobis sunt utilia, ne alius indeumat occasionem peccandi ex sua malitia: atqui Sacramenti administratio per se & ex objecto est res bona & honesta: ergo in casu necessitatis licet eam expetere ab eo, qui ex malitia prævidetur illam vitiaturus; neque propterea, *qui ab eo suscipit Sacramentum, inquit S. Thomas sæpius cit. art. 6. ad 2. communicat peccato ejus; sed communicat Ecclesiæ; quæ eum tamquam Ministrum exhibet.*

Q. 2. *Quæ, & quanta debet esse necessitas, ut liceat ab improbo Ministro Sacramenta petere, & recipere?*

Priusquam huic quæstioni fiat satis,

Advertes improbum Ministrum, vel esse excommunicatione præcisum, quemadmodum hæreticos;

ticos; vel non esse præcisum, aut alia censura percussum. Rursus excommunicati, vel non sunt tolerati, vel tolerati: non toleratus dicitur, qui nominatim declaratus est per sententiam Judicis excommunicatus: toleratus verò, qui quidem excommunicationis pœnam ipso facto incurrit; sed nulla præcessit Judicis sententia, qua nominatim declaretur excommunicatus. His præmissis,

R. 1. In extrema necessitate licitum est ab excommunicato etiam non tolerato petere & suscipere Sacramenta. Vocatur autem extrema necessitas periculum mortis, in quo quis constitutus indiget aliquo Sacramento necessitate mediæ ad salutem necessario, qualia sunt Sacramenta Baptismi & pœnitentiæ.

Probatur responsio auctoritate S. Augustini libro 1. de Baptis. cap. 11. in quo sic scribit: *Si quem fortè coegerit extrema necessitas, ubi catholicum, per quem accipiat (Baptismum) non invenerit per aliquem extra unitatem Catholicam positum acceperit non solum non improbamus quod fecit, sed etiam securissimè verissimèque laudamus.* Idipsum de Sacramento Pœnitentiæ definiit Concil. Trident session. 14. cap. 7 his verbis: *Piè admodum, ne hac ipsa occasione aliquis pereat, in Ecclesia Dei semper custoditum fuit, ut nulla sit reservatio in articulo mortis, atque aded omnes Sacerdotes quoslibet pœnitentes à quibusvis casibus & censuris absolvere possunt.* Cum autem Concilium dicat, omnes Sacerdotes, nullum excipit etiam excommunicatum & degradatum. Et ratio est, quia lex Ecclesiastica non præjudicat juri naturali & divino, nec prohibere potest quominus excommunicatus denunciatus succurrat naufraganti, aut

fame pereunti; multò minùs periclitanti æterna damnatione.

Dices : S. Gregorius lib. 3. Dialog. cap. 32. laudat S. Hermenegildum, qui maluit mori, quàm Sacramenta ab Episcopo Ariano suscipere, referaturque 24. q. 1. cap. 42. ergo in extrema necessitate non licet Sacramenta sumere ab excommunicato Ministro.

Nego consequ. 1. Quia S. Hermenegildus non erat in extrema necessitate constitutus; non enim agebatur de Sacramento necessitate medii necessario, & in articulo mortis suscipiendo, sed de communione Paschali. 2. Etiam si ageretur de Eucharistia in morte suscipienda, non ita certum est eam in ejusmodi circumstantiis posse ab excommunicato non tolerato percipi; plures enim negant id licere, quamvis Navarrus in Summa cap. 22. num. 4. & alii contrarium affirmant; quia illud Sacramentum in articulo mortis est necessarium necessitate præcepti divini; & viaticum, si non absolutè, saltem secundùm quid necessarium hinc transitis. Unde si licitum est ab excommunicato non tolerato cibum corporalem accipere, non solum in extrema, sed etiam in gravi necessitate, multo magis cibum spirituale: Favet cap. *Quod in te*, de pœnit. & remiss. in quo morientibus conceditur tempore generalis interdicti pœnitentia, & in viaticum, denegatur verò Extrema Unctio: *in illo verbo*, inquit Innocentius III. *per quod pœnitentiam morientibus non negamus, viaticum etiam intelligi volumus.* 3. S. Hermenegildus adigebatur ad illam communionem in signum professionis Arianæ. Porro nequidem in extrema necessitate licet suscipere Sacramentum

mentum in iis circumstantiis, in quibus videretur quis hæresim profiteri.

R. 2. Extra casum extremæ necessitatis non licet Sacramenta petere ab Excommunicatis non toleratis, Hæreticis, & Schismaticis; quia Patres & Lex Ecclesiastica hunc casum duntaxat notant, in quo cum ejusmodi abscissis liceat communicare in spiritualibus, ut patet ex præcedenti responsione.

R. 3. Requiritur, & sufficit ea necessitas, quæ censeatur gravis, ut Sacramenta licitè peti, & recipi possint ab improbis Ministris, etiam suspensis & excommunicatis, modo tolerentur ab Ecclesia. Probatur à simili, ejusmodi necessitas requiritur, & sufficit, ut licitè petatur mutuum ab usurario, juramentum ab infideli. Ergo Parochianus benedictionem nuptialem, Eucharistiam in Paschate, & extremam Unctionem in morbo licitè recipit à Parocho, licet excommunicato, aut suspenso, sed tolerato; quia in gravi versatur necessitate; cum alius Sacerdos non adsit, qui illa subsidia spiritualia exhibeat: secus si alteri, puta Vicario, facile possit sacramentaliter confiteri.

CAPUT XVII.

De Subjecto Sacramentorum.

Quodnam est subjectum Sacramentorum?

R. Solus homo viator.

Probatur ex Scriptura, Hebr. 5. *Omnis namque Pontifex ex hominibus assumptus, pro hominibus constituitur in iis, quæ sunt ad Deum; & ratio est, quia nec*

Angelis, cùm sint incorporei, signa sensibila gratiæ sanctificantis applicari possunt, nec creaturis irrationabilibus, cùm sint incapaces gratiæ sanctificantis, nec hominibus defunctis, qui cùm sint in termino, non possunt proficere in gratia, nec proindè percipere effectum Sacramentorum.

Q. 2. *Quid requiritur in subjecto, ut validè percipere possit Sacramentum?*

R. 1. In parvulis nihil requiritur: patet ex Traditione Apostolica, secundùm quam baptizantur infantes in fide Ecclesiæ; quia, ut ratiocinatur sanctus Augustinus serm. 294. aliàs serm. 14. de verbis Apostoli cap. 11. *Qui peccavit in altero (Adamo) credit in altero, nempe in Ecclesia.*

R. 2. In adultis aliud requiritur ad recipiendum validè Sacramentum, aliud ad recipiendum licitè, seu ad consequendum ejus effectum.

Q. 3. *Quid requiritur in adultis ad validè recipiendum Sacramentum?*

R. Requiritur & sufficit voluntas, seu intentio illud recipiendi; excepto tamen Pœnitentiæ Sacramento.

Prima pars responsionis, nempe quòd requiratur intentio, probatur 1. ex constanti Traditione Ecclesiæ. Concilium Carthagenense III. anno 396. Carthagenense IV. anno 398. can. 79. Arausicanum I. anno 442. can. 12. statuunt ægrotos, qui usum vel linguæ, vel rationis amiserunt, non esse baptizandos, aut absolvendos, nisi constet ex testibus, eos priùs voluisse baptizari, aut absolvi. Innocentius Tertius, sæculo decimo tertio, cap. *Majores*, tit. de Baptismo, expressè allerit illum, qui nunquam consensit, sed penitus con-

contradixit, nec rem, nec characterem suscipere Sacramenti; Quia *plus est*, inquit, *expresse contradicere, quam minimè consentire.* Rituale Romanum auctoritate Pauli V. editum, prohibet ne baptizetur adultus, qui ex morbo, aut ex alio casu in amentiam incidit, si, dum esset rationis compos, Baptismum non petiit.

Probatur 2. ratione; Quia Sacramenti susceptio ex dictis cap. 1. est quædam initiatio, & consecratio, seu religionis professio, quæ sine motu voluntatis fieri nequit.

Dices: Ex S. Gregorio Turonensi lib. 6. Hist. Franc. cap. 17. multi Judæi anno 570. coacti sunt ad Baptismum. Idem factitatum fuisse apud Massilienses testatur S. Gregorius Magnus lib. 3. Epist. 45. Idem præstiterunt Sisebutus Hispaniarum Rex, anno 596. Dagobertus I. in Gallia circa idem tempus, & Carolus Magnus anno 776. circa Saxones rebelles, qui postea auditi non sunt, licet contestarentur se invitos, & contra voluntatem fuisse baptizatos: ergo intentio, seu voluntas recipiendi Sacramentum, non est necessaria ad ejus veritatem.

Distinguo anteced. Coacti sunt coactione insufficienti ad perimendum voluntarium, Conc. Coactione sufficienti, quæ excluderet omne voluntarium, Nego antecedens; Hæc enim violentia, ex dictis ubi de actibus humanis, cadere non potest in actus voluntatis elicitos. Sicut ergo non excusatur à peccato idololatriæ, qui suppliciis perterritus Idolo sacrificat; quia voluntate absolutè libera, licet secundum quid invita, grande illud sacrilegium committit; sic qui minis coactus Baptismum suscipit absolute volens, & secundum

dùm quid nolens Christianus efficitur. Prohibuit tamen Ecclesia, ne sic deinceps Infideles baptizarentur.

Secunda pars, quòd illa intentio sufficiat, probatur ex usu Ecclesiæ, quæ Baptismum in hæresi acceptum semper admisit, nec repetendum declaravit, ut patet ex dictis cap. præcedenti: *Non interest*, inquit Sanctus Augustinus, lib. 3. de Baptismo cap. 14. *cum de Sacramenti integritate & sanctitate tractatur, quid credat, & quali fide imbutus sit ille, qui accipit Sacramentum, interest quidem plurimum ad salutis viam, sed ad Sacramenti quæstionem nihil interst; fieri enim potest, ut homo integrum habet Sacramentum & fidem perversam.* Nec sibi contrarius est S. Doctor lib. 7. de Baptismo c. 53. ubi aliquam fidem in suscipiente requirit; nam aliquando fidem usurpat pro intentione, ut colligitur ex Epist. 98. aliàs 23.

Dixi in responsione: *Excepto Pœnitentiæ Sacramento*; Quia in illo Sacramento actus pœnitentis, nempe Contritio, Confessio, & Satisfactio requiruntur tanquam ejus pars materialis; atqui non perficitur Sacramentum sine materia & forma. Ergo.

Q. 4. *Quæ intentio requiritur in subjecto ad validè recipiendum Sacramentum.*

R. 1. Ad Baptismum saltem requiritur intentio habitualis: intentio autem habitualis hîc dicitur voluntas, quæ præcessit, nec fuit retractata, Patet ex dictis in præcedenti responsione; Baptismus enim est Religionis Christianæ professio, per quam baptizatus obligat se ad observandam Legem Evangelicam, & Ecclesiæ Statuta, quod necessario supponit intentionem, saltem habitualement. Idem à fortiori dicendum de Sacra-

Sacramentis Pœnitentiæ & Matrimonii, in quibus cùm actus suscipientium habeant rationem materiæ & partis essentialis, necesse est ut censeantur præsentés, solum moraliter, quando duo illa Sacramenta celebrantur.

R. 2. Intentio generalis & interpretativa sufficit ad suscipienda cætera Sacramenta, excepto fortè Sacramento Ordinis.

Probatur; quia intentio interpretativa ea dicitur, qua dum aliquis expressè vult rem unam, censetur velle ea omnia, quæ ad illam pertinent tanquam appendices, etiamsi de illis nunquam, cogitaverit, v. g. capeffit aliquis dignitatem, ignorans quoddam ejus singulare privilegium, interpretamur illum voluisse tale privilegium, licèt nunquam in mentem ejus venerit; quia expressè voluit illam dignitatem, in qua continebatur illud privilegium.

Atqui, eo ipso, quo quis voluit baptizari, hoc est, profiteri Religionem Christianam, Ecclesia semper est interpretata illum voluisse frui omnibus gratiis & bonis, quorum habet dispensationem, nec aliud quibusdam in casibus ab eo exigit ad conferenda Sacramenta, de quibus est sermo: ergo revera sufficit interpretativa illa intentio.

Minor probatur ex constanti Ecclesiæ praxi, quæ Fidelibus repentino morbo correptis, quo usum linguæ & rationis amiserunt, administravit Sacramenta Confirmationis, & Extremæ Unctionis, etiamsi illa ante non expetierint, satisque fuit piæ matri, quòd Baptismi vota evidenter per peccatum mortale non retractassent.

Dixi, *excepto fortè Sacramento Ordinis*; quia controvertitur in Scholis, num infantibus validè conferri possit?

Nonnulli Theologi affirmant, sed minùs probabiliter; quia cùm liberum sit cuique Christiano amplecti statum Matrimonii, vel Clericatus, voluntas interpretativa suscipiendi Ordines non potest, nec debet intelligi in ipsa professione Religionis Christianæ; ac proinde Sacramentum Ordinis nequit conferri validè sive infanti, sive adulto, qui actu nunquam voluit ordinari.

Cæteri Theologi distinguunt inter Christianos, alii mediocri virtute contenti ad Evangelicam perfectionem non contendunt: alii ad illam toto corde nituntur: sed ex propriæ infirmitatis sensu sacra ordinatione indignos se judicant, nec persuaderi queunt se esse à Deo electos ad tantum honoris & sanctitatis gradum, & hac persuasionem reluctantur suis Prælati, qui eos promovere decreverunt. In prioribus locum non habet voluntas interpretativa, si de Ordinatione agatur, nullumque foret illud Sacramentum, nisi actualis voluntas in suscipiente saltem præcessisset.

De posterioribus verò aliter sentiendum existimant illi Theologi, quia eo ipso, quo Christiani illi pietate insignes se totos Deo, & cultui ejus consecrant, divinæ vocationi, cujus signa non desunt moraliter certa, acquiescere censentur, saltem generali intentione, quamvis particulari quàm maximè resistent. Generalem hanc intentionem intellexerunt Flavianus Episcopus Antiochenus in Macedonio sanctissimo Anachoreta, quem, ut refert Theodoretus lib. Religiosæ

Histo-

Historiæ c. 13. inscium, & nihil tale suspicantem ordinavit in Presbyterum, licèt hætenus fuisset reluctatus; & S. Epiphanius in Pauliniano Monacho fratre S. Hieronymi, quem etiam obstructo ore, ne reclamaret, Presbyterum consecravit, ut ipsemet Epiphanius scribit ep. 60. inter Epist. S. Hieronymi ad Joannem Jerosolymitanum commotum, quòd contra Ecclesiæ leges manus imposuisset Pauliniano in Diœcesi Jerosolymitana commoranti.

De invitis secundùm intentionem particularem intelligendus est S. Gregorius lib. 7. epist. ad Syagrium Augustodunensem Episcopum, in qua sic scribit: *Sicut is, qui invitatus venit: quæstus refugit, sacris est Altaribus admovendus: sic qui multò ambit, vel importunè se ingerit, est procul dubio repellendus. Nam qui sic nititur ad altiora conscendere, quid agit, nisi ut crescendo decreseat, & ascendendo exterius ad profunda descendat?*

Q. 5. *Quid requiritur ad effectum Sacramenti consequendum?*

R. 1. Ad quodlibet Sacramentum requiritur fides, *sine qua*, inquit S. Ambrosius lib. 1. de Spiritu sancto cap. 3. *vacuum est omne mysterium*, idem de pietate & devotione generatim dicendum. Sancta enim sanctè tractanda & accipienda sunt.

R. 2. Cùm quodlibet Sacramentum proprios habeat effectus, exigit quoque in fuscipiente dispositiones sibi proprias; Sacramenta enim, quæ idèd dicuntur mortuorum, quia instituta sunt ad remittendum peccatum mortale, qualia sunt Baptismus & Pœnitentia, non sortiuntur effectum, nisi in contritis corde. Quæ verò dicuntur vi-
vorum

vorum, statum gratiæ sanctificantis necessariò præsupponunt in accedentibus. Ex effectibus ergo, ad quos institutum est quodlibet Sacramentum, colligendum est qualis dispositio esse debeat in fuscipiente.

CAPUT XVIII.

De Sacramentorum novæ Legis effectibus.

Alius est effectus communis omnibus Sacramentis, alius proprius uni, & soli, diciturque gratia sacramentalis: alius proprius uni, sed non soli, ut character, qui est effectus proprius Baptismi, Confirmationis, & Ordinis.

Q. I. *Quis est effectus communis omnibus Sacramentis?*

R. Gratia sanctificans, quam omne Sacramentum novæ Legis producit ex opere operato, ut probatum est cap. 4. contra Novatores.

Movetur in Scholis difficultas exigui admodum momenti, utrùm scilicet Sacramenta novæ Legis physicè operentur, quemadmodum ignis per influxum physicum comburit lignum, ut docent Thomistæ; vel moraliter tantùm, eo modo quo contractus donationis transfert dominium rei datæ, vel merita Christi Domini salutem nostram operantur.

Posterius nobis cum aliis communiter Theologis videtur longe probabilius.

I. Quia Sacramentis non convenit alia efficacia, quàm meritis Christi, quæ per Sacramenta operantur: atqui merita Christi sunt tantùm causæ morales gratiæ, quatenus nempe eorum intuitu Deus tanquam causa physica gratiam producit: Ergo.

2. Quia

2. Quia operari sequitur esse: atqui Sacramentum est compositum morale, non physicum; verba enim absolutionis v. g. cum actibus pœnitentis non faciunt aliquid totum physicum, sed morale, ut patet. Ergo non agunt physicè, sed moraliter.

3. Quæ agunt per influxum physicum, necessariò debent contingere subjectum, in quo operantur, vel per se, ut ignis comburens lignum; vel per virtutem physicam, quemadmodum Sol per lumen in aere diffusum attingit corpus quod illuminat: atqui Sacramenta neque per se, neque per virtutem physicam attingunt animam, quam sanctificant; verba absolutionis, v. g. neque per se contingunt animam, tum quia sunt aliquid corporeum, tum quia nequidem corpus, ut plurimum attingunt, cum vix moveant aeris partem ori loquentis proximam, neque per virtutem physicam à se emanantem quæ nequidem fingi potest, cum Sacramenta non operentur, nisi quatenus significant: atqui non significant nisi prolata ultima formæ syllaba, hoc est, quando physicè existere desinunt, ac proinde quando virtutem physicam habere nequeunt.

Denique non sunt inducendæ opiniones creditu difficiliiores, nisi Ecclesia illas tanquam revelatas proponat; atqui creditu longè est difficilius Sacramenta physicè operari, nec Ecclesia unquam id proposuit, tanquam à Deo revelatum, quidquid garriant Novatores.

Q. 2. Quid est gratia Sacramentalis?

R. Est jus fundatum in gratia sanctificante per quodlibet Sacramentum collata ad accipienda
oppor-

opportuno tempore certa auxilia, id est, gratias actuales, quibus possit homo obtinere finem Sacramenti. Supponamus v. g. quempiam cum debitis dispositionibus Sacramentum Confirmationis suscepisse, ac proinde augmentum gratiæ sanctificantis fuisse consecutum: gratia sic accepta titulus est confirmato ad obtinendas à Deo gratias actuales, ut possit data occasione fidem intrepidè profiteri; ad hoc enim institutum est illud Sacramentum. Gratia ergo sacramentalis non semper recipitur actu, nisi in radice, dum administratur Sacramentum: hoc maximè patet in infantibus, & in iis, qui amisso usu rationis, absolventur, vel unguntur; in illo enim statu non sunt capaces gratiarum actualium, utpote quæ sint actus intellectus & voluntatis divinitus excitati; jus tamen per Sacramentum acquisierunt ad illas suo tempore accipiendas.

Q. 3. *Qui libitur in peccatum mortale post susceptum Sacramentum, retinetne jus ad illa auxilia supernaturalia ad gratiam sacramentalem pertinentia, quando v. g. occurret tentatio?*

R. Minimè, quia auxilia illa fundantur in gratia sanctificante, quæ per peccatum mortale amittitur; imò ex Apostolo terribilis eum manet expectatio Judicii, utpote *qui Filium Dei conculcaverit, & sanguinem testamenti pollutum duxerit, in quo sanctificatus est*, Hebr. 10.

Q. 4. *Sacramenta conferuntne semper æqualem gratiam?*

R. In subjectis æqualiter dispositis, ut in parvulis, æqualem gratiam conferunt: in melius verò dispositis, maj. Ratio est, quia Sacramenta sunt causæ necessariæ. Sicut ergo ignis eodem modo

modo applicatus duabus candelis similiter dispositis, eas similiter accendit, secus si diversimodè sint dispositæ: ita & Sacramentum.

Confirmatur ex Concilio Trid. sess. 6. c. 7. ubi docet in baptizatis recipi justitiam secundum mensuram, quam Spiritus sanctus partitur prout vult, & secundum propriam cujusque dispositionem & cooperationem.

Q. 5. *Major gratia melius disposito collata, estne ex opere operato, an ex opere operantis?*

R. Est ex opere operato. Quemadmodum enim inflammatio ligni siccioris & calidioris non est à ligno, sed ab igne solo; sic major gratia in fuscipiente melius disposito, est à Sacramento, non à dispositionibus, quæ gratiæ non sunt productivæ.

CAPUT XIX.

De Characterè.

Q. 1. *Quid est Character?*

R. Est signum in anima impressum indelebile, quo distinguitur homo ab aliis, efficiturque idoneus ad nonnulla, quæ sunt cultus divini: in Baptismo ad recipienda alia Sacramenta, in Confirmatione ad professionem fidei, & in Ordine, ad functiones Ecclesiasticas obeundas.

Q. 2. *Quot sunt effectus characteris?*

R. Duo. 1. distinguit v. g. baptizatum à non baptizatis, Sacerdotem à laicis. 2. Consecrat & deputat ad nonnulla Religionis officia. Hæc patent ex allata definitione.

Q. 3. *Cujus est ille Character?*

Respon-

Respondet S. Thomas post Sanctum Augustinum esse characterem Christi Domini, *cujus Sacerdotio*, inquit q. 63. art. 3. *configurantur Fideles secundum Sacramentales characteres, qui nihil aliud sunt, quam quædam participationes ab ipso derivatæ.*

Q. 4. *Quare dicitur signum in anima impressum?*

R. Ut distinguatur, tum à characterem Circumcisionis, quo Judæi, inquit S. Chrysostomus, in corpore veluti pecora gregis Domini secernebantur ab aliis nationibus: tum à notis & insignibus, quæ Principum Ministri exterius in vestibus circumferunt: tum denique à characterem dæmonis, qui veluti simia Dei, ut loquuntur S. Patres, extrinsecus notat sacrilegos, qui se ei mancipant, ut habetur Apoc. 13. & 14.

Q. 5. *Imprimitur character in eo, qui fide, id est, sine debitis dispositionibus Sacramentum suscipit?*

R. Imprimitur, ut constat ex dictis cap. 14. ubi probatum est rata esse Sacramenta in hæresi collata & suscepta, quamvis non conferant Spiritum sanctum.

Q. 6. *Quot sunt Sacramenta, quæ characterem imprimunt?*

R. Tria, nempe Baptismus, Confirmatio & Ordo. Ita definiit Concilium Trid. sess. 7. can. 9. his verbis: *Si quis dixerit in tribus Sacramentis; Baptismo, Confirmatione, & Ordine non imprimi characterem in anima, hoc est, signum quoddam spiritale & indelebile, unde ea iterari non possunt; anathema sit.*

Q. 7. *Quid est illud signum in anima impressum?*

R. Certo definiri non potest: quia id Deus non revelavit sive in Scriptura, sive in Traditione. Hinc Theologi, ut solent in rebus obscuris & incertis, abeunt in varias sententias.

Alii,

Alii, ut Scotus in 4. dist. 6. volunt esse relationem realem; quia signum illud ex natura sua ordinem dicit ad quædam religionis officia, in Ordine v. g. ad functiones Sacerdotaies.

Alii contendunt esse relationem rationis tantum; quia, inquiunt, Baptismus, Confirmatio, & Ordo ex Dei instituto consecrant & ordinant fidelem ad ea, quæ sunt divini cultus, quemadmodum ex hominum instituto Magistratus deputat civem ad ministeria politica, consecratio Basilicarum sacra illa loca divinis officiis in perpetuum mancipat: atqui ordo Magistratus ad ministeria politica, Basilicarum ad Officia divina, est relatio rationis: Ergo & ordo baptizati, confirmati, & Sacerdotis ad ea quæ cultum divinum spectant, est etiam relatio rationis. Ita Durandus in quartum dist. 4. quæstione 1.

Alii docent signum illud esse qualitatem, sed non consentiunt quæ sit illa qualitas: quidam illam revocant ad figuræ speciem; alii, ut Guillelmus Altissiodorensis, ad patibilem qualitatem; alii, ut Alexander Alensis, ad habitum; alii communiter, ut S. Thomas & Catechismus Romanus, ad potentiam. Has autem Scholæ controversias neglexit Trid. Concilium, utpote quæ ad fidem non pertineant.

Immeritò itaque Soavis hîc solita dicacitate fuggillat Tridentinos Patres tanquam consilii sanî impotes, nec minùs contumeliosè Kemnitius l. 2. examinis, conqueritur quasi Trid. fideles sub anathemate cogat credere fide divina Scholasticorum opiniones recens excusas circa essentiam characteris, quod nullatenus Concilium attigisse ostendit Cardinalis Pallavicinus lib. 9. c. 5. Hist. Trid.

D. Habert. Theolog. Tom. V. K Q. 8.

Q. 8. *Quid ergo fide divina credendum est circa characterem?*

R. Credendum est solùm characterem existere & imprimi per tria Sacramenta. Ita Tridentinum cit. Can. 9. & ante ipsum Eugenius IV. in suo Decreto pro Armenis.

Dices 1. absurdum est definire rem existere, cujus ignoratur natura: Ergo.

Nego antecedens: etenim S. Augustinus sciebat tempus existere, nec dicere poterat quid sit, lib. 11. Confess. c. 14. fide etiam divina credebatur existentiam peccati originalis, quamvis ignoraret quomodo contrahatur, ut testatur Epistola 29. ad Sanctum Hieronymum. Denique quis definiet quid sit Deus, & quis enarrabit æternam Verbi divini generationem? Adversarii tamen utrumque confitentur, nempe Deum existere, & secundam sanctissimæ Trinitatis Personam generari.

Dices 2. Concilium Tridentinum cit. Canone tria definiit; primum, characterem imprimi anima; secundum, esse indelebilem; tertium, tria Sacramenta propter illum iterari non posse: atqui hæc dici non possunt, nisi character sit aliquid physicum & realiter distinctum, tum ab anima, tum à gratia sanctificante; quis enim diceret relationem sive realem sive rationis imprimi, & esse indelebilem? ergo revera Concilium definiit characterem esse qualitatem, atque ex diversis Scholasticorum opinionibus recens inventis, ad unum fideles astrinxit sub anathemate.

Nego minorem; nam figura dicitur corpori impressa, licet secundum communioem Philosophorum sententiam non sit ens physicum à subiecto distinctum. Item macula peccati dicitur
in

in anima imprimi, quamvis sit aliquid morale, & relatio quædam ad actum peccaminosum jam præteritum, sed moraliter remanentem. Deinde S. Augustinus lib. 2. contra Parmenianum cap. 13. comparat characterem Christi cum characterē militari: atqui character militaris, licet dicatur imprimi, non est tamen qualitas physice adveniens militi, sed quædam moralis deputatio, *an fortè, inquit, minus hærent Christiana Sacramenta, quàm corporalis hæc nota, cum videamus nec Apostatas carere Baptismate, quibus utique per pœnitentiam non restituitur, & idèd amitti non posse judicatur.* Ex quo loco habes primò characterem hære; secundò esse indelebilem; tertio, Sacramentum quo imprimitur, non posse repeti; quæ omnia explicantur per notam militarem, quæ est tantum quid morale, & relatio rationis. Denique ipsi Scholastici qui contendunt characterem non esse qualitatem aut entitatem physicam seu meram rationis relationem seu deputationem inadmissibilem ad certa Religionis officia, nihilominus docent illum in anima imprimi. Alphonsus à Castro lib. 7. adversus hæreses, sic scribebat circa annum 1556. *Character figura quædam est, sive illa sit qualitas, sive relatio, parum interest, quàm Deus animæ imprimit in signaculum, quo suum gregem discernit ab aliis.* Dominicus Soto, qui Concilio Tridentino interfuit, etiam post Concilium probabilius existimat in quartum 1. quæst. 3. art. 1. & 4. art. 2. & 20. art. 1. characterem esse rem ab anima indistinctam, & nihilominus rectè dicit imprimi, atque esse indelebilem; & revera nonne Matrimonii vinculum, licèt morale quid, est divinitus indissolubile?

Instabis : ritus exterior Sacramenti est actio transiens , quæ afficit solum corpus ; character verò est permanens , indelebilis , & in anima ; ergo est quid realiter distinctum à ritu exteriori.

Distinguo consequens : Character imprimens est quid distinctum , Nego : character impressus , subdistinguo ; est quid distinctum moraliter , Concedo : physicè , subdistinguo iterum : est quid distinctum secundum communiorem , & si ita placeat , secundum probabiliorem Scholasticorum sententiam , transeat ; secundum Ecclesiæ doctrinam , & citatum Tridentini Canonem , Nego conseq. Itaque distinguendum est inter sigillum figuram imprimens , & figuram ipsam per sigillum subjecto impressam. Ritus exterior Sacramenti est veluti sigillum imprimens characterem & transit ; consecratio verò impressa manet & quidem in anima ; baptizatus enim aut confirmatus deputatur & consecratur maximè secundum animam ad quædam divini cultus officia. Utrùm autem illa deputatio aut consecratio fiat per qualitatem physicam , necne non attigit Concilium.

Dices 3. si Concilium non definivit , sitne character entitas physica , an moralis , inutilis est ejus definitio ; nullus enim è Novatoribus negavit per Baptismum ita consecrari hominem , ut consecratio illa deleri non possit , aut repeti : absurdum est autem consequens , ergo & antecedens.

Nego maj. namque Novatores 1. negant talem consecrationem divinitus fieri per Confirmationem & Ordinem , & contra hunc errorem definivit Concilium per tria Sacramenta imprimi characterem. 2. docent characterem esse figmentum

tum humanum ab Innocentio III. inventum decimo tertio sæculo, Concilium verò declarat esse à Christo Domino institutum.

Q. 9. *Quomodo probatur characteris existentia?*

R. 1. Evidenter non educitur ex Scripturis; affertur quidem caput primum 2. ad Corinth. v. 22. ubi sic habetur: *Qui & signavit nos, & dedit pignus Spiritus in cordibus nostris.* Et caput 1. Epistola ad Ephes. vers. 13. *In quo & credentes signati estis Spiritu promissionis sancto.* Sed illi textus intelligi possunt de gratia sanctificante, ut explicant Sanctus Chrysostomus, Theophilactus, & Sanctus Thomas in hunc locum.

R. 2. Itaque probatur ex Traditione, quæ cernitur vel in uno Sancto Augustino. Hic enim quarto sæculo agens totius Ecclesiæ causam, tam feliciter evicit contra Donatistas tria Sacramenta in hæresi collata non esse iteranda, ut Concilia sæpius in hanc rem celebrata, & subsequentes Patres ejus doctrinam tanquam divinitus traditam declaraverint. Inter omnia testimonia, quæ supra cap. 14. collegimus, celebris est locus ex cap. 13. lib. 2. contra Parmenianum desumptus, ubi sic scribit S. Doctor, *Nulla ostenditur causa, cur ille qui Baptismum amittere non potest, jus dandi potest amittere, utrumque enim Sacramentum est, & quandam consecrationem utrumque homini dat, illud cum baptizatur, istud cum ordinatur, ideoque in Catholica Ecclesia utrumque non licet iterare.* Ex quibus patet per Baptismum & Ordinem dari quandam consecrationem & potestatem, ideoque non esse iterandos: atqui talis consecratio & potestas ex dictis est character: ergo ex Sancto Augustino Baptismus & Ordo imprimunt characterem: de Confirmatione vero sic lo-

quitur Epistola 74. ad Januarium, *Cur ad verba quæ procedunt de ore homicidæ possit tamen Deus oleum sanctificare, & in altari quod posuerunt hæretici, non possit, nescio.* Similia scribit lib. 5. de Baptismo capite 20. ad probandum Confirmationem collatam ab hæreticis valere, nec esse iterandam, ac proinde imprimere characterem.

Expressè autem meminit nominis characteris Epistola 185. aliàs 50. sub finem, ubi inducit Donatistam sic loquentem: *Quare ergo me non baptizas, ut abluas me à peccatis?* Respondet; *Quia non facio injuriam characteri Imperatoris, cum errorem corrigo desertoris;* Idem nomen usurpat lib. 6. de Baptismo cap. 1. & Epist. 98. aliàs 28. ad Bonifacium: ergo Innocentius III. non efficit nomen characteris.

Dices: ante Petrum Piëtaviensem Magistri Sententiarum primò discipulum, deinde successorem in Cathedra Theologica Parisiensi, nullus meminit characteris; imò Albertus magnus in quartum dist. 6. art. 4. docet vix in scriptis sanctorum Patrum quidquam de characterem inveniri. Scotus etiam in quartum dist. 6. q. 9. dicit propter solam Innocentii III. & Ecclesiæ Romanæ auctoritatem admittendum characterem. Gabriel Biel ibidem quæstione 2 scribit neque Scripturam, neque scripta Sanctorum Patrum cogere ad admittendum characterem. Cajetanus etiam in tertiam partem Sancti Thomæ q. 63. art. 1. ait ex sola auctoritate Ecclesiæ non multum antiqua agnoscendum characterem; ergo cum Ecclesia novas à Deo non accipiat revelationes, Concilium Tridentinum non potuit definire tanquam de fide, characterem existere.

Distin.

Distinguo antecedens : antiqui Theologi docent characterem non habere fundamentum in antiqua traditione, in sensu quo Scholastici disputant, ut ipse Albertus Magnus loquitur loco citato, & Gabriel Biel, Concedo : eo sensu, quo definiit Concilium Tridentinum, & ante illud Eugenius IV. in suo Decreto, Nego antecedens. Itaque fatemur cum laudatis Theologis probari non posse ex Sanctorum Patrum Scriptis characterem esse qualitatem, aut relationem sive realem, sive rationis, sed constat ex dictis eos agnovisse ejus existentiam. Et hoc advertit Magister Sententiarum lib. 4. dist. 7. his verbis : *Iterari autem illam non possunt* (Baptismus nempè, Confirmatio, & Ordo,) *quia sanctus Augustinus ait ea per consecrationem dari ; quod autem semel est consecratum, suam consecrationem nunquam amittit.* Porro consecratio illa intelligi non potest de gratia sanctificante, quæ sæpius amittitur : necesse est ergo, ut intelligatur de characterē.

Instabis : vitiosus hic admittitur circulus ; nam ex characterē probatur tria Sacramenta iterari non posse ; & vicissim colligitur eadem Sacramenta imprimere characterem, ex eo quod non iterentur : ergo.

Nego ant. vitiosus enim non est circulus, quando est in diverso genere probationis, ut patet exemplo diei lucescentis, ex quo colligitur ortus solis, tanquam causa ex affectu. Contra verò cæcus sciens solem oriri in æquinoctio hora sexta, inde concludit diem esse, & vocat domesticos ad solitas operas. Similiter nonnunquam Catholici probant existentiam characteris ex effectu, nimirum ex eo quod tale Sacramentum non iteretur ; data verò alia occasione, ex causa colligunt effectum necessa-

riò ei conjunctum, scilicet, hoc Sacramentum imprimit characterem : ergo iterari non potest.

Contemnenda potius, quàm seriò confutanda ea, quæ docent Novatores, nempe Baptismum non ratione characteris, sed mysticarum significationum non iterari ; quia est regeneratio à peccato originali, & janua, qua patet ingressus in Ecclesiam & in vitam æternam. Cum autem peccatum originale non redeat, nec jam ingressus iterum intrare possit, consequens est, inquiunt, semel baptizatum iterum baptizari non posse. Quasi vero deleatur macula peccati originalis, quando quis fictè & sine debitis dispositionibus baptizatur, vel necesse non habeat iterum intrare, qui per excommunicationem, schisma, & hæresim ab Ecclesia recedit. Non itaque propter significationes illas mysticas, sed propter characterem pœnitens non rebaptizatur.

CAPUT XX.

De numero Sacramentorum Novæ Legis.

Q. I. *Quot sunt Sacramenta novæ Legis?*

Mira est Novatorum varietas circa numerum Sacramentorum. Lutherus lib. de captivitate Babylonica scribit se non damnare septem Sacramenta, unum tamen esse propriè dictum, sed admittenda duo, scilicet Baptismum & Eucharistiam, & in alio loco ejusdem libri addit Pœnitentiam.

Melanchton ejus Collega, in celebri Confessione Augustana tria etiam Sacramenta confitetur, & in posterioribus scriptis nunc quatuor, nunc quinque agnoscit, propendetque in sententiam Zwinglii, Matrimonium inter Sacramenta numerantis lib. de vera & falsa Religione.

Calvi-

Calvinus lib. 4. Institutionum c. 18. Baptifmum & Euchariftiam folùm retinet, quanquam c. 19. Ordinationem addere videatur. Dallæus ejus feftator & Pſeudo-minifter in agro Pariſienſi, vulgò *Charenton*, hac noſtra ætate ſcripſit quæſtionem de num. Sacramentorum nullius aut parvi admodum eſſe momenti. Contra ejusmodi varietates

R. De fide eſt ſeptem eſſe Sacramenta novæ Legis; ita Concillum Tridentinum poſt Eugenium IV. definivit Seſſ. 7. Can. 1. his verbis: *Si quis dixerit Sacramenta novæ Legis non fuiſſe omnia à Jeſu Chriſto Domino noſtro inſtituta, aut eſſe plura vel pauciora, quàm ſeptem . . . anathema ſit.*

Probatur ex conſenſu univerſalis Eccleſiæ tum Orientalis, tum Occidentalis; Græci enim ſicut & Latini, ſeptenarium illum Sacramentorum numerum retinent, ut patet tum ex eorum Euologiis, ſeu Ritualibus: tum ex cenſura, qua Jeremias Patriarcha Conſtantinopolitanus Auguſtanam Lutheranorum Confeſſionem proſcripſit: tum ex Synodo Bethlehemitica anno 1672. ſub Doſitheo Patriarcha, ubi Græci profitentur ſe agnoſcere ſeptem novæ Legis Sacramenta. Porro conſenſus generalis Eccleſiarum Orientalium ſchiſmate à ſe invicem ſeparatarum, evidens eſt teſtimonium traditionis divinæ: ſiquidem quod ſemper & ubique & ab omnibus obſervatum eſt, divinitus eſt traditum ex Vincentio Lirinenſi; errorem enim variaſſe neceſſe eſt, ut arguentur Tertullianus lib. de præſcriptionibus contra hæreticos.

Nec Novatores hîc pro more caluminari poſſunt Eccleſiam Romanam ſua tyrannide Græcorum

rum mentes præoccupasse; cùm Græci à pluribus sæculis ab ea sint divisi, testenturque (quod satis per se notum est) se hanc doctrinam ab antiquioribus Patribus accepisse. Sed ista accuratius probabuntur, ubi de Sacramentis in particulari.

Dices; recens est ille catalogus septem Sacramentorum, nec reperitur in sacra Scriptura, nec apud ullum è Sanctis Patribus; imò SS. Ambrosius, Cyrillus Jerosolymitanus, & alii, qui fidei rudimenta in suis Catechesibus exponunt, non meminerunt nisi duorum aut trium Sacramentorum, nempe Baptismi, Confirmationis, & Eucharistiæ, quod signum est intolerandæ novitatis, quam Scholastica Theologia duodecimo sæculo nata invexit.

R. 1. Neque Scriptura, neque ulla Synodus ante Laodicænam texuerunt catalogum Librorum Canoniorum: an propterea admittendus non est? sufficit itaque quodlibet è septem Sacramentis colligi ex diversis Scripturæ locis.

R. 2. Sancti Patres aliquando unius Sacramenti, aliquando duorum vel trium mentionem faciunt; quia illorum instituti ratio aliud non exigebat: eam ob rem SS. Ambrosius & Cyrillus, qui Catechumenos instituendos susceperant, de Baptismo, Confirmatione, & Eucharistia tractant; quia solebant illis ministrari tria illa Sacramenta. Sic Rabanus nono sæculo in opere de Institutione Clericorum, non meminit Sacramenti Matrimonii, quod Clericos non spectat. Durandus quidem minus rectè scripsit de Matrimonio, sed in hac parte deseritur ab omnibus Theologis.

Q. 2. *Quare nec plura, nec pauciora sunt quàm septem novæ Legis Sacramenta?*

R. Quia ita Christus Dominus voluit; in contingentibus enim & liberis ratio facti nulla esse potest, quàm voluntas facientis; hanc tamen convenientiam S. Thomas repetit ex naturali ordine rerum humanarum. Quemadmodum enim in ordine naturali requiritur primò ut homo nascatur, secundò ut crescat, tertio ut nutriatur, quartò si ægrotet, medicinam accipiat; quintò ut muniatur contra hostes, sextò ut ab aliquo superiore regatur, septimò ut species humana per generationem conservetur; sic in ordine supernaturali & vita spirituali, Baptismus est ad regenerationem., Confirmatio ad accretionem, Eucharistia ad nutritionem, Pœnitentia ad medicinam, Extrema unctio ad armaturam, Ordo ad regimen, & Matrimonium ad multiplicationem fidelium.

CAPUT XXI.

Utrùm Ecclesia habeat potestatem instituendi Cæremonias?

R. **A**ffirmant Catholici contra Novatores, probantque ex continuo usu universalis Ecclesiæ.

Apostolus I. ad Cor. II. pollicetur se ordinaturum, quæ ad Eucharistiam celebrandam spectant; *Cætera autem, inquit, cum venero, disponam.* Huc refert S. Augustinus Epist. 54. aliàs 118. morem ministrandi Eucharistiam nonnisi jejunis; relatis enim Apostoli verbis, hæc addit S. Doctor,
Unde

Unde intelligi datur . . . : ab ipso (Paulo) ordinatum esse, quod nulla morum diversitate variatur.

S. Justinus Apostolorum temporibus vicinus, meminit Apologia 2. multarum Cæremoniarum ad confectionem & dispensationem Eucharistiæ pertinentium.

Tertullianus tertio sæculo, scribit lib. de Baptismo, secundum Ecclesiæ consuetudinem lac & mel baptizatis degustanda dari consuevisse.

S. Cyrillus quarto sæculo recenset in suis Catechesibus multas Cæremonias apud Orientales adhibitas in celebratione Baptismi; & S. Aug. ad probandum peccatum originale contra Pelagianos sæpius urget exorcismos, quibus Ecclesia ex Traditione Apostolica Catechumenos ad Baptismum præparabat.

Sacramentale S. Gregorii Magni, Euchologia Græcorum, scripta S. Isidori, Alcuini, Rabani, Amalarii, & aliorum, fidem faciunt ritus, quos etiam nunc Ecclesia Latina observat in celebratione Sacramentorum, in officio Hebdomadæ Sanctæ, & aliarum Solemnitatum, institutos esse ante mille annos.

Ex his patet, si usus Cæremoniarum sit contrarius verbo Dei, ut contendunt Novatores, Religionem Christianam defecisse à primis incubulis, Ecclesiamque Catholicam nunquam extitisse nisi adulteram, sanctos quoque Patres perisse in ejus sinu, si nemo, ut Novatores afferunt, salutis suæ consulere possit, nisi ab ea recesserit.

Objiciunt Cæremonias Ecclesiæ Romanæ simplicitati & paupertati Evangelicæ esse contrarias, vanitatem mundanam & pompam fatanæ redolere,

re, pleraſque à Gentilibus & à Judæis deſumptas, earumque multitudine fideles obrui, contra Sancti Petri præceptum Act. 15. & Sancti Auguſtini doctrinam Epistoła 154. aliàs 118.

R. 1. Pompa ſatanæ non eſt, quæ non in hominum, ſed in Dei gloriam refertur. Quis enim niſi inſipiens credat aurum, argentum, & gemmas ad folius hominis ornatum fuiſſe creata, cùm ipſemet Deus iis tabernaculum ſuum adornari præceperit, & ipſemet Chriſtus Dominus ſimplicitatis & paupertatis amantiſſimus laudaverit Matth. 26. Mariam, quæ pretioſum unguentum ſuper caput ejus effudit? An culpandi antiquiores Patres, qui Conſtantini magnificentiam in extruendis & adornandis Templis, laudaverunt & imitati ſunt? Negari non poteſt præferendos eſſe pauperes, quando urget neceſſitas; ſed huic pietatis officio non deſuerunt S. Ambroſius, Auguſtinus, & quotquot ſanctitate floruerunt. Si autem privati nonnulli contra mentem Eccleſiæ, hunc charitatis ordinem prætereunt, non eſt propterea ſcindenda unitas, nec eorum ſocietate magis polluimur, quàm divitum communionem, qui neglectis pauperum neceſſitatibus divitias coacervant.

R. 2. Cùm ratio naturalis multa reverentiæ interioris ſigna ſuggerat, qualia ſunt ſacrificia, proſtrationes, &c. quid mirum ſi Chriſtiani ad veri Dei cultum referant, quæ Gentiles in ſuperſtitionem convertunt? Nonne Deus in veteri Teſtamento multa præſcripſit, quæ in uſu erant apud Gentiles? Addere licet, quod obſervarent SS. Patres, dæmonem Dei æmulatorem Judæorum cæremonias ad ſuum cultum ſacrilegum tranſtuliffe.

Q. 2.

Q. 2. *Cæremoniæ possuntne sine peccato omitti aut mutari extra casum necessitatis, per quemcunque Ecclesiæ Ministrum?*

R. Affirmant Novatores, modò id fiat sine scandalo. Contrarium definiit Tridentinum sess. 7. can. 13. his verbis: *Si quis dixerit, receptos & approbatos Ecclesiæ Catholicæ ritus in solemnibus Sacramentorum administratione adhiberi consuetos, aut contemni, aut sine peccato à Ministris pro libito omitti, aut in novos alios per quemcunque Ecclesiarum Pastorem mutari posse; anathema sit.* Et sess. 22. can. 7. *Si quis dixerit, Cæremonias, vestes & externa signa, quibus in Missarum celebratione Ecclesia Catholica utitur, irritabula impietatis esse magis, quàm officia pietatis: anathema sit.*

Q. 3. *Quare Ecclesia instituit Cæremonias?*

R. Triplici ex causa; 1. ut mysteriorum nostrorum commendetur dignitas, & debita ipsis reverentia excitetur. 2. ut in his visibilibus signis fideles tanquam in tabella accuratè depicta latentem mysteriorum virtutem & naturam deprehendant. Unde colliges, quòd quemadmodum intuentium oculos lædit, tabella rudiori & inerudita manu exarata; sic cæremoniæ deformem mysteriorum imaginem exhibent atque in contemptum vertunt, nisi sedulò cum dexteritate, & quadam venustate perficiantur. 3. Nonnullas etiam Cæremonias Ecclesia instituit ad sanctificationem quam habent cum Sacramentis, dicuntur sacramentalia; sunt enim signa quædam sanctitatis.

Q. 4. *Quot vulgò numerantur Sacramentalia?*

R. Sex numerantur hoc versiculo contenta;
Orans, tinctus, edens, confessus, dans, benedicens.

Orans,

Orans, indicat orationem Dominicam; *tin-ctus*, aquam lustralem; *edens*, panem benedictum, qui & Eulogia ab antiquis dici solet; *confessus*, confessionem, quæ publicè fit die Jovis in Cœna Domini; *dans*, eleemosynam: *benedicens*, benedictionem Episcopalem.

Verùm cum recitatio orationis Dominicæ, & largitio eleemosynæ, non sint ritus ab Ecclesia instituti, sed opera moralia, de iis non est hîc differendi locus.

Q. 5. *Quomodo Sacramentalia produciunt sanctitatem?*

R. 1. Certum est eam non producere ex opere operato; hæc enim efficacia propria est Sacramentorum, quæ Ecclesia non potest instituere, ut constat ex dictis.

R. 2. Ex Ecclesiæ precibus vim habent iis impetrandi gratias actuales, quibus applicantur; si enim privati per oleum, aquam, panem, & cætera à se benedicta, salutare effectus aliis obtinuerunt, ut de plurimis Sanctis fidem facit Historia Ecclesiastica; à fortiori ipsamet Ecclesia, in qua omnes Sancti continentur, id præstare poterit. Fideles ergo precibus & suffragiis Ecclesiæ adjuti, dum piè illa Sacramentalia adhibent, faciliùs doloris & contritionis, sive amoris divini motum concipiunt, quo vel delent peccata, vel in gratia crescunt. Unde sequitur Sacramentalia non nisi ex opere operantis, & remotè sanctitatem producere.

Q. 6. *Estne antiquus usus ille Sacramentalium?*

R. Est antiquissimus.

I. Quoad benedictiones. In lege naturæ Sacerdos Melchisedech benedixit Abraham, Gen. 14.

In le-

In lege scripta Deus ipse Num. 6. præscribit Sacerdotibus Aaronicis formam benedicendi Israelitis, promittitque se confirmaturum eorum benedictiones, & ego benedicam eis. In nova lege ritus ordinationis Presbyterorum demonstrat eis competere benedicendi potestatem, eamque Ecclesia suis precibus & suffragiis commendat his verbis: *Consecrentur manus istæ, ut quidquid benedixerint, benedicatur.* In Concilio tamen Agathensi initio sexti sæculi, prohibentur Presbyteri benedictionem dare super plebem & pœnitentes, ut potestas illa Episcopis propria conservetur. A tempore Apostolorum hætenus benedixerunt Presbyteri, tum Latini, tum Græci, eorumque benedictiones Deus nonnunquam miraculis confirmavit, & pro magno beneficio habuerunt etiam Imperatores, si ab Episcopis benedicerentur.

2. Duplex est aquæ benedictio, tum apud Latinos, tum apud Græcos. Alia solemnior, quæ in Ecclesia Latina celebratur pridie Pascha & Pentecosten ad fontem baptismalem: apud Græcos verò in Festo Epiphaniæ, quæ ab ipsis *Theophania* dicitur: alia minus solemnis, quæ fit tum à Græcis, tum a Latinis diebus Dominicis. Dubitari autem non potest, quin prior benedictio fontis baptismalis sit traditionis Apostolicæ, cùm illius meminerint antiquissimi Patres. De tempore, quo instituta fuit altera benedictio, non consentiunt Theologi. Alii putant esse institutam à S. Alexandro, qui vixit primo sæculo, & sedit initio secundi, probantque suam sententiam ex ejus Decretali. Sed communiter rejiciuntur Summorum Pontificum Epist. Decretales quarto sæculo antiquiores, tanquam suppositæ à quodam Isidoro

Ifidoro *Mercatore* nuncupato, ex eo quòd primus vitiosas illas merces advexerit. Bellarminus l. 3. de cultu Sanctorum c. 7. contendit in ea Decretali usum aquæ benedictæ tantum præcipi, institutum verò esse ab Apostolis. Sed esto Ecclesia, non Apostoli, hanc benedictionem instituerit, satis est illam esse antiquissimam, ut constat ex Sacramentariis Latinis, & Euchologiis Græcorum.

Porro in universa Ecclesia, hoc est, in Oriente & in Occidente, ex a qua benedicta sive solemniori, sive minus solemniori plebs secum deferebat, sicuti etiam nunc defert ad aspergendos cibos, agros, pecora, & eorum stabula, & ad arcendas à domiciliis infestationes dæmonum, ut constat tum ex Euchologiis Græcorum: tum ex antiquo ordine Romano, edito à Patre Mabillonio Ordinis S. Benedicti: tum ex lib. 7. Capitularium tit. 76. & ex Hincmaro Episcopo Remensi anno 852. cum hoc tamen discrimine, quòd cit. Capitularia velint hauriendam aquam ex sacro fonte ante chrismatis infusionem, Ordo verò Romanus post ipsam infusionem. Ex quibus mirari licet, quomodo pseudo-Apostolorum sæculi præcedentis infans furor eò usque erumpere potuerit, ut affirmarent sacras illas benedictiones esse incantationes magicas. Quasi verò Christianus sui compos asserere audeat, nunquam veram Christi extitisse Ecclesiam: atqui nunquam extitisset, si, ut contendunt Novatores omnes, omnes Ecclesiæ Pastores à tempore Apostolorum ad eorum usque ætatem magicis artibus fuissent dediti.

3. Panis benedicti frequens est mentio apud Auctores quarti sæculi. Illius meminerunt S. Augustinus lib. 2. de peccatorum meritis c. 26.

Paulinus Episcopus Nolanus in fine Epist. 25. inter Augustinianas, & ante eos Concilium Laodicænum canone 82. ubi prohibet ab Hæreticis Eulogias accipere, quod Martinus Braccarenfis repetit cap. 70. circa annum 572. Gregorius Turonensis lib. 5. Histor. Franc. c. 14. ubi refert se Eulogias, quas prius dare recusaverat Mœrovæo à Sacerdotio apostatæ, tandem concessisse, quia minabatur aliquos de populo interficere. In Concilio Aquisgranensi cap. 64. anno 817. fancitum est pro Monachis, ut Eulogiæ fratribus, qui eo die non communicaverint, per manus Sacerdotis in refectorio distribuuntur, quod etiam Hincmarus præstandum sanxit omnibus laicis.

Ufus etiam Eulogiarum hætenus apud Græcos viguit, apud quos comeduntur in Ecclesia à jejunis non communicantibus, ut Eucharistiæ orbitatem utcunque compensent. Eulogiæ reverà sunt in supplementum Eucharistiæ, quæ dicebatur *fermentum*: quia sicut fermentum totam massam pervadit, sic Eucharistia Fidelibus distributa omnes in unum copulat, proptereaque in signum unionis à Summo Pontifice, ministerio Acolythorum, ad Presbyteros urbanos mittebatur, ut constat ex prima Epist. Innoc. I. quarto sæculo ad Decentium Episcopum; *quia, inquit, urbani Presbyteri, (Parochi) ipsa die dominica, propter plebem creditam nobiscum convenire non possunt; idcirco fermentum à nobis confectum per Acolythos accipiunt, ut se à nostra communione, maxime illa die, non judicent separatos.* Tum de rusticanis Presbyteris adjicit, *quod per Parochias fieri debere non puto, quia non longè portanda sunt Sacramenta Presbyteri eorum conficiendorum jus habent.*

Verum,

Verùm, reforescentente Fidelium devotione, obsolevit usus domum asportandæ Eucharistiæ, quin Concilium Laodicenum illum prohibuit can. 14. his verbis, *quod sancta nullo modo causa Eulogiarum tempore Paschalis festi ad alias Parochias debeant destinari.* Quare usus Eulogiarum, sive panis benedicti, tum apud Græcos, tum apud Latinos substitutus est; unde cùm specialem benedictionem accipiat ad spirituales effectus, fovendamque unionem, quæ inter Fideles debet esse maxima, distribuendus non est animalibus, pro quorum pabulis alias benedictiones instituit Ecclesia. Imò nonnisi religiosa mente, tanquam sacramentale quid sumendus est, non miscendus cum prophanis cibis, cautèque servandus, ne pereat, juxta laudati Hincmari decretum: *Micas, inquit, ne incautè defluant, accipiat (Presbyter) Panem illum sanctum Fidelibus distribuens.* Atque hoc ad Religionis Christianæ, & majorum nostrorum mentem: at nunc, proh dolor! unitatis signum & instrumentum ambitio frequenter convertit in causam divisionis & scandali; adeò ut jam non sit Dominicam cœnam manducare, ut loquitur Apostolus 1. Cor. 11.

4. Ritus confitendi peccata publicè, sed generatim, in Cœna Domini, & continuò percipiendi à Sacerdote vel ab Episcopo, si adsit, benedictionem, quæ vulgò dicitur absolutio, Gallicè *l' Absolutè*, est umbra & repræsentatio ritus antiquioris, secundùm quem publicè pœnitentes, initio Quadragesimæ è templo ejecti, hac die reconciliabantur, palàmque absolutionis beneficium perfecta jam pœnitentia, consequiebantur. Porro nihil est in hac Cæremonia: licet non ad-

modum antiqua, quod justè possint carpere Novatores. In illa siquidem fideles palàm se confidentur peccatores, à Deo veniam petunt, pro illis Ecclesia suis suffragiis intercedit, eosque per Ministrum suum benedicit; quæ omnia planè religiosa sunt, & ad pœnitentiam sanctiorisque vitæ consilium provocant.

Q. 7. *Estne conveniens in administratione Sacramentorum, & aliis Officiis Divinis, uti lingua Latina, quæ à pluribus sæculis peregrina est, & multis ignota?*

Hanc maximè causam recedendi à societate nostra prætexunt Novatores; quia, inquiunt, in Conventibus Papistarum, lingua tantum orat, mens autem sine fructu est, cum non percipiat id quod dicitur. Unde in Romanenses detorqueri licet, quod Christus Dominus Judæis olim exprobrabat: *Populus hic labiis me honorat, cor autem longè est à me.* Hunc abusum (pergunt illi) multis & gravissimis verbis reprehendit Apostolus, adeò ut secundum ipsum insanire, & in aera loqui videantur, qui peregrino orant idiomate, 1. Corinth. 34. v. 9. 14. & 23. Sed meritò ipsi tribuendum est illud Proverb. 18. *Occasiones quærit, qui vult recedere ab amico, & omni tempore erit exprobrabilis.*

1. Namque usus idiomatis vulgaris, & omnibus noti impossibilis est in Conventibus publicis, ad quos conveniunt, vel saltem conveniendi jus habent Fideles diversi idiomatis. Supponatur quòd Romæ, & in tota Italia divina Officia celebrentur idiomate Italico, & Parisiis, sive per totam Galliam Gallico, nonne hæc lingua vulgaris, magis erit ignota Germanis, Hispanis, & aliis Nationibus in illis regionibus peregrinis, quàm Latina? Latina enim in toto Occidente à
pluri-

pluribus dicitur, vulgaris verò vix à quoquam extraneo, imò in eodem regno, puta Francorum, pro diversitate Provinciarum, diversa sunt idiomatica. Parisienses v. g. non norunt idioma Aquitanorum, Amoricorum, Arvernorum. Nunquid hi omnes, qui frequenter inter se in civilibus communicant, in spiritualibus separabuntur propter diversitatem idiomatum? Meritò itaque Ecclesia Romana retinuit usum Linguae Latinae, sicut & Orientalis Graecae, licet ambæ Linguae non sint amplius vulgares.

2. Novatores non fugiunt Conventus Religiosos propriae sectae, etiamsi celebrentur lingua, ut plurimum ignota: Galli Calvinistae, v. gr. dum peregrinantur in Anglia, in Germania, &c. conveniunt cum Anglicis & Germanis ad Officia divina, quamvis lingua magis illis ignota, quam Latina sibi persolvantur. Cur idem nobiscum non factitant?

3. Mutatio, quae frequenter accidit in lingua vulgari, efficit ut verba & nomina obsoleta sermonem ingratum, barbarum & contemptibilem reddant, hoc constat ex Libris Ritualibus, qui Gallico idiomate à duobus saeculis sunt typis mandati; vix enim legi possunt, quin lector aut auditor ad risum moveatur, sicque augustiora nostra Mysteria barbaro illo idiomate explicata manifesto contemptui exponerentur.

Nec dicant Adversarii novos libros identidem cudendos; namque 1. novitas & mutatio in rebus ad Religionem pertinentibus, Fidelium animos offendunt. 2. Versiones difficiles sunt & periculosae, nec publicae proponendae, nisi à sapientioribus prius approbatae fuerint; mutatio enim

verborum sæpè sensum mutat, aut etiam destruit. Vix autem ista posse observari in multis Diœcesibus, nemo est qui non intelligat. 3. Inopia Ecclesiarum, incuria & negligentia populorum, nonnunquam etiam Pastorum, obstant quominus novi cudantur libri.

Respondeo ad momenta ex Epist. ad Corinthios adducta, Apostolum ibi concedere usum linguæ peregrinæ in Conventibus Ecclesiasticis, modò unus adsit, qui interpretetur, solùmque reprehendere Corinthios, quòd omnes æmulerentur diversis loqui linguis, ex quo necesse erat nasci confusionem, qualis esse solet inter insipientes. At in Ecclesia Romana, sicut una omnium fides, & unum corpus mysticum, sic omnes unum Deum laudant uno ore & una lingua, quæ quamvis pluribus sit ignota, adest tamen interpret; nam Pastoris præcipuum officium est singulis diebus Dominicis & festis explicare Verbum Dei, ritum sacrificii, & cætera, quæ fiunt in Ecclesia, quin & negligentes Pastores, si qui sint, severissimis pœnis ab Episcopis urgendos præcipit Concil. Tridentinum sess. 22. cap. 8. Adde preces Ecclesiæ Lingua vulgari redditas esse in omnium manibus; quapropter idiotæ scienter respondere possunt *Amen* ad Sacerdotis benedictionem, quamvis nec temerè responderent, etiam si eam non intelligerent; norunt enim hujusmodi preces esse ab Ecclesia approbatas, nihilque continere falsi & impii. At Corinthiis prius probandi erant spiritus, ut monet Sanctus Joannes, cap. 4. 1. suæ Epistolæ, num scilicet, ii à Deo, vel à damone inspirati essent, qui insolita & omnibus ignota Lingua, absente Interprete, loquebantur: unde

unde idiota ante illud examen prudenter non poterat respondere *Amen*.

O. 8. *Estne tolerandus cantus in Officio publico, & usus Instrumentorum Musicorum?*

R. Psalmi, qui ex sancto Augustino sunt lingua, qua universalis Ecclesia laudes Dei celebrat, nos excitant ad laudandum Deum in sono tubæ, in psalterio, & cythara, in chordis, & organo, Psalm. 150. Horum usus frequens erat apud Judæos, ut constat ex libri secundi Regum cap. 6. & libri 1. Paralip. cap. 25. Organa tamen, & cætera musica instrumenta, primis Ecclesiæ sæculis in Ecclesia videntur incognita; Fideles quippe in criptis & speluncis sine multo apparatu sacra celebrabant: *Nonne*, inquit sanctus Augustinus enar. 2. in Psal. 31. *id egit institutio in nomine Christi vigiliarum istarum, ut ex isto loco cytharæ pellerentur?* Horum tamen Fortunatus Pictaviensis sexto sæculo meminit lib. 2. can. 1. Sedeorum usus non ita fuit universaliter receptus, quin sæculo 13. visa sint S. Thomæ parum congruere moribus Christianorum; sic enim scribit 2. 2. quæst. 19. art. 2. ad 4. *Hujusmodi musica instrumenta magis animum movent ad delectationem, quam per ea formetur intus bona dispositio; in veteri autem Testamento usus erat talium instrumentorum: tum quia populus erat magis durus & carnalis: tum etiam quia hujusmodi instrumenta corporalia aliquid figurabant.* Quare nonnullæ Congregationes Regulares strictioris observantiæ organa in suis Oratoriis non admittunt. Posteriora tamen Concilia tolerarunt, solumque prohibuerunt, ne profana sacris admisceantur, quales sunt concentus, qui voluptatem magis, quam devotionem provocant, & omnia instrumenta, quæ

ad choreas, ludos theatrales, & mundanas sæculi pompas inservire consueverunt.

Cantus verò ad pietatem fovendam compositus, fuit apud Christianos semper in usu, ut colligere licet ex Tertulliano, qui cap. 2. Apologetici refert Plinium juniorem ad Trajanum scripsisse, quòd inquirens in mores Christianorum, nihil de his compererit, præter obstinationem non sacrificandi, & cætus antelucanos ad canendum Deo. Sanctus Hieronymus epistola 17. de incolis Bethlehem, sic scribit: *Extra Psalmos silentium est quocunque te verteris, arator stivam tenens, Alleluja, decantat: sudans messor Psalmis se avocat; hæc sunt in hac Provincia carmina, hic Pastorum sibilus.* Et hæc quidem secundum Apostoli institutum ad Colossenses 3. *Verbum Christi, inquit, habitet in vobis abundanter, docentes & commonentes vosmetipsos psalmis, hymnis & canticis spiritualibus, in gratia cantantes in cordibus vestris Deo.* Quàm autem efficaces sint cantus in Divinis Officiis adhibiti, expertus est sanctus Augustinus lib. 4. Confess. c. 6. ubi sic Deum alloquitur, *quantum flevi in hymnis & Canticis tuis; suave sonantis Ecclesiæ tuæ vocibus commotus acriter.* Sed quàm diligenter in his cavenda sit sensuum delectatio, quæ mentem deprimit, monet lib. 10. Confessionum cap. 33. ubi sic scribit: *Cum mihi accidit, ut me amplius cantus, quàm res, quæ cantatur, moveat, pœnaliter me peccasse confiteor . . . aliquando hanc ipsam fallaciam (aurium delectationem) immoderatiùs cavens errorum nimia severitate: sed valde interdum, ut melos omne Cantilenarum suavium, quibus Davidicum Psalterium frequentatur, ab auribus meis remo-*
veri

veri velim, atque ipsius Ecclesiæ, tutiusque mihi videtur, quod de Alexandrino Episcopo Athanasio sæpè mihi dictum commemini, qui tam modico flatu vocis faciebat sonare lectorem Psalmi, ut pronuntianti vicinior esset, quàm canenti. Notent hæc sancti Doctoris verba, tum qui melodiam componunt, præsertim ad aures mulcendas, tum qui ad Ecclesiam confluunt, tanquam ad spectaculum theatricum voluptatis capiendæ gratia, cui verus Christianus nusquam servit, sed multò minùs in Templo, in quo sicut in cælo debet adesse, nempe ad laudandum Deum reverentia & tremore. Quapropter ne mentes fidelium aliò avocentur, Concilium Braccarense II. anno 567. statuit can. 12. ne quidquam poetice compositum in Ecclesia psallatur, sed anno 633. Toletanum IV. can. 13. versus humano studio compositos rejiciens, excipit quos beatissimi Doctores Hilarius & Ambrosius ediderunt: *Amica & familiaris est oratio Deum de suo rogare*, inquit S. Cyprianus libro de Oratione Dominica.





Tractatus DE BAPTISMO.

CAPUT PRIMUM.

De nomine, existentia, & definitione Sacramenti Baptismi.

Q. I. *Unde nomen Baptismi?*

R. A nomine Græco βαπτισμός, quod Latinè significat immersionem, seu ablu-
tionem.

Hinc Baptismata dicuntur quæcunque ablu-
tiones etiam profanæ, ut usus balneorum, 2. Ef-
dræ 4. lotiones calicum, & aliorum hujusmodi
vasorum, Marci 7. Sed apud Auctores Ecclesia-
sticos, Baptismus est ablutio ad Religionem per-
tinens, de qua hic agitur.

Q. 2. *Quotuplex est Baptismus hoc posteriori modo?*

R. Triplex, Primus dicitur baptismus sangui-
nis,

nis, quod est martyrium: secundus baptismus flaminis, quod est votum, seu desiderium recipiendi Sacramentum Baptismi: tertius, baptismus aquæ, quod est primum novæ Legis Sacramentum, de quo hic est Tractatus.

Q. 3. *Quare martyrium, & votum Baptismi dicuntur baptifinata, seu ablutiones?*

Metaphoricè ita vocantur; quia in casu necessitatis, ubi non est facultas suscipiendi baptismum aquæ animam mundant à peccato, ut infra dicetur; sicque ablutiones quædam sunt metaphoricæ. Dicuntur etiam Sacramentum baptismi in voto, propter desiderium hujus Sacramenti in illis conceptum, quamvis rectiùs ea appellaveris votum sacri Baptismi; reverà enim Sacramenta non sunt, cùm non sint sacri ritus externi à Christo Domino instituti.

Q. 4. *Quomodo probatur Baptismum esse Sacramentum à Christo Domino institutum?*

R. Probatur 1. ex Scriptura Joan. 3. *Nisi quis renatus fuerit ex aqua & Spiritu Sancto, non potest introire in regnum Dei*, Matth. 28. *Docete omnes gentes baptizantes eos in nomine Patris, & Filii, & Spiritus Sancti*, ex quibus textibus hic conficitur syllogismus.

Tria requiruntur ad Sacramentum novæ Legis. Primum, ut sit ritus externus à Christo Domino institutus: secundum, ut ritus ille habeat promissionem gratiæ sanctificantis: tertium, ut extet mandatum illius observandi: atqui hæc tria exprimuntur in illis textibus. 1. Ritus abluendi aqua sub invocatione Sanctissimæ Trinitatis. 2. Promissio gratiæ sanctificantis: talis enim ablutio dicitur regeneratio in Spiritu Sancto. 3. Mandatum

datum observandi illam ablutionem : *Docete*, inquit, *baptizantes*, quod ita necessarium præcipitur, ut sine eo non pateat ingressus in regnum Cælorum.

Probatur 2. ex constanti Traditione universalis Ecclesiæ, quæ semper ritum baptizandi observavit, atque in hac parte nobis consentiunt Novatores.

Q. 5. *Quot nominibus donatur Sacramentum Baptismi?*

R. Tribus potissimum.

1. Dicitur Sacramentum regenerationis, seu renovationis : *Salvos nos fecit*, inquit Apostolus 3. ad Titum, *per lavacrum regenerationis, & renovationis Spiritus Sancti*. Hinc dicitur etiam Sacramentum adoptionis ; quia cum essemus natura filii iræ, Ephes. 2. in hoc Sacramento Deus per gratiam sanctificantem, qua efficimur ejus divinæ consortes naturæ, 2. Petri cap. 1. adoptat nos in filios & hæredes regni sui.

2. Nominatur illuminatio ex S. Justino apolog. 2. juxta illud Apostoli Hebr. 6. *Impossibile est eos, qui semel illuminati sunt (idest baptizati) & prolapsi sunt, rursus renovari ad pœnitentiam*. Ideo autem sic vocatur Baptismus, quia per ipsum infunditur lumen fidei.

3. Vocitatur ab Apostolo, Rom. 6. mors, sepultura, resurrectio ; quia in Baptismo peccatis morimur, exuimus veterem hominem, & novum induimus : *Consepulti enim sumus*, inquit, *cum illo (Christo) per baptismum in mortem, ut quomodo Christus resurrexit à mortuis per gloriam Patris, ita & nos in novitate vitæ ambulemus*.

Q. 6.

Q. 6. *Quomodo definitur Sacramentum Baptismi?*

R. Definitur à S. Thoma post Magistrum Sententiarum, ablutio exterior facta sub præscripta forma verborum : à Theologis vulgò Sacramentum novæ Legis ad spiritualem hominis regenerationem, à Christo institutum.

Q. 7. *Quandonam Christus Dominus instituit Sacramentum Baptismi, an ante, an post Passionem?*

R. 1. Neque ex Scriptura, neque ex Traditione id manifestè constat. Unde sancti Patres & Theologi in oppositas abeunt sententias. S. Chrysostom. homil. 28. in Joan. & post eum Theophylactus & Euthymius, S. Leo epist. 4. ad Episcopos Siciliæ, auctor Commentariorum in epist. ad Rom. cap. 4. apud S. Ambrosium; Alensis, Melchior Canus, existimant post Passionem fuisse institutum, in quam sententiam propendet Tertullianus lib. de Baptismo cap. 11. Contra verò S. Augustinus variis in locis, & præsertim epist. 265. aliàs 208. & tract. 5. in Joan. Magister Sententiarum in 4. distinct. tertia, S. Thomas & alii Theologi communiter contendunt Christum Dominum ante Passionem Baptismum suum instituisse.

R. 2. Ex Scripturis erui videtur Sacramentum Baptismi ante Passionem fuisse institutum.

Probatur 1. ex cap. 3. Joan. vers. 22. baptizabat Jesus, saltem per manus discipulorum suorum, ut habetur Joan. 4. vers. 2. atqui non baptizabat Baptismo Joannis, sed suo. Judas baptizavit, inquit S. Augustinus, sed Baptismo Christi. Id autem evincitur ex invidia Discipulorum Joannis cit. cap. 3. vers. 26. si enim Discipuli Christi baptizassent Baptismo Joannis, non ipse

ipse Christus, sed Joannes dētus fuisset post eos baptizasse; sicque nulla fuisset discordiæ & invidiæ causa; cū in illa hypothesi Christus Dominus sectator; & Discipulus Joannis visus fuisset: Ergo in nomine Christi baptizabant Apostoli.

Probatur 2. Joan. 13. Petrus dicitur lotus, & ea lotione à peccato mundatus: atqui non erat mundus à peccato per baptismum Joannis, cū efficaciam non haberet, ut mox dicitur: ergo lotus erat Baptismo Christi, quem propriis manibus Christus ipsi contulit, cæteris verò Apostolis manibus Petri, si vera sit Epistola Evodii secundi post sanctum Petrum Episcopi Antiocheni, quam refert Nicephorus lib. 2. hist. cap. 3.

Probatur 3. Apostoli ordinati sunt Sacerdotes, & Eucharistiam sumpserunt ante Passionem, nimirum in ultima cœna: atqui non fuissent capaces horum Sacramentorum, nisi prius tincti Baptismo Christi, ut ratiocinatur sanctus Augustinus, epist. 153.

Tempus autem instituti Baptismi certò assignari non potest. Tum quidem adumbratus est, cū à Joanne baptizatus est Dominus; in eo siquidem sensibilibiter apparuerunt tres Sanctissimæ Trinitatis Personæ: audita est vox Patris; demonstratus est Filius, visus est Spiritus Sanctus in specie Columbæ. Denique ex S. Ambrosio lib. 3. in Lucam baptizatur Christus, non mundari volens, sed aquas mundare, ut baptismatis jus haberent. Unde sanctus Thomas, & alii communiter Theologi suspicantur Christum Dominum circa illud tempus, priusquam prædicationis officium inchoaret, Baptismum suum instituisse.

Dices

Dices 1. Per Baptismum myſterium Sanctiſſimæ Trinitatis propalatur; atqui ante Paſſionem non fuit propalatum; prohibuit enim Chriſtus Matth. 16. ne Apoſtoli cuiquam dicerent, quod ipsis per Petrum innotuerat: & cap. ſequenti, ubi de myſterio Transfigurationis, ait: *Nemini dixeritis viſionem, donec Filius hominis à mortuis reſurgat*: Ergo.

Diſtinguo majorem: Propalatur obſcurè, ſicut propalatum eſt, quando Chriſtus Dominus fuit à Joanne baptizatus, Concedo: Clarè & diſtinctè explicando, quod tres Perſonæ realiter diſtinctæ in unitate naturæ ſubſiſtant, Nego major. Similiter diſtinguenda eſt minor, & neganda conſequentia.

Dices 2. In Baptiſmo Chriſti datur Spiritus Sanctus: atqui Spiritus Sanctus non eſt datus, niſi poſt reſurrectionem, ex capite 7. Joannis; donum enim illud eſt effectus Paſſionis Chriſti: Ergo.

Diſtinguo minorem cum S. Auguſtino tract. 32. in Joann. non eſt datus ſenſibiliter, cum tanta effuſione, & cum illis portentis, quæ contigerunt die Pentecoſtes, Conc. Inſenſibiliter, Nego min. Quis enim crediderit Chriſtum miniſtraſſe Euchariſtiam Spiritu vacuum, S. Joannem Baptiſtam, & quotquot præceſſerunt electi, ſine Spiritu Sancto inhabitante fuiſſe juſtos? Porro Baptiſmus licèt tempore Paſſionem præceſſerit, ex ea tamen futura, tanquam ex cauſa morali & meritoria, hauriebat vim ſuam, ſicut profeſſio fidei, quam diximus, ubi de Sacramentis in genere, inſtitutam tempore legis naturæ ad delendum peccatum originale.

Q. 8. *Differuntne Baptismus Christi Domini & Joannis?*

R. Patet differre ex cap. 19. Act. ubi Discipuli tincti solo Baptismate Joannis, jubentur baptizari Baptismo Christi: ergo Baptisma Christi non est idem cum Baptismate Joannis. Ita ratiocinatur S. August. tract. 5. in Joan. & libro 5. de Baptismo cap. 9.

Q. 9. *Quod est discrimen inter Baptismum Christi & Joannis?*

R. Tripliciter differt. 1. Baptismus Joannis non erat Sacramentum, utpotè qui non esset signum permanens; vix enim duravit uno, aut altero anno. 2. Alio ritu peragebatur, nulla in eo invocatio Sanctissimæ Trinitatis: imò verborum expers erat, Joannes quidem hortabatur populum, ut crederet in eum, qui post se erat venturus, Actuum 19. Sed credendum non est ipsum baptizando hæc verba pronuntiasse tanquam formam sui Baptismi, cum non convenirent Christo, quem baptizavit. 3. Non dabat Spiritum Sanctum.

Possunt & alia discrimina afferri, nimirum Joannes non Discipulorum, sed propriis tantum manibus baptizabat, nec nisi adultos; quia Baptismus ejus erat in pœnitentiam, cujus capaces non erant parvuli: at Baptismus Christi potest conferri parvulis, non solum manibus Ministrorum, sed & cujuslibet hominis, saltem in casu necessitatis, ut infra dicetur.

Q. 10. *Nullane efficacia competeat Baptismo Joannis?*

1. Novatores præstruëto fundamento erroneo, hominem sola fide justificari, concludunt Baptismum

mum Christi & Joannis paris fuisse virtutis. Ita Melanchton Lutheri collega in locis communibus, tit. de Bapt. Calvinus in Commentariis in Acta Apostolorum: hunc errorem directè impetit Concilium Tridentinum sess. 7. can. 1. de Bapt. his verbis: *Si quis dixerit Baptismum Joannis habuisse eandem vim cum Baptismo Christi, anathema sit.*

2. Quamvis nullus ex orthodoxis Doctoribus Baptismum Joannis virtute adæquet Baptismo Christi, attamen nonnulli videntur ipsi tribuere inferiorem quandam vim ad delenda peccata. Per Baptisma Joannis, inquit S. Cyrillus Jerosolymitanus catechesi 2. dabatur remissio peccatorum: per Baptismum Christi adoptio filiorum. Item Optatus Milevitanus, lib. 5. adversus Parmenianum, scribit Baptismum Joannis peccata delevisse. In eadem sententia fuisse videntur Lactantius lib. 4. Institut. cap. 15. & Prudentius in hymno, *ó Nazarene.*

Non est cur anxie laboremus cum quibusdam Theologis, ad suadendum laudatos Auctores intelligendos esse de efficacia, quæ sit propria virtutis pœnitentiæ, ad quam Joannes hortabatur suis prædicationibus, & præparabat suo Baptismo, juxta illud Marc. 1. *Fuit Joannes in deserto baptizans, & prædicans Baptismum pœnitentiæ in remissionem peccatorum.* Atque ideo Baptismus ejus non proximè, & ex opere operato; sed remotè, & ex opere operantis mundabat à peccato. Non est, inquam, cur laboremus ad probandum hanc esse sententiam laudatorum Auctorum; hæc enim difficultas non pertinet ad dogma fidei, eamque prudenter Tridentini Patres in citato canone declinaverunt. Ipse quoque Sanctus Augusti-

nus lib. 5. de Bapt. cap. 10. liberum relinquit credere Baptismum Joannis vim habuisse dimittendi peccata (quamvis contrarium ipse opinaretur) modò virtus major concedatur Baptismo Christi; verba ejus sunt: *Ne quisque contendat etiam in Baptismo Joannis dimissa esse peccata, sed . . . ampliore sanctificationem eis, quos jussit Paulus Apostolus denuò baptizari, per Baptismum Christi esse collatam, non ago pugnaciter.*

Attamen verior, & Scripturæ conformior est sententia, quæ Baptismo Joannis negat omnem efficaciam ex opere operato ad delendum peccatum. Quare ad propositam quæstionem

R. Baptismus Joannis non solum eandem vim cum Baptismo Christi non habuit, ut fides docet, sed nec ullam per se, & ex opere operato efficaciam habuit ad delendum peccatum. Duæ sunt responsionis partes; sed iisdem suadentur argumentis.

Probatur itaque 1. ex Scriptura, ubi ipse Joannes monet se baptizare tantum in aqua, eum verò, qui venturus est post se, baptizaturum in Spiritu Sancto, Matth. 3. *Ego quidem baptizo vos in aqua in pœnitentiam; qui autem post me venturus est . . . ipse vos baptizabit in Spiritu Sancto, & igni.* Eadem refert sanctus Lucas, cap. 3. vers. 16 Marc. 1. *Fuit Joannes in deserto baptizans & prædicans Baptismum pœnitentiæ in remissionem peccatorum, Joan. 3. Nisi quis renatus fuerit ex aqua, & Spiritu Sancto, non potest introire in Regnum Dei.* Ex quibus sic argumentari licet pro prima parte responsionis:

Illa baptismata vim eandem non habent, quorum unum dat Spiritum Sanctum, aliud verò non: atqui Baptisma Christi Domini dat Spiritum

tum Sanctum ; Baptisma verò Joannis mimine : Ergo.

Item pro secunda parte responsionis, illud Baptisma per se nullam vim habet delendi peccatum, quod Spiritum Sanctum non confert ; nulla enim potest esse remissio peccatorum sine Spiritu Sancto : atqui Baptisma Joannis non confert Spiritum Sanctum : Ergo.

Nec audiendi sunt Novatores, si dixerint Joannem non loqui de Sacramento Baptismi, sed de descensu Spiritus Sancti die Pentecostes ; quem vocat Baptismum in igne, juxta illud Christi Domini, Act. 1. vers. 5. *Joannes quidem baptizavit aqua, vos autem baptizabimini Spiritu Sancto non post multos hos dies.* Quamvis enim verum sit mirabilem illum descensum vocari metaphoricè Baptisma, non potest tamen dici nullum aliud Baptisma, propriè dictum dare Spiritum Sanctum, & ad solum diem Pentecostes respexisse Joannem ; namque 1. aqua Baptismi habet vim regenerativam : *Nisi quis renatus fuerit ex aqua, &c.* atqui aqua vim regenerativam non habet, nisi à Spiritu Sancto, undè protinus subditur eo loci, & *Spiritu Sancto.* 2. Præceptum est omnibus, ut renascantur ex aqua, & Spiritu Sancto : atqui descensus Spiritus Sancti in igne non omnes spectat, sed solos Discipulos Christi, Jerosolymis congregatos : ergo, ut quis sive adultus, sive parvulus introire possit in regnum cœlorum, debet baptizari, & accipere Spiritum Sanctum in alio symbolo, quàm in symbolo ignis.

At, inquires, Joannis Baptismus de cœlo erat, Matth. 21. vers. 25. ergo per se debebat peccatum.

Nego conseq. Nonne etiam lex vetus de cœlo erat; an propterea tribuebat Spiritum Sanctum, & remissionem peccatorum? de cœlo itaque erat Baptismus Joannis; quia à Deo inspiratus, & non ab hominibus excogitatus. Divinus erat mandato, non potestate, ait Tertull. lib. de Baptismo cap. 10. nihil enim cœleste præstabat, sed cœlestibus præministrabat. Agebatur Baptismus pœnitentiæ quasi Candidatus remissionis & sanctificationis secuturæ.

Probatur 2. ex Patribus, Tertull. cap. 10. de Bapt. mox citato, S. Chrysostomo hom. 10. in Matth. *Spiritus Sancti gratia in Christi Baptismate est, Joannis verò Baptisma hac donatione privatur.* S. Hieronymo Dialogo contra Luciferianos: *Si Joannes, ut confessus est, non baptizavit in Spiritu, consequenter nec peccata dimisit.* S. Augustino enchirid. cap. 49. *non . . . renascebantur, qui Baptismate Joannis baptizabantur, sed Christo, in quo solo renasci poterant, parabantur.*

Dices: S. Ambrosius libro de Spiritu Sancto cap. 3. & in cap. 3. Epist. ad Galatas, item S. Hieronymus in cap. 2. Joelis, & in cap. 1. sancti Marci, docent ideò Paulum Act. 19. jussisse baptizari in nomine Christi, qui jam tincti fuerant à Joanne, quia legitimum Joannis Baptisma non acceperant. Ideo, inquit S. Ambrosius, *Spiritum Sanctum nesciebant, quia nec Baptismum in Christi nomine, sicut Joannes dare solebat, acceperant.* Ex quibus textibus Magister Sententiar. sic concludit dist. 2. lib. 4. *Illi qui baptizati sunt à Joanne, nescientes Spiritum Sanctum esse, ac ponentes spem in illius Baptismo, postea baptizati sunt Baptismo Christi. Illi verò qui spem non posuerunt in Baptismo Joannis, & Patrem,*

Patrem, & Filium, & Spiritum Sanctum credebant, non baptizati fuerunt. Ergo Baptismus Joannis sufficiebat ad salutem, ac proinde remittebat peccata.

Distinguo conseq. Remittebat peccata ratione pœnitentiæ, modò perfectâ esset, & eo sensu sufficiebat ad salutem, nondum promulgato Evangelio, Conc. Sed Doctores laudati imperfectam putabant pœnitentiam sine fide in Spiritum Sanctum: dimittebat peccata per se immediatè, & ex opere operato, Nego conseq. Et quidem ad mentem sanctorum Doctorum. De S. Hieronymo jam constat ex citato Dialogo contra Luciferianos. De sancto verò Ambrosio, probatur ex Præfatione in Psal. 37. ubi opponens Baptismum Joannis Baptismo Christi, dicit in priori solam Pœnitentiam operari, in posteriori verò gratiam: *Supplicia, inquit, prævidet qui baptizatur Baptismo pœnitentiæ. At verò ille gratiam spectat qui baptizatur in Christo.* Itaque duas ob causas tincti à Joanne, Act. 19. videri poterant rursus tingendi Baptismo Christi, 1. Quia non erant justificati, utpote qui nescientes Spiritum Sanctum, ad perfectam pœnitentiam commoveri non potuerint: *Spiritum Sanctum nesciebant, inquit S. Hieronymus loco citato, iterum baptizantur, ne quis putaret Gentibus, ac Judæis aquas sine Spiritu Sancto ad salutem posse sufficere.* 2. Quia jam promulgato Evangelio die Pentecostes, Baptismus Christi erat necessarius, necessitate quidem præcepti iis, qui jam justificati fuerant, cæteris verò necessitate medii, ut infra dicetur. Porro laudati Doctores priori hærent rationi, cùm sola ad propositum conferret. Quare eorum mentem minimè

affecutus Magister Sententiarum, eruit conclusionem, quæ communiter ab omnibus Theologis rejicitur. Opera verò in Epistolas sancti Pauli, & in Evangelium sancti Marci in objectione citata, falso laudatis Doctoribus adscribuntur, cum erroribus scateant.

CAPUT II.

De materia Baptismi.

Q. 1. *Quotuplex est Baptismi materia?*

R. Duplex, remota & proxima.

Q. 2. *Quenam est materia Baptismi remota?*

Lutherus primò dubitavit an Baptismus sine aqua collatus esset validus: deinde admisit collatum in lacte, & cervisia, ac omni liquore, quo ablui possumus.

Contra hunc errorem extat canon 2. sess. 7. Concilii Tridentini de Baptismo: *Si quis dixerit, aquam veram & naturalem non esse de necessitate Baptismi, atque adeò verba illa Domini nostri Jesu Christi, nisi quis renatus fuerit, &c. ad metaphoram aliquam detorserit; anathema sit.* Itaque ad propositam quæstionem

R. De fide est, aquam veram propriè dictam, esse materiam necessariam Baptismi.

Probatur ex Scriptura, Joan. 3. *Nisi quis renatus fuerit ex aqua & Spiritu Sancto, non potest introire in regnum Dei.* Quòd autem aqua hic non metaphoricè, sed propriè determinata sit à Christo pro materia necessaria Baptismi, constat 1. quia Apostoli ita intellexerunt: Actuum 8. Philippo annuntiante necessitatem Baptismi, dixit Eunuchus:

chus: *Ecce aqua, quid prohibet me baptizari?* subditurque, *descenderunt uterque in aquam* & baptizavit eum. Item in capite 10. vers. 47. Petrus, effusa visibiliter supra Cornelii familiam Spiritus Sancti gratia, intulit, *nunquid aquam quis prohibere potest, ut non baptizentur hi, qui Spiritum Sanctum acceperunt sicut & nos?* 2. Eadem aqua baptizavit Christus Dominus, qua baptizatus est à Joanne, ut constat, tum ex sanctis Patribus, qui communiter docent aquas contactu sacratissimi Corporis Christi accepisse vim sanctificandi: tum ex quæstione mota inter Discipulos Joannis ob similitudinem inter Baptismum Christi, & Magistri, Joan. 3. vers. 26. 3. Universalis Ecclesia aquam propriè dictam, tanquam ad baptismum necessariam, semper adhibuit, damnavitque uti hæreticos, qui ea rejiciebant, ut Cajanos, ex Tertulliano, libro de Baptismo cap. 1. Manichæos, ex sancto Augustino libro de hæresibus capite 46. & Séleucianos ex eodem sancto Doctore libro citato, cap. 59.

Dices: Stephanus III. dum in Gallia degeret anno 754. consultus de Presbytero, qui in casu necessitatis infantem vino baptizavit, deficiente aqua, respondit, nulla ei (Presbytero) exinde adscribitur culpa; infantes sic permaneant in ipso baptismo; nam si aqua adfuit præsens, ille Presbyter excommunicetur, & pœnitentiæ submitatur. Item Nicephorus libro 3. hist. cap. 37. narrat Judæum defectu aquæ, arena fuisse baptizatum.

R. Ad primum; 1. Responsum illud multis videri supposititium, vel saltem dubium: tum quia Scriptores contemporanei illius non memi-

nere, nec habetur in Collationibus canonum Gallicanæ & Romanæ Ecclesiæ; tum quia ex tribus Codicibus, qui illud referunt, alii tribuunt Syricio, alii Stephano III. alii Stephano Tornacensi.

2. Supposita veritate historiæ responsum Summi Pontificis spectat solum Presbyteri actionem, de qua erat quæstio, censetque in his circumstantiis non mereri pœnam excommunicationis. Addo verba illa, quæ parenthesi clauduntur, *infantes sic permaneant in suo Baptismo*, videri ab imperitis esse inserta, vel saltem culpa Librariorum mendum irrepsisse. Quidquid sit, non hîc Ecclesiæ, sed Summi Pontificis causam propugnamus, ne scil. videatur errasse recedendo à communi doctrina cæterorum Pontificum, qui Decretis suis definierunt non minùs necessariam esse aquam ad veritatem Baptismi, quàm invocationem SS. Trinitatis, Baptismumque iterandum, si alio liquore fuerit celebratus. Ita Innocentius III. libro 3. Decretal. tit. de Baptismo.

R. Ad secundum, vera sit Nicephori Historia, quam eruditi falsam meritò suspicantur: nihil ex ea contra doctrinam Catholicam concludi potest; cùm Baptismus sic collatus, ab Episcopo irritus fuerit declaratus.

Ex his sequitur 1. Aquam ex herbis, rosis, & aliis floribus expressam, etiamsi lavet, non esse materiam aptam ad Baptismum, quia Christus Dominus determinavit pro materia hujus Sacramenti aquam propriè dictam; hujusmodi autem succi, non magis propriè dici possunt aqua, quam vinum, quod ex vite exprimitur. Idem esto judicium de saliva, sudore, lacrymis, &c.

Sequi-

Sequitur 2. omnem aquam propriè dictam, cujuscunque speciei sit, valere ad Baptismum: *Nulla distinctio est*, inquit Tertullianus lib. de Baptismo cap. 4. *mari quis an stagno, flumine an fonte, lacu an alveo diluatur.*

Sequitur 3. secundùm doctrinam S. Thomæ hic artic. 7. in qualibet aqua, qualitercunque transmutata, dummodo non solvatur species aquæ, posse fieri Baptismum; speciem autem aquæ non solvi, nisi quando liquoris, qui aquæ admiscetur, quantitas superat quantitatem aquæ. Ex quo sequitur (concludit S. Doctor.) 1. Admixtione chrismatis, decoctione carnium, aut aliorum hujusmodi non solvi speciem aquæ, nisi fortè sit facta tanta resolutio lixatorum in aqua, quòd liquor plus habeat de aliena substantia, quàm de aqua, quod ex spissitudine percipi potest. 2. Lixivium, & aquam sulphuream balneorum ad baptizandum assumi posse.

CAPUT III.

Quænam sit materia proxima Baptismi?

R. Ablutio est proxima Baptismi materia; quia usus & applicatio materiæ remotæ in quolibet Sacramento dicitur materia proxima: atqui ablutio est usus, & applicatio aquæ, quia diximus remotam Baptismi materiam: Ergo.

Q. 2. *Quotuplici modo potest fieri ablutio?*

R. Triplici. 1. Immersione, trina, vel unica. 2. Infusione. 3. Aspersione.

Q. 3. *Qualibet ex recensitis ablutionibus sufficitne ad veritatem Baptismi?*

Græci Schismatici contendunt contra Latinos, trinam immersionem, saltem ex præcepto divino esse necessariam. Unde Marcus Ephesinus, soluto Concilio Florentino, in Epistola Encyclica ad omnes orbis Episcopos, arguit Orientales quasi duo Baptismata admiserint, contra illud Apostoli, Ephes. 4. *Unum Baptisma*, dum fœdus cum Latinis in laudato Concilio hac inierunt conditione, quòd unaquæquæ Ecclesia baptizaret secundum morem suum, Græca per trinam immersionem, Latina per infusionem.

Porro Græci his præsertim nituntur momentis.

1. Baptismus, secundum etymologiam & usum nominis apud Judæos, significat immersionem.

2. Christus Dominus per immersionem à Joanne baptizatus est; legitur enim Matth. 3. vers. 16. *Baptizatus Jesus confestim ascendit de aqua.*

3. Per immersionem baptizarunt Apostoli, ut patet ex c. 8. Act. ubi dicitur de Philippo & Eunucho, quòd *descenderunt uterque in aquam.*

4. Baptismus celebratur in signum mortis & sepulturæ Christi, Rom. 6. *Quicumque baptizati sumus in Christo Jesu, in morte ipsius baptizati sumus; confepulti enim sumus cum illo per Baptismum, &c.* Atqui hæc significatio non servatur nisi immersione: Ergo.

5. Quod semper & ubique, & ab omnibus servatum est, censetur divinitus traditum, ex Vincentio Lirinensi: atqui ab Apostolis usque ad decimum tertium sæculum in Ecclesia Latina, in Græca verò ad hunc usque diem, Baptismus per immersionem est celebratus. Can. 5. Apostolorum deponitur Presbyter, qui semel in Baptismo mergit.

mergit. Glossa in canonem septimum Concilii I. Constantinopolitani, observat hoc canone sanciri, ut omnes, qui una immersione baptizati sunt, denuò baptizentur.

6. SS. Patres expressè docent trinam immersionem à Christo Domino esse præceptam. Sanctus Chrysostomus hom. de fide: *Dominus in tribus immersionibus aquæ, unum Baptisma Discipulis suis tradidit.* Pelagius summus Pontifex cap. *Multi*, dist. 4. de consecr. ait, *Evangelicum præceptum nos admonet in nomine Trinitatis, trina etiam immersione sanctum Baptisma tribuere.* S. Cornelius summus Pontifex & Martyr tertio sæculo Epist. ad Fabium Antiochenum de Novatiano in lecto baptizato, atque idè infusione: *si tamen Baptismum suscepisse dicendus est.* Theodoretus libro 4. hæreticarum fabularum, cap. 3. contendit Eunomium Baptismi ritum à Domino præceptum & ab Apostolis traditum subvertisse, quando dixit non oportere, ut baptizandus tèr immergatur, aut Trinitas invocetur. Attamen his non obstantibus momentis, ad propositam quæstionem

R. Certum est immersionem sive trinam, sive unicam, neque necessitate Sacramenti, neque necessitate præcepti divini esse necessariam, sed posse sufficere infusionem, vel asperisionem. In hac parte nobis consentiunt Pseudo-reformati, baptizant enim per infusionem. Ubi advertere licet hominum levitatem, qui mutationem in Ecclesia Romana circa ritum Baptismi factam approbant & observant; circa verò usum Calicis Eucharistici acriter impugnant, quamvis similia prorsus argumenta contra utramque militent. Sed contra Græcos schismaticos convertenda sunt arma nostra.

Recen-

Recentiores Theologi communiter probant immersionem nullo modo esse necessariam, exemplo S. Petri, qui uno die tria, & altero quinque millia hominum baptizavit, quod, ut eis videtur, fieri nequivit nisi aspersione. Verum antiquiores Doctores tale argumentum omiserunt, dum haberent probandam Baptismi veritatem cum infusione: verisimile enim est Petrum Judæos baptizasse secundum communem gentis morem, nimirum per immersionem, quod non ita difficile ei fuit adjuvantibus aliis Discipulis, maxime cum Judæi purificationibus assueti, haberent communiter vasa, seu baptisteria ad hujusmodi cæremonias legales præparata.

Probatur itaque efficaciter ex Traditione Ecclesiæ, quæ à primis sæculis semper probavit Baptismum infusione collatum. S. Cyprianus epist. ad Magnum 69. versùs medium tertii sæculi sic scribit: *Quæsisisti frater charissime, quid mihi de illis videatur, qui in infirmitate . . . gratiam Dei consequuntur, an habendi sint legitimi Christiani, eò quòd aqua salutarì non loti sint, sed perfusi? . . . Nos, quantum concipit mediocritas nostra, æstimamus in nullo . . . debilitari posse beneficia divina nec quenkam movere debet, quòd aspergi vel perfundi videntur ægri, &c.* Idem responsum citatur Stephani III. supra laudati, dum in Galliis Carisiaci degeret. Deinde Confessores in carcere detenti baptizabantur, quod fieri non poterat immersione. Hinc in actis S. Laurentii, quæ refert Valfridus Strabo lib. de rebus Ecclesiasticis cap. 2. desinente nono sæculo, legitur sanctum Romanum urceolum detulisse ad sanctum Laurentium, ex quo beatus Martyr illum baptizavit. Denique Clynicos,
hoc

hoc est, qui ad ultimam ægritudinem Baptisma differebant, nunquam iterum tingendos fancivit Ecclesia: quamvis quarto sæculo statuerit in Concilio Laodicensi can. 12. non esse ordinandos sanitatem recepta, nisi quos singularis pietas commendaret. Nec sanctus Cornelius ambigebat de veritate Baptismi, quem Novatianus in infirmitate acceperat, sed de ejus effectu; satis enim parati ad gratiam Sacramenti non videbantur; qui nonnisi urgente morte ad eam recurrebant.

Dices; His quidem momentis eruitur immersionem non esse necessariam ad veritatem Sacramenti; sed inde concludi non potest minimè esse necessariam necessitate præcepti divini, quemadmodum nec concludere licet explicitam peccatorum confessionem non esse præcepti divini ex eo quòd sine ea absolvantur ægri in extremis positi, certum enim est præceptum positivum etiam divinum non urgere in casu necessitatis.

R. 1. Ergo saltem corruunt argumenta ducta ex etymologia Baptismi, ex cap. 6. Epistol. ad Romanos, ex can. 7. Concilii Constantinopolitani, ex quibus supra eliciebatur sine trina immersione nullum esse Baptismum.

R. 2. Immersionem non esse impossibilem in ægritudine, sicut explicitam peccatorum confessionem in ægris, qui usum linguæ & rationis amiserunt; cum enim periculosè decumbentes nunquam ex præscripto Medici balneis curentur, possent etiam aquis immergi in vitam æternam ex Christi præcepto, si extaret. Reverà quoniam incommoda est infirmis immersio, omittendam censuit Ecclesia; sed dubitandum non est, quin circa cæteros in Occidente ob nimias difficultates, & fre-

& frequens pudoris periculum, maximè in mulieribus, sensim defierit, etiam non expectata Ecclesiæ ordinatione, quæ in nullo Concilio plenario hanc præscripsit mutationem; sed ei obsistendum non credidit cum fidelium perturbatione. Nec movet hodiernus Græcorum usus; nam præterquam quod pro diversitate regionum & morum disparitate, leges sint diversæ, fortè etiam apud Græcos tot occurrunt incommoda in hoc immersionis ritu, ut æquo rerum æstimatori satius visum fuerit ritum hunc omittere; imò testis est Jacobus Goard Dominicanus in notis ad officium Sacramenti Baptismatis, Græcos interdum sola infusione baptizare infantes. Maronitæ etiam modò infusione, modò immersione indiscriminatim baptizant, & in vetustissimo codice Syriaco apud Morinum lib. 8. cap. 18. num. 29. Presbyter effundit aquam tribus vicibus super caput, dicens: *Baptizatur*, &c. Quare stabilita Ecclesiæ Catholicæ doctrina, jam respondendum est ad momenta in contrarium opposita.

Ad primum. Baptismus etiam apud Judæos non solum immersionem sed quamlibet ablutionem significat, ut patet ex c. 7. Marci v. 3. ubi lotiones urceorum & lectorum dicuntur Baptismata, lecti autem per immersionem certè non abluiebantur. Et Lucæ 11. v. 38. miratur Pharisæus, quòd Christus Dominus non esset baptizatus ante prandium; hoc est, quòd non lavisset manus, ut liquet tum ex cit. cap. 7. Marci, tum ex cap. 15. Matthæi, ubi arguuntur Discipuli, quòd manus non lavent, cum panem manducant.

Ad secundum, Christus Dominus baptizatus est, & baptizavit juxta communem morem Judæo-

dæorum per immersionem, sicut Eucharistiam celebravit in calice aqua mixto, & in pane azy-mo, qui solus erat in usu apud Judæos diebus azymorum: unde in forma distinguo hanc propositionem: Christus instituit Eucharistiam in azy-mo, & Baptismum in immersione, tanquam in circumstantiis non pertinentibus ad substantiam illorum Sacramentorum, quas reliquit dispositioni Ecclesiæ vel retinendas vel mutands, Concedo; tanquam in circumstantiis ad substantiam illorum Sacramentorum pertinentibus, & ex præcepto divino servandis, Nego.

Ad tertiam patet solutio ex præcedenti responsione.

Ad quartum: Apostolus Rom. 6. alludit quidem ad immersionem, quæ illa ætate erat in usu, quemadmodum hodie Concionatores ex veste alba, qua induuntur recens baptizati, probant eos exuisse veterem hominem, & novum induisse: sed neutrum signum pertinet ad substantiam Sacramenti; siquidem illa sufficienter exprimuntur per ablutionem, qua significatur peccati destructio, & gratiæ sanctificantis infusio; illa enim est mors quædam spiritualis, ista verò resurrectio, juxta illud Apostoli Rom. cap. 6. v. 11. *Ita & vos existimate, vos mortuos esse quidem peccato, viventes autem Deo, in Christo Jesu Domino nostro.*

Ad quintum, distinguo propositionem: secundum antiquiores Patres trina immersio est à Christo præcepta ratione rei significatæ, Concedo: ratione sui præcisè, Nego. Ad cujus solutionis intelligentiam,

Advertes hæreticos, qui à primis sæculis negarunt Trinitatem Personarum, identidem mutasse

tasse ritum Baptismi, omittendo formam verborum præscriptam, & trinam immersionem; quia his duobus signis tres Personæ expressè designabantur. Adversus autem tantam præsumptionem calamum acuerunt SS. Patres, vindicaveruntque Traditionem Apostolicam, secundum quam tres Personæ in Baptismo debent necessario exprimi, sicut reverà exprimuntur tum verborum prolatione, tum trina immersione: nec solliciti fuerunt an verborum prolatio & trina immersio ex æquo essent necessariae; quia hæc distinctio ad propositum non pertinebat: unde potius repetenda est ex usu Ecclesiæ, quàm ex scriptis Sanctorum Patrum contra hæreticos exaratis. Sic Tertullianus c. 26. lib. contra Praxeam, à quo dicti sunt Hæretici Patripassiani, quia volebant Patrem esse incarnatum & passum, quasi una esset Persona cum Filio & Spiritu Sancto, *Mandavit, inquit, ut tingerent in Patrem, Filium, & Spiritum sanctum, non in unum, nam nec semel, sed ter ad singula nomina in Personas singulas tingimur.* Sic etiam Canon septimus, qui circumfertur sub nomine Concilii Constantinopolitani; quamvis Ecclesia Occidentalis non agnoverit nisi tres primos Canones hujus Concilii; nam Theodoretus libro Hæreticarum Fabularum, & Sanctus Epiphanius hæresi 56. qui non longè post illud Concilium scripserunt, monent idèd Concilium reprobasse Baptismata Hæreticorum in cit. Can. censorum, quia peccabant in forma Baptismi. Sic & Pelagius supra laudatus rejecit Baptismum in nomine Christi, hoc est sine invocatione Sanctissimæ Trinitatis, & sine trina immersione collatum; si tamen illud decretum

fit Pelagii, non enim invenitur inter ejus Epistolae.

Ex his eruitur Patres scripsisse trinam immersionem esse divinitus praescriptam, non quidem ratione sui praecise, sed ratione significationis, hoc est, voluisse tantum in Baptismo tres Personas Sanctissimae Trinitatis necessario esse exprimendas, ad quod sufficit sola verborum prolatio. Hinc cum Ariani sexto saeculo in Hispania, ex trina immersione arguerent distinctionem naturalium in tribus personis, Episcopi Hispani statuerunt baptizandum unica immersione ad designandam naturae divinae unitatem quod statutum probavit Sanctus Gregorius Magnus epist. 41. lib. 1. his verbis: *In una fide nihil officit Ecclesiae sanctae consuetudo diversa*, & paulo post Concilium Toletanum quartum idipsum confirmavit. Nec refert quod Alcuinus octavo saeculo acriter contra hanc mutationem pugnaverit, oppressusque auctoritate Sancti Gregorii, citatam ejus Epistolam tanquam supposititiam, sine fundamento, & contra omnium fidem rejecerit.

Citatur pro trina immersione Can. 50. Apostolorum, qui sic habet: *Si quis Episcopus aut Presbyter non tres immersiones, sed unam duntaxat peregerit, deponatur*. Sed hi Canones falso Apostolis adscribuntur, cum ignoti fuerint antiquioribus, nec collecti credantur nisi post quartum saeculum. Hanc collectionem Gelasius summus Pontifex in Synodo Romana anno 494. declarat esse librum apocryphum.

Nec dicas in Sacramentorum administratione adhibendam esse materiam certam & minime dubiam: secundum vero S. Thomam hic q. 66.

art. 4. tutius esse baptizare per modum immersionis, quia hoc habet communior usus; namque S. Doctor absolutè docet infusionem sufficere. *Dicendum*, inquit, *quòd immersio non est de necessitate Baptismi*. Neque verò comparativum illud, *tutius*, opponitur dubio, sed tuto, sicut calidius calido, non frigido; tutiorem autem dixit immersionem, quia tunc temporis adhuc erat fermè ubique retenta.

Q. 3. *Quæ & qualis requiritur aquæ infusio aut aspersio?*

R. 1. Non sufficit aquam attingere vestes aut capillos baptizandi; sed necesse est, ut corpus ejus perfundatur, aliàs non ipse, sed ejus vestes aut capilli dicerentur ablui.

R. 2. Debet esse quædam successio & fluxus aquæ; non enim dicitur ablutus, super quem una aut altera pluviae gutta decedit. Expresse monet Rituale Catalaunense anni 1649. eam aquæ copiam fundendam, quæ in scapulas defluat & pectus.

R. 3. Curandum est ut perfundatur una ex præcipuis corporis partibus, maximè verò caput, in quo omnes sensus vigent; & hæc ablutio affinis est immersioni, quia videtur homo obrui aquis, dum in quadam copia super caput ejus defluunt. Unde in Rituali Remensi anni 1505. hæc leguntur: *Debet fieri trina mersio super caput pueri*. Inde sequitur dubium esse Baptismum, in quo abluitur manus, vel pes infantis, atque ideo libri rituales communiter docent repetendum sub conditione, quia ex priori ablutione infans videtur non simpliciter, sed secundum quid lotus.

Hic

Hic quæstionem movent Theologi, utrùm in hypothesi, quòd quis periclitantem infantem non posset baptizare, nisi projiciendo eum in puteum, aut in flumen, verus esset Baptismus adhibita verborum forma. Negat Richardus de Media-villa in 4. Sententiarum dist. 4. art. 4. q. 2. Alii communiter affirmant; sed inutilis prorsus quæstio, cùm nemini liceat quovis prætextu occidere innocentem, cùm ejus vita sit sub solius Dei dominio.

CAPUT IV.

Quænam sit forma Baptismi?

R. Legitima est hæc forma, apud Latinos quidem, *Ego te baptizo in nomine Patris, &c.* apud Græcos verò, *Baptizatur N. in nomine Patris, &c.* vel *Baptizetur N. in nomine, &c.* ut refertur in Decreto Eugenii IV. Colligitur ex Scripturâ Matth. 28. *Docete omnes gentes, baptizantes eos in nomine Patris, &c.* Ex quibus verbis Ecclesia semper intellexit baptizandum esse sub formâ allata.

Q. 2. *Valetne Baptismus, si verba laudata mutarentur in alia, quæ eundem sensum redderent?*

R. Valeret juxta doctrinam stabilitam c. 9. de Sacramentis in genere, sed licitum non est mutare ritum ab Ecclesia præscriptum, tum quia Concilium Tridentinum sess. 7. can. 13. dicit anathema his, qui dixerint approbatos Ecclesiæ ritus in solemni Sacramentorum administratione adhiberi consuetos sine peccato per quemcunque Ecclesiarum Pastorem mutari posse: tum quia

talis mutatio vix fieri potest sine aliquo Sacramenti periculo. Quis v. g. non crederet verba illa, in nomine genitoris & geniti & spirati idem significare ac in nomine Patris, &c. attamen S. Thomas in quartum Sentent. ad Annibaldum dist. 3. quæst. unica art. 2. ad quartum, & plures Theologi post illum docent contra alios nullum fore Baptismum sub hac forma collatum: quia nomina illa, genitor & genitus, adjectivè dicuntur, significantque actum, non verò personam subsistentem.

Q. 3. *Singulæ voces suntne ita necessariae, ut vel una omissa, nullum esset Sacramentum?*

R. 1. Si pronomen *Ego*, omitteretur, staret veritas Sacramenti, quia sufficienter exprimitur in verbo, *baptizo*,

R. 2. Fuit agitata quæstio inter insignes Theologos sæculi duodecimi circa hæc vocabula, *Baptizo te*. Hugo Victorinus lib. 2. de Sacramentis parte 3. c. 13. Petrus Cantor in Summa manuscripto de Sacramentis; Stephanus Tornacensis epist. 5. ad Petrum Claromontanum; Præpositus quarta parte Summæ opinantur, *Baptizo te*, sine jactura Sacramenti omitti posse, imò Præpositus asserit hanc esse omnium Magistrorum sententiam. Et ratio est, quia Sancti Patres ad veritatem Baptismi nihil aliud requirunt in forma, quàm invocationem sanctissimæ Trinitatis, nec usquam meminerunt vocum istarum, *Baptizo te*; cum ex Scriptura erui non possint; nam Christus Dominus eo modo dixit, *Docete omnes gentes, baptizantes eos*, &c. quomodo de Eucharistia præscripsit dicens Apostolis: *Hoc facite in meam commemorationem*: atqui ex his posterioribus verbis
non

non concluditur Sacerdoti, dum Eucharistiam conficit, proferendum esse, *Ego facio in commemorationem Christi*: Ergo.

Confirmatur. Nonnulli codices, etiam antiquissimi, sic exhibent ritum Baptismi, ut non Minister pronuntiet sacratissima illa nomina, sed ipse Catechumenus interrogatus à Ministro num credat in Deum Patrem, &c. & ipsum respondentem, *Credo*, ter mergat ad singulas responsiones. Unde ex Rufino lib. 1. Hist. Sanctus Alexander Episcopus Alexandrinus probavit Baptismum à S. Athanasio adhuc puero collatum, postquam prævio examine, didicit interrogata baptizantis, & responsa baptizatorum juxta Ecclesiæ ritum fuisse observata, neque inquisivit utrum puer Athanasius formam allatam protulisset.

Nihilominus constans est Catholicorum doctrina, *Baptizo te*, esse de essentia formæ, adeo ut sine his vocabulis irritus sit Baptismus. Ita decrevit Alexander III. exeunte duodecimo seculo; referturque ejus Decretum extra. de Baptismo & ejus effectu, his verbis: *Si quis puerum ter in aqua immerferit in nomine Patris, & Filii & Spiritus Sancti, amen, & non dixerit, Ego te baptizo in nomine, &c. puer non est baptizatus*. Eugenius IV. in Decreto suo eadem vocabula exprimenda innuit, *Si exprimitur*, inquit, *actus, qui per ipsum perficitur Minister, cum sanctæ Trinitatis invocatione, perficitur Sacramentum*. Tandem Alexander VIII. hanc vigesimam septimam propositionem damnavit anno 1690. *Valuit aliquando Baptismus sub hac forma collatus, In nomine Patris, &c. prætermisissis illis, Ego te baptizo*.

Probatur ex Traditione, secundum quam ubi-

que à tempore Apostolorum usque nunc, Minister inter baptizandum protulit, *Ego te baptizo*, vel *Baptizatur N.* ut constat ex Ritualibus libris tum Latinorum, tum Græcorum, antiquissimis. In Ordine Romano sexti sæculi (ut videtur) in Sacramentario Gregoriano S. Eligii, in Sacramentario Gallicano mille annorum per Mabillonium edito, in Missali Gallicano octavi sæculi Romæ per Thomæ typis excuso legitur, *Baptizo te in nomine*, &c. & in Euchologiis Græcorum schismate antiquioribus habetur in forma Baptismi, *Baptizatur N.*

Deinde Christus Dominus non magis expresse dixit Matth. 28. proferendum à Ministro, *In nomine Patris, & Filii, & Spiritus Sancti*, quàm, *Ego te baptizo*: Ergo cum ex illo textu eruatur dicendum à Ministro, *In nomine Patris*, &c. ut mox probabitur, idem quoque sentiendum de verbo, *Baptizo*; quanquam S. Thomas in 4. dist. 3. q. 2. art. 2. quæst. 1. ad 3. contendit Christum Dominum Matth. 28. non tradere formam Sacramenti, cum eam prius tradidisset, quando Apostoli baptizabant ante Passionem, sed eis præcipere actum baptizandi secundum formam prius traditam. Quod verò spectat Eucharistiam, nec Scriptura, nec Traditio docent dicendum à Sacerdote, dum Eucharistiam conficit, *Hoc facio in Commemorationem Christi*, nec, *Ungo te*, dum ungit infirmum. In his autem, quæ à libera Dei voluntate pendent, non est argumentandum à pari, nisi ubi Scriptura, aut Traditio eodem modo loquuntur.

Insignes quidem sunt laudati Theologi, sed eorum auctoritas hîc non est tanti ponderis: tum quia opinando, & cum aliqua dubitatione scripserunt. *Opiniones*, inquit Stephanus Tornacensis,

cenſis, *profundo non aſſertiones*: tum quia ipſe Petrus Cantor teſtatur opinionem, quam amplectitur, multis diſplicere: tum denique quia Alexander II. ſuo Decreto jam laudato illam proſcripſit, eo ferè tempore quo nata eſt.

Silentium verò unius aut alterius codicis non minuit fidem, quæ debetur omnibus aliis; maxime cum in illo nihil legatur de invocatione Patris, & Filii, &c. neceſſariò faciendâ à Miniſtro etiam in ſententia eorum, qui hunc obijciunt codicem. Ex his autem, quæ expreſſa ſunt, colligendum cætera fuiſſe ſecuta, cum nec inſcitia, nec error præſumi debeant fuiſſe impedimento. Nonne Concilium Arelatenſe I. can. 8. ſtatuit admittendum Baptiſma revertentis ab hæreſi, ſi interrogatus de Symbolo rectè reſpondeat? Quis inde concludet Concilium ad veritatem Baptiſmi nihil requirere, quàm huiusmodi interrogationes & reſponſiones?

R. 3. Vocabula illa, *In nomine Patris, &c.* neceſſariò ſunt à Miniſtro exprimenda.

Probatur 1. ex Scriptura, Ephes. 5. ubi Chriſtus dicitur dilexiſſe Eccleſiam, mundans eam lavacro aquæ in verbo vitæ: *In verbo*, inquit Chryſoſtomus homil. 20. *quo?* *In nomine Patris, & Filii, & Spiritus Sancti.*

Probatur 2. ex conſtanti uſu Eccleſiæ, quæ Baptiſma hæreticorum ſine invocatione ſanctiſſimæ Trinitatis collatum rejecit, cæterorum verò admixit; ſic Concilium Nicænum ratum habuit Baptiſmum Novatianorum, irritum verò Paulianiſtarum. Quid ita? Reſpondet Innocentius I. initio quinti ſæculi Epistoſta 21. ad Episcopos Macedoniæ c. 5. his verbis: *Ratio manifeſta declarat, quia*

Paulianistæ in nomine Patris, &c. minime baptizabant, & Novatiani iisdem tremendis nominibus baptizabant; unde S. Augustinus lib. 6. de Baptismo cap. 25. sic scribit: Quis nesciat non esse Baptismum Christi, si Evangelica verba, quibus Symbolum constat . . . defuerint? sed facilius inveniuntur hæretici, qui omnino non baptizent, quam qui non illis verbis baptizent.

Dices: Apostoli baptizarunt in nomine Jesu, quod constat ex cap. 8. & 19. Actuum, expressèque docent, tum Catechismus Romanus 2. parte n. 15. de Baptismo, ut, inquit, *divina ejus potestas initio Ecclesiæ magis celebraretur*: tum Sanctus Thomas hic qu. 66. art. 6. ad primum, & plures alii Theologi. Deinde Sanctus Stephanus Summus Pontifex & Martyr tertio sæculo decrevit suscipiendum Baptismum à quibuscunque hæreticis collatum. Certum est autem multos hæreticos baptizasse sine invocatione sanctissimæ Trinitatis. 3. S. Ambrosius lib. 1. de Spiritu sancto cap. 3. *Consideremus, inquit, utrum quemadmodum in Christi nomine plenum esse legimus Baptismatis Sacramentum; ita etiam sancto tantum Spiritu nuncupato, nihil desit ad mysterii plenitudinem. Rationem sequamur, quia qui unum dixerit, Trinitatem signavit.* 4. Nicolaus I. nono sæculo in responsione ad consulta Bulgarorum, docet ratum esse Baptismum collatum sive in nomine Patris, sive in nomine Domini Jesu. 5. Sanctus Bernardus 12. sæculo interrogatus de puerro, quem ob periculum mortis laicus baptizaverat, dicens: *Baptizo te in nomine Dei & veræ Crucis*, respondet Epist. 43. aliàs 340. his verbis: *Ego verò hunc baptizatum puto: nec sonum vocis veritati fidei, & pietati intentionis præjudicare debuisse.* Similia habet Magister Sentent. in 4. dist. 3.

dist. 3. *Infinuari videtur, inquit, verum Baptisma dari posse in nomine Patris tantum, vel Spiritus Sancti tantum, si tamen ille qui baptizat, fidem Trinitatis teneat.*

Respondeo ad singula.

Ad primum distingo : Apostoli baptizarunt in nomine Domini Jesu, id est auctoritate & Baptismo Domini Jesu, quemadmodum Petrus Actuum 3. claudum in hoc nomine sanavit, Concedo ; solo nomine Jesu invocato, Nego antecedens. Suadetur autem hæc solutio tum ex Scriptura, tum ex Patribus priorum sæculorum. Ex Scriptura quidem ; nam Actuum 19. miratus Paulus, quod Ephesii respondissent se nescire, an esset Spiritus Sanctus, interrogavit, *In quo ergo baptizati estis ?* quod innuit Apostolos solitos baptizare invocando Spiritum Sanctum, ac proinde duas alias personas ; & cum audisset baptizatos tantum Joannis Baptismate, iussit eos baptizari in nomine Domini Jesu ; ubi baptizare in nomine Domini Jesu, est baptizare auctoritate Domini Jesu in nomine Patris, &c.

Nec dicant adversarii ex hoc loco solum colligi Baptismum Christi non fuisse ab Apostolis collatum, nisi his, qui mysterium sanctissimæ Trinitatis didicerant.

Nam secundum eorum interpretationem baptizari in nomine Domini Jesu, est baptizari sub invocatione tremendi illius nominis : Ergo à pari baptizari in Spiritu Sancto, est etiam baptizari invocato nomine Spiritus Sancti. *In quo ergo, inquit Apostolus, baptizati estis ?* quibus verbis liquet Apostolos baptizasse in Spiritu Sancto. Hærendo itaque Scripturæ textui, nihil cogit credere Apostolos mutasse formam à Christo præscri-

ptam; imò id vetat interpretatio sanctorum Patrum, qui vicini fuerunt temporibus Apostolorum, nam constanter docent Baptismum non valere sine invocatione Patris & Filii, &c. S. Cypr. Ep. ad Jubajanum sic scribit: *Jesu Christi mentionem facit Petrus (Actuum 2.) non quasi Pater omitteretur, sed ut Patri Filius quoque adjungeretur*; Facundus item Hermianensis lib. 1. cap. 3. pro tribus Capitulis sexto sæculo hæc habet: *Quòd in nomine Domini Jesu hi, quos memoravimus, baptizati narrantur, non ex eo credendum arbitror, quia non in nomine Patris, & Filii, & Spiritus Sancti baptizati sunt, sed ut etiam in ipsis servaretur verbis à Domino constituta forma Baptisimi.*

Ad secundum: immeritò Blondellus Calvinista, & nonnulli è Catholicis, ut Benedictus XII. adhuc Cardinalis, hunc errorem tribuunt S. Stephano, 1. quia nullus scriptor quarti aut quinti sæculi, sive orthodoxus, sive heterodoxus, hujus nævi Sanctum Pontificem insimulavit: imò Sanctus Firmilianus, etsi commotus ejus Decreto illum absolvit in Epistola ad Sanctum Cyprianum, sic enim scribit in S. Stephanum, *Illud absurdum, quod non putant quærendum esse, quis sit ille qui baptizaverit, eo quòd, qui baptizatus sit, gratiam consequi potuerit invocata Trinitate nominum Patris, & Filii, & Spiritus Sancti.* Ubi Firmilianus agnoscit Stephanum probasse Baptismum à quibusvis hæreticis collatum, supposito quòd illi baptizaverint in nomine Patris, &c. 2. quia in decreto Sancti Stephani nihil nisi sanum & fidei consonum deprehendi potest; sic enim refertur à S. Cypr. Epist. 24. ad Pompejum, *Si quis à quacunque hæresi venerit ad nos, nihil innovetur, nisi quod traditum est, ut manus illi*

illi imponatur in pœnitentiam. Unde sic argumentari licet : Stephanus vult recipi venientes à quacumque hæresi, prout traditum est, atqui nunquam fuit traditum Baptisma sine invocatione Patris, &c. collatum esse admittendum : *Facilius*, inquit S. Aug. lib. 6. de Baptismo cap. 25. jam laudato, *inveniuntur hæretici, qui omninò non baptizent, quàm qui non illis verbis baptizent.* Et S. Hieron. dialogo contra Luciferianos scribens de Simonis, Menandri, & Cerinthi discipulis, qui vivente Joanne Apostolo eruperunt, asserit nullum eorum fuisse rebaptizatum. Negandum tamen non est quin hæretici successu temporis, ubi viderunt firmatam suam sectam, plura ausi fuerint, ritumque Baptismi errori suo consentaneum induxerint : id de quibusdam Arianis patet ; de Marcionitis verò suspicari licet, nam Theodoretus Epistola 145. jussit eos rebaptizari ; cùm tamen nec S. Irenæus, nec S. Epiphanius, nec S. Augustinus, Theodoro antiquiores, aliquid simile ipsis objiciant. Sed etsi aliqui hæretici tempore Stephani in forma Baptismi peccavissent, error in eo tantùm fuisset facti, non juris, hoc est, Stephanus falsò supposuisset omnes hæreticos formam servare.

At, inquires, S. Cyprianus arguit S. Stephanum, quòd probaverit Baptismum in Christi nomine collatum.

R. Intelligendum Stephanum eo sensu quo ipsemet Cyprianus intellexit verba S. Petri Act. 10. *Jussit eos baptizari in nomine Domini Jesu* ; sed stimulat S. Martyr decreto summi Pontificis, verba ejus sine ratione in diversa expendit statera, & in alienum sensum detorsit.

Ad tertium, 1. Sanctus Ambrosius clarè requirit

quirit ad veritatem Baptismi in Ministro expref-
sam invocationem trium Personarum lib. de my-
fteriis cap. 4. ubi sic fcribit : *Credit Catechumenus ,*
fed nifi baptizatus fuerit in nomine Patris , & Filii , &
Spiritus Sancti , non potest accipere remissionem peccato-
rum. Quare ne fibi videatur contrarius Sanctus
Doctor loco in objectione laudato , qui quidem
difficilis est , & multis offendendi occasio . 2. re-
fpondendum est ipsum eò loci , non de baptizan-
tis , fed de baptizandi fide loqui , velleque folum
baptizandum , ut confequatur effectum Sacramen-
ti , debere credere myfterium fanctiffimæ Trinita-
tis , hancque fidem fuam fatis exprimere , fi re-
fpondeat ad interrogata Miniſtri quòd credit in
Patrem , vel in Filium , vel in Spiritum Sanctum ;
quia nominando unam Perſonam fatis intelligitur
alias credere .

Confirmatur autem hæc refponſio ; 1. quia ad-
ducit exemplum Eunuchi , quem dicit plenum
myfterium eſſe confeutum , ex eo quòd dixerit
ſe credere in Chriſtum Jeſum , Actuum 8. 2. quia
ideo dicit Ephesios Aët. 19. non eſſe confeutos
remiſſionem peccatorum in Joannis baptiſmate ;
quia illud acceperant nescientes Spiritum Sanctum ,
quem Joannes prædicabat , ſicut & alias Perſonas ;
quæ exempla evincunt S. Doctorem loqui de pro-
feſſione emittenda à baptizando , non verò à ba-
ptizante . 3. Docet ſine hac fide vacuum eſſe My-
ſterium ; qua fide inquam ego ? an Miniſtri ? hæ-
reticum eſt , & à mente S. Ambroſii alienum , er-
go intelligendum eſt ſine fide baptizandi . Deni-
que ſcribit ibidem S. Ambroſius expreſſo ſolo no-
mine Spiritus Sancti perinde valere Baptiſmum :
atqui nullus dixerit , niſi Magiſter Sententiarum
in

in hac parte deceptus, & à nullo Theologo hac in re probatus, ratum esse baptismum invocato solo Spiritus Sancti nomine.

Ad quartum, quidam Theologi verba Nicolai I. & venerabilis Bedæ in sensu S. Ambrosii benignè accipiunt, utpote qui S. Doctoris auctoritate nitantur, sed aliis Theologis non videntur pati hanc benignam interpretationem, quare fatentur citatos auctores mentem S. Ambrosii non assecutos, existimasse hanc sufficere Baptismi formam, *Baptizo te in nomine Christi*, neque Nicolaum I. hîc egisse ut summum Pontificem, sed Doctorem particularem; quia ab eo non quærebant Bulgari quid censendum esset de baptismo in nomine Christi, sed de Baptismo à Judæo quodam collato. Ad quæstionem autem propositam rectè, & ut decebat summum Ecclesiæ Pastorem, respondit Nicolaus ratum esse hujusmodi Baptismum, si in eo servatus sit ritus præscriptus; sed longius progressus suam sententiam tanquam Doctor particularis protulit, nempe legitimam esse formam, sive baptizatus esset in nomine Patris, &c. sive in nomine Christi.

Ad quintum, quibusdam videtur supposititia laudata Epist. Sed germana sit Sancti Bernardi Epistola: S. Doctor singularem suam opinionem ita modestè protulit, ut eam sapientiorum judicio subjiciat, *sine præjudicio*, inquit *sanius sapienti.*

Objici potest etiam S. Hilarius lib. de Synodis.

Sed eo loci non agit de Baptismi forma: conciliat tantum cap. 10. Actuum Apostolorum, ubi referuntur baptizati in nomine Christi cum 28. Matthæi, in quo præcipitur Apostolis baptizare
in

in nomine Patris, &c. docetque in nomine Christi intelligi Patrem, & intelligi Filium, & Spiritum Sanctum.

CAPUT V.

Quis est Baptismi Minister in casu necessitatis?

Calvinus lib. 4. Institutionum cap. 15. §. 21. & 22. scribit eos solos esse Baptismi Ministros, qui ad hoc officium ordinati sunt, contrariumque sine ratione & fundamento asserit; quamvis apud Veteres non desint exempla Baptismi à laicis collati, & probati.

Ex Arcudio, cap. 11. de Baptismo, hodie apud Græcos schismatis & ignorantiae tenebris involutos invalescit contra morem antiquum usus non baptizandi parvulos absente Sacerdote, etiam si in extremo vitæ periculo sint constituti. Hujc errori forsitan occasionem dedit S. Basilii Epist. ad Amphilochem auctoritas, quæ in hac parte nulla est; cum eo loci Sanctus Basilius sequatur errorem S. Cypriani, & Sancti Firmiliani prædecessoris sui, asserentium irritum esse Sacerdotum hæreticorum Baptisma hac falsa ratione, quòd Sacerdotes, dum in hæresim incidunt, laici fiant; quasi verò laici baptizare non possint. Nec ita generaliter S. Doctor admittit illud principium, quin in eadem Epistola liberum cuilibet relinquat sequi traditionem suæ Ecclesiæ, hoc est admittere vel rejicere Baptismum ab hæreticis collatum: atque ita, supposito quòd Sacerdotes hæretici fiant laici, verum erit, in mente S. Basilii, laicum posse baptizare.

Patres,

Patres, qui primis Ecclesiæ sæculis floruerunt, expressè quidem tradunt Baptismum à laicis jam baptizatis conferri posse, an autem & à non baptizatis, non ita clarè definiunt.

Tertullianus lib. de Baptismo cap. 17. sic scribit, *etiam laicis jus est, (baptizandi in necessitate) quod enim ex æquo accipitur, ex æquo dari potest sufficiat in necessitatibus ut utaris.*

Concilium Eliberitanum canone 38. sic statuit anno 305. *Peregrè navigantes, aut si Ecclesia in proximo non fuerit, posse fidelem, qui lavacrum suum integrum habet, nec si bigamus, baptizare in necessitate infirmitatis positum Catechumenum.*

Advertes circa hunc canonem, quando Baptismus urgente necessitate conferendus est, & plures adsunt: secundum Concilii mentem, qui dignior est, debere ministrare; quare præferendus est non bigamus bigamo, qui integrum servavit baptismum, ei, qui lapsus in peccatum, Pœnitentiæ legibus subjicitur, vir mulieri, Clericus laico, Sacerdos inferiori Clerico; ita S. Thomas hic art. 4. hæc tamen regula servari non debet ubi læderetur pudor, vel ritus Baptismi à viro ignoraretur.

S. Hieronymus Dialogo contra Luciferianos ait: *Scimus etiam licere laicis (baptizare) ut enim accepit quis, ita & dare potest.*

Sanctus Augustinus lib. 2. contra Parmenianum cap. 13. *Quamquam etsi, inquit, laicus aliquis pereunti dederit (baptisma) necessitate compulsus, quod cum ipse acciperet, dandum esse addidit, nescio an piè quisquam dixerit esse repetendum; nulla enim cogente necessitate si fiat, alieni muneris usurpatio est: si autem necessitas urgeat, aut nullum, aut veniale delictum est.*

Sed

Sed etsi nulla necessitate usurpetur, & à quolibet cuilibet detur, quod datum fuerit, non potest dici non datum; quamvis recte dici possit illicite datum. At ubi S. Doctor quæstionem movet de non baptizatis, utrùm scilicet baptizare queant, quamvis in affirmantem propendeat sententiam, ut patet ex capite 53. lib. 7. de Baptismo ubi sic scribit: *nequaquam dubitare habere eos Baptismum, qui ubicumque & à quibuscumque verbis Evangelicis consecratum acceperint*; tamen non audet quidquam definire.

Equidem Concilium Tridentinum hanc difficultatem non attigit, fortè quia jam satis erat elucidata; maximè cùm Novatores eam ob rem pacem non turbarent; nam ex Bellarmino non constat qua mente Calvinus Baptismum à laicis collatum improbaverit, an ut illicitum tantùm, an verò ut invalidum. Sed cùm cit. loco Catholicos arguat, Ecclesiæ doctrina stabilienda est sequentibus responsionibus. Ad propositam quæstionem itaque

R. I. Nemo in quacunque necessitate potest seipsum baptizare; ita Innocentius III. cap. *debitum*, de Baptismo & ejus effectu, respondit Episcopo Metensi de quodam Judæo, qui seipsum baptizaverat: quia, inquit, Christus à Joanne baptizatus est, & nemo generat seipsum, præcepitque Dominus Apostolis, *Ite, baptizantes eos, in nomine Patris, &c.*

Nec dicas hominem posse seipsum communicare, ut patet in Sacerdotibus sanctificantibus.

Nam in his, quæ pendent a libera Dei voluntate, non est argumentandum a pari; maximè, cùm constans Ecclesiæ Traditio disparitatem agnoscat. Adde quòd qui communicat,
non

non Sacramentum conficiat, sed jam confectum recipiat.

R. 2. Omnis homo viator, sive vir, sive mulier, fidelis, aut infidelis, baptizatus vel non baptizatus, in casu necessitatis potest licitè baptizare.

Probatur 1. ex Scriptura, Exod. 4. Sephora uxor Moyfis circumcidit filium suum: ergo à pari mulier potest baptizare. Joannis 4. Apostoli adhuc laici, & nondum ordinati baptizabant. Act. 9. S. Paulus baptizatus est ab Anania qui à nonnullis creditur laicus. Act. 8. Philippus Diaconus baptizavit Eunuchum.

Probatur 2. ex Traditione. Nicolaus I. laudata responsione ad Bulgaros, docet ratum esse baptismum collatum à quodam Judæo vel Pagano. Quòd autem responsum Summi Pontificis fuerit juxta Traditionem Ecclesiæ Orientalis & Occidentalis, evincitur ex eo quòd Photius & ejus affectu, qui tunc temporis quærebant occasiones discedendi ab Ecclesia Romana, & dente mordaci minima quæque in Latinis immeritò carpebant, nunquam tamen contra illud Nicolai Decretum oblocuti sint.

Confirmatur 1. Latini exinde non variarunt circa hanc doctrinam, nec eam Græci hætenus Latinis objecerunt, sive dum ferveret discordia, sive dum pacem cum Latinis resarcierunt in tribus Conciliis Generalibus, nempe in Generali VIII. in Lugdunensi II. & Florentino.

Confirmatur 2. Eugenius IV. juxta hanc antiquam Ecclesiæ Traditionem in suo Decreto pro Armenis ait: *Minister hujus Sacramenti est Sacerdos, cui competit ex officio baptizare. In casu autem necessitatis, non solum Sacerdos, vel Diaconus, sed etiam laicus,*

vel mulier, imò etiam Paganus & Hereticus baptizare potest; dummodo formam servet Ecclesiæ, & facere intendat, quod facit Ecclesia.

Dices: hi soli baptizare possunt, quibus Christus Dominus dedit potestatem baptizandi: atqui solis Apostolis, & eorum in Sacerdotio successoribus dedit hanc potestatem; illos enim alloquitur, Matth. 28. *Docete omnes Gentes, baptizantes eos in nomine Patris, &c.* Ergo. Hinc cap. 176. Prati Spiritualis refert Joannes Moschus septimo sæculo, Laicos respondisse Judæo in itinere baptisma petenti, *nobis non licet hoc facere, sæculares enim sumus.* Et S. August. Epist. 228. aliàs 180. docent Pastores illicitè fugere sæviante Vandalica persecutione, exponit luctuosum gregis statum, qui Sacerdote absente, non habet qui eum fonte baptismatis regeneret aut pœnitentia reconciliet.

Distinguo min. solis Apostolis dedit potestatem baptizandi solemniter & ex officio: Concedo; baptizandi in casu necessitatis, & sine solemnitate, Nego min. Nam ex S. Thoma 3. p. q. 67. art. 3. ad misericordiam Dei, qui vult omnes homines salvos fieri, pertinet, ut in iis, quæ sunt de necessitate salutis, homo remedium facilè inveniat, ac proinde obvium habeat Baptismi Ministrum, sicut & materiam, & ita semper intellexit Ecclesia; colligiturque ex cap. 8. Actuum, ubi Philip-pus, quamvis Diaconus, Eunuchum baptizavit. Quare nonnisi ex ignorantia ii, de quibus in Prato Spirituali, responderunt Judæo, se in illo necessitatis casu non posse baptizare.

Confirmatur responsio, Christus Dominus Apostolos alloquens, Matth. 28. non solum di-
xit,

xit, *Baptizantes*, sed & *docete* : quod non impedit, quin laici, imò & mulieres, quibus Apostolus non permittit loqui in Ecclesia, 1. Tim 2. privatim & in casu necessitatis licitè doceant : ergo etiam nihil impedit quominus similiter baptizent.

In Epistola verò laudata S. Augustinus non contendit plus juris non competere laicis circa Baptismum, quàm circa reconciliationem ; contrarium enim expresse docet lib. 2. contra Parmenianum jam cit. sed ad flectendos Sacerdotes, exaggerat miseriam gregis à Pastore derelicti, in quo alii petunt monita salutis, alii Baptismum, alii reconciliationem, alii pro morientibus Ecclesiasticam sepulturam ; quæ solatia à multitudine imperita & dispersa nullatenus sperare queunt.

Instabis : neque ex Scriptura, neque ex Traditione, saltem paganis & mulieribus vindicari potest baptizandi potestas. De paganis patet, tum S. Aug. testimonio, qui usque ad suam ætatem, hoc est, usque ad quintum sæculum, hac de re nihil viderat, aut legerat traditum ; tum ex Gregorio III. qui octavo sæculo in Epist. 1. ad Bonifacium sic scribit : *Eosdem quos à Paganis baptizatos esse asseruisti, ut denuò baptizes in nomine Sanctissimæ Trinitatis mandamus.* Refertur de consecratione dist. 4. Denique ex c. 2. pœnitentialis Theodori Cantuariensis sæculo sexto, & ex can. 3. Concilii Compendiensis, referturque à Burchardo, Ivone Carnotensi, & Gratiano his verbis : *Si Presbyter ordinatus deprehenderit se non esse baptizatum, baptizetur, & ordinetur iterum, & omnes, quos prius baptizavit.* Quomodo ergo Nicolaus I. nono

ſæculo, & Eugenius IV. 15. ſine auctoritate Scripturæ, & Traditionis divinæ; definire potuerunt ratum eſſe Baptiſmum à Pagano collatum? De mulieribus etiam hæc ſcribit Tertull. cap. 9. lib. de velandis Virginibus, *non permittitur in Eccleſia loqui, ſed nec docere; nec tingere, nec offerre, nec ullius virilis muneris, nedum Sacerdotalis officii ſortem ſibi vindicare.* S. Epiph. hæ. 42. & 79. inter Marcionitarum errores, notat quòd profiteantur mulieres poſſe baptizare. Concilium Carthaginènſe IV. can 100. prohibet mulierem baptizare.

R. 1. Pertinet ad Eccleſiam explicare Scripturam, & Traditionem divinam, ubi obſcuritas occurrit: habetur autem in Scriptura Chriſtum Dominum ad Apoſtolos non arctaffe poteſtatem baptizandi, cùm Philippus Diaconus baptizaverit, Actuum 8. Sed quouſque extendatur illa poteſtas, an uſque ad Paganos & mulieres, non exprimit Scriptura. Recurrendum eſt ergo ad Traditionem, in qua videmus à tempore Apoſtolorum, Baptiſmum ſuſcipi à laicis collatum. Rationem quidem huiuſce diſciplinæ, Tertullianus & S. Hieronymus afferunt, nempe quia laici aliis dare poſſunt quod ipſi acceperunt: quo ratiocinio innuunt ſe loqui de laicis baptizatis: cùm ipſis non occurreret exemplum (quod rariffimum eſt) Baptiſmi à Pagano collati.

Hinc nata eſt Auguſtino difficultas, num ratio illa inadæquata propoſitionem generalem probaret, accipiendaque eſſet ſicut in ratiocinio ſequenti: hic Sacerdos occurrens homini lethaliſter percuſſo & pœnitenti, reconciliationis Sacramentum impertiri debet; quia Paſtor ejus eſt.

Hæc

Hæc quidem ratio magis urget, sed propositionem universaliter non probat; nam Sacerdos in illo casu, etiamsi non esset Pastor, nihilominus pœnitentem illum absolvere teneretur.

Ita S. Augustinus opinabatur accipiendum ratiocinium Tertulliani & Sancti Hieronymi; sed difficultatem definire non præsumpsit sine Consilio aliorum Episcoporum. Existimavit ergo ex Traditione quæstionem illam elucidari posse. Porro quod optabat S. Doctor, præstiterunt Summi Pontifices & Episcopi.

S. Leo eodem sæculo paucis annis post S. Augustinum, epist. ad Rusticum Narbonensem Episcopum, aliàs 92. nunc 2. sic scribit: *Si isti, quasi se baptizatos sciunt, sed cujus fidei fuerint, qui eos baptizavere, se nescire profitentur . . . quilibet modo formam Baptismatis acceperint, baptizandi non sunt.* Refertur de consecratione dist. 4. cap. 28. Similia eodem sæculo scripsit Gelasius I. epistola, sed clariùs Concilium Compendiense can. 9. octavo sæculo: *Si quis baptizatus est à Presbytero non baptizato, & sancta Trinitas in ipso invocata fuerit, baptizatus est, sicut Sergius Papa dixit, Impositione tamen manus Episcopi indiget.* Ex his

Sequitur 1. in collectionibus objectis, corruptum esse Canonem Compendiensem, nullamque earum rationem habendam. Unde emendator Decreti Gratiani expunxit hæc posteriora Canonis verba, *& omnes, quos baptizavit*, tanquam imperitè abjecta, & textui minus cohærentia.

Sequitur 2. Gregorium III. intelligendum esse de his, qui baptizati fuerant sine invocatione Sanctissimæ Trinitatis. Quis enim crederet Summum Pontificem contraria decernere in re tanti

momenti, nempe Gregorium III. velle à Paganis baptizatos in forma præscripta iterum baptizandos; Sergium verò II. & Nicolaum I. immediatè sequenti sæculo idem expresse prohibere, quibus & præiverat Concilium Compendiense?

Sequitur 3. Eugenium IV. non sine Scripturæ & Traditionis divino auxilio definiisse Paganum in casu necessitatis posse baptizare. Utrùm autem hæc propositio præcisè sumpta sit de fide, Theologis expendendum relinquitur, sufficit ad propositum, quòd sit certissima, *Si quid horum, inquit Sanctus Augustinus epist. 54. aliàs 118. tota per orbem frequentat Ecclesia quin ita faciendum sit disputare, insolentissimæ insanie est.*

R. 2. In objectis textibus agi de mulieribus hæreticis, quæ juxta errorem Sectæ suæ solemniter in Ecclesia non solum baptizabant, sed alia officia Sacerdotalia usurpabant. *Apud eos, inquit S. Epiphanius cit. loco, mulieres Episcopi sunt & Presbyteri.* Quòd autem Concilium Carthaginense cit. can. loquatur de Baptismo solemniter, colligitur ex alio præcedente canone, his verbis concepto: *Mulier, quamvis docta & sancta, propter viros, in conventu docere non præsumat.* Et Tertullianus cap. 9. de velandis Virginibus, *non permittitur mulieri in Ecclesia loqui, sed nec docere, nec tingere, nec offerre.* Et cap. 41. lib. de præscriptionibus: *ipsæ mulieres hæreticæ quàm procaces, & audeant docere, contendere, exorcismos agere, &c.*

Argumenta ex Scriptura, & ex ratione speciatim deducta contra Baptismum ab Hæreticis & peccatoribus collatum, soluta sunt cap. 14. Tractatus de Sacramentis in genere.

CAPUT VI.

Quis est Minister Baptismi solemnis?

R. Solus Sacerdos sive Episcopus sit, sive Presbyter, est ordinarius Baptismi Minister; extraordinarius verò Diaconus.

Prima pars probatur ex cap. 28. Matthæi, Christus Dominus solis Apostolis, & eorum in Sacerdotio successoribus, baptizandi munus demandavit his verbis: *Docete omnes Gentes, baptizantes eos*, &c. Et ratio est, quia cum per Baptismum pateat ingressus in Ecclesiam, fiatque professio solemnis Religionis Christianæ; illius est referare fores, & cætui fidelium coaptare, qui sacræ illi societati præest. Hinc est quodd præsentate Episcopo, Presbyter, nisi iussus non baptizet, quoddque nascente Ecclesia cum Presbyteri sub manu & oculis Episcopi degerent, baptizandi munus soli Episcopo deferretur: *Non licet*, inquit S. Ignatius epistola ad Smyrneneses: *nisi Episcopo aut baptizare, aut sacra facere*. Et Tertullianus c. 17. lib. de Baptismo, *dandi (Baptismi) habet jus Summus Sacerdos, qui est Episcopus, dehinc Presbyteri & Diaconi, non tamen sine Episcopi auctoritate, propter Ecclesiæ honorem, quo salvo, salva pax est*. S. quoque Hieronymus Dialogo adversus Luciferianos ait: *Inde venit, ut sine Episcopi iussione, neque Presbyter, neque Diaconus jus habeant baptizandi*.

Verum crescente numero Fidelium, divisæ sunt Parochiæ, quibus Presbyteri sunt præfecti; ad eorum enim officium & ordinem pertinent præesse, ut monet Episcopus dum sacram Ordinationem celebrat, *Presbyterum*, inquit, *oportet præesse*:

ergo & baptizare, aut aliis delegare illud officium erga sibi subditos; ac proinde peccaret Sacerdos, qui inconsulto vel Episcopo, vel Parocho, alienum Parochianum baptizaret.

Secunda pars, quæ est de Diaconis, probatur; quia Diaconi secundum proprii nominis interpretationem, & ordinis sui institutionem, officium est ministrare, non verò præesse; *neque Diaconis;* inquit Sanctus Epiphanius hæresi 79. *in Ecclesia creditum est, ut aliquod mysterium celebrent, sed solum ut administrent, dum celebratur.*

Unde si Diaconus extra casum necessitatis, nec jussus ab Episcopo, vel Parocho solemniter baptizat, alienum munus usurpat, & secundum communioem Theologorum sententiam fit irregularis; colligiturque ex lib. 5. Decretalium tit. 28. cap. 1. ubi sic legitur: *Si quis baptizaverit, aut aliquod divinum Officium exercuerit non ordinatus, propter temeritatem abjiciatur de Ecclesia, & nunquam ordinetur.*

Dices; ex Concilio Tridentino, hierarchia divinitus instituta constat ex Episcopis, Presbyteris, & Ministris: ergo ex divina institutione principantur Diaconi; definitur enim Hierarchia sacer principatus, ac proinde munus baptizandi Diaconis competit.

Confirmatur 1. Diaconi, cum ordinantur, audiunt ab Episcopo: *Oportet Diaconum prædicare, baptizare, Ecclesiamque (sub typo veteris tabernaculi) portare & munire ornatu sancto, prædicatu divino, & exemplo perfecto.* 2. Philippus Diaconus baptizabat, Actuum 8. 3. Aliquando Diaconi Parochias rexerunt, ut liquet ex can. 77. Concilii Eliberitani, anno 305. his verbis: *Si Diaconus regens plebem*

plebem sine Episcopo, vel Presbytero, aliquos baptizaverit, Episcopus per benedictionem eos perficere debet. Et ex S. Hieronymo dialogo contra Luciferianos, ubi sic scribit: Non abnuo hanc esse Ecclesiarum consuetudinem, ut ad eos, qui in longè minoribus urbibus per Presbyteros & Diaconos baptizati sunt, Episcopus manum impositurus excurrat. Ergo Diaconi eandem cum Presbytero facultatem habent circa Baptismum.

Nego consequentiam; Quemadmodum enim in civilibus ministris, qui ex officio, Principis mandata executioni demandant, in Republica præminent, nomenque & dignitatem Magistratus fortiuntur; sic & Diaconi, qui in Ordinatione sua acceperunt jus ministrandi immediatè Episcopo, vel Presbytero, sive ad Eucharistiam conficiendam, sive ad plebem instituendam prædicando & baptizando, rectè dicuntur principari, functionesque obire hierarchicas. Neque verò pares credendi sunt Presbyteris, ex eo quòd secundum morem antiquum, non licet Presbytero baptizare, aut offerre, præsentè Episcopo: nam etsi honor ille deferatur Summo Sacerdotio, tamen in his non agit Presbyter ut Minister Episcopi, sed ex officio suo ordini competente, ut patet ex Gelasio I. epist. 9. in qua sic habet: *Diaconos propriam constituimus servare mensuram . . . absque Episcopo, vel Presbytero baptizare non audeant, nisi, prædictis fortassis Officiis longius constitutis, necessitas extrema compellat. Refertur i. p. dist. 63. cap. Diaconos, ubi sicut Episcopis, ita & Presbyteris tribuitur facultas mandandi Diaconis ut baptizent, quod perspicuè demonstrat Presbyterum esse Baptismi ordinarium Ministrum, non verò Diaconum.*

num. Cæterum cum Ecclesiæ copia Sacerdotum hodie non desit, Parochi non debent contra hodiernum morem hanc licentiam Diaconis concedere, nisi adsit necessitas, & consensus Episcopi accedat, si ad eum recurri possit.

Ex his facilis est responsio ad ea, quæ in objectionis confirmationem allata sunt. Nimirum Diaconus in Ordinatione accipit baptizandi potestatem, nempe quando illud munus sibi ab Episcopo, vel Presbytero injunctum fuerit: hoc modo baptizavit Philippus, & alii Diaconi, de quibus loquitur Concil. Eliberitanum.

Q. 2. *Plures possuntne eundem baptizare?*

R. Minimè, si quilibet baptizans solum partem Sacramenti ministraret; quia vera non esset forma: *Ego te baptizo*, cum reverà, alio fundente aquam, non ablueret.

Q. 3. *Unus potestne simul plures baptizare?*

R. Potest, mutando singularem numerum in pluralem; sic enim creditur baptizasse S. Petrus Act. 2. Extra tamen casum necessitatis illicitus esset ille modus baptizandi; quia est contra morem Ecclesiæ, secundum quem sicut aqua fundenda est supra singulos parvulos simul oblato, sic supra singulos forma distincta debet proferri.

CAPUT VII.

Quodnam est Baptismi subjectum?

Certum est 1. omnem hominem in statu viæ, sive vir ille sit, sive mulier, esse capacem Baptismi; quia Christus neminem excipit à Baptismi gratia, cum ait Matth. 28. *Docete omnes Gentes, baptizantes eos, &c.*

Cer-

Certum est 2. parvulos in utero materno ita conclusos, ut aqua perfundi non possunt, non esse capaces Baptismi, nec sufficere si matris corpus abluatur, quia foetus animatus non est pars matris, sed persona distincta; ita S. Thomas 3. part. quæst. 68. art. 11. ad 2. & S. Augustinus lib. 6. contra Julianum cap. 14. ubi sic docet: *Si ad matris corpus id quod in ea concipitur, pertineret, ita ut ejus pars deputaretur, non baptizaretur infans, cujus mater baptizata est aliquo mortis urgente periculo, cum eum gestaret in utero. Nunc verò cum etiam ipse baptizatur, non utique bis baptizatus habebitur.* Addit sanctus Thomas citato art. ad 3. non licere occidere matrem, ut salvetur filius, quia nec quivis alius habet dominium directum in propriam, vel alterius vitam, ut probamus Tract. de Justitia & Jure.

Controversia est duntaxat circa parvulos jam natos, utrùm scilicet baptizari possint, ac debeant ante usum rationis?

Petrobrussiani ab auctore suo Petro de Bruis sic dicti, & Henriciani ab Henrico Petri de Bruis discipulo, negarunt XII. sæculo baptismum parvulis posse conferri, ex sancto Bernardo epistola 240. Eundem errorem amplexi sunt Valenses.

Ex Secta Lutheri prodierunt Anabaptistæ anno 1527. qui ex hoc Magistri principio, quòd Sacramenta suscipiens, justificetur per solam fidem, cujus parvuli capaces non sunt, eruerunt, duce quodam Balthasare, baptismum parvulis non debere conferri, & ita docuere repugnantibus Luthero, & Calvino.

Tertull.

Tertull. quidem non negavit parvulos baptis-
mi esse capaces, sed existimavit differendum us-
que ad adultam ætatem, qua per se respondere
possint: *Quid necesse est*, inquit, libro de
Baptismo c. 18. . . . *sponsores periculo in-*
gerit? Ubi agnoscit morem antiquum, secundum
quem sponsores, seu patrini fidejubebant pro
parvulis quos baptizandos offerebant.

Sanctus Gregorius Nazianzenus videtur huic
fuisse sententiæ, quatenus oratione 40. in san-
cta lumina, monet, ut differatur baptismus par-
vulorum, saltem usque ad triennium, aut qua-
driennium, sed non ultra propter mortis pericu-
lum. Erasmus vero à Facultate Parisiensi damna-
tus anno 1527. docet Epistola præfixa Paraphrasi
in Matth. parvulos, cum adoleverint interro-
gandos, num ratum habeant, quod pro ipsis pa-
trini polliciti sunt, nec esse cogendos, si renue-
rint, ad illud observandum. Quid autem in his
credendum sit fidelibus, declarat Concilium Tri-
dentinum, sess. 7. sequentibus Canonibus.

Can. 12. *Si quis dixerit neminem esse baptizandum,*
nisi ea ætate, qua Christus baptizatus est: vel in ipso
mortis articulo; anathema sit.

Canone 13. *Si quis dixerit parvulos, eo quod actum*
credendi non habent, suscepto Baptismo, inter Fideles
computandos non esse, ac propterea cum ad annos discre-
tionis pervenerint, esse rebaptizandos; aut præstare omit-
ti eorum baptismi, quam eos non actu proprio credentes
baptizari in sola fide Ecclesiæ, anathema sit.

Can. 14. *Si quis dixerit hujusmodi parvulos bapti-*
zatos, cum adoleverint, interrogandos esse, an ratum
habere velint, quod patrini eorum nomine, dum baptiza-
rentur, polliciti sunt; & ubi se nolle responderint, suo
esse

esse arbitrio relinquendos, nec alia interim pœna ad Christianam vitam cogendos, nisi ut ab Eucharistiæ, aliorumque Sacramentorum susceptione arceantur, donec resipiscant; anathema sit. Quare, juxta ejusmodi Decreta ad propositam quæstionem,

R. De fide est, parvulos esse baptismi capaces, nec expectandam eorum adultam ætatem. Patet ex definitione Concilii Tridentini, nobisque consentiunt Lutherani, & Calvinistæ.

Probatur 1. ex Scriptura, obscura quidem in hac parte, sed per interpretationem universalis Ecclesiæ, à primis sæculis dilucidè explicata, Joan. 3. *Nisi quis renatus fuerit ex aqua & Spiritu Sancto, non potest introire in regnum Dei.* Ubi Christus Dominus baptismum tanquam medium omnibus ad salutem necessarium præscribit: Ergo est infantibus applicandus.

Resp. posset illud medium non magis spectare infantes jam natos, quàm nondum natos, suadereturque ex eo quòd baptismo jungendæ sint instructio & fides, Matth. 28. *Docete omnes gentes, baptizantes eos, &c.* Marc. 16. *Qui crediderit, & baptizatus fuerit, salvus erit.* Porro infantes sive nati, sive non nati, nec possunt doceri, nec credere: ergo nec baptizari.

Hæc quidem responsio torquet Lutheranos & Calvinistas, Traditionem rejicientes; Catholici verò difficultatem facilè solvunt auctoritate universalis Ecclesiæ, quæ ab Apostolis per continuam Traditionem accipit Christum Dominum hanc baptismi legem extendisse ad parvulos. Quare

Probatur 2. ex constanti Ecclesiæ Traditione.

S. Ire-

S. Irenæus Apostolorum temporibus proximus sic scribit lib. 2. cap. 39. *Omnes per seipsum (Christus) venit salvare, omnes, inquam, qui per ipsum renascuntur in Deo, infantes & parvulos, juvenes & seniores.*

Origenes in cap. 6. epist. ad Romanos: *Ecclesia ab Apostolis traditionem accepit etiam parvulis dare baptismum.* Jam attulimus testimonium Tertulliani contemporanei.

Sanctus Cyprianus epist. 59. ad Fidum, qui circumcidentium more, expectabat diem octavum, ut baptizaret, sic scribit: *Hæc fuit in Concilio nostra sententia à baptismo atque à gratia Dei . . . neminem per nos debere prohiberi . . . tum magis circa infantes ipsos & recens natos observandum putamus.*

S. Augustinus libro 1. de peccatorum meritis cap. 26. probans contra Pelagianos peccatum originale, quod illi negabant; ita habet: *Quia parvulos baptizandos esse concedunt (Pelagiani) qui contra auctoritatem universæ Ecclesiæ, procul dubio per Dominum & Apostolos traditam, venire non possunt, concedant oportet eos egere illis beneficiis mediatoris.* Hic locus insignis est, sufficitque ad demonstrandum tam constantem, tamque universalem fuisse quarto & quinto sæculo Ecclesiæ consuetudinem baptizandi parvulos, ut ipsi Pelagiani quamvis inde maximè urgerentur, eam negare, aut rejicere non auderent. Unde liquet Walfridum lapsum esse memoria, cum nono sæculo scripsit libro de rebus Ecclesiasticis, primis temporibus solum iis baptismi gratiam dari solitam, qui ad hoc pervenerant, ut scire possent quid emolumenti in baptismo consequerentur; Synodumque Parisiensem eodem sæculo benignè intelligendam esse de adultis, cum docet lib. 1. cap. 6. quod in primordio

Eccle-

Ecclesiæ nemo ad perceptionem baptismatis admittebatur, nisi prius fuisset institutus; aliàs error esset manifestus contra indubiam *Historiæ* veritatem.

Dices; ex allatis testimoniis colligitur solum infantes baptizari posse in casu necessitatis, quo cessante, antiquitus differebantur ad adultam ætatem, ut liquet ex Sanctis Gregorio Nazianzeno, Ambrosio, Augustino, & pluribus aliis, qui licet orti ex piis parentibus, tamen nonnisi grandiores effecti, & decursis gradibus cathechumenatus, baptismi gratiam percipiebant: ergo infantes nonnisi in mortis periculo sunt baptizandi.

Nego antec. Cujus falsitas arguitur, vel ex sola controversia, tertio sæculo orta, num expectandus esset octavus dies, in qua sanè controversia, non agebatur de parvulis in extremo vitæ periculo constitutis; cùm in hac hypothese non esset locus procrastinandi; sed de parvulis bene valentibus, quorum baptismus secundum omnes non erat differendus ultra octavum diem, & secundum S. Cyprianum, & sexaginta alios Episcopos, quos in hanc rem congregaverat, statim ab ortu erat conferendus.

Negandum tamen non est, quin parentes etiam pii expectarint adultam filiorum ætatem, quò paratiores baptismi gratiam consequerentur. At contra eorum spem ex ejusmodi procrastinatione innumera oriebantur mala & scandala. Plures enim adulti baptismum negligebant, nonnunquam etiam usque ad ultimam ægritudinem rejiciebant; alii, ut liberiùs propriis cupiditatibus indulgerent, nulla lege refrænati: alii, ut plenè in ipso exitu purgati, recta via ad cælum evolarent, quibus malis occurrens *Ecclesiæ* sapien-

sapientissimè sanxit, ut parentes filios statim ab ortu baptizandos offerrent.

Instabis: saltem parvuli sic baptizati, nisi ratum habuerint grandiores effecti, quod patrini pro ipsis sponponderunt, non sunt cogendi ad observandas Ecclesiæ leges, absurdum enim est condemnare quenquam ad subeundum aliquod onus, quod alter sine ejus mandato promisit: ergo qui in infantia baptizati sunt, suo relinqui debent arbitrio.

Nego antecedens, quia omnes & singuli tenentur etiam sine patrinorum sponsione ad legem divinam servandam, ad baptismum suscipiendum, ad abrenuntiandum diabolo, & pompis ejus, & ad obediendum Ecclesiæ Catholicæ: *Data est mihi omnis potestas in cælo & in terra*, inquit Christus, Matth. 28. *Euntes ergo docete omnes gentes, &c. Qui vos audit, me audit, & qui vos spernit, me spernit*, Luc. 10. *qui verò non crediderit, condemnabitur*, Marc. cap. 16. Hoc solum interest adultos inter & infantes, quòd illi, cum sui sint juris, debeant Ecclesiæ se subicere propria voluntate, & nisi faciant peccent: illi verò, quia sui juris non sunt, sed parentum, possint & debeant eorum voluntate Ecclesiæ subjici: nec ulla fit eis injuria, sed ingens confertur beneficium, licèt ex baptismo consequatur obligatio observandi Ecclesiæ leges. Sic in foro sive interno, sive externo teneretur quis solvere impenfas, quas alter sine ejus mandato fecit, ut equum, aut bovem errantem domum ejus reduceret. Ejusmodi enim officia charitatis dicuntur apud Jurisperitos quasi contractus; quia habent eandem vim obligandi, ac contractus propriè dicti.

CAPUT VIII.

Possuntne baptizari Judæorum & Infidelium
infantes invitis parentibus?

R. 1. Possunt validè; est contra Durandum &
paucos alios.

Probatur, quia nihil deest in ejusmodi Baptismo ad veritatem Sacramenti: *Non scriptum est*, inquit S. Augustinus Epistola 98. aliàs 23. ad Bonifacium num. 2. *Nisi quis renatus fuerit ex parentum voluntate sed nisi quis renatus fuerit ex aqua & Spiritu Sancto.* Et infrà num. 5. *offeruntur parvuli ad percipiendam spiritalem gratiam; non tam ab eis, quorum gestantur manibus quàm ab universa societate Sanctorum tota mater Ecclesia, quæ in Sanctis est, facit; quia tota omnes, tota singulos parit.*

Difficultas est utrùm id fieri possit licitè?

R. 2. Filii hæreticorum possunt licitè baptizari invitis Parentibus. Probatur 1. Quia parentes, utpotè jam baptizati, Ecclesiæ subditi sunt, ac proinde cogi possunt ad servandas ejus leges. 2. Quia Ecclesia semper probavit leges Imperatorum contra hæreticos datas: *Cur non coegeret Ecclesia*, inquit S. Augustinus Epistol. 185. aliàs 50. cap. 6. num. 23. *perditos filios ut redirent, si perditii filii alios coegerunt ut perirent?* Et paulò ante num. 22. *ubi est, quod clamare consueverunt, liberum est credere, vel non credere? Cui Christus vim intulit? Ecce habent Paulum Apostolum; agnoscant in eo prius cogentem Christum, & postea docentem, prius ferientem, & postea consolantem, nempe Act. 9.*

D. Habert Theolog. Tom. V.

P

R. 3.

R. 3. Filii mancipiorum licitè baptizari possunt invitis parentibus, quia tam ipsi quàm parentes sunt sub dominio dominorum, possuntque absque injuria parentibus subtrahi. Idem dicendum de his qui jure belli capti sunt, qui ita in victoris potestatem veniunt, ut fas ei sit illos parentibus eripere, vel etiam vendere, sicque excusantur Mathathias & amici ejus, qui circumciderunt pueros quotquot invenerunt incircumcisos in finibus Israel, 1. Mach. 2. vers. 46. quanquam dici potest eos non paganorum, sed Judæorum filios circumcidisse.

R. 4. Una est Theologorum sententia filios infidelium, qui nequidem civiliter Christianis Principibus subditi sunt, illicitè baptizari reluctantante utroque parente, nisi jamjam sint morituri. Ratio est, quia, vel illi infantes subtraherentur patriæ potestati, vel non: primum fieri non potest sine injuria parentum, quibus jus à natura concessum est educandi & instituendi filios nondum rationis compotes: secundum verò exponeret Sacramentum evidenti periculo profanationis, cum liberi curæ parentum infidelium dimissi, eorum superstitionem infallibiliter sequantur.

Dixi 1. *Reluctante utroque parente*; Si enim vel sola mater sit Christiana, cum & ipsa jus habeat instituendæ prolis, infans invito patre infideli licite baptizabitur. Ita sanxit Concil. Toletanum IV. cap. 62.

Dixi 2. *Nisi illi infantes jamjam sint morituri*; Quia tunc nec eriperentur paternæ potestati, nec Baptismus profanationi exponeretur.

Sed controvertitur in Scholis, num filii Judæorum, & aliorum infidelium non baptizatorum, qui

qui Principibus Christianis civiliter sunt subditi, possint licite baptizari, invitis parentibus?

Affirmat Scotistarum Schola: 1. Quia Baptismus est juris divini, cui cedere debet jus paternum in filios: *Obedire enim oportet Deo magis, quàm hominibus*, Act. 5. 2. Quia parentes jus non habent prohibendi quominus liberi baptizentur: cum jure divino teneantur, tum sibi, tum filiis providere de medio ad salutem necessario; Deus enim concessit illis potestatem in filios in ædificationem, & non in destructionem, ut dicitur, 2. Corinth. cap. 13. Unde si pater Judæus in filium crudeliter sæviret, Princeps, cui politicè subditus est, posset & deberet subvenire injustè oppresso, illumque subtrahere paternæ tyrannidi. 3. Scriptum est Eccl. 17. vers. 12. *Mandavit illis unicuique de proximo suo*, quânto magis iis; qui ideò præsumunt, ut salutem subditorum invigilent? 4. Multi Principes Christiani laudantur, qui Judæos sibi politicè subditos vi & minis ad amplectendam Religionem Christianam compulerunt, ut Childericus Francorum Rex, ex Gregorio Turonensi lib. 6. Hist. cap. 17. Sisebutus in Hispania; Carolus Magnus in Germania. Nihilominus

R. 5. Cum S. Thoma 2. 2. quæst. 10. art. 12. & ejus Schola, aliisque communiter Theologis; nefas est baptizare parvulos, invitis eorum parentibus infidelibus, civiliter dumtaxat subditis.

Probatur 1. ex constanti usu Ecclesiæ, quæ ut observat S. Thomas citato art. 12. nunquam egit apud Imperatores etiam Religionis Christianæ amplificandæ studiosissimos, ut ejusmodi infideles coegerent sacra nostra suscipere, iisque parvulos suos

initiare; quin improbavit, si quando ex Principibus Christianis aliqui minas & verbera in hanc rem adhibuerint. Illud patet, tum ex sancto Gregorio Magno, tum ex Concilio quarto Toletano, cui sexaginta duo Episcopi subscripsere.

Sanctus quidem Gregorius lib. 1. Epistol. 45. sic scribit: *Intentionem quidem hujusmodi laude dignam censeo, sed timeo ne animarum, quas eripi volumus, dispendia subsequantur; dum enim quispiam ad Baptismatis fontem, non prædicationis suavitatem, sed necessitate pervenerit, ad pristinam superstitionem remeans, inde deterius moritur, unde renasci videbatur.* Et lib. 2. Epist. 52. *Nova atque inaudita est illa prædicatio, quæ verberibus exigit fidem.*

Concilium quoque Toletanum quartum tria sanxit; primum, ne quisquam Judæus aut quivis infidelis ad fidem cogatur: *De Judæis:* inquit, cap. 56. *præcipit sancta Synodus nemini deinceps ad credendum vim inferri; cui enim vult Deus, miseretur, & quem vult, indurat; non enim tales inviti salvandi sunt, sed volentes, ut integra sit forma justitiæ.* Secundum, ut compellantur servare Ecclesiæ leges qui olim baptizati sunt, quamvis inviti; quia quævis externa coactio liberum & voluntarium prorsus non tollit: *Qui autem, pergit eodem capite, jam pridem ad Christianitatem coacti sunt venire (sicut factum est temporibus religiosissimi Principis Sisebuti) quia jam constat eos Sacramentis divinis sociatos Baptismi gratiam suscepisse Oportet ut fidem, quam etiam vi, vel necessitate susceperunt, tenere cogantur, ne nomen Domini blasphemetur.* Tertium, cap. 59. ut separentur filii jam baptizati à parentibus infidelibus. *Judæorum filios, vel filias, ne parentum ultra involvantur erroribus, ab eorum consortio separari decernimus.*

Ergo

Ergo contemni debent exempla in confirmationem oppositæ sententiæ allata; cùm ab Ecclesia fuerint improbata; quamquam Carolus Magnus non recessit à legibus in Concilio Toletano sancitis; namque primo, devicerat Saxones rebelles, ac proinde jure belli potuit tollere eorum filios. Secundò, non erant Pagani, sed apostatæ à Religione Christiana, ut probat Baroni-
 us: atqui hæretici & apostatæ cogi possunt ex Concilio Toletano quarto: Ergo. 3. Alcuinus (cui fides adhiberi debet magis, quàm Guillelmo Malmesburienti, cùm esset familiaris Carolo Magno, & in ejus comitatu) Epistola 7. ad Carolum Magnum, ipsi gratulatur ob clementiam Saxonibus exhibitam: *Ecce, inquit, quanta devotione & benignitate pro dilatatione nominis christiani duritiam infidelis populi Saxonum per veræ salutis consilium emollire laborasti*; Persuasum quippe erat Alcuino prædicatores paganorum debere uti pacificis & prudentibus verbis, quemadmodum scribit ad Archarium regalis Palatii, *ne, inquit, si cogantur, fallaciter Baptismum suscipiant.*

Probatur 2. ratione, quam affert S. Thomas cit. art. 2. *Quoniam . . . usum rationis non habet puer, non differt ab animali irrationali. Unde sicut bos vel equus est alicujus, ut utatur eo cùm voluerit secundum jus civile, sicut proprio instrumento: ita de jure naturali est, quod filius, antequàm habeat usum rationis, sit sub cura parentum. Unde contra justitiam naturalem esset, si . . . à cura parentum subtrahatur, vel de eo aliquid ordinetur invito parentibus. Postquam autem incipit habere usum liberi arbitrii, jam incipit esse suus, & potest, quantum ad ea quæ sunt juris divini, vel naturalis, sibi ipsi providere. Et tunc est inducendus ad*

- *fidem non coactione, sed persuasione: & potest etiam invitatis parentibus, consentire fidei, & baptizari.*

Ad singula momenta oppositæ sententiæ respondendo sigillatim.

Ad primum, Nego præceptum naturale debere cedere positivo Dei præcepto; quia præterquam quod utrumque est divinum, cum Deus sit auctor legis naturalis, præceptum naturale est magis necessarium, quam positivum, adeoque in concursu præferendum. Hinc est, quod uxor, aut filius familias votum implere non debeat repugnante marito, aut patre, ut dictum est, ubi de voto, quamvis obligatio voti sit juris divini. Nec dici potest hominem præferendo legem naturalem, obedire hominibus magis quam Deo; cum obsequatur Deo præcipienti, ut præferatur lex naturalis positivæ, utpotè magis necessaria.

Ad secundum, unicuique Deus mandavit de proximo suo, scilicet ut periclitanti subveniat fraternæ charitatis correctione, &, ut loquitur sanctus Gregorius, prædicationis & exhortationis suavitate, non verò violenta coactione, nisi sit superior. Porro Ecclesia nullam habet jurisdictionem in infideles non baptizatos; Principibus verò politicis competit quidem jurisdictio temporalis in infideles civiliter subditos, qua ipsis præcipere possunt, quæ conferunt ad Republicæ pacem, & punire, si eam perturbent, si in proprios filios, qui sunt corporis politici membra, crudelius agant; sed eorum potestas non extenditur ad ea, quæ sunt supernaturalis ordinis.

Ad tertium; licet omnis potestas data sit à Deo in ædificationem, homines tamen ea plerumque abutuntur, sicut qualibet alia re sibi
à Deo

à Deo concessa, puta sanitate, pecunia, vino, &c. sed nunquid propterea fas erit ista ab eis auferre?

CAPUT IX.

De necessitate Baptismi.

Q. I. *Baptismus estne ad salutem necessarius?*

Manichæi, ex Sancto Augustino libro de Hæresibus cap. 46. Baptismum in aqua nihil cuiquam perhibent salutis afferre, nec quenquam eorum, quos decipiunt, baptizandum putant.

Pelagiani peccatum originale negantes, docuerunt sine baptismo haberi posse vitam quandam beatam & æternam, sed ad regnum Dei non perveniri nisi per Baptismum, Christo dicente Joan. 3. *Nisi quis renatus fuerit ex aqua & Spiritu Sancto, non potest introire in regnum Dei.* Distinctionem autem illam inter vitam æternam & regnum Dei, contra expressa Scripturæ verba à Pelagianis effictam demonstrat S. Augustinus Serm. 14. de verbis Apostoli, nunc autem 294. quod enim Christus Dominus regnum vocat Matth. 25. v. 34. nominat vitam æternam v. 46. *Ibunt, inquit, bi in supplicium æternum, justi autem in vitam æternam.*

Socinianos etiam, qui in Baptismo non agnoscunt nisi symbolum exterius fidem excitans, Sacramenti necessitatem negare necesse est. Contra hos hæreticos ad quæstionem propositam

R. De fide est Sacramentum Baptismi necessarium esse necessitate medii, saltem in voto; dico, saltem in voto, nam ubi Sacramentum percipi

non potest, Baptismus flaminis, & Baptismus sanguinis, qui dicunt Sacramentum in voto, supplere possunt, ut patebit ex mox dicendis.

Probatur 1. ex Scriptura, Joan. 2. *Nisi quis renatus fuerit ex aqua & Spiritu Sancto, non potest introire in regnum Dei*: Illud enim dicitur necessarium necessitate medii, sine quo, etiamsi in aliqua hypothese supponatur impossibile, finis obtineri non potest; sic alimenta necessaria sunt necessitate medii ad vitam animalem conservandam; quia iis deficientibus, animal interire necesse est; atqui ex laudato textu sine Baptismo non patet ingressus in regnum Dei, quod est ultimus finis & vita æterna: Ergo.

Probatur 2. ex Traditione.

Tertullianus lib. de Baptismo cap. 17. de eo qui periclitantem non baptizavit, *reus erit, inquit, perditioni hominis.*

S. Chrysostomus hom. 3. in cap. 1. Actuum, de Episcopo ait: *Si vel unus tantum decedat non initiatus, nonne totam ipsius subvertit salutem? unius enim animæ perditio tantam habet jacturam, ut nulla ratione æstimari possit.*

Concilium Carthaginense quartum Epistola Synodica ad Innocentium I. sic scribit: *Quicumque negat parvulos per baptismum Christi à perditione liberari, & salutem percipere sempiternam; anathema sit.* Similia habet Concilium Milevitanum Epist. ad eundem summum Pontificem, qui in sua responsione eandem sententiam confirmavit.

Concilium Trident. sess. 7. can. 5. de Baptismo; *Si quis dixerit Baptismum liberum esse, hoc est, non necessarium ad salutem; anathema sit.*

dices;

Dices ; Gabriel Biel in quartum, Joannes Gerson in concione habita in Festo Nativitatis Beatæ Virginis coram Synodo Constantiensi generali, parentes hortatur Deum orare pro pueris in materno utero morituris ; *Quis enim scit*, inquit, *si fortè exaudiat ?* Cardinalis item Cajetanus in tertiam partem S. Thomæ ad articulum II. quæst. 68. *Dicendum*, inquit, *sub conditione tamen parvulos in uteris maternis periclitantes posse salvari, sicut dictum est de infantibus, qui non possunt baptizari.* Imò Concilium Tridentinum, teste Palavicino in sua historia, pepercit sententiæ Cajetani, nec voluit audire, qui eam damnandam asserebant ; ergo saltem de fide non est Baptismus esse necessarium necessitate medii.

R. Cum S. Augustino lib. I. de peccat. meritis cap. 23. *Nulla . . . ex nostro arbitrio præter Baptismum Christi, salus æterna promittatur infantibus, quam non promittit Scriptura divina, humanis omnibus ingenis præferenda.*

R. 2. Pium V. jussisse expungi illam sententiam ex commentariis Cajetani, utpotè contrariam doctrinæ Ecclesiæ, quæ nunquam pro infantibus sine Baptismo defunctis oravit ; sed eos ita à communione fidelium exclusit, ut nequidem sepulturam Christianorum ipsis concesserit : idèò autem Concilium Tridentinum Cajetani doctrinam expendere noluit, quia ex eodem Palavicino, ejusmodi materia non pertinebat ad controversias, propter quas sopiendæ Patres convenerant.

R. Denique etiamsi extraordinariè Deus nonnullis infantibus salutem sine Baptismo concesserit, ut referunt quædam historiæ ; proptereaque Theologi in objectione laudati, misericordiam di-

vinam obnoxius implorandam pro p̄r̄vulis in utero periclitantibus suaserint, nihilominus stabit catholica propositio, Baptismum à Christo Domino institutum esse, uti remedium unicum ad peccatum originale delendum, & vitam æternam obtinendam. Sic alimenta simpliciter dicuntur necessaria vitæ animali, quamvis Deus aliquos sine cibo extraordinariè servaverit incolumes.

Q. 2. *Baptismus estne etiam necessarius necessitate præcepti?*

Est adultis necessarius, quia ratio naturalis dicitur consulendum propriæ salutis, & assumenda media, sine quibus obtineri non potest. Hinc graviter peccaret, censereturque sui ipsius homicida, qui omnem cibum rejiceret.

Dixi, *adultis*; Nam parvuli capaces præcepti non sunt, cum non habeant usum propriæ voluntatis. Unde si sine Baptismo decedant, non damnantur tanquam præcepti transgressores, nec præcisè propter omissum Baptismum, sed propter originalem maculam. Et hoc extendendum ad infideles negativos, hoc est, ad illos, qui de Christo Domino & ejus Evangelio nihil quidquam audire potuerunt. Hi quippe pereunt, non quia baptizati non sunt, sed quia in peccatis suis moriuntur.

Q. 3. *Sacramentum Baptismi estne omnibus hominibus necessarium?*

Calvinus lib. 4. Institut. cap. 16. negavit esse necessarium fidelium liberis, atque ad stabiliendum suum errorem abutitur his Scripturæ textibus, Geneseos 17. ubi Deus fœdus statuit cum Abraham his verbis; *Statuam pactum meum inter*
me

me & te, & inter semen tuum post te in generationibus suis fœdere sempiterno, ut sum Deus tuus, & seminis tui post te, Rom. II. vers. 16. Quod si delibatio sancta est, & massa; si radix sancta, & rami, I. ad Cor. 7. vers. 14. Sanctificatus est enim vir infidelis per mulierem fidelem; & sanctificata est mulier infidelis per virum fidelem, alioquin filii vestri immundi essent; nunc autem sancti sunt. Contra hunc errorem

R. Universalis Ecclesiæ constans est doctrina, Sacramentum Baptismi esse omnibus omninò hominibus, etiam fidelium liberis, necessarium.

Probatur 1. ex Scriptura, quæst. 3. Joannis cap. sæpius laudato: *Nisi quis renatus, &c.* Neminem excipit à lege baptismi, ut advertit S. Ambrosius libro 2. de Abraham capite ultimo: *Nulum excipit, inquit, non infantem, non aliqua necessitate præventum.*

Probatur 2. ex Traditione Ecclesiæ, quæ semper asseruit parentes Christianos non posse nisi per baptismum saluti filiorum consulere. Enimverò eos spectant gravia illa monita SS. Patrum prima nostra responsione laudata, Baptismum parvulorum non esse negligendum, reum esse hominis perditionis, qui infantem sine Baptismo decedere permiserit: *Cum Dominus, inquit sanctus Cyprianus Epistola 59. ad Fidum, in Evangelio suo dicat, Filius hominis non venit animas perdere, sed salvare, quantum in nobis est, si fieri potest, nulla anima perdenda est si . . . à Baptismo nemo prohibetur, quanto magis prohibere non debet infans, qui recens natus nil peccavit, nisi quod secundum Adam carnaliter natus, contagium mortis antiquæ prima nativitate contraxit? Certè non intonant ista parentibus infidelibus, qui ritum Baptismi velut superstitionem*

sum contemnunt. Sed clariùs S. Augustinus libro de dono perseverantiæ cap. 12. n. 31. ubi luget miseram sortem parvulorum, qui è vita rapiuntur, dum pii parentes ipsis subvenire festinant : *Quid etiam, ait, quod aliquando parvulis infidelium filiis potuit, ne irent in damnationem, & filiis fidelium non potuit Baptismate subveniri?*

Ad textus à Calvino oppositos respondeo

Ad primum, Deus Genes. 17. solum promittit Abrahæ, quòd posteri ejus futuri sibi sint in populum peculiarem. Quòd autem hæc promissio non pertineat ad ordinem gratiæ, Calvinus advertere debuit multos Abrahæ filios fuisse reprobos, quia, ut observat Apostolus Rom. 9. *Non qui filii carnis, hi filii Dei; sed qui filii sunt promissionis.* De Jacob quippe & Esau antequam nati fuissent, aut quidquam boni aut mali egissent, ut secundum electionem propositum Dei maneret scriptum est : *Quia major serviet minori : . . . Jacob dilexi, Esau autem odio habui.* Denique ex fœdere, quod Deus cum Abrahamo pepigit, omnes ejus posteri, nullo excepto, debebant circumcidi : ergo, cum in nova lege Baptismus succedat circumcisioni, omnes fidelium liberi lege Baptismi astringuntur.

Ad secundum, vult solum Apostolus cit. c. 11. ad Rom. Deum non absolute & in æternum repulisse plebem suam, id est Israelitas, quorum adoptio est filiorum & gloria & testamentum, quorum etiam patres sunt primitiæ, seu delibatio; cum enim Deus benedicere soleat massæ, seu cumulo propter primitias inde sibi oblatas, sperandum est ipsum reliquias Israel collecturum saltem in fine mundi. Legatur caput

put integrum & patebit esse prorsus alienum à proposito.

Ad tertium, ex cap. 7. 1. ad Cor. ductum, Apostolus manifestè non loquitur de sanctitate propriè dicta; nunquid enim maritus infidelis verè sanctus est propter cohabitationem cum uxore fidei? absit: dispositivè ergo sanctus est, quatenus conversatio cum uxore fidei disponit illum ad fidem, sicque fit Candidatus fidei, ut scribit S. Hieronymus lib. 1. cont. Jovinian. Idem quoque de eorum liberis dicendum, non enim desunt exempla parvulorum, *quos*, inquit S. Augustinus, *ad Christianos faciendos voluntas unius parentis evicerat.* Ita quoque hunc locum interpretatur Tertullianus lib. 1. de anima c. 39. ubi vocat filios, quorum, vel unus parens est fidelis, designatos sanctitati & saluti.

Addo hujusmodi infantes dici sanctos sanctitate legali, & exteriori, hoc est, legitimos, non verò spurios. Eo enim loci docet Apostolus matrimonium inter fideles contractum, non evadere illicitum per conversionem unius, puta uxoris, ac proinde illam debere cohabitare cum marito, si ille consentiat; quia si separentur, filii eorum immundi, id est, spurii & illegitimi haberentur; servato autem conjugali vinculo, sancti sunt, id est, mundi, & legitimi reputantur.

CAPUT X.

Utrùm Baptismus sanguinis, & Baptismus flaminis aliquando suppleant Baptismum fluminis?

R. Baptismus tum sanguinis, tum flaminis sup-
plent

plent Baptismum fluminis, sed diverso modo. Tres responsionis sunt partes.

Prima pars, quæ est de Baptismo sanguinis, probatur. Qui sanguinem fundunt Christi causa, vel sunt adulti, vel infantes: atqui sive adulti, sive infantes effusione proprii sanguinis pro Christo gratiam Sacramenti Baptismi consequuntur: Ergo.

Minor quoad adultos probatur ex Scriptura, Matth. 10. vers. 32. *Omnis ergo, qui confitebitur me coram hominibus, confitebor & ego eum coram Patre meo, qui in cælis est: in quem locum sic scribit sanctus Cyprianus, Epist. 73. ad Jubajanum: Nunquid potest vis Baptismi major esse, aut potior quàm confessio, ut qui coram hominibus Christum confiteatur?*

Et sanctus Augustinus lib. 13. de Civit. Dei cap. 7. *Quicumque, inquit . . . non percepto regenerationis lavacro pro Christi confessione moriuntur, tantum eis valet ad dimittenda peccata, quantum si abluerentur sacro fonte Baptismatis. Qui enim dixit: Si quis non renatus fuerit ex aqua & Spiritu Sancto, non intrabit in regnum cælorum, alia sententia istos fecit exceptos, ubi non minus generaliter dixit: Qui me confessus fuerit coram hominibus, confitebor & ego eum coram Patre meo.*

Dices; ex Concilio Tridentino sess. 6. cap. 4. translatio à peccato ad justitiam post Evangelium promulgatum sine lavacro regenerationis, aut ejus voto, fieri non potest: Ergo.

Nego conseq. Nam præterquam quòd Tridentini Patres loquuntur de casibus ordinariis, in Martyrio includitur votum Sacramenti Baptismi, saltem implicitum.

Insta-

Instabis : S. Cyprianus epist. 54. ad Cornelium, sic scribit : *Nec quisquam dicat, qui Martyrium tollit, sanguine suo baptizatur, nec pax illi ab Episcopo necessaria est habituro gloriæ suæ pacem ; & accepturo majorem de Domini dignatione mercedem.* Ergo S. Cyprianus non existimavit Martyrium supplere Baptismum.

Nego conseq. Eo enim loci sanctus Martyr contendit solum armandos esse fideles Sacramentorum perceptione, priusquam ineant periculosum illud certamen : *Ut quos, inquit . . . , hortamur ad prælium, non inermes, & nudos relinquamus . . . Idoneus esse non potest ad martyrium, qui ab Ecclesia non armatur ad prælium, & mens deficit, quam non recepta Eucharistia, erigit, & accendit.*

Eadem Minor quoad infantes probatur exemplo sanctorum Innocentium, quos Ecclesia à primis sæculis veneratur, ut qui fidem non loquendo, sed moriendo confessi sint. Tanta vero est precum Ecclesiasticarum auctoritas, ut legem credendi statuat lex supplicandi, ex S. Prospero in resp. ad cap. Gall. *Horum memoria, inquit Orig. hom. in varia Evangelii loca, semper ut dignum in Ecclesiis celebratur, ut ipsa Bethlehem, in qua natus est Dominus, primitias Martyrum obtulisse videatur.* Et sanctus Augustinus serm. 373. aliàs 66. de diversis, numer. 3. *O parvuli beati, inquit, modò nati . . . nondum luctati, jam coronati : ille de vestra corona dubitaverit in passione pro Christo, qui etiam Baptismum parvulis prodesse non existimat Christi.*

Dices. 1. Innocentes ab Herode occisi, circumcisionis beneficio salvati sunt : ergo illorum exemplum trahi non debet ad infantes, qui,
non

non percepto Baptismo, propter Christum occiduntur.

Nego antecedens: Herodes enim occidit omnes pueros, qui erant in Bethlehem, & in omnibus finibus ejus à bimatu & infra, Matth. 2. ergo non solos circumcisos, sed & eos, qui nondum attigerant octavum diem quo circumcisio celebrabatur. Deinde Ecclesia sollicitè non inquisivit, quinam ex iis circumcisi fuerint, sed omnes indiscriminatim semper coluit ut Martyres propter passionem.

Dices 2. Infans, quem mater gestat in utero, dum illa baptizatur, non censetur baptizatus ex dictis: ergo nec pro Martyre habendus est, si dum torquetur mater pro Christo, ipse in utero ejus prævocetur.

Nego conseq. Disparitas est quòd infans in utero materno inclusus, sit persona à matre distincta, ac proinde de sacro fonte separatim ablunda. Hinc si fœtus prodeat monstrosus, præsumenturque in eo duplex anima propter duplex caput, aut pectus, effundenda est aqua super utrumque caput, aut pectus, dicendo absolutè in prima effusione: *Ego te baptizo*, &c. In altera verò sub conditione: *Si non es baptizatus, ego te baptizo*, &c. At matre propter Christum patiente, infans, quem gestat, vere Christi causa interficitur, nec in materno, sed in proprio sanguine abluitur, & ita Martyr effectus in cœlum avolat.

Secunda pars, quæ est de Baptismo flaminis. Probatur 1. ex Scriptura, quæ salutem promittit Deum invocantibus, & diligentibus, Joelis 2. *Qui invocaverit nomen Domini, salvus erit*, Joann. 14. *qui diligit me, diligitur à Patre*

Patre meo, & ego diligam eum, & manifestabo ei meipsum.

Probatur 2. ex Patribus.

S. Ambrosius in oratione funebri Valentiniani junioris, & adhuc catechumeni, sic loquitur: *Quem in Evangelio generaturus eram, amisi: sed ille non amisit gratiam, quam poposcit quod si Martyres suo abluuntur sanguine, & hunc sua pietas abluit & voluntas.*

S. Augustinus lib. 4. de Baptismo cap. 22. num. 29. *Inventio, inquit, non tantum passionem pro nomine Christi, id, quod ex baptismo deerat, posse supplere: sed etiam fidem, conversionemque cordis, si forte ad celebrandum mysterium Baptismi in angustiis temporum succurri non potest.*

S. Bernardus auctoritate SS. Ambrosii & Augustini fretus, Epist. 77. ad Hugonem Victor. cap. 2. cum quadam acrimonia infectatur anonymum, qui contra communem Catholicorum sententiam assererat neminem posse salvari, nisi Baptismo in re suscepto, vel Martyrio: *Ab his duabus columnis (Augustinum loquor, & Ambrosium) crede mihi, difficile avellor. Cum his, inquam, me aut errare, aut sapere fateor; credens & ipse sola fide hominem posse salvari; cum desiderio percipiendi Sacramentum: si tamen pio adimplendo desiderio mors anticipans, seu alia quaecumque vis invincibilis obviarit: Vide etiam ne fortè ob hoc Salvator cum diceret, qui crediderit, & baptizatus fuerit, salvus erit, cautè & vigilanter non repetierit, qui verò baptizatus non fuerit, sed tantum, qui verò, inquit, non crediderit, condemnabitur: Nimirum innuens solam interdum fidem sufficere ad salutem, & sine ipsa sufficere nihil. Quapropter & si Martyrium vicem Baptismi posse*

implere conceditur, non planè hoc facit pœna, sed ipsa fides. Nam absque ipsa quid est martyrium, nisi pœna? Qua ergo martyrio præstat, ut absque ulla dubietate pro Baptismate reputetur, ipsa ita infirma & imbecillis per se erit, ut quod dare alteri valet, sola obtinere non valeat?

Dices: ex S. Ambrosio lib. de initiandis c. 4. *Credit catechumenus, sed nisi baptizetur, remissionem peccatorum non potest obtinere.* Et ex S. Augustino tract. 13. in Joann. *quantumcunque . . . catechumenus proficiat, adhuc sarcinam iniquitatis suæ portat, nisi cum venerit ad Baptismum.* Similia habet sanctus Fulgentius libro de fide ad Petrum cap. 3. Gennadius quoque libro de Ecclesiasticis dogmatibus cap. 74. sic scribit: *Nullum Catechumenum, quamvis in bonis operibus defunctum, vitam æternam habere credimus, excepto martyrio.* Denique Concilium Braccarense primum sic decernit can. 35. *Catechumenis sine Redemptione Baptismi defunctis nec oblationis sanctæ commemoratio, nec psallendi impendatur officium.* Ergo baptismus fluminis, seu votum & desiderium percipiendi Sacramenti, non supplet baptismum fluminis.

Distinguo anteced. Nisi baptizetur vel actu, vel in voto, Conc. Nisi baptizetur actu, subdistinguo, si votum baptismi non excludat voluntatem peccandi, nec sit charitate perfectum, Conc. Si votum excludat voluntatem peccandi, & charitate sit perfectum, Nego anteced. Sic generatim dicimus lapsos post baptismum portare sarcinam peccatorum, donec ea deposuerint beneficio clavium Ecclesiæ, quamvis ex eis aliqui bonis operibus sese disponant; quia rarò perfecta contritio Sacramentum præcedit. Quantò autem

autem verius id dicitur de iis, qui cum proposito confitendi differunt de die in diem, alii ad annum, alii usque ad vitæ extremum, interimque propriis cupiditatibus indulgent? atqui Catechumenorum causa prorsus erat similis; exceptis enim iis, revera respectu aliorum paucissimis, qui ad gratiam regenerationis parabantur eo quo infra dicemus modo; cæteri baptismum differebant ad multos annos, aliquando usque ad ultimam ægri- tudinem, adeò ut si spes recuperandæ valetudi- nis affulgeret, nequidem in morbo abluerentur, quasi per baptismum tempus peccandi amittere- tur. *Sonat undique in artibus nostris*, inquit S. Augustinus lib. 1. Confess. cap. 11. *sine illum fa- ciat quod vult, nondum enim baptizatus est: & ta- men in salute corporis non dicimus, sine vulneretur amplius, nondum enim sanatus est.* Contra ejusmo- di procrastinationes SS. Patres frequenter inve- huntur; quin Ecclesia à sacris Ordinibus arce- bat, qui à nomine Græco dicebantur clinici, id est, abluti dum in lectulo periculose decumbe- rent, & laudatum Concilium Braccarense, ut tan- to malo efficax remedium afferret, terreretque procrastinantes Catechumenos, prohibuit ne pro iis, si in catechumenatu decederent, sacrifici- um offerretur, quemadmodum Ecclesia etiam nunc Ecclesiastica sepultura privandos decernit, qui in Paschate Eucharistiam percipere neglexe- rint. Sed severior illa Concilii Braccarensis di- sciplina non fuit in Ecclesia universali, ut constat tum ex S. Ambrosio supra laudato, tum ex Con- cilio Toletano undecimo, quod ejusmodi severi- tatem corrigit.

Tertia responsionis pars, nempe baptismum

fluminis & Baptismum sanguinis non eodem modo supplere baptismum fluminis, probatur; quia votum seu desiderium Baptismi 1. non extenditur ad parvulos, cum non habeant usum liberi arbitrii, nec capaces sint ullius actus. 2. non supplet in adultis, nisi sit charitate perfectum. 3. etiam si sit charitate perfectum, non tollit, nisi extraordinariè, omnem reatum pœnæ temporalis, quemadmodum baptismus in re susceptus. Contra verò Martyrium supplet etiam in parvulis, tollit ex opere operato in adultis omnem reatum sive culpæ, sive pœnæ temporalis: vincentesque statim coronat. Unde S. Augustinus Serm. 159. aliàs 17. de verbis Apostoli, *injuria est*, inquit *pro Martyre orare, cujus nos debemus orationibus commendari.* Et cit. lib. 13. de Civit. Dei cap. 7. Martyrium præfert baptismo fluminis, *quid enim pretiosius, quàm mors, per quam fit ut & delicta omnia dimittantur, & merita cumulatius augeantur? neque enim tanti sunt meriti, qui cum mortem differre non possent, baptizati sunt, deletisque omnibus peccatis, ex hac vita emigrarunt, quanti sunt hi, qui mortem, cum possent, idèd non distulerunt, quia maluerunt Christum confitendo finire banc vitam, quàm eum negando ad ejus Baptismum pervenire.*

CAPUT XI.

De effectibus Baptismi.

Pseudo-Reformati plures effectus Sacramento Baptismi affingunt.

I. In-

1. Inquiunt, Baptismus reddit impeccabilem, dicitur enim 1. Joan. 3. *Omnis qui natus est ex Deo peccatum non facit, quoniam semen ipsius in eo manet.*

2. Liberat à lege tum divina, lex quippe *justo non est posita*, 1. Timoth. 1. tum humana, *nolite fieri servi hominum*, inquit Apostolus 1. Corinth. cap. 7. Unde Lutherus in cap. 2. Epistolæ ad Galatas, *si conscientia dicat, peccasti, responde, peccavi: Ergo Deus puniet, & damnabit: non. At lex Dei hoc dicit: Sed nihil mihi cum lege. Quare? quia habeo libertatem.* Et lib. de libertate Christiana, *nulla lege Christiano homini opus est, cum per fidem liber sit ab omni lege.*

3. Omnia vota baptismus irritat: quia, inquiunt, in Baptismo plus vovemus, quam implere possimus. Stultus ergo est, qui aliquid baptismo superaddit, imò Sacramentum injuria afficit, quasi esset insufficiens.

4. Quæcumque peccata post baptismum commissa remittuntur memoria pacti cum Deo in baptismo initi. Unde admodum ipsis displicet pœnitentiam vocari à Patribus secundam post naufragium tabulam; quia baptismus semper manet integer, nec promissiones Dei in eo obsignatæ evacuari possunt.

Has impietates & deliria alibi confutamus.

Primam, Tractatu de Gratia, ubi probamus amitti posse gratiam sanctificantem. Secundam Tractatu de Legibus, ubi de Lege Divina, & humana. Tertiam, Tractatu de Religione, ubi de Voto. Quartam, Tractatu de Pœnitentia; ubi asseritur esse Sacramentum à baptismo distinctum.

Qui sunt igitur veri effectus Baptismatis?

R. S. Chrysostomus homil ad Neophytos duodecim recenset, his verbis: *Ecce libertatis serenitate*

perfruiuntur, qui tenebantur paulò ante captivi; & ci-
 ves Ecclesiæ sunt, qui fuerant in peregrinationis errore:
 & iustitiæ in sorte vocantur, qui fuerant in confusione
 peccati. Non enim tantum sunt liberi, sed sancti: non
 tantum sancti, sed & iusti: non solum iusti, sed & filii:
 non solum filii, sed & hæredes: non solum hæredes, sed
 & fratres Christi: nec tantum fratres Christi, sed &
 cohæredes: non solum cohæredes, sed & membra; non
 tantum membra, sed & templum: non tantum templum,
 sed & organa spiritus. Vides quot sunt baptizatis
 largitates: nonnulli deputant cælestem gratiam in pec-
 catorum tantum remissione consistere: nos autem honore
 computavimus duodecim.

1. Itaque baptismus munda ab omni macula
 peccati tum originalis, tum actualis juxta illud
 Apostoli Rom. 8. Nihil ergo nunc damnationis est iis,
 qui sunt in Christo Jesu. Hinc Sanctus Hierony-
 mus epistola 83. ad Oceanum, omnia, inquit, in
 Baptismate condonata sunt crimina, nec post indulgen-
 tiam Judicis est metuenda severitas, dicente Apostolo,
 & hæc quidam fuistis, sed abluti estis. Mirabile
 quidem est in oculis nostris, sed credibile facit
 nimis meritum Sanguinis Christi Domini, qui
 oblatu est ad multorum exhaurienda peccata, Hebr.
 9. quique seipsum tradidit pro ea (Ecclesia) ut il-
 lam sanctificaret, mundans lavacro aquæ in verbo vitæ,
 ut exhiberet ipse sibi gloriosam Ecclesiam, non habentem
 maculam, aut rugam, Ephes. 5.

2. Baptismus delet omnem reatum pænæ, ita
 ut ex Concilio Tridentino sessione 5. de peccato
 originali, nihil prorsus eos, (baptizatos) ab ingres-
 su cæli remoretur. Et Eugenius IV. in suo Decre-
 to pro Armenis, baptizatis, inquit, nulla pro pec-
 catis præteritis injungenda est satisfactio; sed morientes
 ante-

antequam culpam aliquam committant, statim ad regna cœlorum, & Dei visionem perveniunt.

Probatur autem ex constanti Ecclesiæ Traditione, quæ Scripturæ textus mox laudatos ad remissionem pœnæ temporalis semper extendit, nullumque pœnale opus Neophytis injunxit. *Nec post indulgentiam*, inquebat supra Sanctus Hieronymus, *judicis est metuenda severitas.* Et Sanctus Augustinus Enchir. cap. 64. *Hac ergo magna indulgentia incipit hominis renovatio, in qua solvitur omnis reatus, & ingeneratus, & additus;* Et lib. 6. contra Julianum cap. 16. *Omni peccato caret, non omni malo, quod planius ita dicitur, omni reatu omnium malorum caret, non omnibus malis;* quia scilicet homo per baptismum non restituitur integritati status innocentiae, quæ præter gratiam sanctificantem complectebatur perfectam subordinationem partis inferioris cum superiore, immortalitatem in corpore, & immunitatem à quacumque miseria; initiatus enim quacumque gratia sanctificante ornatus, patitur membrorum inobedientiam, & corporis misérias. Sed ejusmodi mala non sunt in illo pœna propriè dicta: quia *caret reatu omnium malorum*, nec remanent ad peccati vindictam, sed ad virtutis exercitium, ut docet Concilium Tridentinum sess. 5. can. 5.

Advertes tamen adultum non solvi per baptismum ab omni reatu pœnæ temporalis, nisi fuerit ad id sufficienter dispositus; qui enim abluitur cum affectu ad aliquod peccatum etiam levissimum, donec eum pœnituerit, manet ligatus reatu illius culpæ, ac consequenter reatu pœnæ. Quapropter Ecclesia Catechumenos non

statim generabat, sed diuturnis pœnitentiæ, & aliarum virtutum exercitationibus ad gratiam præparabat, ut infra dicetur. Nec Apostolos, qui nulla interposita mora credentes statim baptizabant, in exemplum trahere licet; stupenda enim credentium mutatio, quæ describitur Act. 4. numeranda est inter miracula, quibus formabatur Ecclesia. Sed postquam desierunt illa signa, utpote Religioni jam stabilitæ minùs necessaria, oportuit sequi consuetum gratiæ operandi modum, quæ nonnisi paulatim, & vigilantibus Pastorum disciplina opus suum perficit.

3. Per baptismum infunditur gratia sanctificans, 1. Cor. 6. *Sed abluti estis, sed sanctificati estis, sed iustificati estis in nomine Domini nostri Jesu Christi & in Spiritu Dei nostri.* Unde S. Augustinus lib. 1. de peccatorum meritis cap. 9. ait: *Præter quod se ad iustitiam exemplum imitantibus præbuit (Christus) dat etiam sui Spiritus occultissimam gratiam, quam latenter infundit & parvulis, sic & ille, in quo omnes moriuntur, præter quod eis, qui præceptum Domini voluntate transgrediuntur, imitationis exemplum est, occulta etiam tabe carnalis concupiscentiæ suæ tabificavit in se omnes ex sua stirpe venientes.* Ex quibus Concilium Tridentinum sess. 6. cap. 7. merito sic concludit contra Pseudo-Reformatos: *Iustificatio non est sola peccatorum remissio, sed & sanctificatio, & renovatio interioris hominis dum per Spiritum Sanctum charitas Dei diffunditur in cordibus eorum, qui iustificantur, atque ipsi inhæret.*

Quàm autem magnum, quamque pretiosum sit illud gratiæ sanctificantis bonum, quomodo animam immutet ac renovet, efficiatque confor-

tem

tem naturæ divinæ, ut loquitur Apostolorum Princeps, constituens illam in esse divino supra omne creatum & creabile: consule quæ latè tradidimus Tractatu de Gratia, à pagina 379. ad paginam 418. ubi expendimus quid nomine doni supernaturalis intelligi debeat; hæc enim omnia huc revocanda sunt, ut habeatur notitia hujusce effectus baptismalis.

Cùm autem operari sequatur esse, simul cum gratia sanctificante infunduntur virtutes & Spiritus Sancti dona, veluti quædam ejus appendices, & facultates supernaturales ac divinæ, quibus baptizatus sit expeditior ad omnia pietatis officia, etiam ad illa, quæ, ut heroica, communem agendi modum superant, ut fusè prosecuti sumus loco cit. pag. 370. & seq.

4. Baptismus veram tribuit justitiam, redditque initiatum perfectè justum, *sed justificati estis*, ait Apostolus supra laudatus; justus enim dicitur, qui omnium virtutum habitibus est instructus, quique dispositus est ad implendam omnem justitiam: atqui baptizatus ex mox dictis ita instructus est & affectus: ergo verè est justus.

5. Baptismus Deo gratum reddit baptizatum; quomodo enim Deus non diligeret quem efficit S. Justum, & in omnibus conformem suæ voluntati? Similitudo enim est amoris causa: *Ego*, inquit Prov. 8. *diligentes me diligo*.

6. Baptismus filios Dei parit, *non ex sanguinibus, neque ex voluntate carnis, neque ex voluntate viri, sed ex Deo*, ut habetur Joann. 1. Quemadmodum autem quod natum est ex carne, caro est, ita quod natum est ex Spiritu, Spiritus est, Joann. 3.

Nascuntur ergo fideles filii Dei ex aqua & Spiritu Sancto, Christo teste, laudato cap. 3. Joan. in quem locum S. Chrysost. homil. 25. in Joannem sic scribit: *Non amplius mater carnalis, non concubitus, & amplexus, novum jam naturæ nostræ interitur opificium à Spiritu Sancto & aqua, quod enim matrix est embrioni, hoc aqua fideli.* Deus itaque consulit fonti quod dedit matri: quam comparationem SS. Patribus familiarem egregiè prosequitur S. August. vel quivis auctor Serm. 36. de tempore, nunc in Appendice 135. *Penè majori munere, inquit, quàm Maria, unda ditata est. Illa enim sibi tantum meruit castitatem, ista nobis contulit sanctificationem: illa meruit ne peccaret; ista ut peccata purgaret. . . . illi est collata virginitas, isti donata fecunditas: illa unum procreavit, & virgo est; ista generat plures, & pura est.* Maria quærens quomodo Deo consecrata Filium pareret audivit, *Spiritus Sanctus superveniet in te. ideoque & quod nascetur ex te sanctum, vocabitur Filius Dei.* Ipse idem quoque Spiritus Sanctus, qui in utero virgineo adfuit, in fontem descendens aquam fecundat, ut quod ex ea nascitur, sanctum sit, & Filius Dei vocetur; Filius, inquam, non quidem natura, sed gratia. *Ea gratia fit ab initio. homo quicumque Christianus, qua gratia homo ille ab initio. . . . factus est Christus, de ipso Spiritu & hic renatus, de quo est ille natus,* ait S. Augustinus lib. de prædestinatione Sanctorum cap. 15.

Fiunt itaque filii Dei in baptismo, non per deputationem externam & moralem, ut fit in adoptione humana; sed per communicationem ejusdem Spiritus: *quoniam autem estis filii, inquit Apostolus Galat. c. 4. misit Deus Spiritum Filii sui in*
corda

corda vestra. Et Rom. 8. accepistis Spiritum adoptionis filiorum; in quo clamamus, Abba; (Pater,) ipse enim Spiritus testimonium reddit spiritui nostro quod sumus filii Dei; nimirum ex indita quadam propensione & fiducia in Deum, qualem communio ejusdem carnis & sanguinis efficit inter filium & patrem; propter quam vulgò apud nos dicitur le sang ne peut mentir. In eo igitur differt spiritualis hæc regeneratio à carnali generatione, quòd in ista parentes sanguinem suum filiis communicant, non spiritum, nec egregias animi dotes, puta sapientiam, fortitudinem, justitiam, &c. Unde quod ex eis nascitur; caro est & sanguis, licèt aliquando Regum, vel Heroum serie illustris: in spirituali verò regeneratione Deus, qui Spiritus est, filiis suis adoptivis proprium tribuit Spiritum, qui est sapientia, justitia & omnis virtus; quicunque enim Spiritu Dei aguntur ii sunt filii Dei, ait Apostolus Rom. 8. & rursus ibid. Si quis autem Spiritum Christi non habet, hic non est ejus.

Hanc Dei magnificentiam, & ineffabilem domini amplitudinem miratus S. Joannes, scribit epist. I. cap. 3. *Videte qualem charitatem dedit nobis Pater, ut filii Dei nominemur, & simus.* Parum videbatur dicere, quòd *filii Dei nominemur*, nisi addidisset quòd reverà *simus*, scilicet ex participatione ejusdem cum eo Spiritus. Unde Sanctus Gregorius Nyssenus orat. catech. sic concludit: *Quod nascitur, est necessario ejusdem generis, cujus natura est eorum, qui generant, qui ex homine nascitur in vitam instabilem: qui ex Deo, in vitam immutabilem, & inalterabilem.* Si ergo ex Deo natus es, ostende inte eum qui te genuit, per illa ex quibus Deum cognoscimus, oportet

oportet ostendere cum Deo conjunctionem, aliàs tibi dicet Propheta, & tu fili hominis, non fili Dei.

7. Baptismus hæredes Dei constituit, *si autem filii*, inquit Apostolus Rom. 8. *& hæredes.* Atque ut amplitudinem hæreditatis perpendamus, subdit, *hæredes quidem Dei*, cujus immensæ sunt opes, gloria, & potestas. Quid ergo aliud prætereà ambire poterit, qui non solum præsumitur, sed etiam declaratur Dei hæres? Ad fovendam autem hanc baptizati fiduciam, in baptismo Chrsti, qui nostri fuit prænuntius, cœli aperti sunt, *ut discas*, ait S. Chrysost. hom. 12. in Matth. *etiam tu, cum baptizaris, hoc fieri, Deo te jam ad patriam cœlestem vocante, nihilque commune cum terra habere suadente.*

8. Per baptismum non solum hæredes, sed & cohæredes Christi efficimur; qui enim, Rom. 8. dixerat, *hæredes quidem Dei*, statim addit, *cohæredes autem Christi.* Non sic Abraham erga Isaac & Ismaelem proprios filios naturales & legitimos; posteriori enim quædam dona contulit, ne divideret hæreditatem cum priori. Deus verò filiis adoptivis cum suo unigenito secundum naturam servat eandem hæreditatem. Mirum quidem, sed est quod fortè mireris amplius, nimirum ipse unigenitus hanc gloriam nobis non solum non invidet, sed eam nobis promeruit, & obnixè postulavit; *Volo*, inquit Joan. 17. v. 24. & 26. *ut ubi sum ego, & illi sint mecum . . . ut dilectio, qua dilexisti me, in ipsis sit, & ego in ipsis.* Propter quam causam, ait Apostolus Hebr. 2. *non confunditur frater eos vocare dicens, nuntiabo nomen tuum fratribus meis.*

9. Baptismus Christo nos conjungit, compingitque

gitque tanquam membra capiti; *quicumque enim in Christo baptizati estis*, Gal. 3. v. 27. *Christum induistis*. Et vers. 28. *omnes enim vos unum estis in Christo Jesu*, hoc est secundum interpretationem Sancti Chrysostomi in hunc locum, *eandem formam, eandem figuram habetis omnes, in illum per similitudinem transformati*, adeo ut baptizatus jam non ipse, sed Christus in illo vivat, juxta Apostolum Galat. 2. ipse Christus cernatur in vultu, gestu, & toto habitu baptizati. Ex quibus idem Apostolus colligit horrendum esse, si baptizatus indignè contrectet membra sua, utpote quæ sint membra Christi. *Nescitis*, inquit, 1. Cor. 6. *quoniam corpora vestra membra sunt Christi? tollens ergo membra Christi, faciam membra meretricis? absit*, scilicet tantum scelus, vel etiam cogitare, nedum committere.

10. In baptismo Fidelis consecratur templum Spiritus Sancti, juxta illud 1. Cor. 3. *Nescitis quia templum Dei estis, & Spiritus Dei habitat in vobis?* Hinc Ecclesia easdem cæremonias in consecratione Catechumeni observat, quas in dedicatione Templi materialis: purgatur ille exorcismis, multis precibus Deo dicatur, signo Sanctæ Crucis in pluribus corporis partibus signatur tanquam res cultui divino dicata, oleo Sancto perungitur, ut innotescat ipsum esse ab omnibus usibus profanis separatum, quemadmodum monet Apostolus cit. c. 3. *Si quis templum Dei violaverit, disperdet illum Deus, templum enim Dei sanctum est, quod estis vos*. Et cap. 6. *an nescitis quoniam membra vestra templum sunt Spiritus Sancti, qui in nobis est, quem habetis à Deo, & non estis vestri? nempe ut pro libitu utamini mente vestra, oculis, lingua,*

gua, &c. sed pro Dei beneplacito, & ad ejus gloriam.

11. Non solum per baptismum efficimur templa; sed & organa Spiritus Sancti; non enim Spiritus Sanctus habitat in baptizato, sicut dominus in domo sua, sed sicut anima in proprio corpore, quod vivificat, & agit; quicumque enim Spiritu Dei aguntur, ii sunt filii Dei, Rom. 8. Et rursum, *in quo (Spiritu) clamamus, Abba (Pater).* Et iterum, *ipse Spiritus postulat pro nobis gemitibus inenarrabilibus.* Hinc nascitur meritum & valor actionum baptizati.

12. Baptismus non tantum delet peccata præterita, sed efficit ut caveantur futura; dicitur enim 1. Joan. 3. *Qui natus est ex Deo, peccatum non facit, quoniam semen ipsius in eo manet.*

Enimverò quemadmodum parentes carnales subministrant filiis, quæ respondeant generis nobilitati & splendori: similiter Deus intuitu gratiæ adoptionis renatos auxiliis necessariis adjuvat, ut vitam, quæ filios Dei & regni ejus hæredes decet, instituunt.

Quidni dixerimus alia Sacramenta esse veluti quasdam baptismi appendices, cum ad illa Fideles per baptismum jus accipiant tanquam ad paterna bona? Ad quid enim Confirmatio, nisi ut modò geniti in Christo infantes crescant in salutem, roborenturque contra mundi errores, delectationes, ac terrores? Cur Eucharistia, nisi ut sit panis filiorum, cibus electus, regalis & divinus, quo Deo saginantur, Sapientia æterna parvulis lactescente, ut loquitur S. Augustinus donec grandiores effecti ad mensam Patris cum Angelis affideant?

Chara-

Character est alter Baptismi effectus, de quo plura diximus Tract. de Sacramentis in genere cap. 19. pag. 130. Duo tantum characteris baptismalis propria addenda sunt. 1. Character baptismalis non solum distinguit, sed etiam ornat & illustrat baptizatum. Est enim insigne quoddam eximiæ dignitatis, quam per Baptismum consecutus est, ut observat S. Chrysostomus hom. 2. in epist. ad Ephesios, ubi expendens illa Apostoli verba, *in quo signati estis Spiritu promissionis sancto*, sic scribit: *non jam dicit, quod à cæteris sepositi sint tantum, aut delecti, sed quia etiam signati, quemadmodum si quis eos, quos sortitò sibi comparavit, velit aliqua familiari nota notiores reddere.* Signati sunt etiam Israëlita, sed corporali circumcisionis nota, pecora & bruta: nos signati sumus ut filii, scilicet Spiritu Sancto nobis ante promisso. 2. Character baptismalis est potentia veluti passiva recipiendi Sacramenta, non ex Ecclesiæ disciplina, ut vult Maldonatus qu. de Extrema unctione, reclamantibus omnibus Theologis, sed ex divina institutione, probaturque ex cap. *Si quis*, de Presbytero non baptizato: in quo decernit Summus Pontifex illum primò baptizandum, deinde reordinandum.

Hic autem meminisse debent Pastores Deum ipsis veluti Pædagogis filios suos, tot ac tantis donis ornatos atque ideò sibi charissimos tradidisse instituendos. Ut ergo injunctum officium perhonorificum quidem, sed maximè arduum, possint implere, frequenter moneant Fideles, eos in baptismo hominem exuisse, habendosque ut degeneres, si nihil supra hominem sapiant; sic enim quibusdam exprobrat Apostolus 1. Cor. 3.

Non-

Nonne, inquit, carnales estis, & secundum hominem ambulatis? Non cessent ingerere divinæ regenerationis splendorem, & Christiani nominis claritatem; sicut enim nihil ad dicendum copiosius & sublimius, ita nec ad incitandos animos efficacius, ut S. August. lib. 3. de Civitate Dei c. 4. observat ex Varrone inter Paganos doctissimo, de quo sic scribit: utile esse civitatibus dicit (Varro) ut se viri fortes, etiamsi falsum sit, Diis genitos esse credant; ut eo modo animus humanus velut divinæ stirpis fiduciam gerens, res magnas aggrediendas præsumat audacius, agat vehementius, & ob hoc impleat ipsa securitate felicius.

Porro si fabulæ & mendacia aptè ad decipiendum composita, id apud Ethnicos poterant, quid ipsa veritas apud Christianos possit olim experta est Ecclesia, cum ejus SS. Pastores ea, qua par est dignitate, animi fortitudine, & instantia in sermonibus ad populum exponerent baptismi, & aliorum Sacramentorum stupendas virtutes; his enim veluti stimulis incitati fideles, quæcunque in Evangelio, & Apostolorum scriptis sublimiora & perfectiora leguntur, ea in moribus exprimere satagebant. Unde ergo nunc mutatus est color optimus, ut verbis prophetis loquar, nomenque Christianum ita sordescit, nisi quia silentibus Pastoribus fideles nesciunt Sacramenta Dei, nec judicant honorem animarum sanctarum, ut dicitur Sap. 2. In concionibus, quæ magno habentur apparatu, nihil ex professo de sanctitate & efficacia baptismi, nihil de obligationibus initiatorum; totam vim dicendi explicant Ministri Verbi Dei contra transgressionem legis naturalis, quasi Templum nostrum Philosophorum Scholæ evase-

evaferint, & quidquid interferunt de Evangelii perfectione (quæ est filiis Dei, hæredibus regni cœlestis, membris Christi, & organis Spiritus Sancti consentanea morum regula) non sustinent auditores se inde urgeri, ut qui solum meminerint se esse filios Adæ, vulneratos infirmos, qui nedum Evangelii perfectionem ferant, quin ipsam etiam legem naturalem primitus datam homini sano, & viribus integro, nunc ex parte infirmis levandam, vel saltem attemperandam contendunt.

Neque vero credendum est tanto malo catecheses languenti & incomposito stylo, & ad onerandam puerorum memoriam apto, obsistere posse; iis enim grandiores interesse detrectant; tum quia nihil ibi dicitur, quod delectet, aut afficiat voluntatem: tum quia nihil audiunt, nisi quod pueri jam didicerant, adeo ut pudeat eos ad scholam infantium amandari. Ut ergo tandem reflorescat Christiana Religio, inhærendum est vestigiis priscorum Ecclesiæ Pastorum, Cyrilli Jerosolymitani, Gregorii Nazianzeni & Nysseni, Ambrosii, Augustini, & aliorum, qui eloquentiæ suæ vires exerebant, ut fideles præ oculis semper haberent, quanta Deus per Baptismum, & alia Sacramenta largiatur, quo animo ad ea accedendum, quidve pro tot beneficiis acceptis rependendum.

De primo jam dictum est fortè plusquam brevis proposita patiebatur: nunc superest, ut de duobus aliis differamus.

CAPUT XII.

De dispositionibus ad Baptismum requisitis.

Diximus Tractatu præcedenti nullam in parvulis requiri dispositionem, eosque regenerari in fide Matris Ecclesiæ, quemadmodum per voluntatem primi parentis peccatores constituti sunt.

Cum autem à pluribus sæculis vix aliquando contingat adultos baptizari, superfluum videtur quidquam addere iis, quæ de dispositionibus ad justificationem tradimus Tract. de Gratia pag. 357. Sed abs re non fuerit paucis exponere quomodo antiquitus Catechumeni ad Baptismum præparentur; inde enim colligimus, quæ sinceræ conversionis signa, quæ morum probatio, quæve pœnitentia Baptismum adutorum præcedere debeant.

Catechumeni in tres dividebantur classes. In prima dicebantur Audientes, in secunda, Competentes, in tertia, Electi.

De prima classe, quæ est Audientium.

Infidelis Religionem Christianam profiteri cupiens, virum probatæ fidei & pietatis adibat, qui illum Episcopo offerret, ac pro eo sponderet. Episcopus autem paucis exposita Christianæ legis perfectione, quærebat num hanc vivendi normam amplecti vellet? & ubi responderat, ille id se in animo habere, Episcopus capiti ejus manum imponebat. Tum Catechumenus, dato nomine, intererat Conventibus Ecclesiasticis ad audien-

audiendum verbum Dei; sed concione peracta, expellebatur per hanc Diaconi vocem, *Catechumeni discedite*. Hinc vulgaris distinctio Missæ in duas partes; prima dicebatur Missa Catechumenorum, ab introitu scilicet usque ad offertorium exclusivè: altera Fidelium, ab offertorio ad finem.

Quæ autem per illud tempus esset Audientium vivendi ratio, colligitur 1. ex canon. 85. Concilii IV. Carthaginensis, qui sic habet: *Baptizandi nomen suum dent, at diu sub abstinentia vini & carni, & manuum impositione, crebra examinatione Baptismum percipiant*. Ex S. August. lib. de fide & operibus cap. 6. *Videamus, inquit . . . utrum ad percipiendum Baptismum sic admittendi sunt homines, ut nulla ibi vigilet diligentia . . . quò sine dubio admitterentur, si per ipsos dies, quibus eandem gratiam percepturi, suis nominibus datis, abstinentia, jejuniis, exorcismisque purgantur, cum suis legitimis & veris uxoribus se concubituros profiterentur*. Unde Tertullianus lib. de præscr. cap. 41. invehitur in Hæreticos, qui sine probatione & delectu baptizabant quicumque eorum doctrinam amplecterentur. *Non omittam, inquit, ipsius etiam conversationis hæreticæ descriptionem quàm futilis, quàm terrena, quàm humani sit Imprimis quis Catechumenus, quis Fidelis incertum est, pariter adeunt, pariter audiunt, pariter orant*.

Quod Tertullianus carpit in apertis manifestisque Hæreticis, illud ipsum Sanctus Augustinus postmodum reprehendere coactus est lib. de fide & operibus, in quibusdam Catholicis, qui solam fidem ad Baptismum sufficere contendebant, & per sagemam, de qua Christus Matth. 13. vers. 47. intelligebant lavacrum regenerationis, quo Ecclesia colligit bonos & malos; *ut videlicet,*

inquit cit. cap. 6. *perversitate mirabili prius eis dicitur, induite hominem novum, & cum induti fuerint, postea dicatur; exuite veterem; cum contra scriptum sit Jeremiæ 4. v. 3. novate vobis novale, & nolite serere super spinas, id est, interprete S. Hieronymo, agrum cordis vestri scelerum spinis horrentem per seriam pœnitentiam prius expurgate, ut semina gratiæ & justitiæ recipere possitis.*

In hac statione Audientes detractis calceis, & versi ad Occidentem, qui locus est tenebrarum, in quibus robur diaboli consistit, inquit S. Cyrillus Jerosolymitanus Catech. 1. renuntiabant Satanæ exsufflantes, & manus extendentes, quasi eum repellerent. Peractis renuntiationibus, Catechumeni induebantur pallio, quod abjectionem & humilitatem prætendebat, sicut toga splendorem & nobilitatem. Hinc Gentiles convitii loco Christianis recens factis exprobrare solebant, *à toga ad Pallium*, ut refert Tertullianus lib. de Pallio c. 5.

Deinde Catechumeni ad Orientem conversi, fidem profitebantur, ex S. Cyrillo Alexandrino lib. 7. contra Julianum: *ubi deposuerimus tenebras, inquit, & dæmoniorum turbis valedixerimus, omnemque ipsorum pompam & cultum prudentissimè respuerimus, confitemur fidem in Patrem, & Filium, & Spiritum Sanctum.* Similia habet Sanctus Hieronymus in cap. 6. Amos. *Versi ad Orientem, inquit, pactum inimus cum Sole justitiæ, & ei nos servituros esse promittimus.* Et Sanctus Cyrillus Jerosolymitanus Catech. 1. *Cum satanæ renuntiaveris, aperitur tibi Paradisus Dei, quem ipse ad Orientem plantavit.* Fidei professio juramento confirmabatur ex Sancto Hilario can. 15. in Matth. & in tabulis describebatur,

Post

Post fidei professionem Presbyteri Audientium nares, aures, & linguam saliva tangebant, ex S. Ambrosio lib. de initiandis, & S. August. tract. 44. in Joan. idque exemplo Christi Domini Marc. 7. demonstrantis Sacerdotibus ordinatissimum baptizandi officium, inquit Haymo hom. in Evang. Dom. 13.

Dehinc exorcizabantur secundum antiquum & universalem Ecclesiæ morem, ab Apostolis venientem, ex S. Augustino epist. 105. Exorcismus autem peragebatur impositione manus, & exsufflatione in faciem Catechumeni, ut legitur in Sacramentario S. Gregorii: tum inungebantur toto corpore, ex lib. de Eccl. Hierar. sub nomine S. Dionysii, & ex Sancto Cyrillo Jerof. Catech. 2. Signabantur etiam in fronte, pectore, oculis, auribus, naribus, & ore signo Crucis, cujus virtute victus est diabolus, & exaltatus Christus; verba sunt Ivonis Carnotensis ser. ad baptizandos. Denique sal in os mittebatur, ex S. Ambrosio in c. 22. S. Lucæ & ex S. Augustino lib. 1. Confessionum, & fufis precibus referabantur Ecclesiæ fores.

De secunda classe, quæ est competentium.

Competentes ex Sancto Augustino dicuntur simul petentes Baptismum. Humi autem prostratos hanc gratiam efflagitasse scribit S. Gregorius Turonensis lib. 5. Histor. c. 7. & in hujusce rei signum in Ecclesia Mediolanensi infans humi propè fontem collocatur.

In hac classe duris pœnitentiæ laboribus subiciebantur Catechumeni: *Ingressuros Baptismum,*

inquit Tertullianus lib. de Baptismo cap. 19. *orationibus crebris, jejuniis, & geniculationibus, & per-
vigiliis crare oportet, & cum confessione omnium retro
delictorum.* Item Sanctus Gregorius Nazianzenus
orat. 40. *Bona auxilia erant jejunia, humi dormita-
tiones, orationes, lacrymæ, arumnae, indigentium opitu-
latio, &c.* Denique Sanctus Cyrillus Jerosoly-
mitanus catech. 3. ait: *Quilibet serpens in angustum
intrans, deponit senectutem & vetustatem per coarctatio-
nem exuit, corporeque denuo toto renovatur: sic & tu
intra per angustam portam & arctam, affligens te per je-
junium.* Quodd autem initiandi confiterentur pec-
cata, præter Tertullianum jam laudatum, testes
sunt Sanctus Cyrillus Jerosolymitanus catech. 1.
& Sanctus Gregorius Nazianzenus orat. 40. jam
laudata, ubi hæc habet: *Nec peccatum tuum confiteri
grave ducas sciens quo pacto Joannes baptizaverit (nem-
pe confitentes peccata) ut per hujus vitæ pudorem,
futuri sæculi pudorem ignominiamque fugias.*

Symbolum Competentibus tradebatur recitan-
tandum, deinde & Oratio Dominica, ex Sancto
Augustino ser. 58. aliàs hom. 42. ubi sic alloqui-
tur Competentes, *Symbolum reddidistis, quo breviter
comprehensa fides.* Jam ut antea dixi vobis, quod ait
Apostolus: *Quomodo invocabunt, in quem non
crediderunt? Quia ergo quomodo credatur in Deum,
& accepistis, & tenuistis, & credidistis; accipite hodie
quomodo invocatur Deus. Ipse filius, sicut audistis,
cum Evangelium legeretur, docuit Discipulos suos &
fideles suos hanc orationem.* Spem habemus obtinendæ
causæ nostræ, quando talis jurisperitus nobis precem di-
ctavit Assessor Patris. Sicut confessi estis qui sedet ad
dexteram Patris: ipse est advocatus noster, qui ven-
turus est Judex noster, tenete ergo & orationem hanc,
quam

quam reddituri estis die Sabbati novissimo, quo die baptizandi estis. Dominica die Palmarum, quæ dicebatur Capitilovium, ex Sancto Isidoro lib. 6. Etymologiarum cap. 18. lavabantur capita Competentium, ne sordidi ad unctionem accederent.

De tertia classe, quæ erat Electorum.

Ex Competentibus hi ad Baptismum admittebantur, qui via scrutinii digni fuerant inventi, & ideo electi nuncupati. Septem autem fiebant diversis temporibus scrutinia; & si quis deprehenderetur lapsus in aliquod grave peccatum, ad Audientium classem remittebatur, ut per quinquenium juxta Concilium Eliberitanum can. 75. per triennium verò postea juxta Concilium Nicænum canone 14. detinebatur. *Baptisimum*, inquit Tertullianus cap. 8. lib. de Baptismo, *non temerè credendum esse sciunt, quorum officium est imò illud potius perspicendum nolite dare Sanctum canibus, Matth. 7.*

Electi Episcopo offerebantur à sponsoribus probatæ virtutis die ad Baptismum præstituto, qui erat è solemnioribus; scilicet pervigilio Paschæ & Pentecostes. Gravis autem nostra ætate exarsit controversia inter duos Theologos Parisienses circa solemnitatem Epiphaniæ, altero contendente, altero verò negante Baptismum in illa solemnitatem secundum antiquum Ecclesiæ morem fuisse collatum. Syricius quidem exeunte quarto sæculo, epist. 1. ad Himerium, arguit temeritatem Sacerdotum, qui Baptisma in Natalitiis Christi, hoc est, Epiphania, necnon in Apostolorum & Martyrum festivitatis ministrabant:

bant: Cum hoc inquit, sibi privilegium & apud nos & apud omnes Ecclesias dominicum specialiter cum Pentecoste sua Pascha defendat; quibus solis per annum diebus ad fidem confluentibus, generalia Baptismatis tradi convenit Sacramenta. Gregorius II. quoque Epist. 4. sic habet: Sacramentum nonnisi in Paschali festiuitate & Pentecoste noveris esse præbendum, exceptis iis, quibus mortis urgente periculo, ne in æternum pereant, talibus oportet remediis subveniri. Nihilominus Avitus Viennensis, cui, utpote contemporaneo Sancti Remigii, credendum magis quàm Hincmaro, scribit Epistola 7. ad Clodovæum Francorum Regem, ipsum eo die baptizatum fuisse, quo natum cœli Dominum mundus accepit. Et Victor Utiensis lib. 1. de persecutione Vandalica refert cæcum à Deo per Eugenium Carthaginensem illuminatum illucescente die Epiphaniarum; cum catechumenos baptizaturus fontes benediceret. Ex quibus colligere licet in aliquibus Ecclesiis Baptismum die Epiphaniarum solemniter fuisse administratum.

Ex cæremoniis, quæ baptismum antiquitus comitabantur, multas etiam nunc retinet Ecclesia, quales sunt Litanix, Benedictio fontis, Chrismatis perunctio in signum unionis cum Christo, cujus bonum odorem baptizatus ubique spargere debet; vestis alba in signum innocentix restitutæ & conservandæ, cereus accensus, ut virtutis splendore luceat coram omnibus hominibus. Quibus absolutis statim confirmabantur initiati, & Eucharistiam recipiebant Tertullianus lib. de Resurrectione, cap. 8. Caro, inquit, ungitur, ut anima consecretur; caro signatur, ut anima muniatur; caro manus impositione adumbratur, ut

Et anima spiritu illuminetur, caro Corpore Et Sanguine Christi vescitur, ut Et anima de Deo saginetur. Quare quæ hactenus dicta sunt de præparandis initiandis, non solum Baptismum, sed & Confirmationem & Eucharistiam spectant, atque ex iis colligendum, quid exoptet Ecclesia in iis, qui ad duo postrema illa Sacramenta accedunt. Lac & mel, alicubi etiam vinum, Neophytis, porrigebantur, ad infantiae in Christo significationem, ut notat Sanctus Hieronymus dialogo contra Luciferianos.

Sponsores, qui & fide iussores dicebantur, nunc verò communiter Patrini, constat ab exordio assumptos: tum ex Tertulliano libro de Baptismo c. 8. jam laudato: tum ex lib. de Ecclesiastica Hierarchia, qui quinto sæculo sub nomine S. Dionysii Areopagitæ prodiit. Sicut enim, ut ratiocinatur S. Thomas 3. p. qu. 67. art. 7. recens natis nutrix, deinde præceptor, ita Neophytis dantur susceptores, qui eos doceant fidei rudimenta. Plures olim eundem suscepisse colligitur ex Concilio Trid. sess. 23. can. 2. de reformatione ubi eos restringit ad unum, vel ad summum ad unum & unam, quos officium illud charitatis & religionis tam arctè devincit cum baptizato & parentibus ejus, cognationem spiritalem cum ipsis contrahant, quod non extendendum ad eos, qui jam baptizatum ad cæremonias duntaxat supplendas offerunt.

Cum autem susceptores fidejubeant eum, quem offerunt, fidem servaturum, vitamque instituturum juxta Religionis Christianæ legem & disciplinam, jure merito ab hoc munere arcentur, 1. pœnitentes publici, priusquam per dignam

pœnitentiæ & satisfactionem fuerint reconciliati, ita Concilium VI. Parisiense lib. I. capite 54. 2. Excommunicati & publici peccatores, & qui eo anno non fuerint confessi, nec in Paschate communicaverint, ex Concilio I. Mediolanensi, & pluribus libris ritualibus. 3. Hæretici aut de hæresi suspecti, ex Concilio Remensi anno 1583. 4. Monachi & Moniales, cum dedecet mortuos sæculo, cum sæcularibus novas necessitudines & affinitates contrahere, nec ipsis liceat eorum curam gerere, quos instituendos suscepissent. Olim Ecclesiastici hoc fungebantur munere, sed S. Carolus Borromæus in quinta Synodo diœcesana prohibuit Clericis sacris Ordinibus initiatis, infantem de sacro fonte suscipere, *iidemque*, inquit, *in Confirmationis Sacramento compadres non sint.* Libri etiam Rituales communiter remouent eos, qui ignorant fidei rudimenta, utpote qui docere non valent, quod non didicerunt. Si autem Minister Sacramenti de susceptorum eruditione dubitet, non publicè, sed seorsim interroget. Quod de imperitis dictum est, idem de pueris sentiendum, qui etsi memoriter fidei rudimenta teneant, nondum sui satis sunt compotes, ut pro aliis fidejubeant.

Q. 2. *Quid observandum, si cæremoniæ in Baptismo fuerint prætermissæ?*

R. 1. Grave peccatum est cæremonias omittere, nisi urgeat necessitas: constat ex dictis c. 21. de Sacramentis in genere.

R. 2. Certum est eas supplendas quamprimum; ita enim præscribunt omnes Libri Rituales juxta antiquam Ecclesiæ Traditionem; nam Sanctus Cornelius Summus Pontifex & Martyr tertio mediante

diante sæculo, arguit Novatianam in lecto baptizatum, quòd postquam convalescerat, reliqua non percepit, quæ juxta Ecclesiasticam regulam percipi debent, neque ab Episcopo consignatus est: ita apud Eusebium lib. 6. hist. cap. 43.

Difficultas est circa exorcismos, utrùm scilicet sint observandi. Videretur enim injuria fieri Baptismo, quasi non haberet per se vim delendi peccata, & à dæmonis servitute liberandi. Quamobrem aliqui Rituales prohibent suppleri exercismos, & ita novissimè prohibitum est in Synodo Meldensi anno 3691. Attamen communiter docent Theologi, & plerique Libri Rituales exorcismos etiam esse supplendos: quia ut docet S. Thomas tertia parte quæst. 73. art. 3. ad tertium non modo dæmonem coercent, ne impediat Baptismi collationem, sed etiam ne ab audiendo Dei verbo avertat fideles, & ejus impetus per concupiscentiam quam accendit, si non enervant, saltem reprimunt. Prætereà etiamsi exorcismus adhibeatur solum ad significandum per Baptismum diabolum expelli, ut docet Guillelmus Antissiodorensis, non minus supplendus est, quàm aliæ cæremoniæ. Cæterum unusquisque sequatur ritum Ecclesiæ, in qua degit. Quòd si liber Ritualis nihil præscribat, satius est & magis conforme veteri disciplinæ exorcismos supplere.

Q. 3. *Quid si fidei, & sine debitis dispositionibus quis baptizatus fuerit?*

R. Baptismus ratus fuit, ideoque nec repetendus; sed caruit effectu propter malæ voluntatis obicem, quo remoto, per veram pœnitentiam reviviscit Baptismus, hoc est, expungit antecedentia peccata etiam quoad omnem pœnæ reatum.

tum. Ita Sanctus Augustinus lib. 3. de Bapt. cap. 13. his verbis : *Tunc incipit valere idem Baptismus ad dimittenda peccata, cum ad Ecclesie pacem venerint hæretici, non ut ille Baptismus, quasi alienus, aut alius improbetur, ut alter tradatur, sed ut idem ipse, qui propter discordiam foris operabatur mortem, propter pacem intus operatur salutem.*

Dixi, *antecedentia peccata*, quia subsequencia, & ipsa fictio, quæ in Baptismate grave peccatum fuit, subijcienda sunt clavibus Ecclesie, & per absolutionem sacramentalem remittenda.

Confirmatur. Peccata, quæ Baptismum præcedunt, non sunt materia Sacramenti Pœnitentiæ: ergo non per ipsum, sed per Baptismum remitti possunt.

CAPUT XIII.

De obligationibus Baptizorum.

Q. I. *Contrahiturne aliqua obligatio per Baptismum?*

R. Contrahitur, & quidem maxima ex duplici capite repetenda.

I. Ex magnitudine donorum, quæ in Baptismo collata sunt; ait enim Dominus Luc. 12. vers. 48. *Omni autem, cui multum datum est, multum quaeretur ab eo, & qui commendaverunt multum, plus petent ab eo.* Et Apoc. 3. v. 3. *in mente ergo habe qualiter acceperis, & audieris, & serva . . . si ergo non vigilaveris, veniam ad te tanquam fur.* Quasi dicat, scito, cogita, & diligenter perpende, quot & quanta dona Deus tibi in Baptismo contulerit, memineris qualiter adhuc catechumenus sis institutus, qualem te vitam agere docuerint, qui te
initia-

initiarunt, & ita vive: alioquin si dormire perrexeris, veniam ad te spoliandum & perdendum tanquam fur inexpectato & ex improvviso. Hinc Concilium sextum Parisiense nono sæculo, *valde periculosum est*, inquit l. i. c. 9. *& à Religione Christiana alienum, quò post tanti doni perceptionem unusquisque fidelis, cum ad intelligibilem ætatem venit, mysterium Baptismatis discere & intelligere negligit, atque eo intellecto, secundum illud vivere non satagit. Quod periculum ad negligentiam pertinere Sacerdotum, qui illud solerter debent annuntiare, & ad auditorum incuriam, qui hoc & intelligere & adimplere parvipendunt, nulli dubium est.*

2. Baptizorum obligatio repetitur ex eorum sponsionibus in baptismo factis, quas Sanctus Thomas 2. 2. quæst. 87. art. 2. ad primum, vocat votum, Et Sanctus Augustinus Epist. 149. aliàs 59. ad Maximum. *Vovetur, inquit, quæ offeruntur Deo, maxime Sancti altaris oblatio, quo Sacramento prædicatur nostrum aliud votum maximum, quo nos vovimus in Christo esse mansuros, utique in compage Corporis Christi.*

Q. 2. *Sponsiones quæ sunt in Baptismo, suntne propriè vota?*

R. Sunt propriè vota; quia votum est promissio facta Deo de meliori bono: atqui ejusmodi sponsiones sunt promissiones Deo factæ de bono, quo nullum est melius, & ideo nec dispensationem, nec commutationem admittunt. In vulgari tamen voti acceptione vota non sunt, nomine enim voti vulgò intelligitur promissio Deo facta operis boni non debiti; sed supererogationis: atqui ea, quæ promittuntur in baptismo, sunt omnibus præcepta, & necessaria necessitate finis,
ut

ut loquitur Sanctus Thomas cit. art. hoc est, sine eorum observatione nullus salutem consequi potest. Unde vota baptismi sunt omnibus communia, & ad ea obligari possumus sine propria electione, ut diximus ubi de baptismo parvulorum: cetera verò, utpote quæ sint rei ad salutem necessariæ, à nostra libera voluntate pendent, nec ad ea obligari possumus voluntate aliena.

Q. 3. *Quotuplex est votum Baptismi?*

R. Triplex: 1. vovemus nos Christo perpetuò adhæsurus, & ejus Evangelium secuturos, tanquam morum nostrorum, & vitæ agendæ normam ac regulam: 2. Proitemur obedientiam Ecclesiæ, & ejus Pastoribus: 3. Abrenuntiamus iis omnibus, quæ Christianorum instituto sunt dissentanea.

Q. 4. *Quare vovent initiandi se Christo & ejus Evangelio fore mancipatos?*

R. Quia Baptismus est solemnis professio Religionis Christianæ; sicut ergo Apostolus Gal. 5. contestatur omni homini circuncidenti se; quoniam debitor est universæ Legis faciendæ, cum circuncisio sit publica Judaismi professio; ita per Baptismum Christo nos mancipamus, Religionem ab ipso institutam proitemur, & ejus vitæ institutum, hoc est, legem Evangelicam solemniter amplectimur, atque inde Christiani vocamur. Illud adhuc pueri inter fidei rudimenta didicimus, nempe Christianum eum dici, qui credit & profitetur doctrinam Christi.

Q. 5. *Quare in Baptismo proitemur obedientiam Ecclesiæ, & ejus Pastoribus?*

R. 1. Quia per Baptismum adgeneramur membra corporis, scil. Ecclesiæ, cujus Christus caput est, nec potest vivere Spiritu Christi, qui extra corpus

corpus ejus est: *Is alienus est*, inquit S. Cyprianus, lib. de unit. Ecclesiæ, *profanus est*. *Habere jam non potest Deum Patrem, qui Ecclesiam non habet matrem: Illius fœtu nascimur, illius lacte nutrimur, spiritu ejus animamur, nec possumus inter ejus membra numerari, si ab illa nos regi non patimur; mortuum censetur membrum, & aliis noxium, si corporis influxum non recipiat: frustra quis profiteretur regulam alicujus Ordinis regularis, qui nollet subesse Ministro, qui præpositus est regulæ tuendæ, & dispensandæ: Si autem Ecclesiam non audierit, ait Christus Matth. 18. sit tibi sicut ethnicus, & publicanus.* 2. Quia ipsa lex Christi, quam profitemur, imprimis præcipit ejusmodi obedientiam, Luc. 10. *Qui vos audit, me audit, & qui vos spernit, me spernit.* Nemo igitur dicat hominum sunt mandata; namque ex S. Bernardo, lib. de præcept. & dispens. cap. 9. *sive Deus, sive homo Vicarius Dei mandatum quodcunque tradiderit, pari profectò obsequendum est cura, pari reverentia deferendum.* Et infra: *Quod si tantopere cavenda sunt scandala parvulorum, quanto amplius Prælatorum, quos sibi Deos æquare quodammodo in utraque parte dignatus, sibi met imputat illorum reverentiam & contemptum Quamobrem quidquid vice Dei præcipit homo, quod non sit tamen certum displicere Deo, haud secus omnino accipiendum est, quam si præcipiat Deus.*

Q. 6. *Quibus renuntiare coguntur initiandi?*

R. Non abluuntur sacro fonte, nisi solemniter renuntiaverint. 1. Satanæ. 2. Omnibus operibus ejus. 3. Omnibus pompis ejus.

Q. 7. *Mos ille fuitne semper & ubique observatus?*

R. Universalem esse testantur omnia Eucharistia tam Græcorum, quàm Latinorum: Antiquitatem

tatem autem ejus, omnium veterum scripta. Tertullianus, qui floruit secundo & tertio sæculo, inter Traditiones sine scripto ab Apostolis acceptas annumerat ejusmodi morem libro de corona milit. cap. 3. *Aquam adituri, inquit, contestamur nos renuntiare diabolo, & pompæ, & angelis ejus, &c.* Et cap. 4. *Ejusmodi disciplinarum si legem expostules Scripturarum, nullam invenies: Traditio tibi prætendetur auctrix, consuetudo confirmatrix, fides observatrix.* Similia ante eum scripserat S. Clemens Alaxandr. lib. 1. Pædagog. cap. 6. Origenes S. Clementis olim discipulus, sic habet in Epist. ad Romam. *Recordetur quod denuntiaverit diabolo non esse usurum pompis ejus & voluptatibus non pariturum.* Subsequentium Patrum testimonia proferentur ad explicandam sigillatim quamlibet renunciationem.

Q. 8. *Quis est primæ abrenuntiationis sensus, abrenuntio Satanæ?*

R. Una est SS. Patrum sententia initiandum hac voce profiteri se renuntiare mundo, & sæcularibus actibus: *Renuntiasti diabolo, mundo & luxuriis ejus, inquit S. Ambrosius libro de initiandis cap. 2. memor esto sermonis tui, & nunquam tibi excidat tuæ series cautionis Tenetur vox tua, non in tumulto mortuorum, sed in libro viventium.* Et S. Chrysostomus hom. 21. ad Populum Antiochenum: *Vocis illius recorderis, inquit, quam, dum sacris initiareris, emisisti, abrenuntio tibi, satana, nam satanæ adhæres, si sæculi moribus te conformes.*

Enimverò sicut adhæret Christo, qui efficitur membrum Corporis ejus, hoc est, Ecclesiæ cujus Christus est caput; ita diabolo mancipatur, non solum qui illum colit in idolis, aut eo utitur in magicis artibus, & aliis Gentilium superstitionibus;

bus ; sed maximè qui sese conformat huic sæculo, cujus caput & princeps est diabolus, juxta illud Joan. 12. *nunc judicium est mundi, nunc princeps hujus mundi ejicietur foras.* Et Ephes 6. *Non est nobis colluctatio adversus carnem & sanguinem, sed adversus Principes & Potestates, adversus mundi Rectores.* Unde Tertullianus libro de Spectaculis cap. 15. ait : *Utinam ne in sæculo cum illis moraremur, sed tamen in sæcularibus separamur ; quia sæculum Dei est, secularia verò diaboli.*

Ecclesia ergo verborum Domini memor, quòd mundus non possit Spiritum Sanctum accipere, Joan. 14. v. 17. quòd Christianus non sit de mundo, *de mundo non estis*, inquit, Joan. 15. vers. 19. *sed ego elegi vos de mundo.* Et cap. 17. vers. 14. *non sunt de mundo, sicut & ego non sum de mundo ;* quod repetit vers. 16. semper exegit ab initiandis, ut ante omnia mundo valedicant.

Q. 9. *Quid intelligitur per illas voces, abrenuntio omnibus operibus ejus ?*

Respondet S. Ephrem, *paucis his verbis, cuncta, quæ nominantur mala, quæque odit Deus valere jubemur.* Peccata quippe sunt opera diaboli, juxta illud 1. Joan. 3. vers. *qui facit peccatum, ex diabolo est . . . in hoc apparuit Filius Dei, ut dissolvat opera diaboli.* Initiandus itaque bellum indicit quibuscunque peccatis, nec distinguit inter gravia & levia, omnibus in Baptismo renuntiat, quia cit. cap. v. 9. *omnis qui natus est ex Deo, peccatum non facit*, saltem ex proposito, & deliberata voluntate, quoniam semen ipsius in eo manet, id est, generatio divina, quam in Baptismo consecutus est. Quòd si ex infirmitate aliquando in pugna levem plagam accipiat (quis enim miles omnem ictum

adversarii continuò illum laceffentis declinet ?) hinc veluti stimulo incitatus acrius in hostem insurgit, & ferventior ejus charitas operit multitudinem peccatorum. Ita ferè Sanctus Augustinus in hunc Sancti Joannis locum.

Q. 10. *Quid tertia abrenuntiatione profitetur initian-
dus, abrenuntio omnibus pompis ejus ?*

R. Profitetur se abdicare mundanas superfluitates, seu rerum terrenarum immoderatos usus, juxta illud Apostoli, 1. Tim. 6. vers. 8. *Habentes autem alimenta, & quibus tegamur, his contenti simus.* Ita communiter SS. Patres, Cyprianus, Cyrillus Jerosolymitanus, Chrysostomus, Augustinus, Concilia, & ex iis Theologi : *Pompa diaboli, inquit Concilium Parisiense VI. sunt spectacula, venerationes, vestimentorum cultus, jactantia, fastus, ambitio, & superfluitas cujuslibet rei in humanis usibus, unde cre-
scit elatio, quæ multoties honestati adscribitur.* Ideo autem superfluitas illa & mundana honestas, pompæ Satanae nuncupantur ; quia exteriori illo apparatu & splendore dæmon (qui ex se nihil habet nisi vile & execrandum) tanquam Princeps & Rector mundi pellicit animas, & sibi devincit. Unde Tertullian. supra dicebat sæculum, seu res ipsas esse quidem Dei ; sæcularia verò, hoc est, mundanum usum diaboli.

Satis ergo non est Christianum renuntiare omnibus operibus evidenter malis ; sed insuper ab eo exigitur, ut abstineat ab iis quæ malo sunt connexa, & fomenta existunt superbiæ ; voluptatis, & avaritiæ ; alioquin quomodo innoxius ante Tribunal Christi, qui fidem in Baptismo datam irritam facit ? *Non pertimescis, inquit S. Augustinus, non exhorrescis ? in die Judicii referent Angeli chirographum*
& ver-

Et verba oris tui coram formidabili tribunali, tuncque lugubrem illam vocem auditurus es, de ore tuo te iudico, serve nequam, Luc. cap. 19.

Ergo, inquires, vota monastica sunt superflua & superstitiosa, quemadmodum garriunt Pseudo-Reformati. Cum enim fideles in Baptismo profiteantur se adhærere Christo, & ejus Evangelio, renuntiare mundo, & omnibus sæcularibus desideriis, nihil ultra vovere possunt Monachi & Regulares.

Nego sequel. Cujus Confirmationem distinguo: nihil ultra vovere possunt, quod spectet substantiam votorum Baptismi, Conc. Quod spectet modum ea implendi, Nego. Enimverò omnibus initiatis dicitur: *Diliges Dominum Deum tuum ex toto corde tuo, &c. Matth. 12. Post concupiscentias tuas non eas. Eccl. 18. Nolite diligere mundum, neque ea, quæ in mundo sunt. 1. Joan. 2. & speciatim iis, qui in sæculo agunt: qui habent uxores, tanquam non habentes sint: Et qui flent, tanquam non flentes: Et qui gaudent, tanquam non gaudentes: Et qui emunt, tanquam non possidentes, Et qui utuntur hoc mundo, tanquam non utantur, 1. Corinth. 7. Sed quia terrena sunt gravia onera & impedimenta peregrinantibus ad patriam cœlestem, dicente Domino, Matth. 19. *Dives difficile intrabit in regnum cœlorum*; adepta quippe, inquit S. Augustinus, arctius diliguntur, quàm concupita, aut absentia, & concupiscentia iis commota mentem quam sæpissimè decipit obtentu necessitatis, & urbanæ honestatis, impeditque quominus innotescat, quis modus in iis sit tenendus. Quapropter nonnulli ultra mandatum progressi, è sæculo nudi avolant in solitudinem, & usum rerum, sine quibus vita mortalis conservari nequit,*

ex judicio & voluntate Præpositi expectant, ut ab omnibus curis soluti, ea duntaxat cogitent quæ Domini sunt. Porro ad specialem & perfectiorem illum modum implendi mandata non se extendunt vota Baptismi.

Q. II. *Baptizatus magisne peccat eodem genere peccati, quam non baptizatus?*

R. Affirmat sanctus Thomas in 4. dist. 38. quæst. 1. art. 11.

Probatur 1. ex Scriptura, Hebr. 10. vers. 28. *Irritam quis faciens legem Moysi, sine ulla miseratione duobus, vel tribus testibus moritur. Quanto magis putatis deteriora mereri supplicia, qui Filium Dei conculca-verit, & sanguinem Testamenti pollutum duxerit, in quo sanctificatus est, & Spiritui gratiæ contumeliam fecerit?*

Apostolus in hoc textu plures congerit circumstantias, quæ peccata Christianorum supra modum aggravant.

Primò, Baptizatus, si peccaverit, Filium Dei summa afficit injuria, & quod horribile dictu & auditu, illum conculcat, eoque dejicit, ut æmulum ejus, nempe diabolum præponendum judicet, *in Dominum peccat*, inquit Tertullian. libro de Pœnitentia cap 5. *qui cum æmulo ejus diabolo pœnitentia renuntiasset, & hoc nomine illum Domino subjecisset, rursus eundem regressu suo erigit Nonne, quod dicere quoque periculosum est, sed ad ædificationem proferendum est, diabolum Domino præponit? Comparisonem enim videtur egisse, qui utrumque cognoverit; & judicato pronuntiasse eum meliorem, cujus se rursus esse maluerit tantò magis prorsus Deo quantò ejus æmulo acceptus.*

Secundò, Sanguinem Christi pollutum dicit: illum, inquam, sanguinem, nostræ redemptionis
pre-

pretium, quo ablutus, sanctificatus, & omnium virtutum donis ornatus, abjicit veluti rem vilissimam & sordidam præ vana mundi gloria, & terrenis obligationibus, quas ambit: *Ita in Dominum non modò contumax, sed etiam ingratus apparet*, ait Tertullianus loco citato. Ingratum vulgò dicimus, qui par beneficium non rependit, cùm possit; sed qui donum licèt eximium spernit, ac rejicit, ipsumque beneficium injuria afficit, non ingratus tantum, sed & ferinus censerì debet.

Tertiò, violat pactum cum Deo initum & sanctum proprio Filii ejus sanguine, quem idcirco Apostolus vocat sanguinem Testamenti, scilicet novi, cùm vetus firmatum fuerit solo hircorum, aut vitulorum sanguine, juxta Antiquorum morem, qui pacta sua animalis cæde consignabant, simile exitium imprecantes capiti illius, qui prior fœdus violasset. Quæ cùm ita sint, *maximo in metu omnes esse*, inquit Sanctus Gregorius Nazianzenus orat. 40. *atque omni custodia nostras animas servare debemus, ne hoc pactum violasse comperiamur. Nam cùm ad mutua pacta firmanda Deus medius adhiberi soleat, quantum, quæso, periculum est, ne fœdera cum Deo ipsa contracta perfregisse reperiamur?* præsertim contestante Apostolo Hebr. 10. *Fam non relinquitur pro peccatis hostia, terribilis autem quædam expectatio judicii, & ignis æmulatio*; hoc est, ægrè ac difficilè relinquitur hostia, qua illud perfidiæ peccatum expietur; sed manet terribile judicium & zelus vindicis ignis adversus ejusmodi fœdifragos.

Quartò, contumeliam facit Spiritui gratiæ, id est, Spiritui Sancto, qui in eo, veluti in proprio templo pretiosis donis ornato habitabat, nihilo minus horrendo sacrilegio illum expellit, & ejus

loco idolum zeli, scilicet spiritum superbiæ, luxuriæ, & avaritiæ erigit; & ita baptizatus consecratus in templum Dei, evadit templum idolorum. Hi sunt colores, quibus Apostolus, quin Deus ipse per Apostolum pingit peccata Christianorum.


Probatur 2. ex Patribus. Origenes hom. 5. in Ezech. *Neque hi, inquit, qui crucifixerunt Salvatorem meum, rei sunt ingentis pœnæ, sicut hi, quibus Apostolus ait, quod Filium Dei conculcant.* Sanctus Chrysostomus homil. 1. in Acta Apostol. ubi probavit omnia crimina etiam gravissima per Baptismum facile deleri, sic pergit: *Cæterum pro his, quæ post Baptismum commissa sunt, tantam damus pœnam, quasi illa revocata sint, ac multo etiam graviolem, jam enim non simplex peccatum est, sed duplex aut triplex . . . audi quid dicat Apostolus: Quantò putatis graviore vindicta dignus censebitur, qui Filium Dei conculcarit?*

Confirmatur ex praxi universalis Ecclesiæ, quæ lapsos post Baptismum non reconciliabat, nisi post multos pœnitentiæ labores. Sanctus Pacianus epist. 3. ad Sempronian. scribit: *Illud (Baptisma) omnes adipisci possunt; quia gratiæ Dei donum est, id est, gratuita donatio: labor verò iste, (pœnitentiæ) paucorum est, qui post casum resurgunt, qui post vulnere convalescunt, qui lacrymosis vocibus adjuvantur, qui carnis interitu reviviscunt.* Hugo à sancto Victore, lib. de potestate ligandi: *Facilius, inquit, reconciliatur Paganus post crimina centum, quàm Christianus post unum solum.* Et Patres Tridentini sess. 14. cap. 2. *Per Baptismum . . . Christum induentes, nova prorsus in illo efficimur creatura, plenam & integram peccatorum omnium remissionem consequentes; ad quam tamen novitatem & integritatem per Sacramentum Pœnitentiæ,*

tentiæ, sine magnis nostris fletibus & laboribus, divina id exigente iustitia; pervenire nequaquam possumus, ut meritò pœnitentia laboriosus quidam Baptismus à SS. Patribus dictus fuerit.

Ex his colliges, quàm continua esse debeat memoria votorum, quæ in Baptismo emisimus, quamque frequenter Pastores & Patres-familias eam refricare teneantur in animis subditorum: tum, ut vota sua Domino fideliter reddant: tum, ut si quis eorum fortè à gratia baptismali exciderit, pro gravitate culpæ conjiciat quæ debeat esse ejus pœnitentia & satisfactio; scriptum est enim Deuter. 25. *Pro mensura delicti erit & plagarum modus.* Mensuram autem illam Christianus lapsus aliunde repetere nequit, quàm ex sanctitate Baptismi, & ex votis in eo nuncupatis. Hinc est quòd olim Ecclesia priusquam lapsos resipiscences duris pœnitentiæ laboribus subjiceret, eos ad gradum audientium amandabat, in quo omnis eorum actio & exercitatio erat crebrius audire nonnunquam per annum integrum catecheses, seu sacras Religionis Christianæ institutiones, ut agnita tandem peccati sui malitia, & ejus horrore perculsi, pœnas in gradu substratorum subeundas eò alacrius amplecterentur, quò se longè acerbiores mereri judicarent.





Tractatus DE SACRAMENTO CONFIRMATIONIS.

CAPUT PRIMUM.

De nomine, & definitione Sacramenti Confirmationis.

Q. 1. *Quomodo vocatur Sacramentum Confirmationis?*
 R. Vocatur 1. manus impositio: *Per manus impositionem*, inquit Sanctus Augustinus *datur Spiritus Sanctus*, libro de Baptismo cap. 16.

2. Sacramentum chrismatis. Ita Sanctus Augustinus lib. 2. contra literas Petiliani cap. 104. *Sacramentum chrismatis*, inquit, *sacro sanctum est sicut ipse Baptismus*.

Sacrum Unguentum: ita Theodoretus in c. 1. Cantici Canticorum, & Græci communiter.

4. Si-

4. Signaculum Dominicum. Sic Sanctus Cyprrianus epist. 71 ad Jubajanum.

5. Signaculum spirituale; apud Sanctum Ambrosium lib. de iniciandis cap. 7.

6. Signaculum vitæ æternæ, apud Sanctum Leonem citato ferm. 4. de Nativitate.

7. Chrisma supercœleste, Can. 48. Concilii Laodicensi.

8. Chrisma salutis, apud S. Leonem citato ferm. 4. de Nativitate.

9. Perfectio apud S. Ambrosium, seu auctorem lib. 3. de Sacramentis cap. 11. *Post fontem, inquit, superest, ut perfectio fiat, & Concilium Eliberitanum can. 47. de Baptizatis à Diacono, statuit his verbis, Episcopus eos per benedictionem perficere debet. Unde Guillelmus Antissiodorensis lib. 4. Summæ tractat. 4. cap. 1. de Sacramento Confirmationis scribit, per illud Sacramentum perfectè efficiuntur Christiani.*

10. Apud Latinos Confirmatio simpliciter dicitur: *Qui enim per Baptismum Christiani electi sunt, inquit Venerabilis Beda in Psalm. 26. molitiem quandam habent: à chrisinatis Sacramento adversus omnis carnis, mundi, & diaboli impetus robustiores fiunt, & eorum animus in fide confirmatur. Atque vel ex his nominibus conjicere licet quanti Veteres fecerint Sacramentum Confirmationis.*

Q. 2. *Quomodo definitur Confirmatio?*

R. Definitur, Sacramentum novæ Legis, quo baptizatis Spiritus Sancti robur confertur, tum ad firmiter credendum, tum ad fidem ipsam intrepide confitendam.

Dicitur 1. *Sacramentum novæ legis*, ut denote-
tur genus, in quo Confirmatio convenit cum aliis
Sacramentis à Christo Domino institutis.

Dicitur 2. *quo baptizatis*, &c. quibus vocibus
Confirmatio differt à Baptismo, qui nullum in
fuspiciente præsupponit Sacramentum; Confirma-
tio verò necessariò Baptismum præsupponit.

Dicitur 3. *Spiritus Sancti robur*, per quod de-
signatur abundantior gratiæ copia, quæ per Con-
firmationem confertur; cùm enim commune sit
omnibus Sacramentis novæ legis conferre gra-
tiam sanctificantem & Spiritum Sanctum, pro-
prium est Confirmationis illam gratiam dare ad
robur, hoc est, cum ea plenitudine, quæ fuscip-
ientem adhuc parvulum in Christo perficiat, &
coroboret.

Dicitur 4. *Ad fortiter credendum, & ad fidem
ipsam intrepidè conferendam*, ut distinguatur Confir-
matio à Sacramento Ordinis, in quo enim datur
Spiritus Sanctus ad robur, sed ut functiones Ec-
clesiasticæ ritè exerceantur: hic verò ut baptizati
tentationibus contra fidem irruentibus viriliter
resistant, eandemque fidem spretis minis & blan-
ditiis sæculi, data occasione, liberè profiteantur.

CAPUT II.

Utrùm confirmatio sit novæ Legis Sacramen-
tum propriè dictum?

Negavit Lutherus libro de captivitat. Babyl. *Satis
est*, inquit, *pro ritu Ecclesiastico Confirmationem
habere*. Similia docet Calvinus libro 4. Institu-
tionum, ubi vocat Confirmationem, *abortivam Sa-
cramenti larvam*.
Luthe-

Lutherani & Calvinistæ in patrocinium suum conantur adducere. 1. Novatianos, qui tertio sæculo Confirmationem è numero Sacramentorum expunxerunt, teste Theodoretò lib. 3. hæreticarum fabularum. 2. Valdenses circa medium duodecimi sæculi. 3. Wiclefum, 14. sæculo, & Joannem Hus ejus Sectatorem.

Sed erraverint circa Confirmationem illi Hæretici; quid Novatores juvat habere sui criminis socios, quorum præcipui (Novatianos dico) ante mille annos extincti sunt? Imò iisdem ipsis, quos patronos habere gloriantur, schismatis reos sese demonstrant. Cùm enim impia dogmata illi docuerint, etiam Lutheranorum & Calvinistarum judicio; Novatiani scilicet nullum in Ecclesia superesse remedium lapsis post Baptismum; Valdenses & alii quemlibet Præpositum peccato mortali infectum, nullam habere jurisdictionem: Nonne in hostium castris militare deprehenduntur, qui talium societati se adjungunt? Verùm multa suadent priscos illos Hæreticos de Sacramento Confirmationis malè non sensisse, Novatianos quidem: tum quia SS. Epiphanius, Augustinus, Philastrius Brixienfis, & Joannes Damascenus talem ipsis errorem non tribuunt, quamvis accurate de hæresibus scripserint; tum quia S. Cyprianus epist. 76. ad Magnum, supponit Novatianos, qui tunc temporis ab Ecclesia defecerunt, confirmasse pariter & baptizasse; probat enim eo loci utrumque Sacramentum apud eos non valere. Valdenses verò in Fidei Confessione oblata Uladislao Regi Hungariæ, sic habent: *Sacramenta septennaria inclusa numero Ecclesiæ Christi utilia esse pandimus.* Quòd igitur nunc consentiant Calvinistis

nistis asserentibus duo tantum esse Ecclesiæ Sacramenta, in causa est Bucerus Argentinenſis Pſeudo-Miſter, qui eos anno 1522. in ſuum traxit errorem; nec ullam merentur fidem Libri recens editi à quodam Calviniſta tanquam genuini antiquorum Valdenſium fœtus: ex ſtylo enim & aliis momentis arguitur confictitium eſſe opus. Denique inter Wicleſi articulos in Conc. Conſtantiſi reſenſitos, & damnatos, nullus directè attingit Sacramentum Confirmationis. Itaque Lutherus, & Calvinus primi bellum Confirmationi indixerunt, contra quos ad propositam quæſtionem

R. De fide eſt Confirmationem eſſe Sacramentum novæ Legis propriè dictum. Ita definiit Concilium Tridentinum ſeſſ. 7. can. 1. de Confirmatione: *Si quis dixerit Confirmationem baptizatorum otioſam cæremoniam eſſe, & non potius verum & proprium Sacramentum: aut olim nihil aliud fuiſſe, quàm catecheſin quamdam, qua adoleſcentiæ proximi, fidei ſuæ rationem coram Eccleſia exponebant; anathema ſit.* Præiverat Eugenius Quartus in ſuo Decreto pro Armenis, ubi reſenſet ſeptem novæ Legis Sacramenta, aitque, *ſecundum Sacramentum eſt Confirmatio.*

Probatur 1. ex Scriptura ſacra Actuum 8. ubi ſic legitur; *Cum autem audiſſent Apoſtoli qui erant Jeruſolymis, quodd recepisset Samaria verbum Dei, miſerunt ad eos Petrum & Joannem, qui cum veniſſent, oraverunt pro ipsis ut acciperent Spiritum Sanctum, nondum enim in quemquam illorum venerat, ſed baptizati tantum erant in nomine Domini Jeſu. Tunc imponebant manus ſuper illos, & accipiebant Spiritum Sanctum.*

Ex his

Ex his verbis sic argumentari licet. Tria requiruntur, & sufficiunt etiam secundum Novatores ad veritatem Sacramenti. Primum, ritus exterior. Secundum, promissio gratiæ sanctificantis. Tertium, mandatum Christi Domini: atqui hæc tria citato loco designantur. 1. Ritus exterior, qui consistit in rebus & verbis, seu materia & forma. Orabant, en verba; imponebant manus, en res, seu materia, qua significatur divina protectio, juxta illud Isaïæ 49. *In umbra manus suæ protexit me*, sub qua confirmatus quasi clypeo munitus contra tela ignea nequissimi, ut loquitur Apostolus, dicere possit, *Dominus protector vitæ meæ, à quo trepidabo?* Si consistant adversum me castra, non timebit cor meum, Psal. 26. Esto apud Judæos cæremonia illa esset usitata dum alicui bene precabantur; quidni Christus Dominus eam ad Sacramenti dignitatem extulerit quemadmodum & ablutionem, quæ etiam apud Judæos maximè erat in usu? 2. Eo loci etiam habetur gratiæ non solum promissio, sed & collatio, *accipiebant Spiritum Sanctum*. 3. Mandatum Christi colligitur necessariò fatentibus Novatoribus, ex potestate Apostolis collata gratiæ tribuendæ, neque enim in mentem cujusquam venire potest, Christum Dominum tantam eis potestatem concessisse, ut illa nunquam uterentur, maximè cum unicè data sit in commodum & perfectionem Fidelium, & ut exhiberet ipsi sibi gloriosam Ecclesiam, Ephes. 5.

Quòd autem otiosa non fuerit in Apostolis illa potestas, patet non solum ex laudato textu Act. 8. sed & ex cap. 19. ejusdem libri, ubi Apostolus Ephesum ingressus, inquisitione facta, an bapti-

baptizati acceperant Spiritum Sanctum, imposuit manus his qui non acceperant: & ex cap. 6. epist. ad Hæbræos, ubi innuit idem Apostolus morem tunc fuisse & baptizandi & confirmandi Neophytos, *non rursus jacentes*, inquit, *fundamentum pœnitentiæ Baptismatum doctrinæ, impositionis quoque manuum*; quibus postremis verbis intelligit Sanctus Chrysostomus Sacramentum Confirmationis.

Respondent Adversarii allatum textum ex capite 8. Actuum, intelligendum esse de gratia miraculorum, quam prædixit Joel Propheta, interprete S. Petro, Actuum 2. quæque 10. collata est Apostolis die Pentecostes, deinde aliis credentibus per eorum ministerium, ut patet ex capite 1. Actuum, ubi legitur quod, loquente Petro, cecidit Spiritus Sanctus super eos, qui erant congregati in domo Cornelii Centurionis, quo miraculo permotus Apostolus, dixit, *numquid aquam quis prohibere potest, ut non baptizentur hi, qui Spiritum Sanctum acceperunt sicut & nos?* Ergo accipere Spiritum Sanctum, nihil est aliud, quam accipere gratiam miraculorum.

Contra; hæc explicatio nova est, & prorsus aliena à mente omnium sanctorum Patrum, qui laudatum locum cap. 8. intellexerunt de Sacramento Confirmationis, ut constabit ex argumento sequenti.

Probatur itaque 2. Confirmationem esse Sacramentum novæ Legis propriè dictum auctoritate omnium SS. Patrum, & constanti universalis Ecclesiæ traditione.

S. Irenæus, qui floruit secundo sæculo, habuitque Præceptorem Sanctum Polycarpum, auditorem

torem S. Joannis Evangelistæ, libro 4. cap. 75. scribit eos, quibus Apostoli manus imponebant, ut refertur Actuum 8. per hujusmodi manuum impositionem accepisse Spiritum Sanctum, qui est esca vitæ. Ex quo testimonio tria colligere licet. Primum, quod Actuum 8. agatur de Sacramento Confirmationis, non de sola gratia miraculorum, quæ ætate S. Martyris ferè defierat, stabilita jam Ecclesia. Secundum, quòd illa impositio esset signum in Ecclesia permanens ad sanctificationem Fidelium. Tertium, quòd Confirmatio non sit abortiva Sacramenti larva, ut suprà garriebat Calvinus, quasi fuerit primo sæculo ignota: testimonium enim illud evincit illam fuisse in usu primo sæculo.

Tertull. ferè coævus S. Irenæi, cùm vixerit secundo & tertio sæculo, sic docet lib. de Baptismo cap. 7. *egressi de lavacro perungimur benedicta unctione.* Et cap. 8. libro de Resurrect. carnis, sic habet: *Caro abluitur, ut anima emaculetur: caro ungitur, ut anima consecretur: caro signatur, ut & anima muniatur: caro manus impositione adumbratur, ut & anima Spiritu illuminetur; caro Corpore & Sanguine Christi vescitur, ut & anima de Deo saginetur.* Quibus verbis Tertullianus tria designat Sacramenta, quæ solebant continuò dari Neophytis, nempe Baptismum, *caro abluitur*; Confirmationem, *ungitur, signatur, manus impositione adumbratur*; & Eucharistiam, *Corpore & Sanguine Christi vescitur.*

Sanctus Cyprianus scripsit Epist. 73. tertio mediante sæculo, *quod nunc quoque apud nos geritur*, (nempe quod observarunt Apostoli Act. 3.) *ut qui in Ecclesia baptizantur, per Præpositos Ecclesiæ offeran-*

offerantur, & per nostram orationem, ac manus impositionem Spiritum sanctum consequantur.

S. Firmilianus Cæsareæ in Cappadocia Episcopus & Martyr, in Epist. ad S. Cyprianum, quæ est 75. inter Epist. ejusdem S. Cypr. meminit etiam impositionis manuum observande ab Episcopis super baptizatos, exemplo Apost. Act. 19.

Sanctus Cyrillus Jerosolymitanus quarto sæculo catechesim tertiam instituit de Sacramento Confirmationis, ubi inter cætera hæc leguntur: *Sanctum illud unguentum non amplius est unguentum nudum, postquam jam consecratum est; sed est chrisma, quod Christi & Spiritus Sancti divinitatis præsentiam efficit, quo frons, & alii sensus corporis tui symbolicè inunguntur, anima verò sancto vivificoque Spiritu sanctificatur ut enim Salvator post Baptismum, & illum Spiritus Sancti adventum, egressus in prælium vicit adversarium, sic & vos post sacrum Baptisma, & chrisma mysticum induti armis Spiritus Sancti adversus vobis oppositam potestatem consistatis, & præliemini, dicentes: Omnia possum in eo, qui me confortat, hujus chrismatis dono accepto merito appellamini Christiani.*

Nec est quod opponat Dallæus Sanctum Augustinum libro 26. de peccator. meritis, cap. 2. cineribus, & aliis Sacramentalibus tribuere virtutem sanctificandi; satis enim sanctus Doctor distinguit illam virtutem Sacramentalium à virtute, quæ competit Sacramentis. *Illa sanctificant secundum quendam modum suum, inquit, At ista simpliciter dicuntur sanctificare, dare Spiritum Sanctum, & præsentiam ejus divinitatis efficere.*

Sanctus Chrysostomus hom. 18. in Acta Apostolorum etiam quarto sæculo, sic scribit: *Philippus baptizans Spiritum Sanctum non dabat, neque facultatem*

tatem habebat hoc erat in Apostolis singulare; unde præcipuos & non alios videmus hoc facere.

S. Hieronymus eodem sæculo, Dialogo contra Luciferianos: Non quidem abnuo hanc esse Ecclesiarum consuetudinem, ut ad eos, qui longè in minoribus urbibus per Presbyteros & Diaconos baptizati sunt, Episcopus ad invocationem sancti Spiritus manum impositurus excurrat.

S. Augustinus tract. 6. in Epist. S. Joannis: Primis temporibus, inquit, cadebat super credentes Spiritus Sanctus, & loquebantur linguis, quas non didicerant Signa erant tempori opportuna Nunquid modò quibus imponitur manus, ut accipiant Spiritum Sanctum, hoc expectatur, ut linguis loquantur? Si ergo per hæc miracula non fiat modò testimonium præsentiae Spiritus Sancti unde cognoscit quisque accepisse se Spiritum sanctum? Interroget cor suum, si diligit fratrem, manet Spiritus Dei in illo. Similia habet tract. 3. in eadem epist. & libro 2. contra Literas Petiliani cap. 104. in hoc unguento Sacramentum chrismatis vultis interpretari, quod in genere visibilium signaculorum Sacrosanctum est, sicut Baptismus.

Innocentius I. S. Augustino coævus, ita scribit epist. 1. De consignandis verò infantibus manifestum est, non ab alio, quàm ab Episcopo fieri licere; nam Presbyteri licet sint Sacerdotes, Pontificatus tamen apicem non habent; hæc autem solis Pontificibus deberi, ut vel consignent, vel Paracletum Spiritum tradant, non solum consuetudo Ecclesiastica demonstrat, verum & illa lectio Act. Apost. quæ asserit Petrum & Joannem esse directos, qui jam baptizatis traderent Spiritum Sanctum. Nam Presbyteris, (seu extra Episcopum, seu præsentem Episcopum baptizent) chrismate baptizatos ungere

licet; sed quod ab Episcopo fuerit consecratum; non tamen frontem ex eodem oleo signare, quod solis debetur Episcopis, cum tradunt Spiritum sanctum.

S. Gregorius, qui regebat Ecclesiam sexto & septimo sæculo, meminit Sacramenti Confirmationis lib. 12. epist. 31. Venerabilis Beda octavo sæculo in cap. 8. Actuum Apostolorum: S. Isidorus Hispalensis lib. 2. de Officiis Ecclesiasticis cap. 26. Theodulphus Aurelianensis lib. de ordine Baptismi cap. 17. Amalarius Trevirensis libro 1. de Officiis cap. 27. Denique Ecclesia Orientalis retinuit Confirmationem, tamquam verum novæ Legis Sacramentum.

Dices 1. Nemo dat quod non habet: atqui Apostoli confirmati non erant; à quo enim, & quando fuissent confirmati? non à Christo Domino ante Passionem, cum hujusce Confirmationis nullum extet vestigium; sive in Scripturis, sive in Traditione: neque etiam post passionem; quia Confirmatio præsupponitur ordinationi; cum autem Apostoli fuerint ordinati Sacerdotes in ultima cœna, sequitur eos præposterè non fuisse à Christo Domino confirmatos post Passionem; neque etiam à Spiritu Sancto; linguæ enim igneæ; quæ die Pentecostes apparuerunt supra capita singulorum, non fuerunt Sacramenta, utpote signa transitoria præsentiae Spiritus Sancti, non ad eorum sanctificationem; ad illum enim effectum jam acceperant Spiritum sanctum, sed ad gratiam miraculorum, juxta Joelis prophetiam, ut interpretatur S. Petrus Aët. 2. Ergo Apostoli per manus impositionem non conferebant Sacramentum, & hoc expresse docent S. Thomas 3. p. qu. 72. art. 1. Sanctus Bonaventura in 4. dist. 7. & ejus

& ejus Magister Alexander de Ales 3. p. q. 4. Scotus in 24. dist. 7.

Respondeo 1. Negando absolutè majorem, aliàs nec infidelis baptizare posset, cùm ipse baptizatus non sit.

Respondeo 2. Distinguendo eandem majorem, nemo dat quod non habet, nec formaliter, nec virtualiter, Concedo: Quod non habet formaliter, Nego major. Sufficit enim quòd acceperit virtutem conferendi Sacramentum, v. gr. ethnicus baptizandi, Sacerdos ungendi, etiamsi ille Baptismum, iste Extremam Unctionem non acceperit.

Equidem Apostoli sine Sacramento consecuti sunt die Pentecostes effectum Confirmationis, nempe gratiam uberiores, cum dono miraculorum, *foris apparentibus linguis igneis*, inquit S. Gregorius, hom. habita die Pentecostes, *intus facta sunt corda flammantia*, nempe igne charitatis. Quamvis autem prophetia Joelis, quæ mysterium prænuntiat, ad solum donum linguarum arctaretur, argumentum erat S. Petro efficax ad retundendam eorum calumniam, qui dicebant Discipulos esse ebrios.

Adumbratum quidem fuit Sacramentum Confirmationis, & quodammodo indigitatum, cùm Christus Dominus parvulis manum imponebat, ut tradit Concilium Senonense; sed communiter creditur, nonnisi post Resurrectionem sicut pleraque alia Sacramenta fuisse institutum. Attamen sanctus Thomas art. cit. opinatur Christum Dominum ante Passionem promittendo instituisse illud Sacramentum, sed nonnisi post Ascensionem exhibuisse, quia in eo datur plenitudo Spiritus Sancti, quæ danda non erat ante Ascensio-

nem; juxta illud Joan. 7. *Nondum enim erat Spiritus datus, quia Jesus nondum erat glorificatus.*

Docent quidem S. Bonaventura & Halensis ejus Magister, Apostolos sine Sacramento dedisse Spiritum sanctum ad robur (ergo non ad solam gratiam miraculorum, ut falsò contendunt Novatores) ac post eorum mortem hoc Sacramentum fuisse institutum, quantum ad formam verborum & materiam elementarem, hoc est, chrismationem, in quibus verbis nonnulli Theologi errorem agnoscunt, sed venia dignum; cum eorum tempore Ecclesia non definiisset omnia novæ legis Sacramenta à Christo fuisse instituta; sed explicari possunt juxta sensum eorum Theologorum, qui etiam hodie docent Christum Dominum non determinasse materiam & formam cujuslibet Sacramenti, sed dedisse Ecclesiæ potestatem illas determinandi, adedut veteres illi Theologi voluerint duntaxat Ecclesiam post obitum Apostolorum designasse, quæ esset materia, quæve forma hujusce Sacramenti à Christo tamen instituti. Quod verò addit Alensis, chrismationem institutam fuisse in Conc. Meldensi, quod est particulare sæculo octavo celebratum, si intelligatur de prima institutione chrismationis, non verò de aliqua Ecclesiæ ordinatione circa chrismationem, manifestus est error; nam ex testibus allatis constat, jam à secundo sæculo chrismationem per universam Ecclesiam fuisse observatam.

Quod Scotum spectat, clarè docet Confirmationis Sacramentum à Christo Domino fuisse institutum, *supponitur*, inquit loco citato, *institutum fuisse à Deo* (hoc Sacramentum) *licet tempus & modus hujus institutionis in Scriptura non legatur.* Ita
autem

autem scribit, quia sententia ejus est, Apostolos sine Sacramento Spiritum sanctum contulisse per impositionem manuum; ad quam sequebatur gratia miraculorum, quæ erat signum sensibile præsentia Spiritus Sancti, & gratia sanctificantis, ita, ut tunc temporis inutiles essent præscripta verborum forma & chrismatio, quæ cœperunt usurpari cessantibus illis miraculis.

Dices 2. Confirmatio nihil est aliud, quàm cæremonia Ecclesiastica pertinens ad solemnitatem Baptismi; nam, ex dictis hætenus de Baptismo; Catechumeni per Episcopum præparabantur ad Baptismum manuum impositione, & sacris unctionibus. Crescente autem numero fidelium, cum Episcopus solus iis tingendis non sufficeret, ministerium illud Presbyteris, & iis deficientibus, Diaconis demandatum est, hac tamen conditione, quod in fronte Neophytos non ungerent, ut patet ex testimonio Innocentii primi mox relato, sicque natum est Sacramentum Confirmationis, quod perficitur unctione incognita Apostolis & toto primo sæculo, sed excogitata ab iis qui formæ baptizandi à Christo Domino præscriptæ, plures cæremonias addiderunt. Confirmatio itaque prout nunc in Ecclesia celebratur non est repetenda ab impositione manuum, per quam Apostoli Spiritum sanctum advocabant, quæque cessantibus in Ecclesia miraculis omninò desit, sed est alia prorsus cæremonia ab Ecclesia instituta: Ergo.

Confirmatur. Vera Sacramenta ubique in Ecclesia conservantur, cæremoniæ verò non ita, sed variant secundum diversas regiones. Unde aliæ sunt apud Latinos, aliæ apud Græcos;

Porro plures Ecclesiæ, ut Æthiopum, Armenorum, non confirmant.

Nego anteced. Constat enim ex testimoniis adductis; 1. Ritus confirmandi descendere ex traditione Apostolica, & deduci ex capite 8. Actuum. 2. Patres distinxisse inter Baptismum, Confirmationem, & Eucharistiam, licet hæc tria Sacramenta simul conferentur, *Sacramentum christi-matis*, inquit S. Augustinus cit. libro contra Petilianum . . . *sacrosanctum est, sicut . . . Baptismus*, 3. Per Confirmationem Spiritum Sanctum tribui, sicut per Baptismum: quod de pura cæremonia non assererent.

Ad Confirmationem respondeo, falsum esse Græcos non retinere Sacramentum Confirmationis; contrarium enim testantur Morinus & Goardus, qui apprimè noverunt illius Ecclesiæ ritus. Idem constat de Æthiopibus seu Abyssinis ex Illorum Euchologio edito tom. 6. Bibliothecæ Patrum, ubi legitur, *Orationes quas dicit Sacerdos cum imponit manus super eos qui confirmandi sunt accipit balsamum, & orat super ipsum postea ungit.* Habentur testimonia authentica in opere de perpetuitate fidei circa Eucharistiam subscripta ab Ægyptiis seu Cophtis, Syris, qui Damascum habitant, Armenis Palæstinæ & Persidis, Confirmationem apud illos esse Sacramentum. Negandum tamen non est, quin particulares Ecclesiæ schismate & ignorantia laborantes in illis regionibus, illud Sacramentum amiserint, in quas fortè incurrerunt Guido Carmelita & Alvarez, ut scriberent illas gentes ignorare Sacramentum Confirmationis.

Instabis: atqui non colligitur Confirmationem

nem esse Sacramentum à Christo Domino institutum, ex eo quòd per illam cæremoniam dicatur dari Spiritus sanctus. Nam in scriptis Veterum communiter legimus, quòd revertentes ab hæresi debeant recipi cum manuum impositione, & sacra unctione ad accipiendum Spiritum sanctum, & ut in fide confirmentur, seu roborentur. Imò apud Methodium auctorem noni sæculi, & in Eucharologiis recentioribus Græcorum, legitur ejusmodi recipi unctione & ablutione: atqui illæ cæremoniæ non erant Sacramentum, ut dictum est c. 14. de Sacramentis in genere; aliàs cogermur admittere Sacramenta Baptismi & Confirmationis in Ecclesia Catholica iterari. Ergo.

Nego subsumptum & confirmationis minorem. Illa enim manus impositio erat reconciliatoria, designabatque Sacramentum Pœnitentiæ, ut cit. cap. 14. de Sacramentis in genere probavimus. Verum quidem est, quòd post tempora Syricii Papæ, qui meminit solius manus impositionis, qua per totum orbem recipiebantur revertentes ab hæresi, additæ sunt quædam cæremoniæ, ut chrismatio, præsertim in Oriente, ex can. 7. Concilii Constantinopolitani, qui vel ad Syricii notitiam nondum pervenerat, vel ut spurcius ab eo rejiciebatur, cum Ecclesia Romana primis temporibus, nonnisi tres hujus Concilii canones agnosceret: quòd autem successu temporis hujusmodi pœnitentes etiam abluerentur, servarenturque circa eos cæremoniæ, tum Baptismi, tum Confirmationis, efficax est argumentum Confirmationis Sacramentum non fuisse iteratum, sed cæremoniam planè similem, qua significaretur effectus hujus Sacramenti reviviscere

per pœnitentiam, alioquin dicere cogeremur etiam apud Græcos Baptismum à nono sæculo solere repeti. Itaque sicut ablutio illa apud eos est cæremonia repræsentans Baptismum, sic & chrismatio figurat Confirmationem, suntque duo signa sensibilia, quodd per Sacramentum pœnitentiæ reviviscant effectus utriusque Sacramenti, Spiritum sanctum recipiant pœnitentes, & in fide confirmentur.

Dices 3. Cùm Sacramenta sint quid præcipuum in Religione, & veluti quædam Ecclesiæ fundamenta, nihil notius & certius esse debet, quàm ritus, quo perfici debent: atqui omninò incertum est etiam in Ecclesia Romana, quæ sit materia, quæve forma Confirmationis; alii enim contendunt sola manuum impositione perfici illud Sacramentum, alii manus impositione & chrismatione simul, alii sola chrismatione, & hi rursus inter se dissentiunt; alii enim docent chrismationem nullam fore nisi fiat ex oleo & balsamo permixtis; alii simplex oleum sufficere contendunt: alii statuunt oleum ad veritatem Sacramenti esse ab Episcopo consecrandum: alii negant, voluntque illam consecrationem esse cæremoniam merè Ecclesiasticam, adeo ut jam non sit reperire Confirmationem à Christo Domino institutam, ergo fatendum est illam non esse Sacramentum; Ecclesia enim cautè & fideliter servat depositum sibi creditum, nec finit quidquam circa illud immutari, sive detrahendo; sive superaddendo.

R. Hoc argumento expungenda essent Eucharistia & Baptismus è numero Sacramentorum. Nonne plures hæretici, ut Colliridiani, Aquarii, &c. diver-

diversas materias obtrudebant ad conficiendam Eucharistiam? Nonne etiam Novatores nostri docuerant Baptismum posse celebrari in vino, lacte, & in qualibet alia materia apta ad ablundum? An non etiam Catholici diu pugnarunt inter se circa materiam proximam Baptismi, aliis contententibus immersionem esse necessariam, aliis triplicem requirentibus, aliis unicam, aliis infusionem, vel asperisionem sufficere? Ecclesia hunc opinandi pruritum tum reprimat, cum periculum est ne error contra veritatem prævaleat: sic in Concilio Tridentino aquam naturalem pro materia necessaria Baptismi asseruit contra Novatores, qui novitate sua Sacramentum Baptismi è medio tollebant. Quoad verò controversias, quæ salva pace in Scholis agitantur circa Sacramentorum materias & formas, sedulò cavet ne veritati eorundem Sacramentorum & salutis fidelium noceant, prohibetque ne quis Minister in praxi sequatur opinionem probabilem, tutiore omiſſa, neve immutet præscriptum ritum, in quo nihil desideratur eorum, quæ necessaria sunt ad Sacramentorum veritatem. Sic in ritu Confirmationis habes manus impositionem & quidem duplicem, chrismationem ex oleo & balsamo ab Episcopo benedictis: ubi autem urgebit necessitas explicandi fidelibus quid ex his præcisè sit à Christo Domino institutum, Ecclesia non deerit suo officio.

Interim quoties nobis certamen est cum hæreticis, sedulò declinandæ sunt Scholæ controversiæ, in quas illi calidè incautos dejiciunt, ut Sacramentum Confirmationis difficultatum caligine obvolutum faciliùs de medio tollant; hærendumque

dumque Scripturæ & Traditioni, quæ tam clarè demonstrant Spiritum Sanctum per manus impositionem conferri, ut adversarii nonnisi telas araneorum contra opponant. Hoc consilium secutus Bossuetus Episcopus Meldensis in expositione fidei à summo Pontifice & ab aliis Episcopis communiter approbata, sic scribit : *Cum impositio manuum à Sanctis Apostolis adhibita ad confirmandos fideles pro principali effectu habeat descensum interiorum Spiritus Sancti, non debuit rejici ab adversariis . . . Idcirco eam omnes Ecclesiæ ab Apostolorum temporibus religiosè conservarunt. Chrismate autem utentes ad demonstrandam hujus Sacramenti efficaciam, expressiori significatione unctionis interioris Spiritus Sancti.*

CAPUT III.

De materia & forma Sacramenti Confirmationis.

Certum est formam Confirmationis esse verba, quæ profert Episcopus dum applicat materiam, quæcunque tandem illa sit; nam ex dictis de Sacramentis in genere, forma cujusque Sacramenti, sunt verba, quæ expressius significant determinantque materiam ad designandum effectum Sacramenti, v. g. in Baptismo, cum aqua possit assumi vel ad refrigerandum, vel ad abluendum, determinatur ejus usus per hæc verba, *Ego te baptizo*: ergo verba quæ profert Episcopus applicando Confirmationis materiam habenda sunt pro hujus Sacramenti forma: hæc in confesso sunt apud omnes. Sed gravis difficultas est, & variæ sententiæ circa Confirmationis materiam.

Prima

Prima Sententia solam manuum impositionem assignat ; quia ea est materia Confirmationis, quam Apostoli adhibuerunt : atqui Apostoli solam adhibuerunt manuum impositionem, Act. 8. v. 17. Ergo. Ita Sirmondus è Societate Jesu, Sanbo-vius olim in Academia Parisiensi Professor Regius, & alii.

Secunda Sententia è diametro opposita negat impositionem manuum pertinere ad essentiam Sacramenti, contenditque Ecclesiam pro potestate à Christo sibi concessa determinandi materias Sacramentorum loco impositionis manuum chrismationem statuuisse, ut docet Eugenius Papa in decreto pro Armenis.

Tertia Sententia media inter utramque posita definit impositionem manuum simul & chrismationem esse integram, & adæquatam Sacramenti materiam, & utramque adhibitam fuisse ab Apostolis, ac deinceps retentam in Ecclesia tum Orientali, tum Occidentali ; sed non consentiunt inter se hujusce sententiæ patroni, alii quippe volunt chrismationem esse partem essentialem ; alii affirmant esse duntaxat integram, quemadmodum alteram speciem in Eucharistia, & satisfactionem in Pœnitentia.

Ex secunda & tertia sententia duplex oritur difficultas. Prima, utrùm mixtio balsami & olei sit institutionis divinæ, adeoque de substantia Sacramenti ; an verò Ecclesiasticæ duntaxat. Secunda, an benedictio Episcopalis, quæ in Ecclesia fit cum magno apparatu & solemnitate, sit de necessitate Sacramenti. Quæ omnia sequentibus Paragraphis discutienda sunt.

§. I.

Utrum manuum impositio sit essentialis materia Confirmationis?

R. Est materia essentialis.

Probatur 1. ex Scripturis, Act. 8. v. 17. *tunc imponebant (Apostoli) manus super illos, & accipiebant Spiritum Sanctum*, Act. 19. v. 6. *Et cum imposuisset illis manus Paulus, venit Spiritus Sanctus super eos.*

Probatur 2. ex constanti Traditione Ecclesiæ tum Latinæ, tum Græcæ, ac 1. quidem Latinæ.

Tertullianus lib. de resurrectione carnis c. 8. *caro, inquit, signatur, ut & anima muniatur, caro manus impositione adumbratur, ut & anima spiritu illuminetur.*

Sanctus Cyprianus Epist. 73. *Nunc, inquit, apud nos geritur, (quod observaverunt Apostoli) ut qui in Ecclesia baptizantur, per Præpositos Ecclesiæ offerantur, & per nostram orationem, ac manus impositionem Spiritum Sanctum consequantur.*

S. Hieronymus dialogo contra Luciferianos cap. præcedenti laudato, scribit, quòd *Episcopus ad invocationem Sancti Spiritus manum impositurus excurrat.*

S. Aug. cit. tract. 6. in primam S. Joannis Epist. ait num. 10. *nunquid modò quibus imponitur manus, ut accipiant Spiritum Sanctum, hoc expectatur, ut linguis loquantur?*

S. Gregorius hom. 10. in Evang. *per manuum nostrarum impositionem, inquit, Spiritum Sanctum percipiunt.* Similia habet ejus coætaneus S. Isid. Hispalensis lib. 2. de officiis cap. 26. Beda in cap. primum Cant. Canticorum, Theodulphus Aurelia-

lianensis lib. de ordine Baptismi cap. 16. Amalarius lib. de officiis c. 27. Rabanus Maurus lib. 1. Instit. Cleric. cap. 3. Denique Concilia Senonense, anno 1525. Moguntinum, 1569. Remense, 1593. Narbonense, 1589. manuum impositionem pro materia Confirmationis assignant.

Nec minùs constans est Traditio in Ecclesia Græca.

S. Irenæus olim S. Policarpi auditor, & præcedenti capite laudatus, asserit idem nunc observari in Ecclesia quod Apostoli factitarunt Act. 8.

Sanctus Firmilianus Epistola 75. inter Epistolas Sancti Cypriani, sic scribit ad eundem Sanctum Martyrem, *Si in nomine Christi valuit foris Baptisma ad hominem purgandum, in ejusdem Christi nomine valere illic potuit manus impositio (Confirmatio) ad accipiendum Spiritum Sanctum.*

Theodoretus in cap. 6. ad Heb. *per manuum impositionem Sacerdotalem, inquis, Spiritus Sancti gratiam accipiunt.*

Simeon Theffalonicensis lib. de templo sic habet, *per manuum impositionem, & inspirationem unguenti gratiam inserit.* Scripsit autem ille auctor post ortum Græcorum schisma.

Dices 1. Eugenius IV. in Decreto pro Armenis docet loco manus impositionis, per quam Apostoli dabant Spiritum Sanctum, in Ecclesia dari Confirmationem. Ergo manuum impositio non est de essentia hujus Sacramenti.

Nego consequ. Sensus enim illorum verborum est, idem Sacramentum, quod in Scriptura vocatur manus impositio, nunc vocari Confirmationem. Hunc sensum indicat Innocentius III. cap.

cum

cum venisset, de sacra unctione, ubi respondet per frontis chrismationem designari manus impositionem Apostolorum.

Dices 2. Ecclesia Orientalis à pluribus sæculis Sacramentum Confirmationis administrat sine ulla manus impositione, quod Ecclesia Latina nunquam Græcis objecit, quoties eos redeuntes in suam communionem recepit, ut in Concilio Lugdunensi secundo, & Florentino : Ergo.

Nego ant. tum quia Græci præmittunt orationem manibus extensis ad confirmandos, per quam invocant Spiritum Sanctum : tum quia, si in illa oratione nulla fit manuum extensio, sicut nullam præscribunt recentiora eorum Euchologia, chrismatio non fit sine manus impositione. Unde frequenter apud Veteres ungere & manus imponere idem sunt. *Illa unctio*, inquit Beda in Psalm. 26. *quæ per manus impositionem fit, vulgo Confirmatio dicitur.* Amalarius lib. 1. de Officiis Ecclesiasticis cap. 21. sic habet, *ut ab Episcopis solis inungantur per manus impositionem ab Apostolis assumptum est.* Ivo Carnotensis serm. de veteri & novo Testamento ait *per manus impositionem sacro chrismate confirmantur.* Hugo à Sancto Victore l. 1. de Sacram. p. 7. cap. 21. *Christianus, inquit, unctione chrismatis per impositionem manus in fronte signatur.* Innocentius III. cap. *quantò*, de consuetudine, eadem mente scribit, *Sacramentum Confirmationis chrismando renatos soli debent Episcopi per manus impositionem conferre.* Ubi chrismare, & manum imponere sunt unum & idem. Quare merito Bossuetus Meldensis Episcopus in Expositione fidei à Summo Pontifice approbata, asserit impositionem

sitionem manuum omnes Ecclesias religiosè retinuisse ab Apostolorum ævo.

Instabis in chrismatione una manus imponitur, cùm tamen laudati Patres utriusque manus impositionem requirant. Ergo.

Nego conf. hætenus enim ex Traditione satis esse si una imponatur manus, id à Petro & Joanne factum est, inquit S. Cyprianus citat. Epist. 73. *ut oratione pro eis habita, & manu imposita, &c.* Sanctus Hieronymus dialogo contra Lucifer. ait, *Episcopus, si imponat manum, iis imponit, qui in recta fide baptizati sunt.* In Sacramento quoque Sancti Gregorii legitur, *levata manu.*

Q. 2. *Impositio, seu extensio manuum, quæ in Ecclesia Latina ab unctione distinguitur, estne essentialis Sacramento?*

R. Non idem sentiunt Theologi. Negant, qui stant pro secunda sententia definiente chrisma esse adæquatam Sacramenti materiam. Affirmant verò non solum, qui agnoscunt impositionem manuum pro unica Confirmationis materia; sed ex his plures, qui ei adjungunt chrismationem, tum quia chrismatio nonnisi improprie dicitur manuum impositio: tum quia Tertullianus, S. Cyprianus, & Ordo Romanus manus impositionem, per quam datur Spiritus Sanctus, distinguunt à chrismatione.

Obiiciunt i. prioris sententiæ patroni. Ecclesia ritum cujusque Sacramenti ita ordinavit, ut semper præmittat preces, & accidentales cæremonias, quibus præparentur initiandi: atqui in ritu Confirmationis nihil præcedit illam manuum extensionem: ergo extensio illa non est pars essentialis Sacramenti.

Resp.

Resp. maj. non esse universaliter veram; namque ritus Sacramenti Matrimonii inchoatur à consensu contrahentium, qui est essentialis Sacramento.

Nonnulli addunt ideo in ritu Confirmationis nullas cæremonias præparatorias præmitti, quia Sacramentum illud antiquitus simul cum Baptismo conferebatur, sicque Neophyti ad utrumque Sacramentum disponebantur per easdem cæremonias. Sed responsio illa non plenè satisfacit; namque Eucharistia etiam cum Baptismo administrabatur, & nihilominus accedentes ad eam præviis precibus & cæremoniis præparantur.

Objiciunt 2. Non rarò accidit, quòd Neophyti chrismantur, etiamsi prius non fuerint subjecti præviæ illi manuum impositioni, quod præsertim cernere est in magno populorum concursu, ubi Episcopus chrismat à manè ad meridiem; nam fideles ex diversis locis successivè ad Ecclesiam confluunt, & cum aliis sacra unctione liniuntur, licèt tum absentes fuerint, cùm Pontifex manibus extensis Spiritum Sanctum invocaret. Ministri quidem Episcopo assistentes sollicitè monent ne quis egrediatur ante acceptam benedictionem Episcopalem, quæ solet impertiri expleta cæremonia; sed nulla attentio, nullave cura, ne quis numero chrismandorum se adjungat, nisi manus Episcopalis prius fuerit ei imposita, quod signum est illam non pertinere ad integritatem Sacramenti.

Resp. illum morem esse abusum corrigendum etiam in eorum sententia, qui docent cæremoniam illam esse accidentalem; namque ex usu & præcepto Ecclesiæ, si quid omissum est in ritu Sacramentorum, debet postea suppleri, ut exorcismi,

cismi, & aliæ cæremoniæ Baptismi, quæ in casu necessitatis prætermissæ sunt.

Porro si tam accurate servari debent ritus, quos constat non pertinere ad Substantiam Sacramenti, quantò magis, quem graves Theologi & quidem magno numero docent esse essentialem? Quapropter Pastores diligenter moneant, quos ad Confirmationem disponunt, ne quis ungendus accedat, nisi præsens adfuerit, cum Episcopus super confirmandos Spiritum Sanctum invocaret: in id etiam invigilent Ministri Episcopum circumstantes. Et quia difficile cavetur, ne in magno concursu ejusmodi abusus subrepat, plerique Episcopi hac utuntur cautela, nimirum eorum jussu confirmandi in distinctos ordines distribuuntur, ita ut integer Confirmationis ritus circa eos, qui sunt primi ordinis, expleatur: tum iis recedentibus, repetatur oratio cum manuum extensione, & reliquo ritu super eos, qui sunt secundi ordinis, & sic deinceps.

§. II.

Utrum unctio sit partialis materia Confirmationis?

R. I. Nihil Ecclesia circa hanc quæstionem hætenus definiit. Est communis Theologorum sententia contra Suarez, qui disp. 33. sect. 1. existimat esse de fide chrismationem pertinere ad essentiam Confirmationis.

Probatur, quia nullibi extat ejusmodi Ecclesiæ definitio.

Dices I. pro Suarez, Concilium Florentinum decrevit materiam Confirmationis esse chrisma ex oleo & balsamo confectum: Ergo.

D. Habert Theolog. Tom. V.

U

Nego

Nego antec. 1. quia illud decretum non est Concilii Florentini, sed Eugenii quarti in instructione Armenis data post solutum Concilium. 2. quia quaecunque in hac instructione continentur; v. g. quòd in Calice Eucharistico miscenda sit paucissima aqua; non sunt de fide. 3. quia ejusmodi instructio non proponitur universali Ecclesiæ, sed spectat solum Armenos. 4. quia Summus Pontifex ibi duntaxat tradit disciplinam Romanæ Ecclesiæ, cui Armenos conformari exoptabat, quamvis Concilium Florentinum paulò ante decrevisset Græcos, salva fide & pace, posse retinere suæ Ecclesiæ ritus & disciplinam, quæ sanè in multis discrepat ab iis, quæ habentur in instructione pro Armenis.

Dices 2. Concilium Trid. rem definiit sess. 7. can. 2. de Confirmatione, in quo sic statuit: *Si quis dixerit, injurios esse Spiritui Sancto eos, qui sacro Confirmationis charismati virtutem aliquam tribuunt; anathema sit.* Ergo.

Nego ant. Concilium enim in hoc can. præcisè definiit, posse dici absque injuria Spiritus Sancti, consecratum chrisma habere aliquam virtutem. Sed unde habeat, an ex benedictione & suffragiis Ecclesiæ, quemadmodum alia Sacramentalia, v. g. exorcismi, aqua benedicta, &c. an verò ex institutione Christi, quasi illud elegerit in materiam Sacramenti, Concilium quæstionem hanc minimè attingit. Pueriliter ergo ac prorsus inepte Kemnitius ex Lutheranorum secta tripudiat, cum scribit in hunc canonem, *divinitus factum est, quòd non est retenta impositio manuum in Pontificia Confirmatione, sed substituta est chrismatio, ut Ecclesia, animadversa palpabili differentia inter*
manu-

manuum impositionem, & Confirmationem in fronte, non tam facile seduci possit allegatione historiarum Act. 8. & 19.

R. 2. Unctio, quæcunque illa sit, sive ex oleo simplici, sive ex oleo & balsamo mixtis, est ex institutione Christi, & partialis materia Confirmationis. Ita S. Thomas hic q. 72. art. 2. & alii communiter Theologi contra Sirmondum, Sanbovium, & alios.

Probatur ex constanti Traditione universalis Ecclesiæ tum Occidentalis, tum Orientalis; ac primò quidem Occidentalis.

Tertull. lib. de Bapt. cap. 7. exinde, inquit, egressi de lavacro perungimur benedicta unctioe . . . sic & in nobis carnaliter currit unctio, sed spiritualiter proficit: quomodo & ipsius Baptismi carnalis actus, quòd in aqua mergimur; spiritualis effectus, quòd delictis liberamur. Et cap. 8. deinde manus imponitur, per benedictionem advocans & invitans Spiritum Sanctum. Et lib. de resurrectione carnis cit. cap. 8. caro ungitur, ut anima consecretur.

S. Cyprianus Epist. 70. ungui necesse est, inquit, eum qui baptizatus sit, ut accepto chrismate, id est, unctioe, esse unctus Dei, & habere in se gratiam possit.

Sanctus Pacianus Episcopus Barcinonensis & Martyr, Epistola 1. sic scribit. Hoc ergo superædificavimus, quod Apostolorum doctrina fundavit si ergo & lavacri & chrismatis potestas ad Episcopos inde descendit, & ligandi quoque adfuit, atque solvendi.

Sanctus Ambrosius lib. de initiandis cap. 6. Omnes, inquit, in regnum Dei, & in sacerdotium unguimur gratia spirituali. Et lib. 2. de Sacr. cap. 7.

Venisti ad Sacerdotem, quid tibi dixit? Deus, inquit, Pater omnipotens, qui te regeneravit ex aqua, & Spiritu Sancto, concessitque peccata tua, ipse te ungit in vitam æternam.

S. Augustinus Serm. 227. aliàs 83. de diversis, ubi loquens de Baptismo & Confirmatione, quæ simul Neophitis conferebantur, sic habet: *Accessit Baptismus & aqua, quasi conspersi estis, ut ad formam panis veniretis. Sed nondum est panis sine igne. Quid ergo significat ignis? hoc est chrisma. Oleum etenim ignis nostri Spiritus Sancti est Sacramentum.*

Innocentius I. Epist. prima, scribit baptizatorum frontem oleo consignare, solis deberi Episcopis, cùm tradunt Spiritum Sanctum.

Theodulphus Aurelianensis libro de ordine Baptismi cap. 16. quibus etiam, inquit, *septiformis gratia Spiritus per chrismatis unctionem conceditur.*

Ejusdem Traditionis in Ecclesia Orientali testes adduci possunt, Concilium Laodicenum quarto sæculo celebratum, quod sic habet canone 48. *oportet eos, qui illuminantur post Baptismum inungi supercælesti chrismate, & esse regni Christi participes.*

Sanctus Cyrillus Jerosolymitanus catech. 3. de chrismate ait: *Christi & Spiritus Sancti divinitatis ejus præsentiam efficit corpus quidem isto visibili unguento perungitur, anima verò sancto, vivifico quo Spiritu sanctificatur.*

Theodoretus lib. 4. in Cant. Canticorum, velut sigillum quoddam regium suscipiunt, spiritualis unguenti chrisma recipientes gratiam invisibilem sanctissimi Spiritus unguento tanquam in typo.

S. Cyrillus Alexandrinus in illud Joelis, *redundabunt torcularia vino & oleo, ait, accessit item usus olei,*

olei, qui per sacrum Baptisma in Christo justificatis ad confirmationem confert.

Mitto Sacramentarium S. Gregorii, Ordinem Romanum, Euchologia Græcorum, in quibus chrismatio designatur tanquam signum, quo Spiritus Sanctus datur.

Ex his testimoniis sic ratiocinari licet cum Sancto Augustino lib. 4. de Baptismo cap. 24. *quod universa tenet Ecclesia, nec Conciliis institutum, sed semper retentum est, non nisi Auctoritate Apostolica traditum rectissime creditur*: atqui ex testimoniis laudatis, Ecclesia semper & ubique adhibuit chrismationem tanquam signum, quo datur Spiritus Sanctus, baptizatus perficitur, & particeps regni cœlestis efficitur, constatque eam in nullo Concilio fuisse institutam, cùm esset in usu antequam ullum Concilium legatur in Ecclesia celebratum, ut colligitur ex Tertulliano supra laudato: ergo reverà chrismatio est ab Apostolis tradita, tanquam à Christo instituta.

Ergo chrismatio est pars Confirmationis, non solum integrans, sed etiam essentialis, cùm in allatis textibus tribuatur illi primarius effectus Sacramenti.

Ergo sine chrismatione non valet Sacramentum, nec unquam sine ea collatum est, nisi fortè in aliqua Schismaticorum Orientalium secta, ut evincit Petrus Aurelius contra Sirmondum.

Dices 1. Apostoli per solam manuum impositionem confirmasse referuntur, Act. 8. & 19. & ita Concilium Moguntinum anno 1569. intellexit illa Scripturæ loca; sic enim habet cap. 17. *Hoc Sacramentum ab initio sola manus impositione exhibitum, mox sub ipsis temporibus Apostolorum, & ex*

eorundem Traditione, adhibita chrismatis unctione, cœpit conferri.

Præiverant Concilio Moguntino Oecumenius auctor vel octavi sæculi, ut volunt nonnulli, vel undecimi secundum alios; sic enim scribit in capite 8. Actuum Apostolorum: *mox in locum signi visibilis unctio adhiberi cœpit.* Walfridus Strabo nono sæculo, juxta eandem sententiam, ait capite 26. lib. de Rebus Ecclesiasticis, primis temporibus manuum impositione Confirmationem fuisse peractam: *sed crescente, inquit, successu temporum Religionis honore addidere alii chrismatis unctionem.* Petrus Cantor in summa docet Confirmationem esse partim ab Apostolis, quantum ad manus impositionem, partim ab Ecclesia, quantum ad alia.

Alexander de Hales, & ejus Discipulus Sanctus Bonaventura scribunt Sacramentum Confirmationis post obitum Apostolorum fuisse institutum, quantum ad materiam elementarem, hoc est chrismationem, quam Halensis vult definitam in Concilio Meldensi octavo sæculo. Ergo chrismatio est Institutionis Ecclesiasticæ, ac proinde Sacramento merè accidentalis.

Nego conseq. Ad antecedens verò non una est Theologorum responsio.

Qui contendunt Christum materias & formas quorundam Sacramentorum non determinasse nisi in genere, illasque reliquisse Ecclesiæ determinandas quoad speciem, respondent Apostolos re vera sola manuum impositione dedisse sanctum Spiritum, sed Ecclesiam postmodum vel loco impositionis manuum instituisse unctionem, in hypothesi quòd illa sit hodie adæquata
Sacra.

Sacramenti materia, vel addidisse manuum impositioni, si utraque etiam nunc sit de essentia Sacramenti. Quodd autem illa mutatio vel additio facta sit in Concilio Meldensi, manifestus est error, cum constet ex laudatis Patribus unctionem secundo, tertio, & quarto sæculo fuisse ubique adhibitam. Fortè intelligendus est Halensis de mixtione quadam olei & alterius liquoris, putà balsami, in Concilio Meldensi præcepta; nam ex dicendis §. sequenti, nonnulli Theologi contendunt, prioribus sæculis simplex oleum fuisse adhibitum. Sed cum nostra fuerit sententia Tractatu de Sacramentis in genere, Christum determinasse in specie materiam cujuslibet Sacramenti,

Respondeo ad anteced. cum S. Thoma q. 72. art. 2. ad primum, Apostolos, hoc Sacramentum non contulisse sine unctione. Ibi enim S. Doctor duo docet: primum, Apostolos aliquando absque usu Sacramenti dedisse plenitudinem Spiritus Sancti: *Ad impositionem manus Apostolorum, inquit, & etiam ad eorum prædicationem descendebat plenitudo Spiritus Sancti super fideles sub visibilibus signis . . . & ideo non erat necessaria sensibilis materia Sacramentalis, ubi sensibilia signa miraculosè exhibebantur divinitus. Utebantur tamen Apostoli communiter chrismate in exhibitione Sacramenti, quando hujusmodi visibilia signa non exhibebantur.* Nec obstat quodd Scriptura nusquam meminerit unctionis, sed solius manuum impositionis; nam ex S. Augustino lib. de fide & operibus cap. 19. Scriptura multa tacet brevitatis gratia, quæ serie Traditionis constat ab Apostolis fuisse usurpata; atque in hujusce veritatis exemplum pro-

fert Eunuchum, quem S. Lucas narrat Aët. 8. baptizatum fuisse à Philippo, cùm respondisset, *Credo filium Dei esse Jesum*, cæteris prætermiſſis, quæ ab initiando explicite credenda sunt, *intelligi voluit*, inquit Sanctus Doctor, *impleta omnia, quæ licet taceantur in Scripturis brevitatis gratia, tamen serie Traditionis scimus implenda.*

Confirmatur ex laudatis §. primo textibus, in quibus Sancti Patres Sacramentum Confirmationis sæpe indigitant per manuum impositionem nulla facta mentione unctionis, quam tamen alibi agnoscunt fuisse in usu, dum scriberent.

Instabis; certò colligimus Apostolos in sacra Ministrorum ordinatione unctionem non adhibuisse, ex eo quod Scriptura non meminerit nisi manuum impositionis; ergo à pari idem colligere licet de Confirmatione, cùm Scriptura non minus constanter ritum illius reponat in manuum impositione.

Nego conseq. & paritatem; quia ut verbis Sancti Augustini loquar, serie Traditionis scimus implendam unctionem in Confirmatione, non verò in Ordinatione.

Dices 2. Canone primo Concilii Arausici primi, habetur peragendam Confirmationem sola manuum impositione, quando baptizatus in vertice fuit chrismate inunctus, *qui in baptismo, inquiunt Patres, quacunque necessitate, non chrismatus fuerit, in confirmatione Sacerdos (id est Episcopus) monebitur. Nam inter quoslibet chrismatis ipsius nonnisi una benedictio est. Non ut præjudicans quicquam, sed ut non necessaria habeatur repetita chrismatio.* Ergo chrismatio non est essentialis Confirmationi.

Nego

Nego anteced. sensus enim in objectione prolatus non est genuinus canonis sane obscurissimi, quem tamen controversia Petri Aurelii cum Sirmondo celebrem efficit. Sirmondus canonem exponebat eo sensu, quo nobis hic objicitur: Petrus verò Aurelius contendebat ex nonnullis codicibus manuscriptis, vitiata esse lectionem Sirmondi, legendaque postrema canonis verba absque particula negativa hoc modo, *sed ut necessaria habeatur repetita chrismatio*, ita ut sensus sit, quando in Baptismate omissa est propter aliquam necessitatem chrismatio verticalis, monendus est Episcopus confirmaturus, ut priusquam ad ritum Confirmationis pergat, suppleat quod in Baptismate omissum est, nempe verticem baptizati chrismate inungat, non præjudicans chrismationi confirmatoriæ, quæ sit in fronte necessaria, quippe est utraque chrismatio.

Sanbovius, qui cum Sirmondo opinatur, unctionem esse accidentalem Confirmationis cæremoniam, non existimat suam opinionem posse fulciri hoc can. probatque Aurelii lectionem; quia *ea semper fuit Ecclesiæ mens, ut supplerentur cæremoniæ in Baptismo omissæ*. Quòd si particula negativa retineatur, is erit sensus canonis, non ita dicimus chrismationem, in Baptismo omissam ab Episcopo supplendam, ut necessaria habeatur ad veritatem Confirmationis secuturæ, sine ea quippe valeret Sacramentum.

Ex dictis circa materiam Confirmationis satis intelligitur, quæ sit ejus forma, cum forma cujuslibet Sacrament sint verba, quæ in usu materiæ proferuntur, v. g. *Ego te baptizo*, &c. dum infunditur aqua. Ergo si chrismatio sit acciden-

talis, sola verò manuum extensio essentialis, forma essentialis erit oratio, quam Episcopus manibus extensis fundit super Neophytos: contra verò quibus sola chrismatio est essentialis, iisdem verba, quæ tunc proferuntur, sunt unica forma Sacramenti.

Dissentiunt tamen inter se, qui nobiscum agnoscunt manuum impositionem & chrismationem simul esse adæquatam Confirmationis materiam. Namque S. Thomas q. 72. art. 4. Catechismus Romanus, & alii benemulti pro unica forma statuunt verba, quæ Episcopus statim nulla interposita mora, post extensionem manuum profert, dum frontem inungit, *signo te signo Crucis*, &c. Alii verò, & quidem non pauci, contendunt orationem, quæ unctionem præcedit, esse formam essentialem, tum apud Latinos, tum apud Græcos: verba autem, quæ comitantur unctionem, habenda ut cæremoniam merè accidentalem; probantque, quia ea forma est essentialis in Confirmatione, quam adhibuerunt Apostoli, quamque Ecclesia ab eorum temporibus semper & ubique retinuit; accidentalis verò censenda est, quæ nonnisi posterioribus sæculis est usurpata: atqui illam orationem adhibuerunt Apostoli, Act. 8. *Oraverunt pro ipsis, ut acciperent Spiritum Sanctum Tunc imponebant manus super illos*, &c. Ad quem locum respiciens S. August. lib. 15. de Trinit. c. 26. ait: *Orabant, ut venirent ad eos, quibus manus imponebant Quem morem in suis Præpositis etiam nunc servat Ecclesia.*

S. Hieronymus Dialogo contra Luciferianos supra laudato, ut Episcopus, inquit, ad invocationem Spiritus Sancti manum inpositurus excurrat.

Ama-

Amalarius Archiepiscopus Trevirensis lib. 1. de Officiis cap. 27. *ut per manuum impositionem, & orationem detur Spiritus Sanctus, similiter ab Apostolica Auctoritate sumptum est.* Orationem inunctioni præmittendam præscribunt Euchologia Græcorum, S. Gregorii Sacramentarium, Ordo Romanus, & Occidentalis Ecclesiæ Pontificalia. Verba autem illa, *signo te*, &c. nusquam reperiuntur in Ritualibus Latinis ante octavum sæculum, nec ubique obtinuerunt ante duodecimum. Alcuinus, qui scripsit de divinis Officiis octavo, refert Pontificem, finita oratione, frontes singulorum charismate signare, dicendo, *In nomine Patris, & Filii*, &c. Amalarius cit. c. 27. sic scribit nono sæculo: *oratione expleta facit crucem cum pollice ex chrismate in singulorum frontibus, ita dicendo: In nomine Patris, &c.*

§. III.

Utrum mixtio olei & balsami, ac utriusque Episcopalis benedictio sint de necessitate Sacramenti?

R. Communis est Theologorum sententia, Ecclesiam nihil determinasse circa propositam quæstionem; nam quod affert Suarez citata disput. 33. sect. 1. ex Decreto Eugenii, & ex can. 2. Concilii Trid. de Confirmatione, solvimus §. præcedenti pag. 287. & 288. Hinc variæ Scholarum opiniones.

Qui asserunt unctionem esse Institutionis Ecclesiasticæ, nec pertinere ad substantiam Sacramenti, una voce concludunt nec mixtionem olei cum balsamo, nec benedictionem Episcopalem esse de necessitate Sacramenti.

Ex his

Ex his verò, qui nobiscum docent unctionem esse institutionis divinæ, & essentialem Confirmationis partem;

Alii, ut S. Thomas q. 72. art. 2. & 3. contendunt mixtionem & benedictionem pertinere ad essentiam Sacramenti, probantque 1. de mixtione, quia observatur in universalis Ecclesia, Græca & Latina, ut constat ex antiquis Græcorum Euchologiis, ex Sacramentario S. Gregorii, ex Ordine Romano, ex S. Gregorio, qui in illa verba Cantici Canticorum cap. 1. *Botrus Cypri dilectus meus in vineis Engaddi*, sic scribit: *In Engaddi balsamum gignitur, quod cum oleo, pontificali benedictione chrismata efficitur, quo dona Spiritus Sancti exprimuntur.*

Pro benedictione verò, præter laudatum S. Gregorii testimonium, & librum Ordinis Romani, proferuntur S. Cyrillus Jerosolymitanus Catech. 3. in qua sic habet: *Sanctum hoc unguentum non amplius est unguentum nudum. . . . postquam consecratum est.* S. Basilii lib. de Spiritu sancto c. 27. *Benedicimus baptismatis aquam, & unctionis oleum.* Quibus verò Scripturis edocti? nonne à secreta & silente Traditione? Concilium II. Carthaginense cap. 2. *chrismatis consecratio*, inquit, *& puellarum consecratio à Presbyteris non fiant.* Et Concilium III. Carthaginense can. 36. *Presbyter chrismata nunquam conficiat.* Similia habet Innocentius I. epist. 1. ad Decentium.

Alii verò benemulti negant mixtionem & benedictionem esse de necessitate Sacramenti.

Contra mixtionis necessitatem hæc momenta proferunt. 1. Ecclesiæ in hac mixtione variant; nam Latina miscet balsamum, Græca vero triginta quinque Aromatum species. Præterea hujusce mixtionis nullum vestigium apud antiquiores Patres,

tres, Tertullianum, Cyprianum, Cyrillum Jerosolymitanum, Basilium, Augustinum, &c. nec dicas eos meminisse chrismatis, & sacri unguenti; nam chrisma apud Græcos latinè dicitur unctio, quæ peragitur quolibet pingui liquore, sive ille sit simplex oleum, sive aliud quidpiam. Unde S. Augustinus tract. 33. in Joan. vocat oleum olivarum, unguentum ac chrisma: & Innocentius I. citata epist. ad Decentium, oleum infirmorum indigitat nomine chrismatis. Laudatur quidem epist. Sancti Fabiani ad Orientales, in qua eorum excusationem confutat, quòd balsamum difficilè inveniret ad conficiendum quotannis sacrum chrisma. Sed constat apud omnes supposititiam esse ejusmodi epistolam. Denique etiamsi mixtio balsami, aut alterius liquoris semper fuisset in usu, quemadmodum mixtio aquæ in calice Eucharistico, cujus meminere Patres antiquissimi, ut Sanctus Justinus apol. 2. & Sanctus Cyprianus epist. 63. non posset inde certò colligi priorem magis pertinere ad substantiam Sacramenti, quàm posteriorem.

Contra necessitatem benedictionis episcopalis, quæ quidem est perantiqua, ut constat ex textibus pro opposita sententia laudatis, affertur S. Basilus cit. lib. de Spiritu sancto c. 27. ubi confert benedictionem chrismatis cum benedictione fontis baptismalis, *Benedicimus*, inquit, *baptismatis aquam, & unctionis oleum*: atqui benedictio aquæ baptismalis, licèt videatur Traditionis Apostolicæ, non pertinet tamen ad substantiam Baptismi, sed est duntaxat præcepti Ecclesiastici: ergo nec benedictio chrismatis: nec disparitas ex Scriptura aut traditione proferri potest.

Quid

Quid verò, stante ejusmodi gravium Theologorum discordia, sentiendum sit, definiendum relinquimus Episcopis, qui hocce nostro opere uti voluerint, satisque nobis est simpliciter exposuisse eorum Clericis utriusque partis momenta, quibus paratiores reddantur ad amplectendum, quam eorum Prælati determinaverint, sententiam.

Et certè quamlibet amplexi fuerint, non potest esse indubitata. Unde in praxi præscriptum Sacramenti ritum integrè observare oportet; adeo si quid ex inadvertentia fuerit prætermissum, cautè suppleatur, quamvis secundum opinionem probabilem minùs necessarium judicetur, v. g. si quis chrismatus non fuerit Episcopi manibus substratus, substernatur invocato super eum Spiritu sancto: si incautè oleum non benedictum, vel oleum Catechumenorum, aut infirmorum pro chrismate adhibitum fuerit, applicetur chrisma juxta Decretum Innocenti III. c. *Pastoralis*, tit. de non iterandis Sacramentis, ubi rogatus de eo, qui per errorem oleo simplici in fronte fuerat consignatus respondit, *In talibus nihil est iterandum: sed cautè supplendum, quod incautè fuerat prætermissum.*

CAPUT IV.

De Ministro Sacramenti Confirmationis.

Duplex hic occurrit controversia. Altera, quæ pertinet ad fidem, & cum Hæreticis est habenda; utrùm scilicet solus Episcopus sit Confirmationis Minister ordinarius? Altera, quæ est Scholæ, & inter Catholicos duntaxat agitur,

tur, utrùm Presbyter hujusce Sacramenti sit Minister extraordinarius?

§. I.

Utrùm solus Episcopus sit ordinarius Confirmationis Minister?

Photius Sedis Constantinopolitanæ inuasor, & primus Schismatis Græcorum auctor, voluit Episcopos & Presbyteros indiscriminatim esse Ministros Sacramenti Confirmationis. Waldenses, teste Reynero, mirabantur, cur solis Episcopis confirmare liceret.

Wiclefius, & Joannes Hus censuerunt Confirmationem juvenum, & Ordinationem Clericorum reservari Papæ, & Episcopis, propter cupiditatem lucri, & honoris, ut habetur in Concilio Constantinensi sess. 8. & 15. ubi errores eorum proscripti sunt.

Wiclefio adhæserunt Lutherus lib. de captivitate Babylonica, & Calvinus in Antidoto Concilii Tridentini, ubi in Episcopos contumeliose sic scribit: *Digni sunt cornuti & infulati asini tali prærogativa Unde, quæso, probabunt Episcopis magis, quàm reliquis Sacerdotibus convenire has partes, nisi quia incertis Auctoribus ita placuit?* Contra ejusmodi errores ad propositam quæstionem

R. De fide est, solum Episcopum esse Ministrum ordinarium Sacramenti Confirmationis. Ita enim definiit Concilium Tridentinum sess. 7. can. 3. de Confirmatione, in quo sic habet: *Si quis dixerit sanctæ Confirmationis ordinarium Ministrum non esse solum Episcopum, sed quemvis simplicem Sacerdotem; anathe-*

anathema sit. Idem repetit sess. 23. can. 7. Præverat Eugenius IV. in Decreto pro Armenis.

Probatur 1. ex Scriptura, Act. 8. soli Apostoli, quibus succedunt Episcopi, Neophytis manus imponebant ad accipiendum Spiritum sanctum, in quem locum S. Chrysost. hom. 18. in Act. sic scribit; *Ideo baptizans (Philippus) Spiritum sanctum non dabat; hoc enim solorum Apostolorum erat: virtutem quidem acceperant Diaconi faciendi signa, non etiam dandi aliis Spiritum sanctum: igitur hoc erat in Apostolis singulare.* Unde & præcipuos, & non alios videmus hoc facere. Et Sanctus Isidorus Pelusiota lib. 1. epist. 450. *Baptizabat duntaxat (Philippus) ut Discipulus; Apostoli etiam gratiam explebant & perficiebant.*

Ex Latinis verò Innoc. I. epist. ad Decentium: *Pontificibus solis deberi, ut vel consignent, vel Paracletum Spiritum tradant, non solum consuetudo Ecclesiastica demonstrat, verum & illa lectio Actuum Apostolorum, quæ asserit Petrum & Joannem esse directos, qui jam baptizatis traderent Spiritum sanctum.*

Probatur 2. ex Traditione.

S. Cypr. ep. 73. *qui in Ecclesia baptizantur, inquit, per Præpositos Ecclesiæ offerantur.*

Concilium Eliberitanum ineunte quarto sæculo, sic de baptizato decernit can. 38. *ad Episcopum eum perducant, ut manus impositione perfici possit.*

S. Hieronymus Dialogo contra Luciferianos: *Non abnuo, inquit, hanc esse Ecclesiarum consuetudinem, ut ad eos, qui longè in minoribus urbibus per Presbyteros & Diaconos baptizati sunt, Episcopus ad invocationem Spiritus sancti manus impositurus excurrat . . . quòd si hoc loco quæris, quare in Ecclesia baptizatur,*
nisi

nisi per manus Episcopi accipiat Spiritum Sanctum, quem nos asserimus in vero Baptismate tribui, disce hanc observationem ex auctoritate descendere, quod post Ascensionem Domini Spiritus Sanctus ad Apostolos descendit. Addit quidem ad honorem potius Sacerdotii, quam ad legis necessitatem Episcopis tribui ejusmodi potestatem; sed qua mente id dicat, in sequentibus aperit; nimirum quia sine Sacramento Confirmationis confertur Spiritus Sanctus in Baptismo, quamvis non in tanta plenitudine; unde concludit Confirmationem non esse absolute necessariam; alioquin, inquit, si ad Episcopi tantum imprecationem Spiritus sanctus defluit, lugendi sunt, qui in remotioribus locis per Presbyteros & Diaconos baptizati ante dormierunt, quam ab Episcopis visitarentur. Quod autem non omnino excludat divinam legem, ex qua manus impositio Episcopis sit reservata, patet ex seq. verbis: Si Scripturæ auctoritas non subesset, totius orbis in hanc partem consensus instar præcepti obtineret. Cur verò tali prærogativa Christus Episcopatum decoraverit, hanc affert rationem: Ecclesiæ salus in Summi Sacerdotis dignitate pendet, cui si non exors, & ab hominibus eminens quædam detur potestas, tot futura sunt schismata, quot Sacerdotes.

Jam protulimus testimonia Sanctorum Chrysostomi, Isidori Pelusiotæ & Innocentii I.

Dices I. cum Photio: Qui potest majus, potest minus; atqui Presbyteri possunt Eucharistiam conficere, quod est quid majus; ergo & confirmare.

R. I. Photius hoc argumento æquè concluderet Presbyterum consecrare Sacerdotes & Episcopos; quia potest quid majus, nempe Eucharistiam conficere.

R. 2. Distinguendo majorem; Potest minus in eadem specie, v. gr. qui potest ordinare Presbyterum, potest etiam ordinare Diaconum, Concedo: potest minus in diversa specie, nego majorem.

Dices 2. Ananias non erat Episcopus, nihilominus ingressus ad Saulum, imposuit ei manus, ut videret, & impleretur Spiritu sancto, Act. 9. vers. 17.

R. 1. Quis dixit Calvino Ananiam Discipulum Domini non fuisse Episcopum? 2. Saulus nondum erat baptizatus; ergo Ananias non imposuit ei manus, ut eum confirmaret sed ut videret, præpararetque ad Baptismum, quo diluuntur peccata per Spiritum Sanctum.

Dices 3. Si Christus solum Episcopum Confirmationis Ministrum instituisset, Sacramentum illud non sufficienter præparasset omnibus; cum omnibus ad Episcopum accedendi facultas non sit.

R. Si invigilent, ut debent, Episcopi, facilius quemque semel confirmare possunt, quam Presbyteri toties peccatores reconciliare, quoties pœnitentiæ Sacramento indigent. Adde, quòd Sacramentum Confirmationis non sit absolutè necessarium ad salutem.

Dices 4. In Hispania Concilium I. Toletanum, cap. 2. permittit Presbyteris chrismare, absente Episcopo; & Braccarense II. statuit, ut chrisma Presbyteris detur pro confirmandis Neophytis.

Addit Hispalense II. can. 7. novellis duntaxat regulis prohibitum fuisse, ne Presbyter confirmaret. Novellæ autem illæ regulæ colligi possunt ex Pontificali Damasi, ubi dicitur Sylvester

ster Papa Episcopis hoc concessisse privilegium, ut baptizatos consignarent. Idipsum in Gallia Presbyteris concessit Arausicanum I. can. 4. *Si desit Episcopus*, inquit, *à Presbyteris cum chrismate & benedictione consignari placuit*: Ergo

Nego consequ. Perspicuè enim Toletanum loquitur de chrismatione in vertice baptizati, quæ absente Episcopo, concessa erat Presbyteris, ex Innocentio I. cit. epist. ad Decentium.

Braccarense verò statuit duntaxat, ut chrisma ab Episcopo benedictum Presbyteris distribuatur, non ut ipsi, sed Episcopi Parochias visitaturi plebem confirment.

Hispalense expressè doctrinam Ecclesiæ confirmat; probat enim tum ex veteri lege, tum ex nova, quam novellam regulam vocat, Altarium, ac Virginum consecrationem, & Neophytorum consignationem ad solos Episcopos pertinere, quemadmodum in veteri Testamento non quilibet Sacerdos, sed Moyses duntaxat, vel Aaron Summus Sacerdos Altaria erigebat, & consecrabat.

At, inquires, consecratio Altarium & Virginum propria est Episcopi solo Jure Ecclesiastico: Ergo & consignatio Neophytorum, & quidem in mente Concilii.

Nego consequ. Cum enim consecratio Altarium, & Virginum sit institutionis humanæ, manifestè sequitur solo Jure Ecclesiastico Episcopis reservari: contra verò cum consignatio Neophytorum à Christo sit instituta, quæri meritò potest quis sit à Deo institutus ejus Minister, quod Patres Hispalenses non attingunt. Constat autem ex dictis, solum Episcopum hujus Sacramenti Ministrum ordinarium fuisse à Christo institutum.

Quod verò spectat Pontificale Damasi. 1. Certum non est librum illum esse opus hujus Pontificis, ut omnes periti agnoscunt, ac proinde nihil ex illo concludi potest. 2. Sensus loci nobis oppositi est, quòd Sylvester privilegium Episcopis à Christo concessum vindicaverit, prohibueritque, ne Presbyteri frontes Neophytorum consignarent, quemadmodum nonnullos illud munus temere sibi arrogasse patebit ex dicendis.

Arausicanum Concilium perperam nobis obijcitur; non enim de Confirmatione loquitur, sed de reconciliatione Hæreticorum ægrotantium, quæ alicubi unctione peragebatur ab Episcopo, annuitque Concilium, ut Presbyteri in periculo mortis idipsum præstent.

Dices 5. S. Hieronymus epistol. 84. ad Evagrium, supponit solam ordinationem Episcopis esse reservatam: *Quid facit, inquit, extra Ordinationem Episcopus, quod Presbyter non faciat?* Similia docent S. Chrysostomus hom. 11. in 1. ad Timoth. & Venerabilis Beda in Psal. 26. ubi sic habet. *Illà unctio, quæ datur per manuum impositionem ab Episcopis, eadem est cum secunda cærimoniali (scilicet unctione verticali, quæ adhibetur in Baptismo) propter arrogantiam tamen non est concessa singulis Sacerdotibus, sicut multa alia; Ergo.*

Nego consequi. Namque 1. quòd S. Hieronymus, in laudata epistola omiserit speciale confirmandi privilegium à Christo Episcopis concessum, nocere non potest iis, quæ ex eodem S. Doctore in Dialogo contra Luciferianos protulimus, ubi ex professo recenset Episcoporum privilegia, luculenterque probat juxta omnium Ecclesiarum morem, solum Episcopum configare ex Traditione

tione Apostolica. Ideo autem S. Hieronymus citata Epistola breviter perstringit, quæ pertinent ad Episcopum; quia scopus ejus est comprimere Diaconorum superbiam, qui se Presbyteris exæquabant, & ut propositum consequatur, Presbyteros erigit, quantum potest, parum sollicitus ea numerare, in quibus sunt Episcopis inferiores.

2. Certum est S. Chrysostomum & Venerabilem Bedam in cap. 8. Actuum Apostolorum, agnoscere solum Episcopum à Deo institutum fuisse Ministrum saltem Ordinarium Confirmationis. Verba sancti Chrysostomi supra protulimus; Beda verò sic loquitur: *Si Apostolus esset, (Philippus) ipse utique manum imponere potuisset, ut acciperent Spiritum Sanctum: hoc enim solis Pontificibus debetur, non autem Presbyteris: sive extra Episcopum, sive præsentem Episcopo baptizent, chrismate baptizatos ungere licet, sed quod fuerit ab Episcopo consecratum, non tamen frontem ex eodem oleo consignare, quod solis debetur Episcopis, cum tradant Spiritum Sanctum. Quid clarius?*

In mente igitur Bedæ idem chrisma adhibetur à Presbyteris, dum baptizant, & ab Episcopis dum confirmant; sed hæc posterior unctio à Christo non est concessa singulis Sacerdotibus propter vitandam superbiam, nisi forte Bedæ sententia fuerit unctionem fontis esse cæremoniam Confirmationi accidentalem, in qua hypothese per legem Ecclesiæ esset Episcopis reservata, sicut multa alia, quamvis soli jure divino per manus impositionem Spiritum Sanctum dare possint.

Instabis; Presbyteri in Ecclesia Orientali baptizatos consignare consueverunt, & quidem à pluribus sæculis. Namque Photius nono sæculo

in epist. encyclica ad omnes Patriarchas Orientales, conqueritur quòd Legati Nicolai I. in Bulgaria contra antiquum & receptum morem improbaverint Confirmationem à Presbyteris collatam, eamque iterarent; morem autem illum obtinuisse apud Ægyptios quinto sæculo testatur Ambrosiaster, seu Auctor Commentariorum in Epistolas sancti Pauli inter Opera Sancti Ambrosii, ad c. 4. epist. ad Ephesios: *Apud Ægyptum, inquit, Presbyteri consignant, si præsens non sit Episcopus.* Idem legitur in libro quæstionum ex utroque Testamento, apud S. Augustinum quæst. 101.

Neque verò defunt monumenta hujusce consuetudinis in Ecclesia Latina; namque sanctus Gregorius sexto exeunte sæculo monitus Presbyteros Calaritanos in Sardinia consignare Neophytos, primò improbavit prohibuitque illum usum epist. 9. lib. 3. ad Januarium Episcopum Calaritanum. Sed ubi didicit nonnullos inde commotos, epistol. 26. ejusdem libri concessit quod prius negaverat: *Nos quidem, inquit, secundum usum veterem Ecclesiæ nostræ fecimus; sed si omnino hac de re aliqui contristantur, ubi Episcopi defunt, ut Presbyteri etiam in frontibus baptizatos chrismate tangere debeant, concedimus.*

Exemplum sancti Gregorii secuti sunt Patres Concilii Lugdunensis secundi, & Florentini; cum Græcis quippe pacem & unionem sanxerunt, nulla lite mota circa disciplinam, quæ apud eos vigebat, & etiam nunc viget, consignandi per Presbyteros. Eugenius quidem quartus, soluta Synodo Florentina à Græcis inter alia sciscitatus est: *Quare Pontifices non inungunt sacro chrismate, sed Sacerdotes? cum hoc Pontificibus sit datum?* Quæ
à La-

à Latinis objecta (pergunt acta Concili) Mitylenensis Præsul legitimè, ac secundum canones omnia dissolvit, præterquam duo, videlicet, separationem matrimonii quoad vinculum, & creationem Patriarchæ extra Constantinopolim. Quibus auditis, dixit Summus Pontifex, nos, fratres, Dei beneficio sumus fide conjuncti.

Ergo Presbyteri, æquè ac Episcopi, sunt Confirmationis Ministri.

Nego conseq. Ex ejusmodi enim momentis ad summum concludi potest, Presbyterum posse esse extraordinarium Confirmationis Ministrum, quod discutiendum superest sequ. §.

§. II.

Utrum Presbyter sit Confirmationis Minister extraordinarius?

Respondeo 1. Ecclesia hætenus nihil definiit circa propositam quæstionem.

Probatur. Ecclesia quæstionem definiisset vel in Conciliis Oecumenicis, ut in Lateranensi IV. sub Innocentio III. anno 1215. in quo tentata est unio cum Græcis; in Lugdunensi II. sub Gregorio X. anno 1274. & in Florentino sub Eugenio IV. anno 1438. in quibus pax conciliata est: vel Decretis Summorum Pontificum ab universa Ecclesia receptis; atqui neutrum dici potest: ergo.

Non primum; Si quidem in prædictis Conciliis nihil omnino actum est de Confirmatione, nec de ejus Ministro.

Non secundum; quæ enim circumferuntur Sedis Adostolicæ privilegia nonnullis Regularibus concessa Ecclesiæ non innotuerunt, non Bullario inserta sunt, nec publici juris facta.

Unde meritò, vel subreptitiè obtenta creduntur, vel ex opinione probabili indulta in gratiam eorum, qui ab Idolorum cultu ad Deum verum convertebantur in regionibus remotissimis, ad quas Episcopi non erant perventuri; in casu enim necessitatis licitum est adhibere Sacramentum dubium.

Confirmatur, 1. ex Concilio Senonensi anno 1628. quod corruptelam agnoscit in Abbatibus, qui ex consuetudine privilegiis roborata consignabant. Ex Decretis Summorum Pontificum, qui caverunt, ne Sacerdotes sub quocunque prætextu confirmarent, Innocentius III. prohibuit, ne Latini Parochi Constantinopoli, dum urbs esset in potestate Latinorum, secundum morem Græcorum Confirmationem conferrent. Idem præscripsit Gregorius IX. Epist. ad Barensem Episcopum. Sed notatu dignum, quòd Clemens VII. qui obiit ann. 1604. idipsum prohibuit Presbyteris Græcis, præcepitque, ut ab ipsis consignatos Episcopi iterum sub conditione confirmarent. Nec ullius ponderis videtur responsio, Summum Pontificem ita præcepisse, quia Presbyteri illi in Ecclesia Latina degebant. Namque Summi Pontifices non semel concessere Græcis Romæ commorantibus, ut Ecclesiæ suæ probatum morem sequerentur, v. gr. in fermento consecrarent; ergo mos per Presbyteros confirmandi non est ab Ecclesia probatus.

Dices; vera Christi Ecclesia errorem verbo Dei contrarium non patitur, sed è sinu suo eos statim ejicit, qui illum obstinatè propugnauerint. Hinc est quòd tamdiu Ecclesia Latina se à Communionem Græcorum separaverit, quamdiu contra
mani-

manifestum Scripturæ sensum docuerunt Spiritum sanctum à Filio non procedere: ergo cùm semel & iterum eos in suam Communionem receperit, nulla lite mota super Ministro Extraordinario Confirmationis, certò evincitur, etiam esse doctrinam universalis Ecclesiæ, Presbyterum posse hocce Sacramentum conferre tanquam Ministrum extraordinarium.

Confirmatur. Clemens VI. anno 1350. consultationi Patriarchæ Armenorum, inter alia respondit his verbis: *Si credis quòd per solum Romanum Pontificem, plenitudinem potestatis habentem, possit dispensatio Confirmationis Presbyteris, qui non sunt Episcopi, committi, &c.* Quæ sanè indicant constantem fuisse doctrinam Ecclesiæ Latinæ ex ejusmodi dispensatione Presbyteros posse confirmare.

Distinguo anteced. vera Christi Ecclesia errorem Verbo Dei contrarium non patitur, si sit patens & manifestus, qualis est error asserentium Spiritum Sanctum à Filio non procedere, Concedo: Si non sit manifestus, sed probabiliter propugnari possit, Nego anteced. Quot enim oppositas Scholæ opiniones tolerat, v. g. circa prædestinationem, attritionem, Ministrum Sacramenti Matrimonii, utpote quæ apertè verbo Dei non repugnent? Quidni similiter toleraret opinionem Græcorum circa Ministrum Confirmationis extraordinarium, maximè cùm plures è Theologis Latinis eam tueantur verbo Dei conformem, nec sine schismatis periculo quæstio illa in Conciliis Lugdunensi & Florentino terminari potuisset? Quapropter Ecclesia memor præcepti Domini dicentis Matth. 13. *Ne forte colligentes zizania, eradicetis simul cum*

eis tricitum finite utraque crescere usque ad messem, Græcis prudenter indulgit antiquam consuetudinem; mutatio enim consuetudinis, quæ adjuvat utilitate, novitate perturbat, ex Sancto Augustino Epist. 54. aliàs 118.

Ex Clementis verò VI. responsione illud solum colligitur, Summum Pontificem voluisse adducere Armenorum Patriarcham ad sententiam Ecclesiæ Catholicæ, nimirum Presbyteros non proprio jure confirmare, ut docuerat Photius, sed ex dispensatione, quæ juxta usum Romanæ Ecclesiæ obtineri debet, non à quocunque Episcopo, ut contendunt Græci, sed à Romano Pontifice.

Confirmatur 1. ex Patribus Tridentinis, quibus satis fuit definire quod est manifestè traditum, nempe solum Episcopum esse ministrum ordinarium Confirmationis, nec opportunum ipsis visum est ulterius progredi, ut refert Palavicinus in sua historia, an scilicet Presbyter possit esse hujus Sacramenti minister extraordinarius. 2. Ex gravibus Theologis, qui magno numero ante & post Concilia Florentinum, & Tridentinum, negarunt Presbyterum, ulla dispensatione Neophytos consignare posse, ut Ratramus Corbejenfis, qui nono sæculo adversus Græcos insurrexit, Guillelmus Altissiodorensis; S. Bonaventura, qui sedit in Concilio Lugdunensi II. in quo pax cum Græcis sancita est, Durandus, Joannes Major, Adrianus VI. Estius, Petrus Aurelius & alii, qui etiam nunc idem negant.

Communior tamen videtur affirmans S. Thomæ sententia 3. p. q. 72. art. 11. ad 1. ubi docet summum Pontificem ex plenitudine potestatis indulgere

dulgere posse Presbyteris, ut in casu necessitatis Neophytos confirment. Juxta quam sententiam ad propositam quæstionem

Resp. 2. Probabile est, Presbyterum esse extraordinarium Confirmationis ministrum.

Probatur. Illa sententia est probabilis, quæ à duodecim sæculis in præcipuis Ecclesiis obtinuit, quamque Summi Pontifices, vel amplexi sunt, vel permittendam censuerunt: atqui ejusmodi est nostra sententia.

Major negari nequit, quia ex Theologiæ Prolegomenis, ubi de locis communibus, Theologus elicit conclusiones saltem probabiles ex usu recepto in præcipuis Ecclesiis, universa Ecclesia consentiente, nedum repunante.

Minor probatur ex testimoniis allatis ad calcem præcedentis §. 1. Sanctus Gregorius libro 3. Epist. 26. concedit ministerium Confirmationis Presbyteris Calaritanis, juxta morem in illa Ecclesia receptum. 2. Eadem consuetudo jam prævaluerat in Ægypto. 3. Ex citata Epistola encyclica Photii constat omnes Orientis Patriarchales Ecclesias, longè ante schisma Confirmationem administrasse per Presbyteros; cum enim Photius in illa Epist. Nicolaum I. insimulet intolerandæ novitatis, quòd ejus Legati, in Bulgaria consignatos, à Presbyteris Græcis iterum consignassent, perspicuum est consuetudinem illam jamdudum in Oriente prævaluisse. 4. Adrianus II. Nicolai successor excusat legatos, quia Presbyteri illi delegati fuerant à Photio, qui, utpote intrusus, delegare non potuerat: *Quòd si dicas*, inquit, *prius à nobis Presbyteros ab ea regione (Bulgarorum) expulsos, haud inficias imus, erant Photiani, illiusque symmy-*

symmistæ, quibus non solum in Bulgarorum terris, sed ubique gentium sacris ordinibus interdiximus, interdici-musque. Ex quibus patet, Legatos chrismationem non reprobaturos fuisse, si Presbyteri, qui illam adhibuerant, fuissent à legitima potestate delegati. Refertur autem Adriani Epistolæ fragmentum in octavo Concilio generali. 5. Plures Summi Pontifices confirmandi facultatem indulserunt Fratribus Minoribus missis ad annuntiandam Fidem infidelibus, ut Joannes XXII. Nicolaus IV. Leo X. Nicolaus V. Urbanus V. Refert etiam Arcudius libro 2. de Concordia Ecclesiæ Occidentalis & Orientalis, in Sacramentorum administratione, cap. 15. se audivisse à Fonseca Presbytero Societatis Jesu, quòd in Brasiliis Regionibus confirmasset vi similis Indulti. 6. Nisi sententia nostra esset probabilis, Græcos illis impensè addictos Ecclesia in suam communionem non potuisset admittere.

Dices: Illa opinio est à Scholis ableganda, quæ repugnat tum Scripturæ sacrae, tum Traditioni Apostolicæ: atqui ejusmodi est nostra opinio: Ergo.

Minor probatur. 1. Soli Apostoli Actuum 8. manus imponebant, ut Neophyti acciperent Spiritum Sanctum. 2. Patres Græci & Latini, qui floruerunt quatuor primis sæculis, constanter docent, ad solos Episcopos pertinere consignationem Neophytorum: atqui mos, qui inolevit à quinto duntaxat sæculo, non potest censerì Traditionis Apostolicæ: Ergo.

Nego minor. Namque 1. licet Scriptura referat solos Apostolos Neophytis manus imposuisse, non negat eos potuisse Presbyteris ejusmodi
facul-

facultatem demandare. Adde quòd per paucos Sacerdotes ordinaverint Apostoli, quos simul non consecraverint in Episcopos. 2. Ex antiquioribus patribus illud tantum colligi potest, solos Episcopos esse Confirmationis ministros ordinarios; nullus enim ex antiquioribus Patribus proferri potest, qui negaverit in casu necessitatis chrismationem Presbyteris delegari posse. Imò id fieri posse videtur insinuare Sanctus Hieronymus cum laudata Epistola ad Evagrium, scribit Presbyterum posse, præter ordinationem, quidquid facit Episcopus. Itaque potestas delegandi Presbyteros est Traditionis Apostolicæ, quamvis usus hujusce potestatis à primis sæculis non obtinuerit.

Instabis: Presbyteri vel ex sua ordinatione, vel ex jurisdictione ab Episcopis, aut saltem à Summo Pontifice accepta, vel ab utraque simul sunt extraordinarii ministri Confirmationis; atqui nihil horum dici potest: Ergo.

Non ex ordinatione; quia si ratione ordinis confirmare possunt, verum erit Sacramentum ab ipsis collatum absque jurisdictione, quemadmodum rata est Confirmatio, & Ordinatio, quam Episcopus contulit sibi non subditis, in quos nullam habet Jurisdictionem.

Non ex jurisdictione; alioquin Episcopus nondum consecratus verè confirmaret, cum ea, quæ sunt jurisdictionis Episcopalis exercere valeat.

Non ex utraque simul; namque jurisdictio accedens potestati ordinis, non efficit, ut vel Presbyter Presbyteros ordinare possit, vel Diaconus Eucharistiam conficere, & infirmos sacramentaliter inungere.

Confirmatur: Minister extraordinarius sine depu-

deputatione Superioris validè quamvis illicite, Sacramentum celebrat, Diaconus, v. grat. sine deputatione Superioris validè baptizat etiam solemniter : ergo.

R. 1. Fateor me propter hujusmodi instantiam in oppositam sententiam iturum, nisi praxis Ecclesiarum tam antiqua, tamque universalis retineret ; non enim possum adduci Concilia Oecumenica fuisse errori manifesto, totque Summos Pontifices non minùs scientia, quàm pietate conspicuos in praxim institutioni divinæ contrariam consensisse. Quare

R. 2. Confirmandi potestas extraordinaria competit Presbyteris ex ordinatione simul & ex jurisdictione ; ex ordinatione quidem ; quia non potest delegari Diacono, aut inferiori Clerico. Unde Episcopus nondum consecratus confirmare non posset. Ex jurisdictione etiam à solo Romano Pontifice concedenda, juxta usum Ecclesiæ Latinæ, vel ab Episcopo, ut contendunt Græci ; quia sine hujusmodi delegatione irritum esset Sacramentum, ut constat ex omnium Catholicorum, sententia. Cur autem esset irritum, auctoritas occurrit, non ratio ; nec in iis, quæ à libera Dei voluntate pendent, argumentari licet à pari v. g. valet ordinatio sine jurisdictione collata : ergo & Confirmatio à Presbytero. Quamvis non desint aliqua exempla, in quibus alia Sacramenta sine jurisdictione collata, essent irrita ; nam Sacramentum Pœnitentiæ nullum est sine jurisdictione Ministris. Porro ex antiquo Ecclesiarum usu constat, Sacramentum Confirmationis ita à Christo fuisse institutum, ut Presbyter illud conferre non possit absque delegatione.

CAPUT V.

De Subjecto Sacramenti Confirmationis.

Q. 1. *Quodnam est Confirmationis Subjectum?*

R. Omnes & soli baptizati.

Q. 2. *Quare soli baptizati?*

R. Quia Baptismatis character est moralis quædam potentia recipiendi alia Sacramenta. Unde cap. *Si quis*, de Presbytero non baptizato, præcipitur, ut accepto Baptismo iterum ordinetur. Deinde Confirmatio instituta est ad perficiendum & roborandum Neophytum in gratia per Baptismum accepta: ergo Confirmatio necessario Baptismum supponit. Vide, quæ fusiùs in hanc rem dicta sunt Tract. de Baptismo cap. II.

Q. 3. *Quomodo probatur, infantes Baptizatos capaces esse hujus Sacramenti?*

R. Ex usu universalis Ecclesiæ, quæ antiquitus una cum Baptismo Confirmationem & Eucharistiam ministrabat. Hic usus per plura sæcula permansit in Ecclesia Latina, ut colligitur ex antiquis Ritualibus, ac etiam nunc viget in Ecclesia Græca, comprobante Latina.

Dices: Parvuli non sunt capaces aliorum Sacramentorum, puta Ordinis, Matrimonii, Pœnitentiæ, & extremæ Unctionis: ergo neque Confirmationis.

Nego consequ. Disparitas est 1. Pœnitentia & extrema Unctio, quæ est Sacramenti Pœnitentiæ complementum, supponit peccata propria voluntate commissa, ac proinde usum rationis, quo carent parvuli. 2. Ordo & Matrimonium non spectant omnes baptizatos, sed eos solum, quos

Deus vocat ad certum vitæ genus: vocat autem inclinando voluntatem ad eligendum alterutrum statum. At Sacramenta Confirmationis & Eucharistiæ, cùm perficiant vitam spiritalem, quæ in Baptismo incipit, pro omnibus sunt instituta: & sicut aliena voluntate, nempe primi parentis, gratiam amisimus, sic aliena fide, scilicet, matris Ecclesiæ, reparari potest.

Q. 4. *Quare Ecclesia Latina nunc contra antiquum morem, non nisi adultis Confirmationem & Eucharistiam administrat?*

R. Ut accedentes prius discant, quid fides, & Religio ab ipsis requirant: quæ sit donorum propositorum magnitudo & virtus, quidve pro iis collatis rependere debeant: denique, ut Baptismalium Abrenuntiationum refricetur memoria, sicque majori reverentia & devotione, atque ideo uberiori fructu illa percipiant Sacramenta, quæ alioqui non sunt tantæ necessitatis, quantæ Baptismus, ut illi cedere debeat reverentia divinis mysteriis debita. Nec propterea priscum morem reprehendimus: *In his enim rebus*, ait sanctus Augustinus Epist. 36. aliàs 86. cap. 2. *in quibus nihil certi statuit Scriptura divina, mos populi Dei, vel instituta Majorum, pro lege tenenda sunt.*

Q. 5. *An propter modernum Ecclesiæ Latinæ usum, denegenda est Confirmatio parvulis in extremo vitæ periculo constitutis?*

R. Minimè: *Morituris*, inquit S. Thomas, 3. p. qu. 72. art. 8. ad quartum, *hoc Sacramentum dandum est, ut in resurrectione perfecti appareant . . . unde etiam pueri confirmati decedentes, majorem gloriam consequuntur; sicut & hic majorem obtinent gratiam.* Concilium etiam Mediolanense V. sub sancto Carolo,

rolo, sic statuit: *Si Episcopus aliquam justam causam, atque adeò necessariam parvulo ac infanti, qui non modò eam ætatem (septennii) expleat, sed ne attingat quidem, ministrandi aliquando censuerit, ne sit vetitum.*

CAPUT VI.

De effectibus Sacramenti Confirmationis.

Q. 1. *Quinam sunt Confirmationis effectus?*

R. Duplicis generis est Confirmationis effectus: alius ipsi & cæteris Sacramentis communis; alius proprius.

Q. 2. *Quis est effectus communis?*

R. Gratia sanctificans. Probatur 1. ex Scriptura, Actuum 8. *Tunc imponebant manus super illos, & accipiebant Spiritum sanctum:* Missio autem, seu communicatio Spiritus sancti, non est sine gratia sanctificante, ut docent Theologi tract. de Trinitate. 2. Ex Patribus, quorum testimonia retulimus cap. 1. 3. Ratione Theologica; quia omnia novæ legis Sacramenta producant gratiam sanctificantem: atqui Confirmatio est Sacramentum novæ legis: Ergo. Quàm autem pretiosum donum sit, gratia sanctificans, consule quæ dicta sunt cap. 11. tract. de Baptismo.

Q. 3. *Quam sanctificantem gratiam producit Confirmatio? an primam, per quam remittuntur peccata mortalia: an secundam, quæ primam auget & perficit?*

R. Per se non confert primam gratiam; colligiturque tum ex nominibus hujus Sacramenti c. 1. expositis; idè enim dicitur Confirmatio & Perfectio, quia baptizatum confirmat & perficit in

gratia per Baptismum accepta, ac proinde primam gratiam supponit: tum ex his verbis Concilii Trid. sess. 14. cap. 2. de Pœnit. *Est autem, inquit, hoc Sacramentum Pœnitentiæ lapsis post Baptismum ad salutem necessarium ut nondum regeneratis Baptismus: atqui Pœnitentia non esset necessaria post Baptismum lapso nondum confirmato, si confirmatio per se conferret primam gratiam, qua deletur peccatum: Ergo.*

Dixi per se; Nam si aliquis adultus in peccato existens, inquit S. Thomas 3. p. qu. 72. art. 7. ad 2. *cujus conscientiam non habet, vel si etiam non perfecte contritus accedat per gratiam collatam in hoc Sacramento, consequetur remissionem peccatorum.*

Q. 4. *Qui sunt proprii effectus Confirmationis?*

R. 1. Confert plenitudinem Spiritus Sancti ad robur spiritale.

Probatur 1. ex Scriptura. Actuum octavo capite sæpius laudato, de Samaritanis dicitur, vers. 16. *nondum enim in quemquam illorum (Spiritus Sanctus) venerat, sed baptizati tantum erant in nomine Domini Jesu: Et v. 17. subditur de Confirmatione, tunc imponebant manus super illos, & accipiebant Spiritum Sanctum.* Unde sic argumentari licet: Samaritani jam baptizati dicuntur nondum accepisse Spiritum Sanctum, cum fide divina certum sit per Baptismum tribui gratiam sanctificantem, per quam Spiritus Sanctus mittitur seu datur, juxta illud Rom. 5. *Charitas Dei diffusa est in cordibus nostris per Spiritum sanctum, qui datus est nobis.* Quomodo ergo jam baptizati dicuntur non accepisse Spiritum sanctum? Non acceperunt ea plenitudine, qua datur in Confirmatione, quo sensu etiam legitur, Joan. 7. *non enim erat Spiritus datus;*
quia

quia *Iesus nondum erat glorificatus*. An non Apostoli ante glorificationem seu Ascensionem Christi Domini fuerant baptizati, ordinati, & Eucharistia refecti? An non Christus Dominus statim post resurrectionem, Joan. 20. insufflavimus in Apostolos, & dixit eis: *Accipite Spiritum Sanctum?* Quomodo igitur nondum erat Spiritus datus? nimirum ea plenitudine, quam Christus promiserat, Joan. 16. & Act. 1. & quam glorificatus exhibuit i. per se & sine Sacramento die Pentecostes, deinde per ministerium Apostolorum; *Christus*, inquit S. Thomas, qu. 72. art. 2. ad 1. *ex potestate excellentiæ, quam habet in Sacramentis, contulit Apostolis rem (seu effectum) huius Sacramenti, idest, plenitudinem Spiritus sancti sine Sacramento . . . similiter etiam ad impositionem manus Apostolorum, & etiam ad eorum prædicationem descendebat plenitudo Spiritus sancti super fideles sub visibilibus signis, sicut & à principio descenderat super Apostolos; unde Petrus . . . Act. 11. cum cœpissim loqui, cecidit Spiritus Sanctus super eos, sicut & in nos in initio.*

Probatur 2. ex Traditione. Sanctus Cyprianus Epist. 75. de baptizatis sic scribit: *Per Præpositos Ecclesiæ offerantur, & per orationem ad manus impositionem Spiritum sanctum consequantur, & signaculo Domini confirmentur.* Concilium Eliberitanum can. 38. *baptizatus ad Episcopum perducatur, ut per manuum impositionem perfici possit.* Rabanus libro de institut. Clericorum cap. 31. *signatur baptizatus in fronte per Pontificem, ut Spiritus sancti septiformis gratia cum omni plenitudine sanctitatis & scientiæ & virtutis venire in hominem declaretur.* Unde ex S. Thoma 3. p. qu. 72. art. 11. ad 2. *Sacramentum Baptismi est efficacius . . . quantum ad*

remotionem mali hoc autem Sacramentum est efficacius ad proficiendum in bono; quia est quoddam spirituale augmentum de esse imperfecto ad esse perfectum.

Dices; chrismatione verticali, quæ fit in Baptismo, secundum quosdam, v. gr. Hugonem à S. Victore lib. 2. de Sacramentis, supplentur vices Confirmationis, secundum alios perficiuntur Christiani, & secundum S. Thomam 3. p. qu. 71. de Baptismo art. 3. ad 4. conservatur gratia ad robur, quo resistamus peccato, & profiteamur in persecutionibus fidem. Ergo plenitudo Spiritus sancti ad robur, non est effectus proprius Confirmationis.

Distinguo anteced. Supplentur vices Confirmationis, perficiuntur Christiani exterius, vel ex opere operantis, & quatenus est quoddam votum Confirmationis, Conc. Interius, vel ex opere operato, Nego anteced. Nam Hugo à S. Victore, & S. Thomas expressè docent Confirmationem esse Sacramentum à Baptismo distinctum. Sciendum itaque est chrismationem verticalem esse cæremoniam Baptismi ab Ecclesia eo fine institutam, ut fideles, qui ab Episcopo non consignari possunt, exterius uncti appareant, hoc est, Christiani; Christus enim ab unctiōe dicitur, sicque chrismatio verticalis quodam modo supplet vices Confirmationis, quatenus defectus illius observatur. Roborat etiam propter Ecclesiæ præces & suffragia, perficit quoque infantes exterius, adultos interius ex opere operantis, & ut votum quoddam Confirmationis. Addo chrismationem illam dare Spiritum Sanctum ratione Batismi, cujus est appendix, & ad ritum
illius

illius pertinens, sed per se & in ratione signi efficax non est, cum non sit Sacramentum, sed sacramentale quid.

Q. 5. *Quomodo explicatur illa plenitudo Spiritus sancti per hoc Sacramentum concessa ad robur spiritale?*

R. S. Thomas cit. quæst. 72. passim, & præsertim articulo 2. & 5. eam explicat exemplo hominis, qui infantiae metas excessit: homo autem, inquit, articulo 2. *cum ad perfectam ætatem pervenerit, incipit jam communicare actiones suas ad alios: antea verò quasi singulariter sibi ipsi vivit.* Sic in Baptismo accipit potestatem agendi ea, quæ pertinent ad propriam salutem: in Confirmatione verò roboratur ad pugnam spiritalem contra hostes Christiani nominis, non solum invisibiles, quibus etiam baptizatus resistit, sed & visibiles, ut contemptis mundi terroribus, illecebris, & derisionibus, publicè fidem verbis & operibus profiteatur, hoc patet, inquit sanctus Doctor, art. 6. exemplo Apostolorum, qui nondum hanc plenitudinem consecuti, in cœnaculo inclusi orationi vacabant; postmodum verò egressi, Christum confiteri non verentur, etiam coram inimicis fidei.

Q. 6. *Roboratne Confirmatio ad solam fidei pugnam contra persecutores Ecclesiæ?*

R. Minimè. Est quidem difficilior illa pugna, & prioribus Ecclesiæ sæculis multum frequens, atqui ideo Veteres illius præsertim meminerunt; sed non una Confirmatis proponitur. Nam ex S. Thoma in præcedenti responsione laudato, sicut per Baptismum munimur contra hostes invisibiles & internos, dæmones scilicet, & carnis concupiscentiam, quæ ad agonem re-

dicta est in baptizatis; ita per Confirmationem armamur contra hostes visibiles, puta mundum & sæculi amatores, qui variis modis persequuntur omnes qui volunt in Christo piè vivere. Terrent potentes, quia eorum iras contra se provocat, quisquis illicitis eorum desideriis non acquiescit: terrent etiam amici simul & propinqui, quorum odia justus incurrit, si juxta Evangelii præceptum eorum dicta, vel facta minùs recta charitatis officio reprehendit. Denique in mundo deridetur justi simplicitas, stultitia videtur pauperum sectari, ignavia irrogatas injurias non ulcisci. Dura sanè sunt hæc quotidiana certamina, sed nemo ex confirmatis dicat; quia infirmus sum; donum enim quod in hoc Sacramento accepit, majus omnibus est: *Cruce signatur in fronte*, inquit S. Augustinus, *quia est sedes pudoris, ut compressa viriliter omni erubescencia, gloriatur pro Christo contumeliam pati.* Apostoli in figura linguæ repleti sunt Spiritu sancto, ut fidei doctores; alii verò fideles in olei symbolo, quod fortitudinem designat, tanquam operadores eorum, quæ pertinent ad ædificationem fidelium. Ita S. Thomas 3. part. qu. 72. art. 2. ad 1.

Q. 7. *In quo consistit illa plenitudo, quæ per Confirmationem confertur ad robur spiritale?*

R. In uberiori gratia sanctificante, non quidem præcisè sumpta, cùm gratia sanctificans sit effectus communis omnibus Sacramentis, plenitudo verò illa sit effectus Confirmationis proprius; sed in gratia sanctificante ordinata ad illas actiones difficiliore, seu ad spiritalem pugnam contra mundanum timorem. Duo itaque includit illa plenitudo; primum, gratiam sanctificantem & qui-

& quidem uberiores; secundum, auxilia supernaturalia merito hujus Sacramenti concedenda tempore opportuno, nempe cum instat tentatio. Sunt autem illa auxilia sanctæ cogitationes, & piæ affectiones, quibus accenditur animus ad contemnenda erronea hominum judicia, & impotentes iras.

Dices; mera infirmitas in confirmatis deprehenditur, ubi contra mundanum timorem pugnandi occasio occurrit: ergo robur spiritale non est certus Confirmationis effectus.

Distinguo antec. In confirmatis, qui, vel sine debitis dispositionibus ad Sacramentum accesserunt, vel eo dignè suscepto, indignos se præbuerunt supraddictis auxiliis, (ut sæpius contingit,) Conc. In confirmatis, qui nullum obicem opponunt, Nego antec. & consequentiam. Enimverò nec qui fictè accedit, recipit gratiam sanctificantem, nec qui post susceptam negligenter agit, dignus est auxiliis ad pugnandum necessariis, ut dicetur ubi de dispositionibus ad hoc Sacramentum requisitis.

Sequitur 1. ex dictis robur spiritale discedere à confirmato, qui in peccatum mortale labitur, ac simile quid ei contingere, quod Samsoni Judic. 16. qui, abradis capillis, in quibus erat ejus fortitudo, infirmus factus est sicut cæteri homines; nam spiritale illud robur fundatur in gratia sanctificante, quam peccatum mortale expellit.

Sequitur 2. Robur spirituale adæquatè non conferri in ipsa susceptione Sacramenti; exurgit enim partim ex auxiliis actualibus, quæ Deus supeditat confirmato, ubi pugnandi se offert occasio. Quare vigilantia opus est, ut præstò adsint

illa auxilia; nam gratia, ex S. Chrysostomo, non obvenit socordibus & somnolentis.

Q. 8. *Quis est alter effectus Confirmationis proprius?*

R. Character, de cujus existentia satis dictum est cap. 19. de Sacramentis in genere, quod consulere necesse est ad perfectam hujus quæstionis elucidationem.

Q. 9. *Quid præstat ille character?*

R. 1. Distinguit ab aliis fidelibus: *Est signum distinctivum*, inquit S. Thomas 3. p. quæst. 72. art. 5. ad 1. *non infidelium à fidelibus, sed spiritualiter provektorum ab his, quibus dicitur, sicut modò geniti infantes.*

R. 2. Consecrat fidelem tanquam militem Christi: *Insignitur signo Crucis, sicut miles signo ducis & ideo in fronte ut neque propter timorem, neque propter erubescientiam nomen Christi confiteri prætermittat.* Ita sanctus Thomas cit. quæst. art. 9.

CAPUT VII.

Utrùm conveniens sit ritus Confirmationis?

R. **E**st convenientissimus. Prob. Quia ille ritus convenit, in quo omnes cæremoniæ virtutem & proprietates Sacramenti sensibilibiter exprimunt, venerationemque suscipientium provocant: atqui talis est Confirmationis ritus: Ergo.

1. Manus impositio significat protectionem Dei, à quo omnis nostra virtus & fortitudo juxta illud Psal. 26. *Dominus protector vitæ meæ, à quo trepidabo?*

2. Oleum

2. Oleum confortat, quare antiquitus Athletæ ungebantur; est etiam symbolum mansuetudinis, qua confirmatus delinire debet suos adversarios: *Charitas*, inquit Apostolus, 1. Corinth. 13. *patiens est, benigna est non irritatur.* Denique est signum interioris unctionis Spiritus Sancti, de qua Psalm. 44. *unxit te Deus oleo lætitiæ præ confortibus tuis.*

3. Cum in aliis Sacramentis materia simplex adhibeatur, in isto oleum miscetur alio liquore, nempe balsamo; quia ex S. Thoma 3. part. q. 7. art. 2. ad. 2. *hoc Sacramentum datur ad plenitudinem consequendam Spiritus Sancti, cujus est multiformis operatio, secundum illud, Sap. 7. est . . . in illa Spiritus intelligentiæ sanctus, unicus, multiplex, &c.*

4. Balsamum adhibetur, inquit S. Thomas cit. art. *Propter fragrantiam odoris, quæ redundat ad alios: unde Apostolus dicit, 2. Corinth. 2. Christi bonus odor sumus Deo, &c.*

5. Chrisma ab Episcopo benedicitur, ut hac benedictione præparetur & consecretur ad usum spiritualem.

Objiciunt hæretici contra ritum hujus benedictionis; 1. Quodd christma fœtidis halitibus inquinetur. 2. Quod adoretur. 3. Quod quasi esset vivens, his compellatur vocibus: *Ave sanctum Chrisma.* Sed immeritò ista derident. 1. Namque Christus Dominus insufflavit super Apostolos, cum dedit eis Spiritum Sanctum Joan. 20. 2. Genuflexio non est signum supremæ adorationis, quæ latria dicitur, cum etiam procumbamus coram hominibus honoris gratia. Deinde honos, qui Chrismati deferitur, non est absolutus, sed relativus ad Deum. Denique in Scripturis sacris ser-

mo non raro ad res inanimatas dirigitur, ut Dan. 3. *benedicite omnia opera Domini Domino*, Psalm. 148. *laudate eum sol & Luna*. Ave autem, non solum significat, Deus te conservet, sed sæpius est salutationis & honoris testificatio, ut, *ave salus mundi: salve festa dies*. Ex Fortunato in hymno Resurrectionis Christi, *ò Crux, ave spes unica*.

6. Frons cruce signatur: Ut, inquit S. Thomas cit. q. art. 9. *in manifesto demonstret se esse Christianum, sicut & Apostoli post acceptum Spiritum Sanctum se manifestaverunt, qui prius in cœnaculo latebant*. Crux autem chrismate producitur, quia ex S. Bernardo Serm. 1. de Dedicatione, *nec est sine Cruce sequi Christum, & sine unctione crucis asperitatem ferre quis posset? . . . verè crux nostra inuncta est, & ut ita dicam, amaritudo nostra dulcissima*.

7. Alapa confirmatus leviter percutitur, ut secundum quosdam facilius recordetur se hoc Sacramentum recepisse, secundum vero Catechismum Romanum, & alios communiter, ut admonetur, quod paratus esse debeat ad injurias & contumelias pro Christi nomine & ejus Evangelio deinceps tolerandas. Suspiciantur nonnulli per hanc cæremoniam designari osculum, quo Christiani in Synaxibus mutuam charitatem demonstrare solebant; Superiores siquidem suam erga inferiores benevolentiam amica manus attrectatione, ut plurimum testantur. Unde & Episcopus subdit, *pax tibi*.

8. Patrini baptizatum jam membrum Ecclesiæ effectum, nondum tamen militiæ Christianæ ascriptum Episcopo tanquam Duci exercitus offerunt ascribendum, spondentes strenuè militaturum, ex sancto Thoma art. 10. consuetudinem adhibendi

bendi patrilinos, nonnulli Episcopi hodie negligunt, est tamen perantiqua & satis constans in Ecclesia; de his enim mentionem faciunt Sacramentarium S. Gregorii Magni, Nicolaus I. in Epist. ad Rodolphum Bituricensem, Concilia Cabillonense sub Carolo Magno, Parisiense VI. Tridentinum sess. 24. cap. 2. de reform. Mediolanense V. sub S. Carolo. Patrinorum necessitatem & Officium S. Thomas cit. art. 10. exprimit his verbis: *Sicut . . . aliquis de novo natus indiget instructore in his, quæ pertinent ad conservationem vitæ . . . ita illi, qui assumuntur ad pugnam, indigent eruditoribus, à quibus instruuntur de his, quæ pertinent ad modum certaminis . . . Et propter hoc etiam ille, qui accipit hoc Sacramentum ab alio tenetur, quasi per alium in pugna spiritali erudiendus.* Ab hoc munere repellendi sunt ii omnes, qui in Baptismo susceptores esse non possunt; item ex c. in Baptismate 3. p. de consecr. dist. 4. c. 102. & ex S. Thoma cit. art. 10. qui nondum sunt confirmati. Concilium etiam Mediolanense V. prohibet ne mares fœminas, & vicissim ne fœminæ mares in hoc Sacramento suscipiant. Porro quia Patrini in hoc Sacramento contrahunt cognationem spiritalem ex cit. cap. Conc. Trid. caveant parentes suscipere proprios filios.

9. Ut à jejunis Confirmatio detur, & accipiat, præscribunt canones relati à Gratiano de consecr. dist. 5. cap. 6. & 7. idque ob reverentiam tanti Sacramenti. Unde Magister Sententiarum sic scribit cap. 4. *hoc Sacramentum à jejunis accipi, & jejunis tradi debet; & hæc disciplina fuit universalis in Ecclesia tum Orientali, tum Occidentali, in qua Confirmatio ante Eucharistiam admini-*
straba-

strabatur. Verum in dissuetudinem apud Latinos jam abiisse decimo tertio sæculo constat ex S. Thoma, qui art. 12. ad secundum monet sustineri, ut hoc Sacramentum à non jejunis detur, etiam non jejunis, propter multitudinem fidelium confirmandorum; addit tamen convenientius esse, ut à jejunis detur, & accipiatur, cum manè administratur, & ita statuerunt Concilia Aquense anno 1585. Senonense, 1526. Rothomagense, 1581. Remense, 1583.

10. In Confirmatione nomen mutandum, si homini Christiano conveniens non sit, *ut novo ac sancto suscepto nomine, virilem in sancté agendo constantiam perpetuò deinceps præstet*, ait Concilium Mediolanense V.

CAPUT VIII.

Quæ dispositiones requiruntur ad Sacramentum Confirmationis?

R. 1. **Q**uæ de dispositionibus ad Baptismum antiquitus requisitis retulimus tract. de Bapt. ea ad Confirmationem extendenda sunt, utrumque enim Sacramentum spectabant. Unde Albaspineus lib. 1. cap. 13. observat omnibus, qui in infirmitate baptizabantur, denegatam fuisse Confirmationem, nisi prius in stationibus Catechumenorum desudassent, aut saltem insignia Christianæ pietatis indicia præmisset, ut colligitur tum ex Epist. S. Cornelii, in qua Novatiano in lectulo decumbenti baptizato exprobrat, quòd consignatus non fuerit: tum ex Concilio Eliberitano; quòd, cum Baptismum concedat
cap.

cap. 45. omnibus moribundis statuit can. 39. manum iis non esse imponendam, nisi fuerit eorum in aliqua parte honesta vita.

R. 2. Requiritur gratiæ sanctificantis status, qui ex S. Thoma art. 7. sicut hoc Sacramentum præsupponit Baptismum, ita & ejus effectum, ut vel ex ejus nomine apparet; Confirmatio enim dicitur, quia est ad confirmandum perficiendumque, quod prius invenerit. Non est ergo danda iis qui per peccatum gratiam Baptismi amisere, nisi pœnitentes eam reparaverint, & tunc per hoc Sacramentum perficitur Pœnitentiæ effectus; sicut & Baptismi, inquit S. Doctor. Non reparatur autem Baptismi gratia, nisi per pœnitentiæ Sacramentum saltem in voto, quod sincerum non videtur in eo, qui cum habeat Confessarii copiam, eam negligit. Adde neminem certum esse contritionem, qua movetur, ita charitate esse perfectam, ut nihil ei desit, quod per Sacramentum Pœnitentiæ suppleri debeat. Quare ex Concilio Aurelianiensi relato c. *Ut jejuni*, dist. 5. de consecrat. monentur fideles prius peccata confiteri, ut mundi donum Spiritus Sancti valeant accipere. Idipsum repetunt Concilia Senonense, Mediolanense IV. Remense, & alia.

R. 3. Cum ex Ecclesiæ usu Confirmatio ad ætatem adultam differatur, sequitur manifestè, quod in ejus mente status gratiæ sanctificantis non sufficiat ad dignam hujus Sacramenti perceptionem; sed requiratur insuper in confirmando prompta & devota animi affectio erga singulare illud donum. Ut autem debita illa reverentia & devotio possint concipi, hæc omnino necessaria videntur.

Primum, est satis explicita cognitio tum myſteriorum fidei, tum Evangelicæ regulæ, ſecundum quam mores Chriſtiani efformandi ſunt, ac præſertim eorum omnium quæ pertinent ad Baptiſmum & Confirmationem. Cum enim fidelis per hoc Sacramentum perficiatur, ut implere poſſit, quæ in Baptiſmo profeſſus eſt, efficiaturque organum Spiritus Sancti, cujus plenitudinem accipit ad multiplices ejus operationes, quis cenſebitur paratus ad illa præſtanda, ſi ea ignoraverit? Cur expectatur ejus adulta ætas, niſi ut, quæ alii pro ſeipſo infante ſponſponderunt, dum ad lavacrum regenerationis liſteretur, jam eruditus & ſuæ libertatis compos amplectatur, profiteaturque? Non ergo leviter, ut moris eſt, ſed plenè imbuatur iis omnibus, in quibus vita Chriſtiana conſiſtit, ut expendere valeat quanta Deus confirmatiſ largiatur, & quanta ab ipsis repoſcat.

Secundum, eſt accurata vitæ poſt Baptiſmum exactæ diſcuſſio, ut, ſi ad ea, quibus in Baptiſmo abrenuntiaverat, rediſſe deprehenderit, eluat lacrymis & Pœnitentiæ exercitationibus, aliàs non ſeridò, ſed fictè hic teſtatur ſe confirmare fœdus in Baptiſmo initum, quod tamen nec ſervare nec renovare intendit. Quid enim eſt Confirmatio niſi ſolemniſ profeſſio eorum, quæ in Baptiſmo peracta ſunt? Debet ergo confirmandus interitiſ gerere, quod exteritiſ proſitetur.

Tertium, eſt perſeverantia per aliquot dies in oratione & meditatione præſertim hujus myſterii; hoc diligentia & pietatiſ exercitiſ ipſemet Dominuſ præſcripſit Apoſtoliſ donum Spirituſ Sancti recepturiſ, Luc. 24. *Vos autem ſedete in civitate quoaduſque induamini virtute ex alto.* Et Actuum 1.

hi omnes erant perseverantes unanimiter in oratione cum mulieribus, & Maria matre Jesu. Ubi operæ pretium est advertere Christum nusquam ab Apostolis tanta exegisse, quanta ad effectum Confirmationis consequendum. Satis ei non fuit quòd *justi essent*, sicut testimonium eis perhibuit Joan. 13. *vos mundi estis*, quòd per quadraginta dies à resurrectione eos docuerit de regno Dei, & maxime de futuro illapsu Spiritus Sancti Act. 1. sed ab Ascensione usque ad Pentecostem in cœnaculo inclusos detinuit orationi vacantes. Hæc est forma, secundum quam fideles ad Sacramentum Confirmationis disponi oportet. Absit ergo ab Ecclesiæ Pastoribus falsa illa quorundam persuasio, subditos ad hoc Sacramentum tum esse dispositos, cum peccata confessi sunt, aridamque memoriter tenent unam aut alteram definitionem, cujus vim cum non percipiant, mens eorum sine fructu est. Unde contingit fideles ad hoc Sacramentum præ cæteris temerè & irreverenter accedere, (quod sæpius cum dolore advertimus) vacuosque nonnunquam recedere: Deus enim thesauro suo invigilat, nec finit obrepere indignos, ait Tertullianus.

Ex his liquet catecheses de Confirmatione non esse differendas ad tempus, quo Episcopus Parochias lustraturus est: tum quia multis ob urgentia tunc temporis negotia interesse non licet; tum quia rudiores mentes multitudine eorum, quæ angusto temporis intervallo discenda sunt, obruuntur. Quod autem objiciunt nonnulli, Parochianos oblivisci, quæ diu ante Episcopi adventum didicere, contra eos retorqueri debet, nempe post Episcopi discessum eadem facilitate obli-

oblituros, sicque futurum iri, ut nullam tanti Sacramenti notitiam conseruent, magnusque sit obex eorum ignorantia gratiis actualibus seu auxiliis, quibus Sacramenta suscepta solent operari; porro his malis non occurreret Pastor, nisi per frequentes de Confirmatione catecheses & conciones.

Hæc Pastoralis sollicitudo non solum utilis est, sed prorsus necessaria; 1. his, qui nondum sunt consignati, tum ut plenè discant, quæ ad illud Sacramentum pertinent, tum ut ad aliud dignè recipiendum disponantur, tum denique, ut cognitis pluribus ejus effectibus, illius recipiendi desiderio flagrent, & per votum illud, aliquatenus tanti doni participes efficiantur; constans enim est Theologorum sententia votum Sacramenti suo modo operari. 2. non minus necessaria est confirmatis illa pastoralis sollicitudo 1. ne obliviscantur, quæ semel didicerunt. 2. ut ad vocem Pastoris recalescentes, quanta Deus beneficia ipsis per Sacramentum contulerit, in gratiarum actione permaneant, *cultus enim Dei in hoc maximè constitutus est*, ait S. Aug. cap. 11. de spiritu & littera, *ut anima ei non sit ingrata*. Et serm. 21. de diversis cap 2. *hoc est glorificare Deum, gratias agere Deo*. 3. Ne gratiæ Sacramentali ponatur obex, qui cum initiatis frequens sit, raro Sacramenta etiam rectè suscepta finem suum consequuntur. Enimverò Sacramenta non suscipiuntur ad quiescendum, sed ad laborandum magis; auxilia supernaturalia, in quibus gratiam sacramentalem reposuimus, denotant hominem conantem ad finem ad quem ordinatur Sacramentum; nec enim auxiliari dicimur, homini otioso, nihilque ex sua parte

parte conferenti. Quis credet dūcem ex pacto, quod iniit cum conducto milite, debere stipendium & annonam, ita deferente pugnam, ut nequidem meminerit se militiæ nomen dedisse? Præterea auxilia, quæ respondent Sacramentis, alia sunt aliis magis vel minùs efficacia, remotiora, vel propinquiora: Deus nonnunquam propter Sacramentum ritè susceptum immittit piam cogitationem, quam si mens vanis rebus intenta non advertit, cætera quæ consecutura erant, perdit: movet virtus Sacramenti ut oremus, in minimis fideles simus, quibus neglectis, in difficilioribus deficimus; sicque contingit, ut ex frequenti Sacramentorum usu mores non formentur in melius. Vigilandum itaque post Sacramenta suscepta, orandum, satagendum, ne quis obex gratiis sacramentalibus viam occludat; denique tendendum continuò ad finem, ad quem Sacramentum institutum est, quod ut præstent fideles, luce clarius est necessarias esse frequentes Pastoris admonitiones, cohortationesque.

4. In Sacramenti collatione intercedit pactum inter Deum & suscipientem: Deus offert gratias, pollicetur auxilia; confirmatus verò promittit se strenuè pugnaturum, nec jam deinceps uti imbellem infantem, sed tamquam virum fortem, Christianumque perfectum sese exhibiturum. Ad quid enim gratia sanctificans ipsi confertur uberior, nisi ut abundet magis in operibus bonis? Quare insignibus militis Christi decoratur, nisi ut pro gloria ejus decertet? omnis quidem homo miles est, ubi propulsanda est Creatoris injuria, ait Tertullianus; sed confirmatus id tanquam ex officio præstare tenetur, ut advertit S. Thomas. *Idcirco accepimus Spiritum, non ut pavidus simus aut metu contra-*

D. Habert Theolog. Tom. V.

Z

bamur,

bamur, sed ut celsiores evadamus, inquit S. Chrysostomus ad illud 1. ad Tim. 1. non enim dedit nobis Deus Spiritum timoris, sed virtutis. At milites isti nisi crebris ducum, hoc est, Pastorum cohortationibus excitentur, languent animo, officio defunt, quin & pacti cum Deo per Sacramentum initi sæpissimè non recordantur.

CAPUT IX.

An & quæ sit necessitas Confirmationis ?

R. 1. **C**ertum est præcepto divino teneri Pastores ministrare hoc Sacramentum, etiamsi supponatur nulla necessitas illius suscipiendi: tum quia dispensator, quem constituit Dominus super familiam suam, infidelis est nisi singulis distribuat, quæ à Domino accepit in eorum utilitatem: tum quia Confirmatio est perfectio Baptismi, sicut Extrema unctio Sacramenti Pœnitentiæ. Non minùs itaque tenentur Pastores prius administrare, quam posterius.

R. 2. Certum est non esse necessarium necessitate mediæ, ut quis confirmetur. Illud enim necessarium non est necessitate mediæ, sine quo salus obtineri potest; cum sine Confirmatione homo per Baptismum vel per Pœnitentiam peccatorum veniam consequatur, fiat justus & Deo gratus, *alioquin, inquit S. Hieronymus Dial. contra Luciferianos, si ad Episcopi tantum imprecationem Spiritus Sanctus defluit, lugendi sunt, qui in longè minoribus urbibus ante dormierunt, quàm ab Episcopo visiterentur.* Difficultas ergo solum est de necessitate præcepti divini, sive Ecclesiastici.

R. 3.

R. 3. Sacramentum Confirmationis necessarium est saltem jure Ecclesiastico iis omnibus, qui in Clerum assumuntur; & ratio est, quia cum ordo Clericalis status sit perfectionis, nonnisi perfectos admittit. Hinc Christus Dominus ad Apostolos, in quibus omnes saltem Clerici intelliguntur; *sedete in civitate*, inquit Luc. 24. *quoadusque induamini virtute ex alto*. Sanctus Cornelius epist. sæpius laudata ad Fabium Antiochenum, exprobrat Novatiano, quod signaculo chrismatis minimè percepto, sacrum ordinem suscepisset. Et Concilium Nicænum primum can. 8. statuit Novatianos ab hæresi conversos in Ordinibus admittendos cum manuum impositione, confirmatoria, ut creditur.

R. 4. Omnibus adultis confirmatio præcipitur jure tum divino, tum Ecclesiastico.

Prima pars, quæ est de jure divino, non habetur quidem expressè in Scripturis, sed ex iis facile deducitur. Etenim verba Christi Domini Luc. 24. mox relata, & Act. 1. *præcepit eis ab Jerosolymis ne discederent, sed expectarent promissionem Patris*: non soli Apostoli, sed & cæteri Fideles, etiam mulieres, quasi sibi dicta intellexerunt, eisque paruerunt omnes, Act. 1. v. 14. Deinde vigilantia & sollicitudo Apostolorum Act. 8. & 10. ne cuiquam ex baptizatis hoc spiritale subsidium deesset, denotat præceptum divinum illud conferendi & suscipiendi; hæc enim duo correlata sunt.

Probatur 2. ex regula S. Augustini, quod ab omnibus fuit semper observatum, nec invenitur in aliquo Concilio institutum, illud ab Apostolis traditum censeretur debet: atqui semper in Ecclesia fuit observatum, ut Fideles post Baptismum per Sacramentum Confirmationis perficerentur: *ungi*

quoque necesse est eum, qui baptizatus est, inquit Sanctus Cyprianus epist. 70. ut accepto chrismate, id est unctiōe, esse unctus Dei, & habere in se gratiam Christi possit. Sanctus Cornelius exprobrat Novatiano, quod post Baptismum non fuerit consignatus. Si supervixerit (inquiunt Patres Eliberitani can. 38. de Neophyto baptizato) ad Episcopum eum perducatur, ut per manus impositionem perfici possit. Et Concilium Laodicenum canone 48. oportet eos, qui illuminantur, post Baptismum inungi supercœlesti chrismate, & esse regni Christi participes. Sanctus Gregorius libro 12. epist. 6. vult Sacramentum Confirmationis ministrari his, quos accepisse non constiterit, ne talis dubitatio ruina fidelibus fiat. Canones pœnitentiales ad quintum Decalogi præceptum subijciunt pœnitentiæ trium annorum parentes, quorum negligentia filius sine Sacramento Confirmationis decesserit. Et Concilium quartum Mediolanense, à sede Apostolica approbatum, sic statuit: Si quis neglexerit (Confirmationem) canonicis subjaceat disciplinis. Denique extra casum necessitatis fideles antiquitus ad Eucharistiam non admittebantur, nisi prius confirmati. Hoc etiam nunc observant Græci; & præscripsit Rituale Eboracense anno 1409. non admittatur ad Communionem non confirmatus, nisi rationabiliter fuerit impeditus.

Probatur 3. rationibus Theologicis. Prima est S. Thomæ art. 8. Per hoc Sacramentum, inquit, promovetur homo spiritualiter ad ætatem perfectam. Hoc autem est de intentione naturæ, ut omnis qui corporaliter nascitur, ad perfectam ætatem perveniat. Multò autem magis de intentione Dei esse, omnia ad perfectionem perducere, ex cujus imitatione hoc natura participat. Secunda, illud Sacramentum ex præcepto divino est suscipi-

ciendum, quod Christus Dominus instituit tanquam medium, sine quo vix staret infirmitas humana inter mundi pericula & tentationes. Atqui talis est confirmatio, ut habetur can. *Spiritus sanctus*, de consecr. dist. 5. his verbis, quæ falsò tribuuntur Melchiadi: *Quamvis continuò transitoris sufficiant regenerationis beneficia, victuris tamen Confirmationis auxilia necessaria sunt: quia Confirmatio armat & instruit ad agones mundi hujus, & prælia reservandos.* Unde Hugo Victorinus l. 2. de Sacram. p. 3. c. 7. sic scribit: *Quid prodest si à lapsu erigeris (per Baptismum) nisi ad standum confirmeris? & timendum est iis, qui per negligentiam amittunt Episcopi præsentiam, & non suscipiunt manus impositionem, ne fortè propterea damnentur, quia festinare debuerunt cum poterant.* In eadem sententia sunt Theologi celeberrimi, ut Gerson in Compendio de Sacramentis, *ut si homo non debeat debilitari, inquit, comedat necesse est, & isto modo potest dici quòd Confirmatio est necessaria; nam ad hoc, quòd vita spiritualis debeat contra hostes custodiri, necesse habet hoc Sacramento confortari.*

Sed præ cæteris audiendus est Angelus à Clavasio; quia ejus auctoritate abuti conati sunt nonnulli Presbyteri in Angliam missi. Sic autem scribit auctor ille in sua Summa, quæ dicitur Angelica, verbo Confirmatio: *Respondeo quòd non absolute (est necessarium illud Sacramentum) quia baptizatus, si statim decedit, salvatur; tamen necessarium est. Itaque contemnens ipsum suscipere, peccat mortaliter; propterea credo, quod notabilis negligentia Episcoporum in non conferendo illud, sit eis peccatum mortale.*

Dices 1. Rabanus lib. 1. de institutione Clericorum cap. 28. sic scribit de chrismatione verticali, quæ fit per Presbyterum, *necessarium est, ut*

statim succurratur baptizato cum chrismatis unctione, ut Spiritus Sancti participationem accipiens alienus à Christo non existat. Ergo revera unctio verticalis supplet Confirmationem.

Distinguo antecedens, ex opere operantis, sive propter preces Ecclesiæ, quas Deus exaudit in hac unctione; sive Neophyti devotionem, & votum suscipiendæ Confirmationis: quo sensu exorcismi fugant dæmonem, confessio in periculo mortis facta laico, absente Sacerdote, juxta usum decimi tertii sæculi supplet confessionem sacramentalem, propter humilitatem confitentis, & votum Sacramenti Pœnitentiæ, Concedo: ex opere operato, quasi per unctionem illam infundatur gratia sanctificans, Nego antecedens. Et quidem ad mentem Rabani, cujus hæc sunt verba: *Signatur baptizatus per Sacerdotem chrismate in capitis summitate: per Pontificem verò in fronte, ut priori unctione significetur Spiritus Sancti descensio ad habitationem Deo conservandam; in secunda verò ejusdem Spiritus Sancti septiformis gratia venire declaretur.* In unctione ergo verticali significatur tantum gratia Spiritus Sancti, in frontali verò confertur.

Dices 2. Ex S. Thoma art. 8. ad quartum; *omnino periculosum esse secundum Hugonem Victorinum, si Neophytus ex hac vita sine Confirmatione migrare contingeret: non quia damnaretur, nisi fortè propter contemptum, sed quia detrimentum perfectionis pateretur.* Ergo ubi nullus est contemptus, nullum est peccatum, saltem mortale; ac proinde nullum præceptum suscipiendæ Confirmationis.

Distinguo antecedens, propter contemptum, vel formalem, quo despicitur Confirmatio tanquam cæremonia mimica, vel interpretativum, quando

quando sine causa negligitur ; præfente & parato Episcopo ad confirmandum, quo sensu supra dicebat Angelus à Calvasio, *contemnens ipsum suscipere, peccat mortaliter*, Concedo : propter contemptum solum formalem, Nego anteced. nam S. Doctor in corpore ejusdem articuli, docet contra intentionem Dei esse, si negligatur illud Sacramentum.

Secunda pars responsionis nostræ, nimirum Confirmationem esse ex præcepto Ecclesiastico necessariam, patet ex dictis in prima parte ejusdem responsionis ; in ea siquidem multas leges Ecclesiasticas inferuimus, quibus urgentur Fideles ad observandum præceptum divinum de suscipienda Confirmatione.





Tractatus DE EUCHARISTIA.

Duas in partes Tractatus distribuetur. Prima erit de Eucharistia, ut Sacramentum est. Secunda, de eadem, ut est Sacrificium.

PRIMA PARS.

De Eucharistiæ Sacramento.

CAPUT PRIMUM.

Utrùm Eucharistia sit Sactamentum simul & Sacrificium ?

R. **D**e fide est, Eucharistiam esse utrumque. Ita enim definiit Concilium Tridentinum. De Sacramento quidem sess. 7. can. 1. his verbis : *Si quis dixerit Sacramenta novæ Legis . . . esse plura vel pauciora, quam septem, videlicet Baptisimum, Confirmationem, Eucharistiam, &c.*
aut

aut etiam aliquod horum septem non esse verè & proprie Sacramentum, anathema sit. De Sacrificio vero fess. 22. can. 1. Si quis dixerit in Missa non offerri Deo verum & proprium Sacrificium anathema sit.

Q. 2. Unde probatur Eucharistiam esse Sacramentum propriè dictum?

R. Ex Scriptura. Namque ad Sacramentum propriè dictum, tria ex dictis requiruntur. 1. ut sit signum sensibile divinitus institutum. 2. ut promissio gratiæ signo sit annexa. 3. ut existat mandatum divinum illius signi observandi: atqui ex Scriptura hæc tria conveniunt Eucharistiæ: 1. est signum sensibile divinitus institutum, nempe panis & vinum, Matth. 26. *accepit Jesus panem, &c.* 2. promittitur gratia observantibus hoc signum, Joan. 6. *qui manducat hunc panem, vivet in æternum.* 3. extat mandatum divinum utendi hoc signo, Luc. 22. *hoc facite in meam commemorationem.* Et Joan. 6. *nisi manducaveritis carnem Filii hominis, & biberitis ejus sanguinem, non habebitis vitam in vobis.*

Probatur etiam ex universali Ecclesiæ Traditione, quæ semper Eucharistiam numeravit inter vera Sacramenta; in hac parte Novatores, paucis exceptis, nempe Socinianis, conveniunt cum Catholicis.

Q. 3. Quomodo probatur, Eucharistiam esse sacrificium?

R. Probatur; quia Sacrificium propriè dictum est oblatio rei sensibilis, cum aliqua ejus destructione, seu immutatione, facta à legitimo Ministro, ad recognoscendum supremum Dei dominium in omnes creaturas: atqui hæc definitio perfecte convenit Eucharistiæ. In ea siquidem Christus Dominus offertur, tanquam victima cum

mystica ejus destructione per legitimum Ministrum, nempe Sacerdotem ad recognoscendum supremum Dei dominium: ergo est verum sacrificium. Hic toto conatu insurgunt Novatores; sed gravis illa controversia spectat posteriorem hujusce Tractatus partem, quæ erit de Sacrificio.

Ergo Eucharistia Sacramentum est, quatenus Christus datur Fidelibus sub speciebus panis & vini ad spiritualem eorum refectionem; sub illo enim respectu est signum gratiæ sanctificantis: Sacrificium vero est, quatenus ipse Christus Deo offertur ut victima.

Dices; repugnat unum & idem esse Sacramentum & Sacrificium: ergo Eucharistia non est utrumque.

Probatur antecedens, quæ sunt diversæ naturæ, non possunt esse unum & idem: atqui Sacramentum & Sacrificium: sunt diversæ naturæ: ergo.

Nego ant. nam ex dictis ubi de Sacramentis in genere, professio fidei pro remissione peccati originalis, quæ erat Sacramentum in statu Legis naturæ, plerumque fiebat oblatione sacrificii: deinde in Lege scripta multa sacrificia erant etiam Sacramenta, ut consecrationes Sacerdotum.

Ad confirmationem, distinguo majorem, quæ sunt diversæ naturæ totalis, non possunt esse unum & idem, Concedo: quæ sunt diversæ naturæ partialis, Nego majorem. Sic homo & brutum non possunt esse unum & idem, quia sunt diversæ naturæ totales & completæ: sed corpus & spiritus constituunt unum & eundem hominem, quia sunt diversæ naturæ partiales & incompletæ. Porro in Eucharistia sacrificium & sacramentum sunt duæ veluti partes methaphysicæ, ex quibus exsurgit unum mysterium.

Insta-

Instabis: quæ natura & definitione differunt minùs possunt esse unum & idem, quàm quæ solo numero distinguuntur: atqui quæ solo numero distinguuntur, non possunt in unum coalescere, v. g. repugnat Petrum & Paulum esse unum & eundem hominem. Ergo.

Distinguo majorem ut supra: quæ natura & definitione totali differunt, minùs possunt esse unum & idem, Concedo: quæ natura & definitione partiali differunt, Nego majorem. Porro Petrus & Paulus, & cætera numero distincta naturas ultimò completas habent; unde repugnat eas unam tertiam constituere: sed sicut animalitas & rationalitas concurrunt ad unum constituendum hominem, quia sunt naturæ incompletæ; sic ex sacrificio & Sacramento tanquam ex naturis incompletis constituitur Eucharistia.

CAPUT II.

Quibus nominibus designatur Eucharistia.

R. **A**lia conveniunt Eucharistiæ universim sumptæ pro Sacramento simul & Sacrificio: alia speciatim sumptæ pro Sacrificio: alia sumptæ pro Sacramento.

Q. 2. *Quomodo vocatur Eucharistia sumpta pro Sacramento simul & Sacrificio?*

R. Dicitur I. Eucharistia, à nomine Græco, quod Latine est bona gratia, & gratiarum actio, sive quia in ea Christus recipitur donorum maximum, & fons omnium gratiarum, sive quia in ea offertur Deo sacrificium gratiarum, actionis perfectissimæ; *propterea*, inquit S. Chrysostomus
hom.

hom. 25. in Matth. *tremenda ac salutaria illa mysteria, quæ in Congregatione Ecclesiastica celebramus, Eucharistia vocantur, quia multorum beneficiorum sunt recordatio, ipsumque caput divinæ erga nos providentiæ ostendunt, nosque præparant, ut in omnibus grâtiâs agamus.*

Dicitur 2. Eulogia, id est benedictio; *calix benedictionis, cui benedicimus, nonne communicatio sanguinis Christi est?* ait Apostolus 1. Corinth. 10.

Eulogiarum nomen usurpant Scriptores Ecclesiastici, 1. ad significandas partes Eucharistiæ consecratæ, quæ in signum mutuae communionis & charitatis ad absentes Presbyteros per Parochias mitti solebant, ut patet ex Epistola Innocentii I. ad Decentium. Hunc tamen usum prohibuit Concilium Laodicenum can. 14. 2. ad denotandas eas partes panis ex oblatione Fidelium superstites, quas Sacerdos precibus sanctificabat, & expletis mysteriis, iis distribuebat, qui ob aliquod impedimentum ad sacram mensam accedere non poterant, ut habetur in Concilio Laodiceno can. 49. & Nannetenfi can. 9. 3. Ad designanda privatorum dona, quibus mutuam communionem & charitatem testabantur. De iis Sanctus Augustinus epist. 31. alias 33.

Dicitur 3. Pascha, juxta illud Apostoli 1. Cor. 5. *Pascha nostrum immolatus est Christus.* Eucharistia enim succedit Agno Paschali, qui ex S. Thoma qu. 73. art. 6. erat præcipua ejus figura, 1. quatenus immolabatur Agnus ab universa multitudine filiorum Israel, præfigurabatque Passionem Christi Agni immaculati in Cruce immolati; atque adeo sacrificium Missæ, quod celebratur in commemorationem sacrificii Crucis. 2. Quatenus comedebatur cum panibus azymis, adumbrabat

bat Eucharistiam ut sacramentum est. Pascha autem seu phase significat transitum, nempe Angeli, qui cū media nocte percuteret primogenitos in cunctis Ægyptiorum familiis, pertransiit Israelitarum domos, in quarum postibus aspersus cernebatur, juxta præceptum Domini, sanguis Agni tum primum immolati, ut habetur Exodi 12. in quo nemo est qui non videat effectum Sacramenti Eucharistiæ luculenter expressum.

Dicitur 4. Synaxis, id est, collectio seu congregatio; quia multi Fideles convenire solent & in unum congregantur, ut intersint Sacrificio, participesque fiant Corporis Christi. Ob eandem etiam rationem à Latinis dicitur collecta.

Q. 3. *Quæ nomina sunt Eucharistiæ propria, ut sacrificium est?*

R. Dicitur 1. Liturgia, id est, ritus & ordo sacrificii Eucharistiæ peragendi.

Dicitur 2. Missa, quod est nomen Latinum à verbo, *mitto*, vel quia preces ad Deum mittuntur per Sacerdotem, aut per Angelum, ut habetur in canon. Missæ: vel quia Christus est hostia nobis missa à Deo: unde & in fine Missæ Diaconus in festivis diebus populum dimittit, dicens: *Ite, Missa est*, scilicet hostia ad Deum per Angelum. Ita S. Thomas q. 83. art. 4. ad 9. Hoc autem nomen apud Latinos est antiquissimum; habetur enim apud S. Ambrosium lib. 5. epist. 33. S. Augustinum ser. 31. de tempore, S. Gregorium hom. 8. in Evangelia, & in Concilio Agathensi ad annum 506.

Dicitur 3. Sacrificium panis & vini, quod in fide & charitate, sancta Ecclesia Catholica per
univer-

universum orbem terræ offerre non cessat, ex S. Fulgenio lib. de fide ad Petrum, cap. 19.

Dicitur 4. altaris oblatio, ita Sanctus Augustinus epist. 149. alias 59.

Q. 4. *Quæ nomina conveniunt Eucharistiæ, ut sacramentum est?*

R. Dicitur 1. Simpliciter S. Sacramentum propter ejus præ cæteris excellentiam.

Dicitur 2. Cæna Dominica, aut Cæna Domini, ut à Tertulliano lib. de spectaculis c. 13. S. Chrysostomo homil. 24. in 1. ad Cor. Novatores abutuntur hoc nomine, ut probent Eucharistiam non posse celebrari, nisi in congregatione plurium, ac proinde non esse deferendam ad ægrotos. Unde quidam è nostris monent nomen illud, quamvis usitatissimum apud veteres, nunc debere esse minùs familiare.

Dicitur 3. Agapa, id est, dilectio, quia summæ est Dei erga nos dilectionis argumentum, & mutuæ inter Fideles charitatis symbolum & vinculum. Nomen tamen illud extendebatur etiam ad convivia, quæ primis sæculis instruebant Christiani in Ecclesia ad fovendam fraternam dilectionem; in iis quippe pauperes cum divitibus, uti fratres simul accumbebant, ut colligitur ex c. 11. 1. ad Cor.

Dicitur 4. Communio; quia ex S. Joanne Damasceno lib. 4. de fide orthodoxa c. 14. per illam Christi concorporei sumus, & de uno pane participant fideles sic inter se copulantur, ut unum corpus evadant. Hinc vocatur ab eodem Sancto Doctore loco citato metalepsis, quod est assumptio seu transmutatio, quia Fideles per Eucharistiam assumuntur ad unionem cum Christo,
& in

& in ipsum spiritaliter transformantur. In eundem sensum veteres Eucharistiam fermentum appellabant; quia sicut fermentum totam massam, sic Corpus Christi affectiones animi immutat.

Triplicis communionis meminerunt veteres, alia erat Clericorum propria, qui orariis induti intra cancellos communicabant: alia dicebatur laica, ad quam Clerici in pœnam gravioris alicujus delicti amandabantur, nimirum privati clericalis gradus honore extra cancellos, more laicorum, Eucharistiam recipiebant: alia peregrina, quæ concedebatur Clericis viatoribus, cum commendatitias Episcopi Literas non exhibebant.

Dicitur 5. Viaticum, ut à Concilio I. Nicæno, can. 13. & Carthaginensi IV. can. 77. & 78. quia ex S. Thoma qu. 73. art. 4. *hoc Sacramentum præfigurativum est divinæ fruitionis, quæ erit in patria*; ad quam nobis festinantibus vires suppeditat. Cum autem Baptismus & absolutio sacramentalis viam aperiant ad cœlestem beatitudinem, dicuntur etiam viaticum, ut à Sanctis Basilio & Gregorio Nazianzeno ser. in Sanctum Baptisma.

Dicitur 6. Corpus Christi, vel Corpus Domini, ut à Tertulliano lib. de oratione capite ultimo.

Dicitur 7. Panis ab Apostolo 1. Corinth. 10. *Panis, quem frangimus, nonne participatio Corporis Domini est?* à Sancto Augustino, *Panis cœlestis*, epist. 120. *Dominicus*, tractat. 39. in Joannem, *quotidianus*, epist. 121. *super substantialis*, serm. 145. de tempore: ab Ecclesia, *Panis Christi*, *Panis Angelorum*; vel quia ex pane conficitur, vel quia id intuentium oculis speciem panis gerit, vel quia
est ani-

est animis, quod panis corporibus. Ita Lanfrancus lib. de Sacramento Eucharistiæ.

Dicitur 8. Sacramentum seu signum, aliquando etiam figura corporis & sanguinis Christi, scilicet à speciebus panis & vini, quæ Sacramentum vocantur; quia significant corpus & sanguinem Christi. Quare perperam Novatores ex hujusmodi nominibus colligunt, antiquos Patres non credidisse, Christum esse realiter præsentem in Eucharistia; neque enim Sacramentum, seu signum excludit præsentiam rei significatæ, ut constat ex omnibus Sacramentis novæ Legis, quæ sunt signa gratiæ, quam continent. Hinc non solum qui scripserunt ante ortas hæreses circa Eucharistiam, ut Theodoretus Dialogo 3. sed & hi, qui eas grassantes suis scriptis compresserunt, ut Innoc. III. c. *Cum Martha*, de celebratione Missarum, & S. Thomas hic, vocant species panis & vini, Sacramentum seu signum Corporis Sanguinis Domini, quod imprimis notandum est & memoria retinendum.

Dicitur 9. Sacramentum novi Testamenti, juxta illud 1. Cor. 11. *hic calix novum Testamentum est in meo sanguine*; quia Christus Dominus morti proximus hoc amoris sui pignus nobis legavit.

CAPUT III.

Quotuplici modo spectari potest Sacramentum Eucharistiæ?

R. Duplici, nempe in fieri, & in facto esse.

Q. 2. *Quid est Sacramentum Eucharistiæ in fieri?*

R. Est

R. Est consecratio seu conversio panis & vini in Corpus & Sanguinem Christi Domini, remanentibus speciebus, ad spiritualem Fidelium refectionem.

Q. 3. *Quid est Sacramentum Eucharistiæ in facto esse.*

R. Est Corpus & Sanguis Christi Domini sub speciebus panis & vini ad spiritualem Fidelium refectionem. Et hoc posteriori modo communiter accipitur Sacramentum Eucharistiæ. Quare,

Definitur, Sacramentum novæ Legis, continens realiter Corpus & Sanguinem Christi Domini sub speciebus panis & vini ad spiritualem Fidelium refectionem.

Q. 4. *Estne admittenda duplex illa acceptio Sacramenti Eucharistiæ?*

Novatores rejiciunt posteriorem acceptionem, contenduntque hoc Sacramentum, sicut cætera, non habere esse nisi in fieri, sive in usu, & in actuali manducatione, quemadmodum Baptismus non existit nisi in ablutione. Ita Calvinus lib. 4. Instit. cap. 17. §. 3. & Lutherus in articulis Concordiæ anno 1536. ex quo deducunt nullum cultum pani Eucharistico exhibendum, reliquiasque ex Cœna superstites in usus profanos consumi posse, cum nullam habeant sanctitatem.

Lutherani tamen inter se dissentiunt; quidam enim, ut Kemnitiuss secunda parte examinis Concilii Tridentini cap. 3. docent Christum esse in Eucharistia, quamdiu durat actio seu ritus cœnæ: alii extendunt ejus præsentiam usque ad triduum, in gratiam ægrotantium; ad quos intra illud tempus Eucharistia deferri potest; ac

D. Habert Theolog. Tom. V. Aa dein-

deinceps consecrationem evanescere. Contra ejusmodi errores

R. De fide est Sacramentum Eucharistiæ non consistere in usu duntaxat, aut in actione transeunte, sed in re permanenti; ita definiit Concilium Tridentinum sess. 13. canon. 4. his verbis: *Si quis dixerit, peracta consecratione, in admirabili Eucharistiæ sacramento non esse Corpus & Sanguinem Domini nostri Jesu Christi, sed tantum in usu, dum sumitur, non autem ante vel post & in hostiis seu particulis consecratis quæ post communionem reservantur, vel supersunt, non remanere verum Corpus Domini, anathema sit.*

Probatur 1. ex Scriptura, Matth. 26. & Luc. 22. Christus Dominus dixit: *Hoc est Corpus meum, hic est Calix novum Testamentum in sanguine meo*, priusquam Apostoli symbola sumerent: Ergo corpus Christi extitit in manibus ejus, & sanguis ejus in calice, ac proinde Eucharistia erat Sacramentum, priusquam in os Apostolorum intraret.

Respondent, hæc Christi verba, vel esse promissoria rei paulò post futuræ, vel esse prolata in ipso usu symbolorum, quod colligi potest ex his S. Marci verbis, cap. 14. *biberunt omnes*, tum subdit Evangelista, & ait illis, *hic est sanguis meus*, &c.

Contra 1. pronomen, *hoc*, est demonstrativum rei sensibilibiter præsentis, ut infra dicitur. 2. nisi Christus præmisisset verba, & præmonuisset id esse corpus suum & sanguinem; quod porrigebat, Apostoli illud sine fide, & tanquam cibum & potum communem sumpissent. Unde certum est Sanctum Marcum per anticipationem scripsisse, *biberunt omnes*, nec servasse ordinem rerum gestarum, sicut Sancti Matthæus, Lucas, & Pau-

& Paulus 1. Cor. 11. 3. Sic Sancti Patres verba Christi intellexerunt. S. Chrysostomus in cap. 10. 1. ad Corinth. sic loquitur: *Quid est in calice? quod ex latere Christi fluxit.* Et S. Augustinus prologo in Psalm. 33. scribit Christum in manibus suis corpus suum portasse. Ergo revera existebat Sacramentum in calice & in manibus Christi.

Probatur 2. ex constanti Traditione Ecclesiæ.

S. Justinus Apostolorum discipulus cœvus, in Apologia 2. refert Eucharistiam, peractis mysteriis ad absentes solere deferri. Idem testatur Sanctus Irenæus auditor Sancti Polycarpi, discipuli Sancti Joannis Evangelistæ; nam in Epistola ad Victorem Summum Pontificem, qui minabatur se recessurum à communione Episcoporum celebrantium Pascha more Judaico, hoc est 14. Luna, commonet prædecessores ejus misisse Eucharistiam ad illos Episcopos, qui idipsum observabant: Ergo Apostoli & eorum Discipuli crediderunt Eucharistiam habere esse permanens.

Deinde à primis sæculis Fideles Eucharistiam secum asportabant in spiritalem alimoniam. Id constat 1. ex Tertulliano lib. 2. ad uxorem cap. 5. ubi deterrens illam à matrimonio post sui obitum cum infideli contrahendo, sic scribit: *non sciet maritus, quid secreto ante omnem cibum gustes?* 2. Sanctus Cyprianus, qui scripsit quadraginta circiter annis post Tertullianum, hoc est, tertio mediantæ sæculo, narrat tractatu de lapsis, de quadam muliere in persecutione lapsa, quod *cum arcam suam, in qua Domini sanctum fuit, manibus indignis tentasset aperire, igne inde surgente, deterrita est.* 3. Ex Sancto Basilio epist. 289. ad Cæsaream Patriciam, ubi scribit Monachos desertum pe-

tentes, deferre secum Eucharistiam, ibique eam propriis manibus sumere. 4. Ex Sancto Gregorio Nazianzeno, qui in oratione 11. laudat sororem suam Gorgoniam, quòd magna fide de nocte procumbens coram Eucharistia, quam apud se recondiderat, statim morbo se liberatam sensit. 5. Ex S. Ambrosio, qui in Oratione funebri fratris sui Satyri habet, ipsum beneficio Eucharistiæ, quam collo suo appenderat, naufragii periculum evasisse,

Denique Eucharistiam servatam pro infirmis, testis est Eusebius lib. 6. hist. c. 44. ubi referens Decretum S. Dionysii Alexandrini (qui florebat tertio mediante sæculo) de concedenda lapsis pœnitentibus communione, refert quemdam Serapionem in extremis positum, misisse de nocte puerum ad Presbyterum, ut ab eo perciperet Eucharistiam: Presbyterum verò fortè tunc ægrotantem, cùm venire non potuisset, misisse ad Serapionem per eundem puerum exiguam Eucharistiæ partem, ac iussisse ut madefactam in os senis instillaret. Decretum Dionysii confirmavit Concilium Nicænum 1. generale can. 13. anno 325. *omni cuilibet in exitu posito, & poscenti sibi communioinis gratiam tribui, Episcopus probabiliter (id est probatis ejus dispositionibus) ex oblatione dare debet.*

Quid ad hæc Calvinus? *habent fateor, inquit* l. 4. Instit. c. 17. §. 29. *veteris Ecclesiæ exemplum, verùm in re tanta, in qua non sine magno periculo erratur, nihil tutius est, quàm veritatem sequi.* Ergo Ecclesia viventibus adhuc Apostolis usque ad beata Calvini tempora à veritate defecit. Cùm autem blasphemiam tantam non ferant ejus discipuli, præsertim Dalæus, mitiora respondent, contendunt.

duntque ex illa consuetudine non colligi Ecclesiam reposuisse Eucharistiam in re permanenti; tum quia Presbyteri ad infirmos vocati, poterant Eucharistiam conficere in eorum domibus: tum quia etiamsi apud se servassent Eucharistiam, deportandam, necessitate occurrente, ordinabatur ad manducationem, in qua sola habet rationem Sacramenti. Verum frustranei sunt illi conatus; namque 1. nullus Sacerdos aderat, cùm Serapion Eucharistiam percepit. Deinde Columba illa argentea in Templo suspensa, de qua fit mentio in vita S. Basilii, in Testamento Perpetui Episcopi Turonensis, qui obiit anno 477. ex lib. 5. Spicilegii, in Concilio Constantinopolitano sub Menna anno 536. & Turonensi II. an. 567. probant Eucharistiam antiquitus fuisse asservatam, quemadmodum nunc in Ecclesia tum Latina, tum Græca, asservatur in Viaticum infirmorum. 3. Quis Catholicorum unquam negavit Eucharistiam ad usum seu manducationem ordinari? Detur etiam quòd in sumptione ultimò perficiatur Sacramentum, ut docent nonnulli Theologi orthodoxi, an inde sequitur quòd ante manducationem non habeat rationem Sacramenti, sitque panis communis, sicut aqua Baptismi ante infusionem? Si non erat Sacramentum, antequam privati comederent panem, quem post celebrata Mysteria, deferebant in domos suas: ergo ipsi Eucharistiam conficiebant, erantque Ministri tanti Sacramenti.

His absurdis occurrunt laudati Patres; nam S. Cyprianus vocat Sanctum Domini, quod mulier in arca sua reposuerat; S. Ambrosius dixit Satyrum ab initiatis divinum illud Sacramentum

poposcisse. S. Hieronymus in epist. ad Rusticum, scribit S. Exuberium Episcopum Tolosanum, contractis vasis pretiosis in pauperum sublevamen ad eam inopiam fuisse redactum, ut Christi Corpus in canistro deportare cogeretur. Ergo Eucharistia primis sæculis extra usum credebatur Corpus Christi, Sanctum Domini divinum Sacramentum.

Ex his necessariò sequitur Eucharistiam supremo cultu esse colendam. Christus enim ubique est adorandus, sed tum maximè cum immensa sua charitate ad nos exaltandos seipsum demittit.

Nec dicas Regem, qui se in alieno habitu occultat, offendi, si quis illum latentem detegens publicis honoribus & acclamationibus prosequatur; unde Christus non procumbentibus, sed acumbentibus Apostolis Eucharistiam distribuit. Id enim verum est quando Rex non vult agnoscì, ut Saul Pythonissam adiens, 1. Reg. cap. 28. non verò cum seipsum in illa veste peregrina manifestat. Hinc cæcus quem Christus sanaverat, adoravit illum, ubi agnovit esse Filium Dei in forma hominis, Joan. 9. vers. 38. Adoraverunt eum, infantem pannis involutum, & Magi Matth. 2. & Pastores, Angeli quoque, Luc. 2. juxta illud Hebr. 1. *Cum iterum introducit primogenitum in orbem terræ, dicit, & adorent eum omnes Angeli ejus.* Adorant etiam nunc symbolis panis & vini velatum ex sanctis Chrysostomo homil. in cap. 6. Isaïæ, & lib. 4. de Sacerdotio, ac Gregorio libro 4. Dial. c. 58. *Quis, inquit, dubium habere possit in ipsa immolationis hora ad Sacerdotis vocem cœlos aperiri, Angelorum chorus adesse?* Quod dictum sit ad ignominiam Beguardorum & Beguinarum, qui in elevatione

vatione Corporis Christi non assurgebant, nec adorabant, ne ab altitudine contemplationis descenderent ex Clementina ad nostrum, in Conc. Viennensi anno 1311. Adorarunt denique Christiani à primis sæculis, ut patet ex Origene homil. 13. in Exod. *Cum suscipitis Corpus Domini, cum omni cautela & veneratione servatis, ne ex eo parum quid decadat.* Ex S. Ambrosio libro. de Spiritu sancto c. 11. *per terram etiam (intelligitur) caro Christi, quam hodie quoque in mysteriis adoramus.* Ex S. Augustino Pf. 98. *In ipsa carne hic ambulavit (Christus) & ipsam carnem nobis manducandum ad salutem dedit.* Nemo autem carnem illam manducat, nisi prius adoravit. Addit eum peccare qui non adorat. Ex Theodoreto Dialog. 2. symbola post sanctificationem adorantur.

Nullius verò momenti est, quod obijciunt ex accubitu Apostolorum in ultima cœna; nam inde liceret concludere Apostolos nequidem Christum in specie humana spectatum fuisse veneratos. Cum ergo duplex sit adoratio, interior una, exterior altera; prior eadem fuit semper in Apostolis, posterior verò major, vel minor, secundum circumstantiam temporis & loci. Quis autem crederet Apostolos cum Christo visibili recumbentes; debuisse assurgere ad præsentiam Eucharistiæ, in qua idem ipse Christus invisibilis existeret?

Similiter in Ecclesia idem semper fuit cultus interior erga Eucharistiam, crevit verò exterior, ubi floruit sub Principibus Christianis, tum verò maximè, cum injuria tanto Sacramento ab Hæreticis illata refarcienda fuit. Hinc post Berengarianam hæresim, hoc est ab undecimo sæculo, cœpit hostia, statim post consecrationem elevari ab

astantibus adoranda; & exponi in vase solo vitreo inclusa, quamvis illud posterius initio non fuerit ita frequens: instituta est quoque solemnitas in honorem tanti Sacramenti, nempe decimo tertio sæculo: & aliquantò post usus hostiam per vicos honorificè circumgestandi subsecutus est: *Ut . . . adversarii in conspectu tanti splendoris, inquit Concilium Tridentinum, sess. 13. cap. 5. & in tanta universæ Ecclesiæ lætitia positi, vel debilitati & fracti tabesceant, vel pudore affecti, & confusi aliquando resipiscant.*

Objiciunt 1. nonnulla veterum acta, quæ cultui Eucharistiæ repugnant. 1. S. Cyrillus Hierosolymitanus catech. 5. monet, ut post communionem digito tangant labia sanguine Christi tincta; deinde eodem digito sanctificent oculos, frontem, &c. 2. S. Augustinus libro 3. operis imperfecti contra Julianum cap. 164. narrat. mulierem filio suo cataplasma ex Eucharistia fecisse, quo imposito, sanatus est puer. 3. Fidelium cadavera cum Eucharistiâ sepulturæ tradebantur, ut constat ex historia vitæ Sancti Basilii, ex lib. 2. Dialog. Sancti Gregorii cap. 24. & ex Amalario lib. 4. de Officiis cap. 9. 4. Ex Nicæta in vita sancti Ignatii Constantinopolitani Episcopi, calamo intincto in sanguine Christi Domini, subscripserunt damnationi Photii. 5. Reliquiæ Eucharistiæ post mysteriorum celebrationem superstites igni tradebantur, ex Esichio, libro 2. in Levitic. & ex Concilio Aurelianensi relato ab Ivone Carnotensi. 2. parte Decreti cap. 22.

R. 1: Generatim cum Sancto Augustino lib. 2. de Civit. c. 23. *Non quærimus utrum factum sit, sed utrum faciendum; sana quippe ratio etiam exemplis anteponenda est.* Deinde si auctoritate agendum est,

est, certè cujusvis privati auctoritas cedere debet universalis Ecclesiæ judicio, quia talia non permittit.

R. 2. Ad singula.

Ad primum & secundum, quæ scribit Sanctus Cyrillus, singularem reverentiam & devotionem indicant; sicut & quæ egit mater pro salutè filii, fiduciam divinitus inspiratam, ex eventu miraculoso licet conjicere.

Ad tertium, vera sit illa historia, quæ est incerti auctoris, probat Eucharistiæ cultum a Sancto Basilio fuisse exhibitum; sic enim habet: *Dividens panem consecratum in tres partes, unam communicavit cum timore multo; alteram autem reservavit conspeli sibi; tertiam verò imponens Columbæ aureæ pependit super altare.* Citatur hæc historia ab Ænea Parisiensi contra Græcos anno 860. Factum autem Sancti Benedicti à Sancto Gregorio laudatum miraculum est, non exemplum. Denique licet illa praxis spem resurrectionis obsignaret, eam tamen prohibuit Ecclesia in Concilio Carthaginensi III. can. 6. anno 397. & Synodo Antissiodorensi can. 12. anno 579.

Ad quartum, incerta planè, quæ refert Nicætas in objectione citatus, sicut & quæ Baronius narrat de Theodoro Summo Pontifice ad annum 648. Ex Græcorum Annalibus: sed supponantur vera, cedunt in venerationem sacri Sanguinis, quo subscriptionis ostendebatur veritas.

Ad quintum hæc intelligenda sunt de speciebus corruptis, ex ipso Ivone, cujus hæc sunt verba: *Ut omne sacrificium sordida vetustate perditum igne comburatur, & cineres juxta altare sepeliantur;* quæ reverentiam indicant, ut observat Guitmondus,

duſ, lib. 2. de Corpore Chriſti: *Miſteria*, inquit, *non traduntur ignibus cremanda, ſed mundiffimo elemento fideliter committuntur nobis occultanda, & ſupernis ſedibus illicò reponenda.*

Objiciunt 2. contra Eucharistiæ permanentiam. Non est attendendum quid in hac parte privati, ſed quid celeberrimæ Eccleſiæ obſervarent: Atqui celeberrimæ Eccleſiæ prohibent ne quid ex Eucharistia in craſtinum reſervetur: Ergo.

Probant minorem.

1. In Eccleſia Romana, quæ reſidua erant poſt myſteriorum celebrationem, conſumebant Clerici, ex epiſtola 2. ſancti Clementis: in Eccleſia verò Conſtantinopolitana dabantur pueris ſcholaribus conſumenda, ex Evagrio lib. 4. hiſtor. c. 35. & Nicephor. lib. 17. cap. 25. quem morem amplexi ſunt Patres Concilii Matiſconenſis II. anno 585.

2. Concilium Cæſarauguſtanum anno 381. & Toletanum I. anno 400. vetant ne in privatorum manibus detur Eucharistia domum deferenda.

3. Cardinalis Humbertus undecimo ſæculo agens contra Græcos, reprehendit eos; quòd Eucharistiam aſſervarent. Quin & Gabriel Biel inſignis in Germania Theologus ſcribens XV. ſæculo in Canonem Miſſæ, obſervat Chriſtum Apoſtoliſ non dediffe Eucharistiam, ut honorificè eam conſervarent, ſed ut ederent, quo argumento uſus eſt Origenes hom. 5. in cap. 5. Levit. ad probandum ſacrificium laudis novum eſſe offerendum.

4. Ferunt etiam nunc apud Abyſſinos, ſeu Æthiopes Eucharistiam non aſſervari.

Reſp. conceſſa maj. Nego min. Textus enim allati, præſertim ex SS. Juſtino, Irenæo, Dionyſio Alexandrino, & Concilio Nicæno, non priva-

privatorum quorundam, sed universalis Ecclesiæ mores exponunt, nec contra pugnant, quæ obijciuntur.

Non primum; nam præterquam quod non desint qui contendunt laudatam epistolam non esse sancti Clementis, ex illa clarè colligitur consumi tantum à Clericis, quod residuum erat ex iis, quæ vel ad absentes mittebantur, vel quæ Fideles secum in domos suas asportabant; vel quæ in sacrario pro infirmis recondebantur; scribit enim auctor ille: *Cum timore & tremore reliquias fragmentorum Corporis Domini custodire debent, ne qua putredo in sacrario inveniatur*: Ergo supponit Eucharistiam asservari, sicut & Concilium Matisconense; loquitur enim de hostiis unaquaque hebdomada renovandis; *Quarta, inquit, vel sexta feria innocentēs, indicto eis jejuniis, easdem reliquias aspersas vino percipiant.*

Non secundum; Ideò enim Concilium Cæsaraugustanum & Toletanum sanxerunt, ne Eucharistia secundum pristinum morem in manibus fidelium deponeretur; quia Priscillianistæ Hæretici cum Catholicis ad sacram mensam accedebant, simulantes se esse Catholicos, sed acceptam Eucharistiam horrenda impietate projiciebant, ut colligitur ex Concilio Toletano II. Porro lex illa Concilii Cæsaraugustani & Toletani I. non ubique obtinuit. Nam mos asportandi Eucharistiam vigeat tempore Sancti Gregorii, ut patet ex lib. 3. Dial. cap. 33. & Venerabilis Bedæ, lib. 4. hist. cap. 24.

Non tertium: nam Cardinalis Humbertus realis præsentiae contra Berengarium defensor acerrimus, solum reprehendit Græcos, quod per Quadrage-

dragesimam imperfectas, ut vocat, Missas celebrarent; hoc est, ex præsanctificatis, seu præconsecratis, die Dominica præcedente; Biel verò urget Fideles ad sacram communionem hoc argumento, nempe Christum non eo solo fine instituisse tantum mysterium, ut honorificè circumgestetur, sed ut eo spiritualiter nutriamur. Unde patet mala Novatorum fides in citandis auctoribus.

Quod autem assertur ex Origene, non est ad rem; loquitur enim de Sacrificio laudis, vultque ut renovemur spiritu mentis nostræ, ac novum semper canticum Domino canamus, quemadmodum Psalmista frequenter admonet.

At inquires, Christus præcepit Apostolis, ut impræsentiarum comederent. Quid inde, nisi quod tunc præceptum communionis urgeret? sic Sacerdotibus dum sacrificant, sic omnibus fidelibus tempore Paschatis & in mortis exitu inducitur communicandi necessitas, sed ex his non sequitur Eucharistiæ Sacramentum in solo usu consistere, nec posse asservari in gratiam eorum, qui Sacrificio non interfunt.

Non quartum; Schismatici enim, quales sunt Abyssini, in errores facilè impingunt: deinde forsitan non videtur ipsis necessarium asservare Eucharistiam, cum apud eos non solum Clerici, sed & Laici omnes bis in hebdomada Eucharistiam percipere dicantur.

Instabis I. omne Sacramentum debet esse signum gratiæ sanctificantis: atqui Eucharistia non est signum gratiæ, nisi in usu & actuali perceptione.

Nego minor. Nam corpus Christi sub speciebus panis existens, habet rationem cibi spiritualis:

ergo

ergo significat nutritionem spiritalem, seu gratiam sanctificantem.

Urgebis: Licet oleum significet corroborationem, cum naturaliter corroboret, tamen non habet rationem Sacramenti, nisi in ipsa applicatione, seu unctione actuali: ergo satis non est ad rationem Sacramenti, quod sit productivum gratiæ, sed debet esse signum, quod actu producat gratia. Porro corpus Christi sub speciebus panis, est quidem nutritivum: sed actu non nutrit, nisi in ipsa manducatione: Ergo tunc solum est Sacramentum.

Distinguo anteced. Oleum extra usum, naturaliter corroborare potest membra corporis, Conc. Vires animæ, Nego anteced. Oleum enim naturaliter non significat animæ corroboracionem, sed ex institutione divina, determinaturque ad significandum spiritalem illum effectum per verba quæ non proferuntur nisi in ipsa applicatione. At Corpus Christi sub speciebus panis existens, etiam extra usum significat nutritionem spiritalem. Deinde falsum est Sacramentum debere significare sanctificationem actualem; nam de fide est Baptismus esse verum Sacramentum in Hæreticis, & in aliis peccatoribus, qui ejus effectui obicem ponunt.

Instabis 2. omne Sacramentum novæ Legis constat rebus tanquam materia, & verbis tanquam forma: atqui Eucharistia in facto esse non constat verbis: ergo in facto esse non est Sacramentum.

Distinguo maj. Omne Sacramentum in fieri constat rebus & verbis, Conc. In facto esse, Nego maj. Sed de materia & forma Eucharistiæ dicetur seqq. capitibus.

CA-

CAPUT IV.

Quænam est materia Sacramenti Eucharistiæ?

R. Duplex est, nempe remota & proxima.

2. *Quænam est materia remota?*

R. Panis & vinum, quemadmodum enim in Pœnitentiæ Sacramento peccata destruenda & necessariò præsupposita, dicuntur materia remota; sic in Eucharistia panis & vinum in corpus & sanguinem Christi Domini convertenda, & eo sensu destruenda necessariò præsupponuntur, tanquam Sacramenti materia remota. Est. 1. Contra Gnosticos, qui Eucharistiam suam conficiebant ex abortivo infante in mortario contuso, ex Epiphanio hæres. 26. 2. Contra Artotyritas qui panem caseo mixtum adhibebant, ex eodem Sancto Epiphanio hæresi 49. 3. Contra Aquarios, qui solam aquam offerebant, ex sancto Cypriano epist. 63. Aquariis annumerantur Encratitæ, Ebionitæ, & ipse Tatianus olim Sancti Justini discipulus, ex sancto Epiphanio hæres. 30. 46. & 47. Item Manichæi ex S. Leone serm. 4. de Quadragesima.

Probatur autem responsio: tum ex scriptura, in qua legimus Christum Dominum Eucharistiam confecisse in pane & vino, & præcepisse Apostolis, ut idipsum facerent in ejus commemorationem, Matth. 26. Luc. 22. & 1. Corinth. 11. tum ex constanti Ecclesiæ Traditione, quæ non nisi panem & vinum pro materia Eucharistiæ usurpavit, damnayitque aliud offerentes: *In Sacramento corporis & sanguinis Domini*, inquit Concilium tertium Carthaginense anno 397. cap. 24. *nihil amplius*

amplius offeratur, quam ipse Dominus tradidit, hoc est panis & vinum aqua mixtum. Eadem tradunt Concilium Braccarense quartum anno 675. c. 2. & Concilium Trullanum, seu Quini-Sextum, ann. 692. can. 28.

Dices : Can. 4. Apostolorum permittitur, ut uvæ, oleum, & incensum offerantur ! Ergo.

R. 1. Hos Canones non fuisse ab Apostolis conditos, sed ex variis Conciliis collectos.

R. 2. Distinguendo antecedens : Ut offerantur, vel ad alendos Clericos, vel ad altaris ornatum, Conc. Ad Sacrificii materiam, Nego anteced. Nam. can. 3. decernitur depositionis pœna Episcopo, vel Presbytero, qui aliud quam panem & vinum obtulerit.

Q. 3. *Quenam est Eucharistiæ materia proxima ?*

R. Aliis est Conversio panis & vini in corpus & sanguinem Domini ; quia, inquit, actio Ministri in aliis Sacramentis est materia proxima, v. gr. ablutio in Baptismate, manus impositio in Confirmatione & Ordinatione, unctio in Extrema Unctione.

Sed contra. Conversio panis & vini in corpus & sanguinem Christi, nec per se, nec per aliud est sensibilis, sicut aliæ recensitæ actiones, sed sola fide percipitur : Ergo.

Aliis corpus & sanguis Christi Domini sunt materia Eucharistiæ proxima & adæquata : tum quia succedunt pani & vino, quæ diximus materiam remotam & totalem, suntque sensibilia per species panis & vini, quemadmodum in Sacramento pœnitentiæ dolor fit sensibilis per Confessionem, & alios nutus pœnitentis : tum quia si quid aliud posset assignari pro materia proxima Eucharistiæ, maximè species panis & vini : atqui species

cies assignari non possunt, cum non sint signa gratiæ productiva.

Communior, & (ut nobis videtur) verior est illorum sententia, qui affirmant corpus & sanguinem Christi esse quidem materiam proximam propter argumenta secundæ sententiæ, sed partialem tantum; species verò panis & vini alteram, & ex illis duabus partibus exurgere materiam totalem & adæquatam.

Probatur 1. ex his Concilii Tridentini verbis sess. 13. can. 1. *Si quis negaverit in sanctissimæ Eucharistiæ Sacramento contineri verè, realiter, & substantialiter corpus & sanguinem, &c.* Unde sic argumentari licet: corpus & sanguis Christi non sunt Sacramentum, sed dicuntur contineri in Sacramento, sicut anima in homine: ergo ad Sacramentum Eucharistiæ, præter corpus & sanguinem, aliud requiritur: aliud autem assignari nequit, præter species. Ergo reverà species sunt materia partialis Sacramenti. 2. Species panis & vini non solum demonstrant sensibilibus corpus & sanguinem, quemadmodum nutus pœnitentis, aut sponsorum significant duntaxat dolorem, aut consensum interiorem; sed insuper signa sunt nutritionis spiritalis, seu gratiæ nutritivæ, quatenus scilicet conjunctæ cum corpore & sanguine Christi Domini evadunt spiritalis cibus & potus animæ; quamvis enim corpus & sanguis Domini sancta sint independentes à speciebus, hauriantque virtutem sanctificandi à Verbo, in quo subsistunt, non habent tamen esse Sacramentale, nisi per species, hoc est, non constituuntur ut animæ cibus & potus, nisi ratione specierum, sub quibus existunt, tanquam contentum substantiale ad animæ nutritionem

nem ordinatum. Ergo species proximè significant corpus & sanguinem, simul & gratiam nutritivam, ac proinde illam re vera efficiunt, Sacramenta enim novæ legis efficiunt quod significant; & sic patet solutio ad alterum argumentum secundæ sententiæ.

Dices 1. Illud non potest censerī materia Sacramenti, quod est totum Sacramentum: atqui corpus & sanguis Christi, simul & species panis & vini sunt totum Eucharistiæ Sacramentum: ergo non sunt ejus materia.

Negat Scotistarum Schola absolutè minorem, namque, ajunt illi, verba consecratoria sunt forma Eucharistiæ, etiam in factō esse, quia licet physicè transierit, moraliter tamen perseverant, & veluti informant species panis, quemadmodum forma absolutionis informat Confessionem, & Contritionem, quæ pluribus diebus fortè præcesserunt.

Non satisfacit hæc responsio; namque verba consecrationis non sunt forma informans, nec pars Sacramenti, cū immediate non significant gratiam nutritivam, sed conversionem panis & vini in corpus & sanguinem Christi, quam re vera efficiunt; manet itaque in Sacramento jam perfecto, sicut causa efficiens in effectu. Unde

R. Distinguendo min. Sunt totum Sacramentum in factō esse, Conc. In fieri, Nego min. Distinguo similiter consequens. Non sunt materia Eucharistiæ in factō esse, Conc. In fieri, Nego consequ. Etenim ex dictis ad Sacramentum in fieri hæc tria concurrunt. Primum, materia remota; scilicet, panis & vinum: secundum, materia proxima, nempe corpus & sanguis Christi Domini,

quæ panis & vino succedunt: tertium, verba consecrationis tanquam forma, non quidem informans, sed efficiens conversionem.

Dices 2. Innocentius III. Cap. *Cum Martha*, de celebratione Missarum, & ex illo S. Thomas & alii Theologi, docent species, esse Sacramentum tantum: ergo corpus & sanguis Christi non sunt ejus pars.

Nego consequentiam. Enimverò contra mentem illorum Theologorum eruitur; cum expressè doceant corpus & sanguinem Christi esse etiam Sacramentum. Ut autem intelligas quo sensu dixerint species esse Sacramentum tantum,

Observa Innocentium eo loci tria distinguere in Eucharistia. Primum, quod est Sacramentum tantum: secundum, quod est res Sacramenti & Sacramentum simul: tertium, quod est res Sacramenti tantum. Sacramentum tantum est id quod significat, & non significatur; ut species, quæ sunt signa per se visibilia, tum corporis & sanguinis Christi, tum gratiæ nutritivæ. Res Sacramenti & Sacramentum simul sunt id quod significatur & significat; ut corpus & sanguis Christi, quæ significantur per species, & significant gratiam nutritivam, quemadmodum dolor in Sacramento Pœnitentiæ significatur per confessionem, & significat remissionem peccatorum, & ideo est res Sacramenti & Sacramentum simul. Res Sacramenti tantum est id quod significatur, & non significat, ut gratia nutritiva, quæ est effectus Eucharistiæ, significatur enim per species & per corpus Christi, & nihil ulterius significat.

Q. 4. *Species panis cum corpore Christi, & species vini cum ejus sanguine, suntne duo Sacramenta specie distincta?*

R. Minimè, quia ordinantur ad unam refectio-
nem totalem, quæ perficitur cibo & potu.

Dices 1. Ecclesia appellat Eucharistiam in plu-
rali numero Sacramenta: *Purificent nos, inquit, Sacramenta quæ sumpsimus*: Ergo.

Distinguo anteced. Ratione duplicis signi,
Conc. Duo enim signa dicuntur Sacramenta, ut
jam notavimus: ratione rei significatæ, seu nu-
tritionis spiritualis, Nego anteced. Sic homo
sumpta una refectioe, dicitur in plurali numero
sumpsisse alimenta.

Instabis 1. Ubi sunt diversa signa gratiæ, sunt
Sacramenta specie distincta: atqui species panis
& vini sunt distincta signa gratiæ: ergo.

Distinguo maj. Diversa signa gratiæ distinctæ,
& ad diversum finem ordinata, Conc. Sic Baptis-
mus & Confirmatio sunt Sacramenta specie distin-
cta, quia diversam gratiam significant: diversa si-
gna ejusdem gratiæ, & ad eundem finem proxi-
mum ordinata, Nego maj. Porro species panis &
vini eandem gratiam significant, ordinanturque
ad eundem finem proximum, scilic. ad refectio-
nem spiritualem, quæ in eo differt à corporali;
quodd in illa potus & cibus sint unum & idem,
juxta illud Matth. 5. *Beati qui esuriunt & sitiunt ju-
sticiam*; in hac verò minimè.

Urgebis; Ergo superfluæ sunt illæ duæ spe-
cies, cum una idem præstet quod ambæ simul.

Nego conseq. Inserviunt enim, ut perfectius
Passio Christi repræsentetur, in qua sanguis sepa-
ratus est à corpore; &, ut clarius significetur

virtus Eucharistiæ, quæ & confortat animam, sicut panis corpus hominis, & temperat ardorem concupiscentiæ, sicut potus viscera refrigerat. Sed quæ in corporibus diversa sunt, in spiritualibus sunt prorsus unum & idem: eadem iustitia & gratia augeat animæ vires, & minuit concupiscentiæ impetus.

Instabis 2. Si duæ species efficiunt unum Sacramentum, jure meritò Catholicis exprobrant Novatores, quod Sacramentum truncatum exhibeant, dum unicam speciem concedunt Laicis.

Nego sequel. Non merentur Catholici illas Novatorum contumelias: tum quia semper integrum Sacramentum conficiunt, nec hætenus unam speciem sine altera consecrarunt: tum quia Laicis sub una specie ministrant Christum integrum, qui est res Sacramenti, & Sacramentum simul. Unde ad confirmationem

Respondeo in forma. Catholici Laicis ministrant Sacramentum incompletum, si nomine Sacramenti intelligatur id, quod est Sacramentum seu signum tantum, Conc. Si intelligatur id, quod est res Sacramenti & Sacramentum simul, Nego. Cur autem Ecclesia unam speciem Laicis concedat, dicemus, ubi de Communionem.

Dices 2. Ibi est diversum Sacramentum, ubi diversa forma, & diversa materia: atqui in Eucharistia diversa est forma, & diversa materia: ergo.

Distinguo majorem. Ubi est diversa forma in facto esse, Conc. In fieri, Nego majorem: Distinguo similiter minorem; in Eucharistia diversa est forma & diversa materia in fieri, Concedo. In facto esse, Nego min. Ut enim jam
monui-

monuimus, forma consecratoria non est pars componens Sacramentum, sed est causa efficiens Sacramentum, seu conversionem panis & vini in corpus & Sanguinem Christi sub speciebus panis & vini, quæ duo simul juncta componunt Sacramentum integrum in facto esse, in quo corpus & sanguis Christi habent rationem formæ, cum sit præcipua ejus pars, & magis significant refectionem spiritalem: species verò censentur veluti pars ejus materialis.

Q. 5. *Eucharistia estne unum vel multiplex numero Sacramentum?*

R. Distinguendum est: vel enim species ordinatæ sunt ad unam refectionem, v. gr. Sacerdotis, qui utramque speciem consecravit, vel ad plures refectiones, ut hostiæ in pyxide: si primum, Eucharistia est unum numero Sacramentum; quia in hac hypothese est unicum signum totale ejusdem gratiæ nutritivæ: si secundum, multiplex est numero Sacramentum, quia sunt plura numero distincta signa gratiarum numero distinctarum. Ex quo sequitur fore unum numero Sacramentum, si unus simul sumeret plures hostias consecratas; quia esset unum signum formale unius refectionis.

Dices: si esset una & eadem substantia panis sub diversis accidentibus, esset unus numero panis: ergo cum sit idem Christus sub diversis speciebus, erit unum numero Sacramentum.

Nego conseq. Disparitas est, quodd denominatio Sacramenti non repetatur à solo corpore Christi, sicut denominatio panis à sola substantia panis, sed à speciebus, quas diximus esse partem Sacramenti.

Q. 6. *Quæ quantitas panis aut vini requiritur ad Eucharistiæ confectionem?*

R. 1. Ad veritatem Sacramenti, sicut minima sufficit, modo sensu perceptibilis sit; sic maxima non officit: tum quia Christus nullam quantitatem determinavit: tum quia cum qualibet quantitate stare potest veritas formæ, modo censeatur sufficienter præsens, ut demonstrari possit.

Quidam tamen Thologi opinantur verba consecratoria super enormem panis quantitatem, qualis esse potest in macello, carere effectu; quia, inquit, Christus non dedit consecrandi potestatem in destructionem, sed in ædificationem. Verum illa ratio nimis probat; sequeretur enim Sacerdotem non conficere quoties sua potestate abutitur contra Christi intentionem, quod est absurdum, aliàs condemnanda essent Sacrificia Sacerdotum sacrilegorum, & hostiæ ab ipsis consecratæ.

R. 2. Peccaret contra Christi intentionem & Ecclesiæ præceptum, qui sciens & volens majorem quantitatem consecraret, quàm requirat communicantium numerus. Constat ex citata Epistola sub nomine S. Clementis, distinctione secunda de consecratione, in qua sic legitur: *Tanta in altari holocausta offerantur, quanta populo sufficere debeant*: & ex decretis summorum Pontificum, quibus damnant abusum Sacerdotum, qui uni & eidem plures formulas simul administrabant majoremque vini quantitatem in Calicem infundebant eo devotionis prætextu, quod ex diuturniori Christi præsentia in stomacho majorem fructum perciperent saltem ex opere operantis.

Q. 7.

Q. 7. *Requiriturne præsentia panis & vini ad consecrationem Eucharistiæ?*

R. Requiritur. Hæ enim particulae, *hoc, hic*, sensibilibiter demonstrant rem præsentem, sicut particula *te*, in forma Baptismi & Pœnitentiæ. Ergo sicut non potest baptizari aut absolvi nisi persona præsens, sic nec consecrari materia absens.

Q. 8. *Quotuplex potest esse præsentia?*

R. Duplex, physica & moralis. Physica est, cum aliquo sensu res attingitur, puta oculis vel manibus. Moralis, quando res etsi sensu non percipiatur actu, tamen in eo loco sita est, quo à consecrante sit perceptibilis & demonstrabilis, si non in se, saltem in aliquo ipsi conjuncto, aut ordinato ad illam continendam, sic in cumulo multarum formularum, si quæ sub aliis latitent; nihilominus censentur Sacerdoti præsentem, quia ingens hostiarum cumulus se habet per modum totius, quod re vera præsens est, etiam sensibilibiter, licet sensus singulas illius partes non attingat: quis negaverit, v. gr. quod ostensa lagena aut crumena, moraliter non videatur vinum aut argentum inclusum?

Q. 9. *Quæ præsentia requiritur ad consecrationem Eucharistiæ?*

R. Moralis sufficit; quia cum illa morali præsentia stat veritas formæ consecratoriæ, & sensibilibiter demonstratur materia consecranda.

Ex his sequitur

I. Materiam ponere parietem non esse moraliter præsentem Sacerdoti ad Altare stanti. Idem dicendum videtur, si sit in tabernaculo conclusa; quia tabernaculum non est vas, sed locus se-

paratus, quo demonstrato non demonstratur id, quod in eo continetur inclusum.

2. Sacerdotem, qui habet duas hostias, dum putat se habere unam tantum, utramque consecrare, cum utraque sit ei moraliter præsens, velitque consecrare id, quod habet præ manibus.

3. Si ex oblivione non aperiatur pyxis super corporali reposita, ut monent Rubricæ Missalis, nihilominus hostiæ in ea conclusæ consecrantur; quia sunt moraliter præsentes Sacerdoti, pyxis enim est vas, quo demonstrato, demonstratur contentum

Dixi, *super corporali reposita*; Si enim extra remansisset, verbi gratia, ad cornu altaris, hostiæ non censerentur consecratae, non quidem defectu præsentiæ, sed intentionis in Sacerdote; siquidem in illa hypothese neque esset intentio interior etiam virtualis, cum Sacerdos nunquam voluerit consecrare illas hostias contra Ecclesiæ vetitum, neque exterior, quia ne quidem exterius Sacerdos facit, quod facit Ecclesia, nec iudicant circumstantes eum velle tali in hypothese consecrare. Idem dicendum de vini guttis, quæ casu super calicis pedem ceciderunt.

4. Et si præscribant rubricæ, ut Sacerdos parum inclinatus consecret, indecens tamen est & contra reverentiam mysteriis nostris debitam, ut os admoveat ad materiam consecrandam; & tanto conatu verba consecrationis pronuntiet interponendo morulas ad singula verba, *hic est calix*, ut suo halitu contingat, & inficiat res oblatas, non sine aliqua intuitum offensione.

CAPUT V.

Qualis panis, & quale vinum est materia Eucharistiæ?

R. Panis confectus ex farina triticea, aqua naturali diluta, & ad ignem cocta, vinum quoque de vite, & expressum ex uvis maturis & integris, est necessaria Eucharistiæ materia.

Probatur 1. ex Scriptura, ubi Christus instituens Eucharistiam, panem & vinum usurpavit: qualia erant tunc temporis in usu apud Judæos, atqui apud Judæos non erat alius panis simpliciter dictus & ad usum communem, neque aliud vinum: ergo.

Probatur 2. Ex constanti Ecclesiæ praxi, quæ nunquam Eucharistiam nisi in pane triticeo, & vino de vite celebravit, ut patet tum ex Decreto Eugenii IV. tum ex actione tertia Concilii Chalcædon. anno 450. ubi Ischirion exponit adversus avaritiam Dioscori Episcopi Alexandrini, Sacrificium in Lybia non fuisse oblatum, defectu frumenti, tum ex pluribus aliis Conciliis, à quibus prohibitum est, ne pro materia Eucharistiæ aliud usurpetur quam quod à Christo traditum est, panis scil. & vinum.

Probatur 3. Quia sicut materia Baptismi est sola aqua simpliciter dicta; sic materia necessaria Eucharistiæ est panis & vinum, quæ his nominibus simpliciter & communiter designantur: atqui panis triticeus & vinum de vite sunt hujusmodi; alius vero panis, & aliud vinum improprie & cum addito ita vocantur v. gr. panis ex hordeo con-

fectus non dicitur simpliciter panis sed panis hordeaceus, Joan. 6. v. 9. Ergo.

S. Thomas tamen q. 74. art. 8. ad secundum, existimat panem filigineum esse materiam sufficientem; quia filigo nascitur ex frumento, nec ab eo essentialiter differt. Idipsum Estius de hordeo sentit in quartum distinct. 8. cap. 6. Verum cum Eucharistia non sit Sacramentum ad salutem absolutè necessarium, nunquam licet uti hujusmodi materiis dubiis.

Sequitur 1. ex dictis materiam non esse Eucharistiæ aptam 1. Massam crudam, uvas nondum compressas; quia licet massa cocta, & succus ex uvis expressus substantialiter non differant à massa cruda, & à succo nondum expresso; tamen non sunt moraliter quid idem; nec massa cruda, aut uva dici potest panis, aut vinum. 2. Neque farinam aqua roseacea, aut alio liquore dilutam, quia ex illa non fit panis, sed placenta. 3. Neque succum ex uvis immaturis expressum, quia non est vinum, sed omphacium, gallicè *verius*, neque ex uvis corruptis seu decoctis aut siccatis propter eandem rationem.

Sequitur 2. Mustum esse materiam sufficientem; quia propriè est vinum, sed impurum; quare extra necessitatem assumi non debet.

Circa vinum congelatum non conveniunt Theologi. Probabilior nobis videtur eorum sententia, qui affirmant esse materiam validam, modò tanta congelatio non fit, ut speciem solvat, & ratio est quia vinum congelatum retinet naturam & proprietates vini, adeout si species consecratae congelascant, sub iisdem remaneat Sanguis Christi Domini.

Nec

Nec dicas aquam congelatam non esse materiam sufficientem Baptismi. Nam ablutio, quæ non potest esse, nisi aqua actu fluat, est materia essentialis, & proxima Baptismi; potatio verò actualis nullatenus pertinet ad essentiam Eucharistiæ, ut constat ex capite præcedenti, & videre est in speciebus post consecrationem congelatis, quæ habent rationem Sacramenti, quamvis ut sic potabiles non sint, in praxi tamen observandum est, quod monent rubricæ, nempe ubi contingit vinum congelari ante consecrationem, liquefaciendum esse, antequam verba consecrationis proferantur.

CAPUT VI.

Utrum panis Eucharisticus debeat esse fermentatus, aut azymus?

R. Græci, duce Michaelæ Cærulario Patriarcha Constantinopolitano, ducentis ferè annis ab ortu schismatis per Photium inducti, hoc est, undecimo sæculo, anno scilicet 1653. litem moverunt Latinis, quòd in pane azymo consecrarent, contenderuntque azymum non esse panem. Unde Jacobus Sirmondus è Societate Jesu, in disquisitione de azymo anno 1652. infert usum azymorum in Ecclesia Latina non obtinuisse, nisi post ortum Photianum schisma circa annum 886. cui sententiæ suffragatur ex parte Cardinalis Bona libro 2. de rebus liturgicis cap. 23. anno 1672. aliàs, inquit Photius, qui levissima Latinis obijcit, non siluisset in re gravioris momenti. Verùm multa suadent usum azymorum fuisse in Ecclesia

clesia Latina frequentem ante Photii tempora ; nam Rabanus Maurus , qui obiit anno 856. libro 1. de Institut. Clericorum cap. 33. probat exemplo Christi Domini panem Sacrificii debere esse absque fermento. Idem ante eum præstitit Alcuinus Epist. 90. Leo verò IX. epist. 6. ad Michaellem Cerularium scribit Ecclesiam Romanam usum azymorum ab Apostolis sumpsisse : *quis non stupeat*, inquit, *quod post tot sanctos & orthodoxos Patres per mille & viginti à Passione Salvatoris annos novus Calumniator Ecclesiæ Latinorum emerisisti ?* Certè Leo IX. non erat ita remotus à tempore Photii, ut ignoraverit mutationem, quam in illo temporis intervallo Sirmondus factam præsumit : ergo si quæ in hac re facta est mutatio in Ecclesia Latina, necesse est antiquissimam credere. Quidquid sit, lis confopita est anno 1438. in Concilio Florentino in quo Ecclesia Latina & Græca declararunt panem sive azymum, sive fermentatum esse materiam Eucharistiæ idoneam : *Definimus insuper*, inquiunt Patres, *in azymo sive fermentato pane triticeo Corpus Christi veraciter confici*, Sacerdotesque in altari ipsum Corpus Domini conficere debere, unumquemque scilicet, *juxta suæ Ecclesiæ sive Occidentalis, sive Orientalis consuetudinem.* Quod autem præceptum illud grave sit, colligitur ex cap. *Liternas*, de celebratione Missarum, ubi privatur Sacerdos Latinus officio & beneficio, qui in fermento celebraverat.

Novatores agnoscunt quidem azymum esse materiam Eucharistiæ sufficientem, sed contendunt fermentatum panem esse convenientiorem ; testatur tamen Casaubonus exercitatione 16. in Ann. Baronii, Genevenses abdicatum à se

à se panem azymum anno 1540. in usum revocasse.

Q. 3. *Quare panis fermentatus est idonea materia Eucharistiæ?*

R. Quia est verus panis omnium iudicio, colligiturque ex cap. 2. Actuum Apostolos eo aliquando fuisse usos: communis enim est SS. Patrum & interpretum sententia intelligendum esse de Eucharistia quod vers. 42. legitur, *erant ... perseverantes in doctrina Apostolorum, & communicatione fractionis panis, & orationibus*; panis autem ille erat obviu & in usu apud Judæos, qualis est fermentatus.

Dices 1. ex Apostolo, 1. Cor. 5. *Modicum fermentum totam massam corrumpit*: ergo.

Dist. ant. Ad mentem Apostoli fermentum allegoricè sumptum pro peccato, quod totam inficit animam, Concedo: Fermentum propriè sumptum, subdistinguo; corrumpit, id est, immutat accidentaliter, quemadmodum modicum salis, quod in nonnullis regionibus condiendæ massæ admiscetur, Concedo: Corrumpit substantialiter, Nego anteced. Apostolus itaque eo loci allegoricè peccatum vocat fermentum, *Epulemur, inquit, non in fermento malitiæ & nequitiae*.

Dices 2. Solus ille panis est idoneus, quem Christus Dominus in ultima cœna usurpavit: atqui ex dicendis Christus usurpavit panem azymum, dicens: *Hoc facite in meam commemorationem*, Luc. 22. Ergo.

Distinguo major. Solus panis quoad substantiam, Concedo: Quoad accidentia, Nego majorem. Christus enim non præcepit omnes circumstan-

cumstantias ultimæ cœnæ : v. gr. quòd cœnam Eucharisticam cœna communis præcedere debeat, quòd vinum rubrum aqua dilutum ex ejus mandato offerendum sit, in hypothesi, quòd tali vino fuerit usus. Unde Algerus lib. 2. de Sacramento corporis & Sanguinis Domini cap. 10. *Et pane usus est, non quia res, quæ fiebat, id exigebat, sed quia cœna, in qua hoc factum est, alium panem non exhibebat.*

Q. 3. *Quare panis azymus est valida Eucharistiæ materia?*

R. Quia ex dictis & ex omnium consensu materia Eucharistiæ est panis verus & simpliciter dictus : atqui constat tum Scriptura, tum universalis Ecclesiæ Traditione, tum Christi Domini exemplo azymum esse panem verum, & simpliciter dictum : ergo.

Prima pars minoris quoad scripturam probatur ex cap. 21. lib. 1. Regum, ubi panes propositionis, qui erant azymi, teste Josepho lib. 3. Antiq. cap. 9. dicuntur simpliciter panes, & ex c. 24. Lucæ, ubi agnitus est Christus in fractione panis ipso die Resurrectionis, quo non erat panis fermentatus apud Judæos propter festum azymorum.

Dices : panis simpliciter dictus est ille, quo vescuntur homines : atqui homines non solent vesci azymo, sed fermentato ; unde apud Græcos panis *αζυμὸς* dicitur, ex eo quòd per fermentum elevetur : ergo,

Nego major. Nam vinum purum est potus simpliciter dictus, sicut & cibus carnes assatæ, non consperso sale, quamvis homines non soleant bibere nisi vinum aqua temperatum, aut car-

nes

nes comedere nisi fale conditas. Esto, Græcipanem denominent ab illa elevatione, quæ fit per fermentum, certum est non tam nominis etymologiam, quàm usum & acceptionem debere attendi, in textu autem Græco panis azymus dicitur Deuter. 16. ἀζυμος: *Illud quoque*, ait Cardinalis Humbertus ad objecta Cæularii respondens, *quodd azymum negantes panem esse, per etymologiam ejus nominis, quod est artos, conamini nos vincere, sciatis omnino vanum & puerile, quia & à linguarum peritis diversæ etymologiæ dantur ex uno nomine secundum humanum placitum magis, quam secundum rerum naturam.*

Secunda pars minoris ostenditur, nimirum Ecclesiam semper habuisse azymum pro vero pane. Enimverò Ecclesia, alioquin sollicita ne quid in Sacrificio offeratur præterquam quod à Domino constitutum est; nunquam damnavit eos, qui in azymo confecerunt, sicut eos, qui in aqua sola aut caseo; sed liberum reliquit usum vel fermentati, vel azymi, secundum varios populorum mores, & rerum occurrentium exigentiam. Sic in Oriente consecrant in azymis. 1. Maronitæ, ex Morino præfatione in ordinatione Maronitarum. 2. Armeni, ex Demetrio Cizyceno in tractatu de Jacobitarum hæresi, quem Combeficius juris publici fecit. 3. Ecclesia Jerosolymitana, ex Cardinali Humberto apud Baronium tom. 11. 4. Alexandrino, ex Michaelæ Cerulario apud eundem Baronium. Probabile est etiam Græcos primis sæculis azymum usurpasse: tum quia antiqui eorum Patres, ut Origenes tract. 35. in Matth. S. Chrysostomus homil. 81. 82. & 83. in Matth. & alii docent Christum Pascha celebrasse ritu per legem

legem præscripto, ac proinde in azymis, tum quia nullum habemus antiquius testimonium pro usu panis fermentati apud Græcos, quàm quod scribit Joannes Philoponus sexto labente sæculo in disputatione de Paschate: tum denique quia Halensis 4. parte de Eucharistia q. 10. S. Thomas 4. dist. 11. q. 2. & alii Veteres Scholastici scripserunt non tamen satis firmo fundamento, Ecclesiam Latinam & Græcam fermentatum, reje-ctis azymis, usurpasse in odium hæresis Ebionitarum, qui contendebant legem simul cum Evangelio esse observandam, atque idcirco azymos panes in conficiendis mysteriis adhibebant; sed post extinctam hæresim, Græcos retinuisse fermentum: Latinos verò rediisse ad priorem azymorum usum, quem tamen non ita fuisse constantem multis argumentis probat Cardinalis Bona opere supra cit. quin identidem promiscuè usi sint pane fermentato & azymo usque ad octavum, vel nonum sæculum.

Dices, Canon septimus ex iis, qui dicuntur Apostolorum, & canon. 12. Concilii Trullani prohibent comedere Judæorum azyma. Sanctus Epiphanius hæresi 30. reprobatur Ebionitarum Pascha in azymis celebratum. Denique Concilium Nicænum primum prohibuit, ne Christianorum Pascha celebraretur decima quarta luna more Judæorum, qui in azymis suum Pascha peragebant. Ergo Eucharistia in pane azymo non est conficienda.

Dist. ant. Reprobatur usus azymorum more Judæorum, & ex præscripto legis veteris, quasi legalia essent cum Evangelio observanda, ut contendebant Ebionitæ, Concedo: reprobatur ab-
solutè.

solutè, Nego ant. Solutio patet ex ipsa lectione Canonum. Concilium verò Nicænum statuit præcisè Pascha celebrandum non die decima quarta lunæ, sed Dominica proximè sequente. Utrum autem in azymo aut in fermentato pane, non determinat.

Tertia pars minoris, scilicet Christum Dominum consecrasse in azymo, atque ideo hunc panem esse convenientiorem Eucharistiæ materiam, constat ex tribus Evangelistis, qui referunt Christum Pascha comedisse prima die azymorum; *Prima . . . die azymorum*, inquit Matth. cap. 26. v. 17. *accesserunt Discipuli ad Jesum, dicentes: Ubi vis paremus tibi comedere Pascha?* Similia leguntur apud Marcum c. 14. v. 12. & apud Lucam c. 22. v. 7. Porro in solemnitate azymorum, quæ per septem dies celebrabatur Exodi 12. prohibitum erat fermentatum panem non solum comedere, sed & in domibus retinere, ad quam legem alludens Apostolus scribit 1. Cor. 5. *Expurgate vetus fermentum etenim Pascha nostrum immolatus est Christus; itaque epulemur, non in fermento veteri sed in azymis sinceritatis & veritatis.* Quibus verbis monet Apostolus necessarium esse, ut veritas figuræ respondeat; Judæi in figura agnum immolabant decima quarta luna Martii, qui erat primus eorum mensis, ejusque carnes cum pane azymo comedebant; Christiani verò Christum verum Pascha immolant: epulentur ergo in azymis veris, seu sinceritatis & veritatis, hoc est, in innocentia & puritate cordis, non verò in fermento malitiæ.

Nec dicas cum Græcis, aut Christum prævenisse tempus à lege præscriptum, & ante Judæos

R. 1. Absit ab homine Christiano tanta blasphemia, ut dicat Sanctos Evangelistas Spiritu Sancto afflatos contradictoria scripsisse, quamquam infidelis, qui Evangelium non ut verbum Dei acciperet, trium testimonium præferendum decerneret unius testimonio. Sed faciliè conciliantur Sancti Evangelistæ, sicut & textus capitis 12. Exodi, ubi primus dies azymorum est decimus quartus, & Levit. 23. decimus quintus, secundum diversam rationem numerandi dies. Quare,

R. 2. Dist. ant. Ante diem Paschæ naturalem Concedo : legalem, Nego ant. Dies naturalis numeratur à media nocte ad aliam mediam noctem. Legalis verò incipit vespere diei præcedentis & definit vespere subsequenter, à *vespera usque ad vesperam celebrabitis Sabbata vestra*, Levit. 23. v. 32. Legalis ergo dies azymorum incipiebat die decimo quarto ad vesperam, quo Christus Dominus novum Pascha, vetere expleto, instituit; *primo mense quarta decima die mensis, ad vesperam comedetis azyma usque ad diem vicesimam prima ejusdem mensis ad vesperam*, Exod. 12. vers. 18. Naturalis verò dies azymorum initium ducebat à media nocte subsequente diem decimum quartum naturalem, hoc est, die decimo quinto, ut habetur Levit. 23. v. 6. *quinta decima die mensis hujus solemnitas azymorum Domini est*; atque hoc numerandi modo Christus Pascha celebravit ante diem festum Paschæ, id est, ante primum diem naturalem azymorum; tota enim azymorum solemnitas Pascha dicebatur, id est transitus, quia erat sollemnis memoria egressus filiorum Israel ex Ægypto. Sed ne nostra videamur proferre, audiatur S. Augustinus epist. 36. aliàs 86. c. 13. in qua sic scribit :

scribit: *Traditus est* (Christus) *ea nocte, quæ*
ad sextam Sabbati, qui dies Passionis ejus manifestus est,
pertinebat. Hic dies primus azymorum fuit à vespera
incipiens. Sed Matthæus Evangelista quintam Sabbati
dicit fuisse primam . . . azymorum; quia ejus vespera
sequente futura erat cæna Paschalis, qua . . . incipiebat
azymum, & ovis immolatio manducari. Similia ha-
bent alii Patres non solum Latini, ut S. Hiero-
nymus in cap. 26. Matth. sed & Græci, ut Theo-
doretus, Theophylactus & ante eos S. Chryso-
stomus hom. 84. in Matth. ad illa verba Matth.
26. v. 50. Et manus injecerunt in eum, ipsa nocte,
inquit, in qua comederunt Pascha, tanta insania tanto-
que furore agitabantur. Ideo autem tres Evange-
listæ secuti sunt computum dierum legalium po-
tius, quàm naturalium, quia cùm suscepissent
enarrare Christum substituisse novum Pascha ve-
teri, veritatem figuræ, quod prætermisit Sanctus
Joannes, propositum illorum postulabat, ut di-
ligentiùs observarent verum Agnum fuisse immo-
latum eo tempore, & in iisdem circumstantiis,
in quibus typicus juxta præscriptum legis ma-
stabatur.

R. 3. Per Pascha, quod Judæi feria sexta erant
 comesturi, non necessariò intelligendum agnum
 Paschalem; Pascha namque in Scripturis triplex
 fumitur, 1. pro tota solemnitate Paschali, quæ
 septem diebus celebratur: *Est autem consuetudo vo-*
bis, ait Pilatus Joan. 18. v. 37. ut unum dimittam
vobis in Pascha, hoc est in festo Paschæ, 2. pro
agno Paschali, de quo Apostoli Matth. 26. v. 17.
ubi vis paremus tibi comedere Pascha? 3. pro victi-
mis, quæ singulis diebus Paschalibus offereban-
tur, de quibus Deut. 16. immolabis phase

Domino Deo tuo de ovibus & de bobus. Et 2. Paralip. 35. dederunt Sacerdotibus ad faciendum phase pecora commixta duo millia sexcenta, & boves trecentos. Propter hoc Pascha manducandum noluerunt Judæi ingredi in Prætorium; nam agnum Paschalem immolaverant ad vesperam diei præcedentis, ex S. Marco, nisi cum Sancto Chrysostomo cit. hom. 85. excipias Principes, qui unicè intenti, quomodo Christum comprehenderent, immolationem agni ad feriam sextam distulerunt.

Ad momenta autem, quæ ad confirmandam objectionem allata sunt, facilis est responsio.

Ad primum, primus dies azymorum secundum computum dierum naturalium est decimus quintus, ex cap. 23. Levit. secundum verò computum dierum legalium incipit die decimo quarto ad vesperam, ut habetur Exodi 12. v. 18. his verbis: *Primo mense, quarta decima die mensis ad vesperam comedetis azyma usque ad vigesimam primam ejusdem mensis ad vesperam.*

Ad secundum mos ille non celebrandi duos festos dies continuo, est inductus à Rabbinis Thalmudicis post quadraginta annos à nativitate Christi; de illa enim translatione festorum nihil prorsus habetur in Scriptura sacra, neque apud Philonem & Josephum, qui scripserunt de rebus Judaicis circa Apostolorum tempora: imò ipse Josephus lib. 3. cap. 16. refert festum Pentecostes celebratum fuisse tempore Hircani die Sabbatum proximè sequente; & S. Epiphanius Judæus genere testatur hæresi 51. & 60. quolibet die etiam feria sexta celebrari azyma, quod etiam colligitur ex controversia orta Catholicos inter & Quartodecimanos, & in Concilio Nicæno terminata;

nata; hi enim ideo contendebant Pascha semper esse celebrandum decima quarta luna, quia Judæi eo die & non alio agnum typicum immolabant.

Nec obstat quod primo die azymorum omne opus servile prohibeatur, Levit. 23. Nam Exodi 12. v. 16. excipiuntur quæ ad vescendum pertinent; illa siquidem præparabantur tam pro ipso met die festo, quam pro Sabbato; si continuò sequeretur, quia Sabbatò nequidem ignis accendebatur, unde feria sexta Parasceve dicitur. Quòd autem Christus crucifixus sit die festo, docent communiter SS. Patres: *Oportuit*, inquit S. Leo, *tam insigne Sacrificium de die solemniori offerri*, colligiturque ex cap. 27. Matth. ubi sic legitur, *per diem autem solemnem consueverat Præses populo dimittere unum vinctum quem voluissent*. Sed contra spem Præsidis seditiosum & homicidam petierunt, Deo id permittente, ne peccator morte sua eum redimere videretur, qui pro peccatoribus liberandis venerat moriturus. Neque verò conscientia religionis, sed metu seditionis Pontifices dixerant, *non in die festo*. Quamquam excusatos forte se credebant; tum quia non ipsi, sed Gentiles, qui legibus Synagogæ non tenebantur, ferale illud opus perfecerunt; unde vox illorum fuit, *nobis non licet interficere quemquam*, qui tamen postea lapidaverunt Stephanum: tum quia blasphemum, qualem arbitrabantur Christum, quolibet die occidi posse colligebant ex cap. 15. Numerorum.

Ad tertium, 1. communis quidem opinio est quam S. Leo & alii deinceps Scriptores Ecclesiastici amplexi sunt, Spiritum Sanctum missum fuisse die Dominica, sed omnino certum non est. 2. cum anno Passionis Domini dies secunda azymo-

rum incideret in Sabbatum, quo non licebat metere spicas, expectanda fuit dies tertia azymorum, quæ est Resurrectionis Dominicæ, quam præfigurabat elevatio manipuli & novorum fructuum oblatio; sicque numerando septem hebdomadas à die Sabbati & quinquagesima dies erit Dominica.

Suadetur autem hæc responsio 1. ex Scriptura Levit. 23. v. 15. ubi non legitur numerabitis à secundo die azymorum, sed ab altero die Sabbati, quasi indicetur, quodd si secundus dies incidat in Sabbatum, numerandum sit à tertio die, quia minus licebat falcem mittere in segetem die Sabbati, quam primo die azymorum. 2. ex aliis versionibus; Chaldaica enim habet, *post diem festivitatis*. Arabica, *in crastina die otii seu cessationis*. Theologi non pauci existimant numerandas septem hebdomadas à secunda die azymorum exclusivè, ita ut prima dies primæ hebdomadæ sit tertia dies azymorum, qua resurrexit Dominus, sicque Pentecoste incidit in similem diem Dominicam. Supponit hæc sententia licitum fuisse Sabbato metere spicas, sicut & alia pietatis opera exercere, circumcidere infantem, infirmos curare, Matth. 12. & mortuos sepelire; Tobix 2. unde Joseph ab Arimathæa Corpus Domini aromatibus conditum posuit in monumento prima die azymorum, quæ erat festiva.

Dices 2. ex c. 13. Joannis Christus Dominus cæna facta surrexit è mensa, lavit pedes Apostolorum, & recubuit, tumque Eucharistiam instituit. Ergo agnum Paschalem non immolavit; Judæi enim stantes eum comedebant, Exod 12.

R. 1. Etiam si non immolasset, certum est ex tribus Evangelistis ipsum Eucharistiam instituisse
prima

prima die azymorum, qua usus panis fermentati prohibebatur, 2. licet Judæi in Ægypto agnum stantes comederint, non constat eandem cæremioniam deinceps fuisse observatam. 3. ubi agnus non sufficebat omnibus reficiendis, cœnam usua-lem & communem parabant, in qua recumbere erat licitum: ita S. Chrysostomus hom. 51. in Matth.

Triplicem ergo cœnam Evangelium exhibet. Prima erat legalis, in qua Christus Dominus, & Apostoli stantes agnum comederunt absque ullo juscule aut obsonio, quæ prohibentur Exodi 12. Secunda, communis, in qua recubuerunt, & appositum est obsonium, in quo Christus buccellam intinxit. Tertia, Eucharistica.

Dices 3. ex Origine tract. 35. in Matth. & S. Epiphanio hæresi 50. Christus Dominus mortuus est decima quarta luna. Ergo.

R. Originem intelligendum de initio Passionis, quæ reverà cœpit decima quarta luna: tunc enim Christus fuit traditus, comprehensus, & ut loquitur ille auctor, immolatus: Sanctum verò Epiphanium velle solum Christum in agno Paschali fuisse typicè immolatum.

Opponunt nonnulli è Latinis pro sententia Græcorum Chronicon S. Petri Alexandrini, & tabulas astronomicas. Sed Chronicon illud est suppositum opus, ut colligitur vel ex vocibus *ὁμῶσιον*, & *θεότωνιον* ab ætate S. Martyris alienis. Ex tabulis verò astronomicis fatentur omnes periti nihil certi erui posse, cùm Scriptores Ecclesiastici nequidem de anno Passionis Domini inter se conveniant. Denique contra dubia, quæ ex Noviluniis oriri possunt, utrùm scilicet Judæi ea

numeraverint ex prima conjunctione Lunæ cum Sole, an vero ex ejus apparitione, unde sequitur eos vel citius vel tardius Pascha celebrasse; nostram sententiam confirmant tres Evangelistæ oculati testes, quod Christus Pascha comederit prima die azymorum, cum Judæi illud immolabant, & necesse erat illud occidi.

Q. 4. *Panis Eucharisticus fuitne semper singulari studio præparatus?*

R. Primis Ecclesiæ temporibus panes obvii assumebantur, ut colligitur ex c. 2. Act. v. 42. & 46. Concilium autem Toletanum anno 693. arguit Presbyteros, qui ex quolibet pane crustulam in rotunditatem præcisam offerebant, statuitque *ut non aliter panis in altari Domini Sacerdotali benedictione sanctificandus proponatur, nisi integer & nitidus, qui ex studio fuerit præparatus.* Testatur Fortunatus sanctam Radegundem Reginam sexto sæculo oblationes suis manibus factas sacris locis dispensasse, & Cardinalis Humbertus scribit contra Michaelem Cerularium, altaris Ministros sacris vestibus amictos, inter Psalmorum decantationes panem Eucharisticum confecisse, quod etiam nunc in Oriente Nestoriani dicuntur observare. S. Carolus in IV. Mediolanensi parte secunda c. *de his quæ pertinent ad Missarum sollemnia*, prohibet ne Laici hunc panem præparent. In Ordine Sancti Benedicti seligebantur frumenti grana, & fidei fratri molenda committebantur, testibus Lanfranco cap. 3. Decreti Sancti Benedicti, & Uldarico lib. 3. Constitut. Cluniac. cap. 13.

* Figuram orbicularem indicat S. Epiphanius in Ancorato num. 56. unde S. Gregorius lib. 4. Dialog. hostias vocat *coronas*. Sed cum panis integer & so-

& solitus pridem offerretur, undecimo sæculo ad formam nummi tenuissimam redactus est, de quo nonnulli conquesti sunt.

CAPUT VII.

Utrùm aqua vino sit admiscenda.

Armeni, ne videantur significare, inquit Nicephorus lib. 18. hist. cap. 53. unionem duarum in Christo naturarum, quam negant utpote Eutychiano errore imbuti, jam pridem vinum purum sine aqua offerunt; hunc enim abusum in ipsis reprehendit Concilium Trullanum anno 691. can. 32.

Lutherus scribens contra Henricum Angliæ Regem anno 1522. hanc mixtionem aquæ cum vino figmentum esse humanum contra Christi institutionem, ac pessimam habere significationem calumniatus est.

Kemnitius in parte examinis Concilii Tridentini docet eandem mixtionem rem esse indifferentem, quæ nec recipi debet, nec prohiberi, & hæc videtur esse nunc sententia Lutheranorum & Calvinistarum.

S. Bernardus Epist. 69. ad Guidonem, innuit sua ætate quosdam asseruisse aquam ita necessariò in calice miscendam, ut sine illa mixtione nulla sit consecratio.

Alexander Halensis 4. parte, q. 12. scripsit aquam necessariam esse necessitate non quidem Sacramenti, sed præcepti divini. Hunc secuti sunt Hosius cap. 14. Confessionis, & Alphonfus à Castro, hæresi 7.

R. Aquæ

R. Aquæ mixtio necessaria est ex præcepto Ecclesiæ. Ita Concilium Tridentinum sess. 22. cap. 7. his verbis : *Monet sancta Synodus præceptum esse ab Ecclesia Sacerdotibus, ut aquam vino in calice offerendo miscerent.* Atque hujusce ritus triplicem subdit rationem, 1. quia Christum Dominum ita observasse creditur. Creditur, inquam, pia quædam credulitate, non fide divina : id enim revelatum fuisse non constat, ut advertit Durandus in quartum dist. 9. quæst. 5. 2. quia è latere Domini aqua simul cum sanguine fluxit, quod Sacramentum hac mixtione recolitur. 3. quia sic populi fidelis cum capite Christo unio repræsentatur. Tandem can. 9. ejusdem sessionis, quid circa propositam quæstionem credendum sit, definit his verbis : *Si quis dixerit Ecclesiæ Romanæ ritum, quo submissa voce pars canonis, & verba consecrationis proferuntur, damnandum esse, aut lingua tantum vulgari Missam celebrari debere, aut aquam non miscendam esse vino in calice offerendo, eò quod sit contra Christi institutionem; anathema sit.* Ubi concilium non attingit diversas Theologorum sententias circa exemplum Christi, & aquæ miscendæ necessitatem, sive Sacramenti, sive præcepti Divini aut Ecclesiastici, sed solum Novatorum calumnias impetit definiens præcisè non esse contra Christi institutionem, quod in Missa nonnulla submissè proferantur, quod alia lingua, quàm vulgari ritus sacrificii peragatur, & quod aqua vino admisceatur. Enimverò sicut ex hoc canone non licet sic inferre; ergo de fide est quædam in Missa submissè debere proferri, aut alia lingua, quàm vulgari Mysteria nostra esse celebranda; hæc enim illatio falsa est, & contra

Con-

Concilii mentem; similiter malè concluderetur ex his Concilii verbis: Ergo de fide est aquam vino esse miscendam; sed inferendum est: Ergo de fide est aquam vino miscere non esse contra Christi institutionem.

Probatur hæc Concilii definitio ex universalis Ecclesiæ praxi. Illud enim catholicum censendum, quod semper, quod ab omnibus & ubique servatum, ex Vincentio Lyrinensi; neque est immisum, sed traditum, ex Tertulliano lib. de præscript. & contra illud disputare insolentissimæ est insanix, ex S. Augustino: atqui mixtio aquæ & vini in calice Eucharistico semper, ubique & ab omnibus est observata: Ergo.

Minor probatur 1. ex Sanctis Patribus. S. Justinus Apolog. 2. testatur hanc fuisse praxim sui sæculi, nempe secundi: *Affertur*, inquit, *præcipuo fratri panis & calix aqua dilutus*. S. Irenæus initio tertii sæculi sic scribit lib. 4. cap. 57. *accipiens Dominus panem, suum corpus esse confitebatur, & temperamentum calicis suum sanguinem confirmavit*. S. Cyprianus eodem mediante sæculo, totus est in epist. 63. ut probet contra Aquarios, nec vinum purum, nec aquam puram, sed utrumque mixtum esse offerendum. *Dominica traditio*, inquit, *servetur; neque aliud fiat à nobis, quàm quod pro nobis Dominus prior fecit, ut calix . . . mixtus vino offeratur*. Sanctus Hieronymus in cap. 14. Marci, eidem veritati suffragatur, *forma, (Christus) sanguinem suum in calice vino & aqua mixtis*.

Probatur 2. ex Conciliis: Carthaginense tertium anno 397. c. 24. sic habet: *In Sacramento corporis & sanguinis Domini nihil amplius offeratur, quam ipse Dominus tradidit, hoc est panis & vinum aqua mixtum*

mixtum. Trullanum seu Quinisextum anno 692. canone 32. *Si quis, inquit contra Armenos, Episcopus vel Presbyter non secundum ordinem ab Apostolis traditum facit, & aquam vino non miscens, sic immaculatum offert sacrificium, deponatur, ut imperfectè mysterium enuntians, & quæ tradita sunt, immovans.* Patres Concilii Triburiensis nono sæculo celebrati c. 19. hæc habent, *cujus rei veritatem (scilicet ab Apostolis traditum fuisse ritum, de quo agitur) in hac sancta Synodo confitemur, credimus, & confirmamus ne ullus sine commixtione vini & aquæ mysteria sacra perficiat.*

Probatur 3. ex omnibus Liturgiis, S. Petri apud Latinos, Sancti Jacobi apud Jerosolymitanos, S. Marci apud Alexandrinos, Sanctorum Basilii & Chrysostomi apud Græcos, in quibus sicut & in Æthiopica præscribitur illa mixtio. Unde Eugenius in suo Decreto pro Armenis, ita loquitur anno 1438. *Cum ergo tam sancta Romana Ecclesia à beatis Apostolis Petro & Paulo edocta, quàm reliquæ omnes Latinorum Græcorumque Ecclesiæ, in quibus omnis sanctitatis & doctrinæ lumina claruerunt, ab initio nascentis Ecclesiæ sic servaverint, & modò servant, inconveniens admodum videtur, ut quævis alia Ecclesia ab hac universali & rationabili discrepet observantia: decernimus, ut ipsi etiam Armeni cum universo Christiano orbe se conforment, eorumque Sacerdotes in calicis oblatione paululum aquæ admisceant.* Immerito itaque Innocentius III. lib. 4. de Sacrificio Missæ cap. 32. Guido Carmelita in cat. hæresum, & alii Græcos accusant quasi vino calicis aquam non misceant; imò legimus ad calcem Concilii Florintini eos satisfecisse Latinis, objicientibus quod bis aquam infunderent, frigidam scilicet ante consecrationem, & calidam post consecrationem.

Dices;

Dices ; vinum aqua mixtum in Scriptura , ut Isaiaë 1. pessimam habet significationem : ergo vitanda est illa mixtio.

Distinguo anteced. aliquo sensu, Concedo ; omni sensu, Nego anteced. & conseq. Licet enim fermentum aliquando significet malitiam 1. Cor. 5. assumitur tamen à Christo Domino , Matth. 13. ad designandum alio sensu regnum cœlorum. Item Leo est symbolum crudelitatis & tyrannidis in Sedecia , fortitudinis verò in Christo Domino , qui idcirco dicitur Leo de Tribu Juda : similiter vinum aqua mixtum significat iudiciorum corruptelas in optimatibus Juda , sobrietatem & temperantiam in Christo Domino , sicut in quolibet sapiente ; unionem fidelium cum suo capite Christo in Missæ sacrificio.

Q. 2. *In qua quantitate aqua miscenda est ?*

R. Capite *Perniciosus*, tit. 41. de celebratione Missarum , perstringuntur qui plus aquæ quàm vini offerebant ; *cum secundum rationabilem consuetudinem Ecclesiæ generalis , plus sit de vino quàm de aqua ponendum.* Ex Concilio Triburiensi nono sæculo cap. 19. aqua non debet tertiam calicis partem excedere. Eugenius IV. in suo decreto monet modicissimam esse admiscendam , quod etsi in praxi servari debeat , probandi tamen non sunt illi Sacerdotes , qui unam guttulam infundunt.

Q. 3. *Mixtio aquæ pertinetne ad essentiam Sacramenti , aut saltem ad ejus integritatem , quemadmodum satisfactio in Sacramento Pœnitentiæ ?*

R. Minimè , quia neque ex Scriptura , neque ex Traditione illa necessitas colligitur , imò Sancti Patres

Patres & Concilia non obscurè contrarium docent; nam S. Cyprianus laudata epist. 63. sic habet: *Si vinum quis offerat, sanguis Christi incipit esse sine nobis.* Ergo sine aqua valida est consecratio. S. Bernardus de Sacerdote, qui per negligentiam aut oblivionem aquam non miscuerat, scribit epist. 69. *Non nego panem & vinum aquæ mixtum debere apponi, sed aliud est culpæ negligentiam, aliud negare efficaciam.*

Patres Concilii Trid. cap. 7. sess. 22. & ante eos plures Summi Pontifices relati tit. de celebratione Missarum; docent aquam misceri ex canonum ordinatione, & Ecclesiæ præcepto. Hanc doctrinam expresse tradit Catechismus Romanus 2. p. num. 17. his verbis: *Quamvis aquæ miscendæ ita graves rationes sint, ut eam sine mortali peccato prætermittere non liceat, ea tamen si desit, Sacramentum constare potest.* Idem notatur in Rubricis Missalis Romani, tit. de defectibus vini. *Si celebrans ante consecrationem calicis advertat non fuisse appositam aquam, statim ponat eam si id advertat post consecrationem calicis, nullo modo apponat, quia non est de necessitate Sacramenti: addo, neque de ejus integritate & substantia; aliàs post consecrationem videretur adhibenda, quemadmodum Sacerdos, qui in tribunali Pœnitentiæ satisfactionem non imposuit ante absolutionem, debet supplere quod omissum est, si pœnitens non recesserit.*

Ex quibus sequitur mixtionem æquæ non esse præcepti divini; sed Ecclesiastici tantum. Quæ enim Christus observanda præcepit in Sacramentorum administratione, illa ad Sacramenti substantiam & integritatem pertinent: atqui ex dictis illa
mixtio

mixtio non pertinent ad integritatem Eucharistiæ. Ergo Christus eam non præcepit.

Dices 1. ex Sanctis Patribus & Conciliis mixtio aquæ à Christo est tradita : Ergo.

Distinguo ant. ut supra de azymo pane , à Christo tradita est velut exemplum , quod sequi liceat, Concedo ; velut legis necessitas, Nego ant.

Dices 2. Omne Sacramentum novæ Legis est signum gratiæ, quam efficit : atqui aqua quæ in calice miscetur , est signum unionis populi cum Christo , quam efficit Eucharistia : Ergo.

Distinguo min. est signum secundarium seu accidentale , & ab Ecclesia institutum ; Concedo : Sic vestis alba in Baptismo est signum aliquod ab Ecclesia institutum , quo significatur innocentia reparata : est signum primum & essentialiale Sacramento , & à Christo Domino institutum, Nego min. Enimverò unio fidelis cum Christo primo, & ex institutione divina significatur per sumptionem corporis & sanguinis Christi sub speciebus panis & vini , juxta illud Joan. 6. *Qui manducat meam carnem, & bibit meum sanguinem, in me manet & ego in illo.*

Instabis : sacrificium Missæ essentialiter est præsentatio mortis Christi , ex cuius latere fluxit aqua cum sanguine , cujus mysterii symbolum est mixtio aquæ & vini. Deinde ex S. Augustino Sacrificium exterius est signum sacrificii interioris , hoc est, victima immolatur exterius in signum quod offerens ita se in præparatione animi exhibeat coram Deo , quem agnoscit supremum Dominum vitæ suæ & necis : atqui si offeratur calix sine aqua, existit & offertur sanguis Christi sine nobis : ergo non est verum sacrificium , seu verum signum sa-

crificii interioris. Unde S. Cyprianus cit. epist. asserit calicem non esse aquam solam, aut vinum solum; sicut nec corpus Domini potest esse farina sola aut aqua sola, nisi utrumque adunatum fuerit. Quid ita? nimirum quia in hoc differt sacrificium Missæ à sacrificio Crucis, quòd in altari totus Christus, id est, caput & membra offerantur, cum in Cruce solus Christus ut caput oblatus fuerit.

R. 1. Per consecrationem panis & vini sanguis à corpore mysticè separatur, quod sufficit ad repræsentandam mortem Christi, nec ad rationem sacrificii Missæ requiritur, ut singulæ circumstantiæ passionis, qualis est flagellatio, crucifixio, repræsententur.

R. 2. Ad confirmationem, distinguendo minorem: atqui sine aqua sanguis Christi existit & offertur sine nobis aliquo sensu, & quatenus illo signo accidentali, quod exhibetur per aquæ mixtionem, non significamur offerri cum Christo, Concedo: offertur sine nobis absolutè, Nego minorem. Quot enim oblata fuere sacrificia, tum in lege naturæ, tum in lege scripta, in quibus fideles sine ulla mixtione aquæ seipsum Deo interiùs offerebant? Itaque aqua ex Ecclesiæ institutione miscetur in Missæ sacrificio, ut hac cæremonia expressiùs significetur interior Christianorum dispositio; quæ aliàs satis intelligitur ex ipsa ratione generica sacrificii.

R. 3. Ad auctoritatem Sancti Cypriani, distinguendo, calix non est aqua sola, nec vinum solum, sed utrumque mixtum sicut nec corpus Domini potest esse farina sola, aut aqua sola ex usu & praxi Ecclesiæ, Concedo: ex necessitate Sacramenti,

menti, subdistinguo; non est vinum solum, sicut nec corpus Domini farina sola ex una parte, Concedo: ex utraque parte, quasi calix non possit sine aqua esse sanguis Christi, sicut nec corpus sine aqua farinæ admixta, Nego. Contrarium enim expressè asserit S. Doctor. *Si vinum solum quis offerat*, inquit, *sanguis Christi incipit esse sine nobis*. Itaque utitur solum comparatione panis, qui nequit esse sine mixtione farinæ & aquæ, ut probet contra adversarios, qui solam aquam offerebant, rejecto vino, sive ex errore sive ex simplicitate & ignorantia, vinum esse adhibendum necessitate Sacramenti; adeo ut sine vino nulla sit consecratio, populusque, qui significatur per aquam, quam usurpabant, remaneat sine sanguine Christi. Honorificum intentum Sancti Martyris. Concedit quidem adversariis aquam esse retinendam, uti volebant; sed non expendit qua necessitate sit retinenda, quia non erat ejus instituti. Frustra ergo vim faceret quis in comparatione panis à Sancto Doctore usurpata, in qua non minus aqua, quam farina, est de necessitate Sacramenti; nam omnis comparatio claudicat, inquiunt, quia semper in ea occurrit aliquid simile, & aliud dissimile.

Urgebis: S. Cyprianus dixit in illa epistola, tum demum fore plenum & perfectum Sacrificium, cum calix erat vino & aqua temperatus: Ergo sine aqua erit imperfectum Sacrificium: quod Patres Trullani dissertè asserunt cit. can. 32. ac proinde aqua ad substantialem integritatem Sacramenti pertinet.

Distinguo conseq. imperfectum accidentaliter, sicut in hypothesi, quod Sacerdos partem canonis prætermisisset, diceremus imperfectum Sacrificium

ficiū obtulisse, Concedo : imperfectum substantialiter, Nego consequ.

Q. 4. *Aqua vino permixta convertitur-ne in sanguinem Christi?*

R. 1. De fide non est aquam in vinum converti; quia licet identidem graves circa hanc questionem controversiæ exortæ sint, v. g. sæculo XII. & XIII. nihil hætenus Ecclesia hac de re determinavit; imò Innocentius III. lib. 5. ep. ad Joannem Archiepiscopum Lugdunensem ex quatuor enumeratis opinionibus affirmantem tantum probabiliorem describit.

R. 2. Theologorum communis est sententia aquam in sanguinem converti: probaturque ex Sanctis Patribus & Conciliis mox laudatis, qui asserunt Christum Dominum calicem aqua mixtum suum sanguinem fecisse, calicem ante consecrationem esse vinum & aquam, post consecrationem verò esse sanguinem Domini; unde Sanctus Thomas qu. 75. art. 8. dicit opinionem, quæ negat aquam in sanguinem converti, stare non posse.

Sed dissentiunt Theologi circa modum conversionis: alii contendunt aquam immediatè verborum converti in sanguinem; quia vinum aqua dilutum est potus usualis, sicut panis fermentatus apud Græcos est panis usualis: ergo sicut totus ille panis convertitur in Corpus Christi, quamvis fermentum seorsim sumptum non sit materia Eucharistiæ idonea; ita pariter totus ille calix convertitur in sanguinem.

Confirmatur. Totus calix offertur, benedicitur, consecratur, ergo totus convertitur; neque enim Christus, neque Patres distinxerunt inter utramque materiam, scilicet vinum & aquam, sed

fed absolute dixerunt mixtum illud esse sanguinem Christi.

Contra verò S. Thomas, & ejus discipuli docent aquam prius converti in vinum, & sic mediatè tantum transmutari in sanguinem Christi. Hanc sententiam amplexus est Catechismus Romanus parte 2. Hanc etiam supponunt Rubricæ, dum præscribunt paululum aquæ debere in calicem infundi; quia debet prius in vinum converti, quàm in sanguinem. Ratio autem colligitur ex dictis: quia aqua non miscetur ex præcepto divino, sed merè Ecclesiastico: atqui Ecclesia non potest efficere, ut res, quæ ex institutione divina non est materia Sacramenti, talis evadat.

At, inquires, si aqua in vinum non converteretur, multa ex hac posteriori sententia sequerentur absurda. Primum, non solæ remanerent species vini, quod est contrarium definitioni Concilii Tridentini. Secundum, calix consecratus non posset simpliciter dici sanguis Christi cum in eo alia contineretur substantia. Tertium, non adoraretur sine periculo idololatriæ; in illa enim hypothese aqua cum sanguine censeretur adorari.

Nugæ sunt ista. Quasi verò non staret veritas definitionis Tridentinæ, si pulvis aut culices deciderent in calicem, aut in illa hypothese, quæ satis frequens est, calix non diceretur sanguis Christi, nec posset adorari sine periculo idololatriæ? Tale periculum meritò non timent Græci, dum infundunt aquam calidam in calicem consecratum, Species vini in mente Patrum Tridentinorum remanent sine substantia rei consecratæ. Adoratur contentum substantiale, quod sensibilibiter demonstratur per calicem: illud autem con-

tentum est sanguis Christi, non species vini, quæ idcirco non adorantur, sicut nec cætera minutiora, quæ per calicem sensibilibiter non demonstrantur.

CAPUT VIII.

Quænam est forma Eucharistiæ?

NOVatores non conveniunt inter se circa formam Eucharistiæ. Bucerus in caput 26. Matth. & alii negant eam constare verbis. Lutherus lib. de abroganda Missa; & Calvinus lib. 4. Institut. c. 17. volunt, 1. hæc Christi Domini verba, *hoc est corpus meum, hic est sanguis meus*, quæ in omnibus Liturgiis referuntur, non esse consecratoria, sed historicè & narrative à celebrante pronunciari, non verò significativè, quasi celebrans eam proferat cum intentione affirmandi id, quod præmanibus tenet, esse corpus Christi. 2. Sinelaudatis Christi verbis Eucharistiam perfici posse, & ad eam sufficere quæcumque verba idonea ad excitandam fidem promissionum divinarum; quas in eorum sententia obsignat Sacramentum; itaque ut eludant testimonia Sanctorum Patrum, qui asserunt virtute verborum Christi, panem & vinum converti in corpus ejus & sanguinem, contendunt illos Patres eo sensu intelligendos, quo sæpius dixerunt animalia crescere & multiplicari vi & efficacia primævi illius imperii, *crescite, & multiplicamini*, Gen. cap. 1. quod sicut non est repetendum, ut animalia multiplicentur; ita nec proferenda Christi verba, ut panis corpus ejus fiat. Contra hos errores ac propositam quæstionem,

R. I.

R. 1. Forma Eucharistiæ consistit in verbis, iisque consecratoriis. Hæc propositio quoad utramque partem probata manet ex dictis in Tractatu de Sacramentis in genere, ubi demonstravimus omnia Sacramenta novæ legis perfici verbis tanquam forma: verba autem illa non esse concionalia, sed consecratoria.

R. 2. Per verba Christi Domini à celebrante prolata conficitur Eucharistia. Ita Eugenius IV. in suo Decreto pro Armenis, *forma*, inquit, *hujus Sacramenti sunt verba Salvatoris, quibus hoc conficit Sacramentum.* Non ait, *confecit*, sed, *conficit*, etiam hodie, quia ipse est Sacerdos & hostia.

Probat ex Scriptura per Ecclesiæ Traditionem explicata. Luc. enim 22. sic legitur: *Et accepto pane, gratias egit, & fregit, & dedit eis, dicens: Hoc est Corpus meum, quod pro vobis datur, hoc facite in meam commemorationem.* Atqui Ecclesia ex hoc Christi mandato semper intellexit in consecranda Eucharistia iisdem Christi verbis, *hoc est corpus meum, hic est sanguis meus*, utendum: sicut ex hoc baptizandi præcepto, *docete omnes gentes, baptizantes eos in nomine Patris*, &c. collegit ad veritatem Baptismi proferenda illa verba: *Ego te baptizo in nomine Patris, &c.*

Minor probatur.

S. Justinus sic scribit Apol. 2. *Quemadmodum per verbum Dei incarnatus Jesus-Christus Salvator noster & carnem & sanguinem pro nostra salute habuit; sic etiam per orationem verbi Dei ab ipso Eucharistiam factam cibum & carnem & sanguinem edocti sumus Apostoli in Commentariis suis, quæ Evangelia dicuntur, ita Jesum sibi præcepisse tradiderunt, cum accepto pane gratias egisset, dixisse, hoc est Corpus meum: quod etiam in-*

citati mali genii in sacris suis faciendum tradiderunt; panem enim & potum aquæ cum certis quibusdam verbis, &c. Quæ ostendunt ætate Sancti Martyris tam constantem fuisse usum celebrandi Eucharistiam verbis Evangelicis, quæ vocat preces verbi Dei, ut ad imitationem fidelium mali genii, ut loquitur, sacra sua in pane cum certis quibusdam verbis peragerent.

S. Irenæus lib. 5. cap. 2. *panis & vinum, inquit, percipientia verbum Dei, sunt Eucharistia, quod est corpus, &c.*

S. Chrysostomus hom. 2. in 2. ad Timotheum, ait: *Quemadmodum verba, quæ locutus est, eadem sunt, quæ Sacerdotes nunc quoque pronunciant: ita & obligatio eadem est. Quid clarius? Sacerdotes etiam nunc eadem verba pronunciant, quæ olim Christus. Et ser. de proditiōe Judæ, hoc verbum (scilicet, hoc est Corpus meum) proposita dona transmutat.*

S. Augustinus ser. aliàs 28. de verbis Dom. nunc in app. 84. *Dixi, inquit, vobis, quod ante verba Christi, quod offertur in altari, panis dicatur: ubi Christi verba deprompta fuerint, jam non panis dicitur; sed corpus appellatur.*

Sanctus Ambrosius lib. de initiandis cap. 9. *Sacramentum istud, quod accipis, Christi sermone conficitur. Et lib. 4. de Sacramentis c. 4. Cum venit, ut conficiatur venerabile Sacramentum, jam non suis sermonibus utitur Sacerdos, sed sermonibus Christi utitur. Quo modo potest, quod panis est, corpus esse Christi? Consecratione: Consecratio igitur quibus verbis fit? Domini Jesu.*

Denique omnes Liturgiæ utuntur verbis à Christo in Evangelio prolatis: ergo illa verba ad conficiendam Eucharistiam sunt necessaria.

Nec

Nec dicas, quòd in Liturgiis historicè referantur: nam eadem verba possunt historicè & significativè simul pronùnciari, ut videre est in isto exemplo: Aristoteles verè dixit, Cœlum est mobile; non enim solùm refertur quod Aristoteles dixit, sed & comprobatur. Porro celebrans & narrat Christum verè dixisse: *Hoc est corpus meum*, & intendit idem facere quod in ultima cœna præstitit.

Q. 2. *Forma Eucharistiæ consistitne in solis Christi verbis jam laudatis?*

Liturgiæ Græcorum videntur reponere, saltem partialiter, formam Eucharistiæ in certis quibusdam precibus. Nam in Liturgia Sancti Chrysostomi post recitata Christi verba, sic orat Sacerdos: *Fac panem hunc preciosum Corpus Christi tui immutans spiritu tuo*. Et in Liturgia S. Basilii, etiam post prolata Christi verba, Sacerdos ait: *PropONENTES antitypa sancti corporis & sanguinis Filii tui, obsecramus, ut veniat Spiritus tuus super nos, & super munera ista, & benedicat atque ostendat panem quidem istum pretiosum corpus, &c.* Porro ex S. Joanne Damasceno lib. 4. de fide orthodoxa c. 4. & ex Epiphanio contra Iconoclastas disputante in 2. Conc. Nicæno octavo sæculo, antitypa non dicuntur post consecrationem. Quibus permoti Latini in Concilio Florentino per Eugenium IV. sciscitati sunt à Græcis, *Cur non contenti estis Domini verbis?* Accepto autem responso Mitilenensis Episcopi, subjunxit Summus Pontifex, *Nos, fratres, Dei beneficio sumus fide conjuncti*. Quale autem fuerit Græcorum responsum, non referunt Acta Concilii: sed Goarius in notis ad Missam S. Chrysostomi narrat Græcos respondisse se per has preces

non petere simpliciter, ut panis fiat Corpus Christi, cum credant jam factum per verba Dominica, sed ut fiat ad salutem suscipientium, quemadmodum & Latini post consecrationem sic precantur; *Supra quæ propitio ac sereno vultu respicere digneris.... Jube hæc perferri per manus sancti Angeli tui, &c. Item, per quem (Christum) hæc dona ... sanctificas, vivificas, &c.*

Verum negari non potest, quin hodie plures Græci existiment consecrationem perfici per preces, verba verò Christi ex præcepto divino recitari historicè tantum. Quam sententiam amplexus est ex Latinis Ambrosius Catharinus ex Episcopatu Minorensi ad Archiepiscopatum Campensem à Julio tertio promotus, eamque propugnavit in Concilio Tridentino, scriptis hac de re duobus libellis. Fundamenta autem hujus opinionis, sunt 1. quia Christus Dominus prius panem & calicem benedixit, quam affirmaverit esse suum corpus & sanguinem. Imò jam utrumque Apostolis distribuerat, ut constat ex cap. 14. v. 22. Sancti Marci, cum dixit: *Hoc est Corpus meum, hic est Sanguis meus.* Enimverò Christi benedictio, in qua oratio intelligitur, non fuit hinc minus efficax, ut panis evaderet corpus Christi, quam cum multiplicavit quinque panes Joan. 6. Unde S. Gaudentius Episcopus Brixienfis tract. 2. in Exodum ait: *Cum panem consecratum & vinum discipulis suis porrigeret, Dominus dixit, hoc est corpus meum.* 2. Apostoli benedictione consecrarunt, ut colligitur ex c. 10. primæ ad Corinth. *Calix benedictionis, cui benedicimus, nonne communicatio Sanguinis Christi est?* 3. Antiquæ Græcorum Liturgiæ, ut SS. Basilii & Chrysostomi ita clarè consecrationem

nem in precibus reponunt, ut non possit ad verba Christi referri. 4. Omnium Patrum una est vox, Eucharistiam perfici Dei invocatione, gratiarum actione, benedictione. *Ad preces Sacerdotum*, inquit S. Hieronymus epist. 85. ad Evagrium, *Christi corpus & sanguis conficitur*. Origenes quoque scribit hom. 15. in Matth. *Santificatur Eucharistia per verbum Dei & orationem*. S. Gregorius lib. 7. epist. 64. asserit Apostolos ad solam Orationem Dominicam oblationis hostiam consecrasse. Denique Berengarius suam hæresim sub Gregorio VII. his verbis ejuravit: *Ego Berengarius credo panem per mysterium sacræ Orationis, & verba Redemptoris substantialiter converti*. 5. Non potest stare veritas hujus propositionis, *hoc est corpus meum*, si per illam panis convertatur in corpus Christi; quia verè non demonstratur hoc esse corpus Christi, nisi præsupponatur facta conversio; corpus enim Christi non existit sub speciebus panis, nisi per conversionem: atqui quando fit illa enuntiatio, nondum facta est conversio. Ut ergo veritas propositionis salvaretur in hac hypothese, dicendum esset, *hoc sit corpus meum*, non verò, *hoc est corpus meum*. Præterea pronomen *hoc*, vel demonstraret panem, vel corpus Christi: atqui neutrum dici potest; non prius, quia falsum est panem esse corpus Christi: non posterius; nam pronomen *hoc*, demonstrat rem præsentem: corpus autem Christi nondum est præsens. At in sententia Græcorum & Catharini, corruunt omnes difficultates, planus est sensus. Enimverò sicut Christus prius gratias egit, & benedixit panem, tum enuntiavit, *hoc est corpus meum*; sic in Liturgia Latina præcedunt preces, gratiarum actiones, tum ad demon-

strandam

strandam efficaciam illarum precum, textitur historia ultimæ cœnæ. In Liturgiis verò Græcorum inverso ordine, primo loco historicè refertur quod Christus fecit, dixit, & manducavit in ultima cœna. Ex his enim preces subsecuturæ hauriunt totam suam vim, & efficaciam. 6. Denique propositio illa, *boc est corpus meum*, necessario significat corpus Sacerdotis loquentis, nisi aliud proferatur quo appareat Sacerdotem loqui in persona Christi. Ergo ad formam Eucharistiæ pertinet illa narratio, *qui pridie quàm pateretur, accepit panem.... benedixit.... dicens.... boc est corpus meum*. Verba enim sacramentalia eatenus operantur, quatenus significant: atqui hæc verba sola nullatenus significant corpus Christi: ergo sola illud non efficiunt.

Hæc quidem sententia suos habet Catholicos patronos, quos Patres Tridentini proscribere noluerunt, ut testatur non solum Catharinus in fine secundi libelli, sed & Alphonsus Salmeron è Societate Jesu, qui Concilio adfuit, quique Tom. 9. Tractat. 13. allatis utriusque sententiæ momentis sic scribit: *Jam prudens lector suo fruatur judicio, & quam velit magis amplectatur, donec Ecclesia aliud statuat*.

Nihilominus recedendum non videtur à communi Theologorum sententia. Quare ad propositam quæstionem

R. Consecratio perficitur solis Christi verbis.

Probat. 1. quia Patres laudati, Irenæus, Chrysostomus, Ambrosius, Augustinus, & plures alii conversionem panis in corpus Christi prædictis verbis ascribunt, *panem..... corpus suum.... fecit, boc est corpus meum dicendo*, ait Tertullianus lib. 4. contra Marcion. cap. 40. Et Eusebius

Emys-

Emysenus homil. in ramis Palmarum, qui dixit, inquit, *tunc per se, modò dicit per suos Ministros, hoc est corpus meum; & tanta est ejus verbi virtus & efficacia, ut statim fiat quod dicitur.* 2. Forma Eucharistiæ consistit solum in his verbis, quæ convertunt panem & vinum in corpus & sanguinem Christi Domini: atqui sola Christi verba id præstant: Ergo. Minor probatur: verba Sacramentorum novæ legis efficiunt quod significant; atqui prædicta verba, quæ pertinent ex dictis ad substantiam Eucharistiæ, sola significant illam conversionem: ergo sola eam efficiunt. 3. Quamvis Ecclesia oppositam sententiam hætenus non proscripserit, ea tamen displicuit in Concilio tum Florentino, tum Tridentino: in Florentino quidem; nam Latini inter cætera Græcis duo objecerunt. Primum, quòd Presbyteri apud eos confirmarent; secundum, quòd in Liturgia preces verbis Domini adderent. Ergo in mente Latinorum consecratio fit sine precibus; & sicut ab institutione Christi alienum credebant, quòd Presbyteri tanquam Ministri ordinarii confirmarent; ita quòd consecratio precibus perficeretur.

Accepta autem Græcorum canonica responsione, ut in actis Concilii refertur, pronunciavit Summus Pontifex Eugenius, *fide conjuncti sumus*, & sic confirmata est unio. In Decreto quoque, quòd ipse Eugenius paulo post edidit ad exponendam Armenis Ecclesiæ Romanæ doctrinam, consecratio nullatenus precibus ascribitur, sed solis Domini verbis: *Forma, inquit, hujus Sacramenti sunt verba Salvatoris, quibus hoc conficit Sacramentum; Sacerdos enim in persona Christi loquens, hoc conficit Sacramentum.*

In Concilio autem Tridentino opposita sententia, quam tuebatur Catharinus, multos offendit, fuitque eorum judicio proscribenda, Porro in opinionibus seligendis verus Theologus vitabit non solum hæreseos notam, sed & temeritatis, seu singularitatis, quam S. Bernardus tractat. de gradibus superbiæ, sicut & alii Patres, inter filias superbiæ recensent. Unde enim ille pruritus fuscitandi opiniones jam pridem extinctas, & in angulo veteris cujusdam paginæ veluti sepultas, nisi ex inordinato appetitu falsi nominis scientiæ, ut loquitur Apostolus 1. ad Tim. 6. vers. 20. Denique argumenta allata in confirmationem oppositæ sententiæ tanti ponderis non sunt, ut à communi Theologorum doctrina nos retrahant.

Non primum. Quis enim negaverit consecrationem, seu benedictionem Domini semper fuisse efficacem respectu effectus, quem intendit; cum ipse Lazarum fuscitans, Joan. 11. dicat *ego autem sciebam quia semper me audis?* Sed quemadmodum Lazarus oratione Christi præmissa non surrexit nisi ad vocem, qua Christus clamavit: *Lazare veni foras*; sic nec panis mutatus est in corpus Christi, nisi ad illa verba: *hoc est corpus meum*. In hoc ergo efficax fuit oratio seu benedictio Christi, quod omnipotentiam divinam sibi conciliaverit ad perficiendam illam conversionem, & ad materiam præparandam, quo sensu S. Gaudentius dicit Christum consecratum panem Apostolis porrexisse. Sanctus verò Marcus per anticipationem narrat Apostolos bibisse, tùm Christum dixisse, *hic est sanguis meus*, aliàs bibissent illi, nescientes quid biberent, si jam hausto calice dixisset, *hic est sanguis meus*. Nec juvat adversarios, quòd Innocentius

centius III. & nonnulli alii doceant Christum non consecrasse allatis verbis; unum siquidem volunt illi Theologi, scilicet Christum potestate excellentiæ effectum Sacramentorum contulisse sine Sacramentorum legibus, v. g. peccata remisisse sine ritu Baptismi: panem in corpus suum convertisse sine verbis consecratoriis, sed Ministris suis necessitatem imposuisse dicendi: *Ego te baptizo*, &c. ad peccata remittenda per Baptismum: *hoc est corpus meum*, ad consecrandum panem.

Non secundum; quia Apostolus eo loco non explicat quibus verbis Christus consecraverit; sed meminit solum fideles tantum mysterium celebrasse benedictionibus, quod etiam nunc præstamus; tota enim nostra Liturgia est benedictio, gratiarum actio, & deprecatio. At capite sequenti vers. 24. & 25. refert consecrationem fuisse peractam his verbis, *hoc est corpus meum*, *hic est sanguis meus*. Ita enim intellexerunt sancti Patres jam laudati.

Non tertium. 1. Quia omnes communiter fatentur nos non habere puras Liturgias, quales edidit ii, quorum nomen præferunt, nempe sancti Petrus, Jacobus, Basilii, & Chrysostomus; sed multa in iis identidem fuisse addita & immutata. 2. Quia per preces, quæ in Liturgiis Græcorum leguntur post prolata Christi verba, non petitur simpliciter ut panis fiat corpus Christi, sed ut fiat suscipientibus ad salutem; & ita vulgò creditur Græcos in Concilio Florentino mentem suam explicuisse. Nec obstat, quòd ante preces illas panis & vinum dicantur antitypa; nam certum est ab antiquioribus Patribus ita vocari etiam post peractam Liturgiam.

S. Gregorius Nazianzenus in Oratione funebri de sancta Gorgonia sorore sua, testatur ipsam probuisse ante antitypa, id est, Eucharistiam, quam domi servabat. Unde sancti Damascenus & Epiphanius, vel lapsi sunt memoria, dum asserunt nullum è sanctis Patribus dona jam consecrata vocasse antitypa; vel alio sensu, quàm veteres, acceperunt illud nomen, *antitypum*, nempe pro signo vacuo; certum enim est nullum è sanctis Patribus dixisse Eucharistiam esse signum seu imaginem vacuum corporis Christi. Sic hac nostra ætate dicimus Eucharistiam esse Sacramentum corporis Christi, nec feremus eum qui diceret esse signum aut figuram corporis Christi: quamvis Sacramentum & signum, seu figura idem sonent, & illa nomina aliquando à veteribus promiscuè usurpata sint. Quid ita? nimirum propter Novatores, qui hodie nomen illud, *signum*, sive *figura*, usurpant pro mero signo excludente rem significatam. Et hoc sensu negamus ullum ex sanctis Patribus Eucharistiam sic appellasse. 3. Quia cùm tota Liturgiæ actio consecrationem spectet veluti unicum scopum suum, in singulis ejus partibus exhibetur Christi corpus tanquam præsens, saltem intentionaliter. Sic apud Latinos præparatoriè fit offertorium, in quo Sacerdos sic loquitur: *Suscipe, sancte Pater...hanc immaculatam hostiam, &c. offerimus tibi, Domine, calicem, &c.* Quis autem mysteriorum nostrorum ignarus non crederet Sacerdotem habere præ manibus Sacrificii victimam, cùm tamen non nisi panem & vinum offerat, quæ sanè non sunt nostra victima? sed in hac cæremonia consecratio futura repræsentatur tanquam præsens, sicut cùm in canone Sacerdos imponens manus super

panem

panem & vinum, dicit per anticipationem: *hanc igitur oblationem . . . quam offerimus*, &c. Familiare enim est in Ecclesia exhibere res vel futuras, vel præteritas, tanquam præsentem, ut videre est in Officio defunctorum, in quo veluti oculis subjicitur defunctus quasi adhuc animam exhalaret, *libera eos de ore Leonis . . . ne cadant in obscura tenebrarum loca*, cum certum sit sortem earum jam esse definitam. Quemadmodum ergo Latini consecrationem futuram tanquam præsentem exhibent: sic Græci, quasi jam non essent peracta, precantur, sive gratulando, sive confirmando, ut Spiritus Sanctus adveniens, panem & vinum sanctificet, convertatque in corpus & sanguinem Christi.

Non quartum: tum quia Liturgia, in qua fit consecratio, tota ferè oratio est: tum quia cæteræ formæ Sacramentorum, quæ formaliter deprecativæ non sunt, qualis ista: *Ego te baptizo in nomine Patris*, &c. dicuntur frequenter à sanctis Patribus preces, invocationes; quia cum Sacerdos agat in Sacramentis tanquam Christi Minister, non propria, sed Dei virtute nititur, quàm implicitè invocare censetur: *Quomodo*, inquit sanctus Augustinus, lib. 5. de Bapt. cap. 20. num. 28. *exaudit homicidam deprecantem (Deus) vel super aquam Baptismi, vel super oleum, vel super Eucharistiam?* Legatur verò Epistola S. Gregorii, & perspicuum erit ipsum non loqui de forma consecratoria, sed de precibus Liturgiæ, in quibus scribit, non esse prætermittendam Orationem Dominicam; cum Apostoli, priusquam Ecclesiæ haberent Liturgias, ad solam Orationem Dominicam Eucharistiam celebrarent.

Non quintum. Verum quidem est propositio.
D. Habert Theolog. Tom. V. Ee tio.

tionem speculativam supponere suum objectum ; at propositio practica non supponit, sed facit ; neque enim remissa erant peccata mulieris peccatricis, priusquam Christus diceret : *Remittuntur tibi peccata*, Luc. 7. necdum sanatus fuerat filius Reguli, cum hic audivit : *Vade, filius tuus vivit* : nec mulier dimissa erat ab infirmitate sua antequam Christus diceret, *dimissa es ab infirmitate tua*, Luc. 13. Porro practica est hæc propositio, *hoc est corpus meum*, sufficitque ad ejus veritatem ; quod objectum sit tale in ultimæ syllabæ pronuntiatione, quale enuntiatur. Sic vera est hæc propositio : *Ego fileo*, non quidem dum loquor, sed cum desino loqui. Unde pronomen, *hoc*, non panem demonstrat, sed confusè corpus Christi, quemadmodum si quis oblata moneta diceret, *hoc est aurum vel argentum* ; *hoc*, demonstraret confusè aurum vel argentum, nec nugatoria esset locutio, ex eo quod idem bis in eadem propositione significaretur ; quia primo loco per pronomen, *hoc*, confusè tantum ; in fine verò propositionis clarè & distinctè demonstraretur.

Nec dicas : dum pronuntiatur, *hoc*, nondum est corpus Christi, sed panis : Ergo pronomen illud nec distinctè, nec confusè demonstrat corpus Christi. Distinguendum enim est illud consequens, non demonstrat speculative, Concedo : Non demonstrat practice, Nego : propositio enim illa efficit, ut hoc sit corpus Christi, reddaturque præsens sensibilibiter, non quidem cum incipit pronuntiari, sed cum sensus est completus ; quia verba Sacramentalia non operantur, nisi quatenus significant : non significant autem, nisi completa propositione.

Non

Non sextum, quia eadem difficultas posset proponi contra formam Baptismi: *Ego te baptizo in nomine Patris*, &c. propositio enim illa non determinatè significat (si solitariè sumatur) ablutionem animæ aut corporis, sicut nec illa, *hoc est corpus meum*, corpus Christi aut Sacerdotis; sed determinatur per circumstantias, & intentionem saltem exteriorē loquentis.

Q. 3. *Singula Domini verba suntne de essentia formæ?*

R. Primò, certum est hæc esse necessaria: *Hoc est corpus meum, hic est sanguis meus*, vel, *hic est calix sanguinis mei*: quia detractò vel uno ex his vocabulis corrumpitur sensus propositionum, nec demonstratur corpus, aut sanguis Christi præsens.

Sed quid, si in alia vocabula mutarentur, si v. g. pro corpore diceretur *caro*; loco pronominis, *hoc*, pronuntiaretur, *istud*, *illud*, vel, *hic* adverbialiter, seu, *ibi est corpus meum*.

R. Integra esset forma, si loco pronominis, *hoc*, diceretur, *istud*; quia illa duo pronomina idem & eodem modo significant; sed irrita esset, si diceretur primò *caro*; quia caro minùs significat, quàm corpus; corpus enim est aliquod totum integrale ex carne, ossibus, nervis, &c. Secundò, si diceretur, *illud*; quia hoc pronomen æquè significat rem absentem, ac præsentem. Tertiò, si diceretur, *ibi*, vel, *hic*; quia adverbia illa non significant conversionem panis in corpus Christi, aut vini in sanguinem, sed demonstrant tantum corpus esse in pane, aut sanguinem in vino, ut infra probabitur.

R. Secundò, certum est particulam, *enim*, non esse necessariam, quia sine ea remanet integer

sensus. Difficultatem solum movet Thomistarum Schola circa hæc verba formæ calicis, *novi & æterni Testamenti, mysterium fidei, qui pro vobis & pro multis effundetur in remissionem peccatorum*. Alii siquidem affirmant S. Thomam docuisse ea pertinere ad essentiam formæ; sic enim scribit 3. p. q. 78. art. 3. *dicendum est ergo, quod omnia prædicta verba sunt de substantia formæ*. Alii verò negant eam fuisse mentem sancti Doctoris, cum immediatè post allata verba subjiciat: *Per prima verba* (hic est sanguis meus) *significatur ipsa conversio in sanguinem eo modo, quo dictum est in forma consecrationis panis*. Atqui perficitur consecratio panis per illa verba, *hoc est corpus meum*; quia significant conversionem panis in corpus Christi: ergo & per ista, *hic est sanguis meus*, perficitur consecratio calicis, ac proinde reliqua pertinent tantum ad integritatem formæ, quam S. Doctor hic vocat substantiam. Qui ex Thomistis digessere Catechismum Romanum, amplexi sunt primam sententiam, cui etiam favere visi sunt Ministri sacræ Inquisitionis sub Pio III. qui jusserunt expungi ex Commentariis Cajetani propositionem, quæ negabat prædicta verba esse de essentia formæ calicis; fortè quia non satis honorificè de sententia S. Thomæ fuerat locutus, ut censent nonnulli.

Q. 4. *Estne consentaneum adhibere laudata verba in consecratione calicis?*

R. Prorsus est consentaneum, nec sine gravi peccato, saltem contra Ecclesiæ præceptum, omitti possunt. 1. Quia Christus Dominus ea usurpavit, his exceptis, *æterni, & mysterium fidei*, quæ ex sola traditione habentur. 2. Quia per hujusmodi

modi verba optimè designantur usus & efficacia sanguinis Christi. Enimverò nomine Calicis præsentatur sanguis Domini in ratione potus, dum exhibetur in vase huic usui accommodato. Nominè vero Testamenti significatur dispositio hæreditatis cœlestis, quam Deus disposuit hominibus dandam per virtutem sanguinis Christi: additur: *novi*, quia, inquit sanctus Thomas, in veteri Testamento sanguis Christi in figura exhibitus fuit, unde Apostolus Hebr. 9. *Nec primum Testamentum sine sanguine dedicatum est.* Hic autem in veritate exhibetur. Dicitur etiam, *æterni*, tum quia ab æterno novum Testamentum dispositum fuit: tum quia æterna est hæreditas, ad quam disponit. Quæ omnia cum nec sensu, nec ratione, sed sola fide detegi possint, calix ille vocatur mysterium fidei, reliqua verò sunt ad designandam virtutem Passionis, quæ operatur in hoc mysterio, & expressius significatur per sanguinem seorsim à corpore consecratum; & *ideò*, inquit S. Thomas cit. art. 2. ad 1. *potius in consecratione sanguinis fit mentio de effectu Passionis, quam in consecratione corporis.*

CAPUT IX.

Quis est sensus formæ Eucharistiæ?

Manichæi & alii antiquiores hæretici Simonis Magi discipuli, qui negarunt Filium Dei veram carnem assumpsisse, consequenter & indirectè negarunt his Domini verbis, *hoc est corpus meum, hic est sanguis meus*, demonstrari verum corpus, & verum sanguinem: *Eucharistias* &

oblaciones non admittunt, inquit sanctus Ignatius Epistola ad Smyrneneses, *quod non confiteantur, Eucharistiam carnem esse Salvatoris nostri Jesu Christi, quæ pro peccatis nostris passa est.* Ex Manichæorum schola prodierunt Lisojus & Helibertus Clerici Aurelianienses, proscripti in Concilio Aureliæ celebrato anno 1017. Spicilegii tomo 2. hi, sicut docebant Christum de Virgine Maria natum non fuisse, neque pro hominibus passum, neque verè in sepulchro positum: ita in Eucharistia esse verum ejus corpus & sanguinem negabant.

Joannes Erigena natione Scotus, primus verba Christi ad sensum metaphoricum detorsit, directèque realem Christi præsentiam in Eucharistia impugnavit: *Usque ad præsens nemo de his (Eucharistiæ mysteriis) errasse legitur, nisi qui & de Christo erraverit*, inquit Paschasius Radbertus Abbas Corbejenfis Epistola ad Feudegardum, circa annum 870. obiisse fertur Joannes Scotus anno 884. sine sectatoribus; quia ab omnibus explosa est illa doctrinæ novitas, ut ostendemus cap. 12. sicque cum auctore error fuit sepultus. Nostris tamen Pseudo-reformatis talem parentem non invidemus, fuit enim Pelagianus, ut advertit Prudentius Tricassinus, libro de Prædestinatione, & multis aliis erroribus implicatus, ex eodem Prudentio: *Capitula ineptissimè & mendacissimè à quodam Scoto conclusa*, inquit Synodus Lingonensis cap. 4. *ubi non argumentum fidei, sed potius commentum perfidiæ patet, à pio fidelium auditu explodimus.* Nicolaus I. Carolum Calvum monet in Epistola ad eum scripta, *ut Joannem Scotum Parisiis expellat, ne cum tritico sacri eloquii grana lolii, & zizania miscere dignoscatur.* Fabula verò est, quod scribit Willelmus Malmesburiensis

riensis lib. 2. de gestis Anglorum cap. 4. Joannem Scotum Martyrum albo fuisse ascriptum; quæ enim Ecclesia talem martyrem in fastis suis descripsit?

Berengarius 1. S. Fulberti Carnotensis Episcopi discipulus, tum in Ecclesia S. Martini Turonensis scholæ Præfectus, tandemque à Brunone Andegavensis Archidiaconus renunciatus, librum Joannis Scoti impensius laudavit undecimo sæculo, erroremque ejus disseminans universum orbem turbavit, multos ab avita fide retraxit, ac propterea primus Sacramentariorum parens vulgò perhibetur. Sed tantum abest ut talis parens filiis patrocinetur, quin ipsos aperti schismatis, & manifesti erroris convincit. Nam ejus doctrina ad Sedem Apostolicam delata anno 1050. in Concilio Romano, Leone IX. Præsidente, primum damnata fuit, deinde in Vercellensi, & Parisiensi; in Turonensi autem anno 1055. Hildebrandus Cardinalis, postea Gregor. VII. Berengarium, ut videbatur, correctum clementer suscepit; sed ad vomitum reversus, in Synodo Romana anno 1059. sub Nicolao II. libros perversi dogmatis in ignem conjecit, jurans fidem se inviolabiliter servaturum, ex Lanfranco libro de corpore Christi, cap. 1. & 2. Verùm in Gallias reversus, denuò ad priorem rediit errorem, quem iterum proscripsit Concilium Rothomagense, anno 1073. dehinc Pictaviense, anno 1075. ubi Berengarius vita periclitatus est. Anno autem 1078. in Synodo Romana subdolan confessionem Gregorio VII. obtulit, tandemque in altera Synodo Romana errorem abdicavit, anno 1079. tum reversus Turones sæculi pompis abrenunciens, fere octo annis Domino militans ex Chronico S. Petri Vivi, fidelis & verè Catholici

cus vitam finivit anno 1088. ex manuscripto Ecclesiæ S. Martini Turonensis.

Nonnulli ex ejus discipulis admissa reali præsentia, transubstantiationem negarunt, asserentes Christum sub pane contineri, & in eo impanari, ex Guitmondo libro 1. & ex Algero in prologo librorum de Sacramento Corporis & Sanguinis Domini.

Adversus Berengarium adhuc viventem scripserunt Adelmannus ejus condiscipulus sub S. Fulberto Brixienfis postea Episcopus; Hugo Episcopus Lingonensis, Lanfrancus ex Priore Beccensi tandem Cantuariensis Archiepiscopus Durandus Abbas Troarnensis, Guitmondus ex Monacho Abbatiae Crucis in Normannia, Aversanus Episcopus in Italia, Duoduinus Leodiensis Episcopus, & post ejus obitum Algerus ex Leodiensis Ecclesiæ Scholaste Monachus Cluniacensis, quorum opera extant tom. 18. Bibliothecæ Patrum, editionis Lugdunensis.

Petrus de Bruis, à quo Petrobrussiani, & Henricus ejus Discipulus, à quo Henriciani, quoddecimo sæculo ineunte, non solum veritatem corporis & sanguinis Domini in Sacramento altaris negarunt, sed & ipsum Sacramentum, contententes non transire ad posteros, quod Christus in ultima cœna gessit, ex Venerabili Petro Cluniacensi eis coætaneo Epist. 2. contra Petrobrussianos. His adhæserunt Arnaldus, Colonienses dicti Apostoli, & Albigenfes, seu Tolosani, sic nuncupati, quia in illis locis hæreseos virus sparserunt. Viderint Sacramentarii nostri, an sit ipsis honorificum vestigiis talium inhærere, qui Sacramentum cœnæ & baptismum parvulorum negarunt, qui
Mani-

Manichæorum discipuli extitere; legitur enim in libro 7. cap. 17. vitæ S. Bernardi sanctum Doctorem contra Henricianos Tolosam profectum pro confutanda hæresi Manichæorum. Colonienfes conjugium detestabantur, bestialiter vivebant, atque eo nomine verè appellandi bestię, ex Hugone Netello Epist. ad Henricum Tullensem Episcopum. De Arnaldo S. Bernardus sic scribit Epist. 196. *Quem Brixia evomuit, Roma exhorruit, Francia expulit, Germania abominabatur.* Albigenfes vetus Testamentum repudiabant, corpus Christi phantasticum docebant, cùmque saginarent propria corpora, dicebant se solos facere corpus Christi, ex Ecberto S. Florini Abbate serm. 1.

Non horum sectæ jamdudum extinctæ copulamur, inquiunt Novatores, sed Waldensium & Hussitarum, qui hucusque permanent plusquàm quingentis annis, saltem Waldenses exorti anno 1160.

Contra 1. Waldenses circa Eucharistiam non errarunt usque ad annum 1530. quo Bucerus eos ad Calvinistarum partes adduxit, ex Gillio in hist. Ecclesiarum reformatarum; nam Claudius Seycel Archiepiscopus Taurinensis, qui circa annum 1517. cum eis congressus est, docet lib. contra illos edito, in eorum sententia Christum in altari non fisci præsentem ad verba improbi Sacerdotis, quod supponit probum Sacerdotem corpus Christi conficere, & hoc expressè confessi sunt anno 1445. ut habetur in autographo inquisitionum, quod asservatur in Bibliotheca Colbertina. Nec fides est habenda libro de Antichristo vernaculo sermone sub eorum nomine edito à Calvinista: tum quia ex præfatione confessionis Bohemorum

Waldenses nullum publicarunt scriptum: tum quia liber ille fingitur scriptus anno 1120. cum Waldensium schisma assignetur anno 1160. tum quia in illo libro laudatur milleloquium S. Augustini, quod fuit confarcinatum decimo, tertio sæculo: tum denique quia sermo ille vernaculus non est duodecimi sæculi, sed posteriorum. Haberdus quidem scripsit de antiquioribus Waldensibus, quòd corpus Christi negant asse in altari; sed nomen Waldensium pluribus sectis evasit commune; nam subdit ille Auctor, Trinitatem diffitentur, legem Moysis destruunt, nubere prohibent, quod certè non convenit Waldensibus speciatim dictis.

Contra 2. Joannes Hufs in sess. 15. Concilii Constantiensis profitetur, panem desinere per transubstantiationem, & converti in corpus Christi. Idem confessus est Hieronymus Pragensis, priusquam Constantiæ combureretur. Pragenses magistro suo adhæserunt; ut testatur Choclæus lib. 5. hist. Hussit. excipiendi tamen Thaboritæ homines flagitiosi, qui in Religione nihil intactum reliquerunt, nec solum cum aliis Hussitis, sed nec secum concordēs. Consule illustrissimum Bossuet Meldensem Episcopum tomo 2. hist. Variationum.

Wiclefus ob repulsam sive à præfectura Collegii Oxoniensis in Anglia, sive ab Episcopatu Vigornienfi anno 1375. cæca indignatione commotus multa impia & blasphemata contra Ecclesiæ consuetudines, fidem & speciatim Eucharistiam scripsit, quæ recensita & damnata sunt in Concilio Constantiensi sess. 8. anno 1414. Unde nulla ejus auctoritas, maximè cum inconstans fuerit
circa

circa realem præsentiam ; nam lib. 4. Trialogi c. 1. habet, *Corpus Christi latet in qualibet particula panis*. Quia verò Sacerdos potest esse improbus, addit, *adoro sub conditione hostiam visibilem*; quia in ejus sententia Sacerdos in statu peccati mortalis Sacramentum non conficit. Libro vero de Apostasia cap. 18. scribit, corpus Christi in Eucharistia est creatura peior publica, quia panis. Anno 1382. Londini fraudulenter ejuravit errorem, obiitque in speciem Catholicus anno sequenti ante biduum correptus paralyti, cùm nomina SS. Sylvestri primi, & Thomæ Cantuariensis, satyrica oratione proscindere pararet.

Ex his liquet Sacramentarios suscitasse errorem ubique ab omnibus damnatum, jam pridem extinctum, atque cum auctoribus conscriptum, ac proinde novi schismatis esse reos. Ex his

Huldricus Zwinglius Tiguri in Helvetia Pastor primo loco numerandus est. Hic an. 1524. rogatus à Senatu ejusdem urbis, quem Lutherana novitas moverat, quid sentiendum esset de Eucharistia, post sibi datas inducias respondit edoctus, ut scribit lib. de subsidio Eucharistiæ, à nescio quo, qui sibi dormienti astitit, *ater*, inquit, *an albus fuerit non memini*, verba Domini, *hoc est corpus meum*, intelligenda tropicè, quemadmodum illud Exodi 12. *est enim phase, id est, transitus Domini*, ubi verbum *est*, accipitur pro, *significat*, aded ut sensus verborum Christi sit, hoc significat corpus meum, & ita Eucharistiam esse tantum figuram & nudum signum corporis Domini. Comites habuit Oecolampadium Ordinis S. Brigittæ Apostatam, & Carlostadium Archidiaconum Vittembergensem, qui in ea parte recessit à Magistro suo Luthero; hic enim

enim in epist. ad Argentinenses sic scribit : *Vellem posset mihi aliquis persuadere nihil esse in Eucharistia præter panem & vinum, magno ille me beneficio devinciret. Jam sæpè gravibus curis in hac materia desudavi, & videbam me hoc modo plurimum posse Papæ incommode esse. Verùm me captum vidi, nulla elabendi vi relicta, textus Evangelii nimis apertus est. Talia sunt primordia præsumptæ reformationis, hoc spiritu maligno incitati, qui eam conceperunt.*

Joannes Calvinus Novioduni oriundus patre Gerardo Chauvino, anno 1535. lib. 4. Institutionum edidit, in quo Magistri nomen ambiens viam init mediam inter Zwinglium & Lutherum : contra illum quidem magnificè & Catholicorum more loquitur de Eucharistia, *in sacra cæna*, inquit cap. 17. §. 22. *jubet me (Christus) sub symbolis panis & vini corpus & sanguinem suum bibere, manducare, nihil dubito quin & ipse porrigat, & ego recipiam.* Et in Cap. 26. Matth. *verè in cæna datur nobis corpus Christi : non ergo vacuum & inane signum nobis proponitur, sed verè carnis & sanguinis Domini efficimur participes.* Hæc contra Zwinglium. Contra verò Lutherum in fine libelli, cui titulus est, *Consensio de re Sacramentaria*, sic scribit, *tollenda est quælibet præsentiae localis imaginatio ; nam cum signa hæc in mundo sint, Christus, quantum homo est, non alibi quam in cælo quærendus est. Et infra, quia tamen corpus Christi finitum, & cælo ut loco continetur : necesse est à nobis tanto locorum intervallo distare, quantum cælum abest à terra.* Quomodo autem propositiones in speciem contradictoriæ cohærere possint, explicat cit. cap. lib. 4. Instit. ubi scribit corpus Christi per fidem, quam symbola panis & vini exci-

tant

tant, apprehendi, fierique objectivè præsens in Sacramento, quin & virtutem quandam è corpore Christi diffundi in animam communicantis: Nam, inquit, si Solem conspiciamus radiis in terram emicantem ad generandos, fovendos, vegetandos ejus fœtus, suam quodammodo substantiam ad eam trajicere; cur inferior spiritus Christi esset irradiatio, ad communionem carnis & sanguinis in nos traducendam? Habemus ergo ex Calvino contra Zwinglium Eucharistiam non esse meram figuram, nudum signum corporis Christi institutum ad excitandam fidem, per quam spiritualiter manducatur caro Christi. Hanc Calvini confessionem libenter accipiunt Catholici, rejiciunt verò communiter ejus discipuli, exceptis nonnullis ex doctioribus; nam ex Plesæo lib. 4. de Eucharistia cap. 1. Christus non aliter bibitur & manducatur in cœna, quàm in Baptismo, id est, Cœna & Baptismus sunt mera signa promissionum divinarum. Quid igitur in cœna amplius habetur in mente Calvini, quàm signum & figura corporis Christi? virtus quædam emanans ex corpore Christi existentis in cœlo, non quæ permanenter inhæreat pani & vino, sed quam fides in communicantis animam attrahit. Hanc virtutem dicit substantialem, nonnumquam etiam vocat substantialem, nonnunquam etiam vocat substantiam corporis Christi, quemadmodum, inquit, calor ignis, aut lumen Solis dici possunt substantia ignis sive Solis. Hoc autem fidei suæ arcanum exponit tanquam singulare omnipotentiae divinæ miraculum omni intellectui humano impervium; sic enim scribit cit. c. lib. Institut. §. 10. *Etsi incredibile videtur etiam tanta locorum distantia bene trahere ad nos carnem Christi meminerimus quantum*

suprà

supra sensus omnes nostros emineat Spiritus Sancti virtus, & quam stultum sit ejus immensitatem modo nostro velle metiri: quod ergo mens nostra non comprehendit, concipiat fides. Verum perspicuum est vel idiotis & bardis Deum per omnipotentiam suam, absente sole, aut igne deficiente lumen seu calorem posse excitare: nulla ergo fides necessaria, ut cognoscamus Deum in animabus nostris posse imprimere virtutem corporis Christi absentis, ac proinde fucum facit dolosus homo, dum ad explicandum Eucharistiæ mysterium usurpat SS. Patrum verba, quamvis de ea longe dissimilia cogitet. Claudius tamen Pseudo-Minister, & alii, Catholicorum argumentis pressi, confugiunt ad istam Calvini sententiam, in qua putant se posse declinare tela, quæ ex Scripturis & Antiquorum libris in eos mittuntur. Sed quærendum est ab ipsis. 1. Ex quo Scripturæ textu aut Veterum testimonio habeat Calvinus in cœna non ipsam Christi Carnem, sed virtutem ab ea emanantem accipi? novum ergo & antea inauditum mentis suæ figmentum tanquam fundatissimum Religionis Christianæ dogma credendum proponit. 2. Quid infantes, qui per plura sæcula Eucharistiæ facti sunt participes, & etiam nunc fiunt in Ecclesia Orientali, amplius accipiant, quàm signum & nudam figuram corporis aut sanguinis Christi, cum careant illa fide promissionum, per quam solam attrahitur illa virtus substantialis corporis Christi? In Calvinistas ergo usurpare liceat illud Psalmi Octavi: *Ex ore infantium & lactentium perfecisti laudem propter inimicos tuos, ut destruas inimicum & ultorem.*

Sociniani non solum docent cum Zwinglianis
Eucha-

Eucharistiam esse nudum corporis Christi signum, sed insuper rationem Sacramenti ei denegant, contententes nullam huic ritui annexam esse gratiæ promissionem, sed esse gratiæ jam donatæ meram commemorationem.

Contra hos errores extat canon 1. sess. 13. Concilii Trident. *Si quis negaverit in sanctissimæ Eucharistiæ Sacramento contineri verè, realiter, & substantialiter corpus & sanguinem, una cum anima & divinitate Domini nostri Jesu Christi, ac proinde totum Christum; sed dixerit tantummodo esse in eo ut in signo, vel figura, aut virtute; anathema sit.*

Dicitur 1. *verè*, contra Zwinglianos, qui asserunt esse tantum figuram, signum, & imaginem corporis Christi.

Dicitur 2. *realiter*: id est, non tantum objective, & per fidem, ut vult Calvinus.

Dicitur 3. *substantialiter*, ad excludendam fictam illam virtutem à corpore Christi emanantem. Ad propositam itaque quæstionem

R. Catholica doctrina est, verba consecratoria non esse accipienda in sensu metaphorico & figurato, sed in proprio & naturali, adeoque *post panis & vini consecrationem, Dominum nostrum Jesum Christum, verum Deum atque hominem, verè, realiter, ac substantialiter sub specie illarum rerum sensibilibus contineri.* Verba sunt Concilii Tridentini sess. 13. cap. 1.

Q. 2. *Quomodo adversus Sacramentarios vindicatur illa veritas?*

R. Tribus illis momentis, quibus homines rem suam defendunt adversus litigantes. Opponunt 1. contractum, quo prior proprietarius rem illam solemniter promisit. 2. Ipsam donationem. 3. Pos-

3. Possessionem diuturnam, & non interruptam à tempore donationis. Sic Ecclesia Catholica contra Novatores præscribit 1. Christus Dominus promisit Joan. 6. se mihi daturum suum corpus & sanguinem. 2. Mihi actu & de facto dedit Matth. 26. Marc. 14. & Luc. 22. 3. Ex tunc possideo, litisque contestatio mota possessionem mille annorum, transivit in rem judicatam contra Berengarianos, & alios suprà recensitos. Quæ tria momenta totidem capitibus expendenda sunt.

CAPUT X.

Utrum Christus Dominus promiserit, Joan. 6. se daturum Carnem suam in Sacramento Eucharistiæ?

R. Distinguendum est; caput enim tres continet partes.

1. Certum est, in prima capitis parte describi dumtaxat. miraculum, quo quinque panes multiplicati sunt in deserto, & quasdam miraculi circumstantias.

2. Conveniunt etiam Catholici & heterodoxi in secunda parte capitis, nempe à vers. 26. usque ad 52. nullatenus agi de Eucharistia, sed de fide in Christum Dominum, quam metaphoricè vocat cibum, occasione accepta ex multiplicatione panum, propter quàm turba Christum requirebat; quemadmodum enim Discipulis Dominum rogantibus, ut cibum sumeret, Joan. 4. vers. 34. appositè respondit, *meus cibus est ut faciam voluntatem ejus, qui misit me*; sic Judæis ipsum quærentibus:

tibus: quia manducaverant ex panibus, ait: *Operamini non cibum, qui perit, sed qui permanet in vitam æternam . . . hoc est opus Dei, ut credatis in eum, quem misit ille.* Et prosequens eandem metaphoram, subdit, *panis enim Dei est, qui de cælo descendit . . . Ego sum panis vitæ.* Ubi manifestè loquitur de re jam completa, nempe de Incarnatione. Judæi equidem tunc murmurarunt, non quòd se tanquam panem proponeret, sed quia se de cælo descendisse assererat: *Nonne, inquit, hic est Jesus, Filius Joseph?* . . . *Quomodo ergo dicit hic, quia de cælo descendit?* Enimverò qui duri habent illa verba, *operamini . . . cibum . . . qui permanet in vitam æternam?* Nam ex S. Augustino tract. 25. in Joan. *cibus ille est, ut credatis in eum, qui est panis vitæ: hoc est ergo manducare cibum qui non perit. Ut quid ergo paras dentes & ventrem? crede, & manducaſti.*

Monendum tamen est, Calvinistas mala fide potius, quàm ignorantia trahere verba S. Augustini ad Sacramentum Eucharistiæ; sed frustra: tum quia S. Doctor tractatu sequenti, nempe 26. requirit ventrem & dentes ad visibile Sacramentum, *quod, inquit, pertinet ad virtutem Sacramenti, non ad visibile Sacramentum; qui manducat intus, non foris, qui manducat corde, non qui premit dente:* tum quia eadem sancti Doctoris verba in ipsos Calvinistas retorqueri possunt, ut quid enim parant dentes, & ventrem, cum cœnam celebrant? Paramus, inquit, dentes ad Sacramentum, fidem ad virtutem ejus. Idipsum cum S. Augustino respondent Catholici.

3. Ita certum Patribus Tridentinis visum est in tertia parte hujus capituli, quæ incipit à verbis

istis, v. 52. *Panis quem ego dabo, caro mea est, sermonem esse de Eucharistia, aut manducatione orali & reali Corporis Christi, ut multi ex Palavicino, lib. 17. cap. 11. postularint id definiri tanquam de fide, quibus tamen obstitit Episcopus Granatensis propter recentiore quorundam expositionem, qui ut declinarent argumenta, quibus Novatores urgebant Communionem sub utraque specie necessariam, ex illo Joannis testimonio, nisi manducaveritis carnem Filii hominis, & biberitis ejus sanguinem, non habebitis vitam in vobis, contendunt, illa verba non esse intelligenda de Eucharistia, seu de manducatione sacramentali, sed de spirituali tantum, quæ fit per fidem: Quod, ut benignissime dicam, inquit Maldonatus in caput 6. Joan. est temerarium, gravioribusque condemnare verbis homines bene Catholicos, nisi compertum haberem, errore magis animi, quam vitio in hæreticorum sententiam impegisse.*

Novatores itaque negant agi in illa parte hujus capituli de Sacramento Eucharistiæ, & nihilominus impugnant Catholicorum Communionem sub unica specie ex citatis verbis, *nisi manducaveritis carnem Filii hominis & biberitis, &c.* ubi vides hominum levitatem, & contentiosi animi cæcitatem.

Q. 2. *Quomodo probatur, in illa tertia parte capituli sermonem esse de Eucharistiæ Sacramento, Christumque in eo realiter contineri?*

R. Probatur auctoritate SS. Patrum & Conciliorum; ab iis enim accipienda est vera Scripturæ intelligentia juxta Concilii Tridentini Decretum sess. 4.

S. Hilarius lib. de Trinitate post medium probat ex capite 6. Joan. Contra Arianos Filium Dei

Dei esse in Patre secundum naturam & substantiam, sicut per Eucharistiam in nobis verè & substantialiter existit: Si verè, inquit, carnem corporis nostri Christus assumpsit, nosque verè sub mysterio carnis corporis ejus sumimus . . . per hoc unum erimus; quia Pater in eo est, & ille in nobis . . . ipse enim ait: caro mea verè est cibus . . . qui edit carnem meam & bibit meum sanguinem, in me manet & ego in eo. De veritate carnis & sanguinis non est relictus ambigendi locus . . . & hæc accepta atque hausta id efficiunt, ut nos in Christo, & Christus in nobis sit. Hæc igitur idcirco commemorata sunt, quia voluntatis tantum inter Patrem & Filium unitatem hæretici mentientes, unitatis nostræ ad Deum utebantur exemplo, tanquam nobis ad Filium & per Filium ad Patrem obsequio tantum ac voluntate unitis, nulla per Sacramentum carnis & sanguinis naturalis communionis proprietas indulgeretur; cum & per honorem nobis datum Dei Filii, & permanentem in nobis carnaliter Filium, & in nobis corporaliter & inseparabiliter unitis mysterium veræ ac naturalis unitatis sit prædicandum, &c. Ubi S. Doctor ex cap. 6. Joan. sic concludit realem Christi præsentiam in Eucharistia; ut excludat omnes Aubertini & aliorum Novatorum cavillationes. Namque 1. termini illi, Eucharistia est verè caro Christi, per Eucharistiam Christus est in nobis carnaliter & corporaliter, non possunt intelligi de signo carnis, nec de virtute à Calvino efficta, quæ re vera non est caro. 2. S. Hilarius vult probare, Christum esse consubstantialem Patri, & in eo existere, quomodo per Eucharistiam existit in nobis: supponit ergo esse in nobis per identitatem substantiæ, non verò per participationem alicujus virtutis, & proprietatis ab illo

emanantis, aliàs pro Arianis concluderet, nempe Filium esse in Patre, ut volebant, per quandam similitudinem & perfectionem ab eo derivatam, contra quem errorem S. Doctor hanc elicit conclusionem: *Si ergo nos naturaliter secundum carnem per eum vivimus, id est, naturam carnis suæ adepti, quomodo non naturaliter secundum spiritum in se Patrem habeat, cum vivat per Patrem?*

Objicit Aubertinus, ex S. Hilario eo loci fideles per Baptismum sunt realiter unum inter se: ergo à pari erunt unum realiter cum Christo per Sacramentum carnis ejus.

Distinguo antecedens. Ad mentem S. Hilarii, fideles per Baptismum sunt realiter unum inter se, quia habent eandem rem Sacramenti, scilicet, fidem & gratiam, Conc. Et hoc sufficiat ad propositum sancti Hilarii, qui probandum suscepit, fideles per Baptismum esse unum inter se, non ex solo consensu voluntatum, sed per rem aliquam ipsis communem, scilicet fidem: sunt realiter unum per identitatem & communionem ejusdem naturæ, Nego anteced. Baptismus enim etiam ad mentem Sancti Hilarii, non communicat eandem naturam & substantiam.

Distinguo etiam consequens; fideles erunt unum realiter cum Christo per Sacramentum carnis ejus in sensu hæretico, hoc est, supponendo cum Novatoribus, per Eucharistiam accipi quandam virtutem, quæ sit communis Christo & nobis, transeat: erunt unum realiter cum Christo ad mentem Sancti Hilarii per verba ejus clarè expressam, Nego consequ. nam S. Doctor inculcat, Christum esse in nobis per identitatem
natu-

naturæ carnis & corporis, quomodo est in Patre per identitatem Spiritus.

Concilium Alexandrinum, præside Sancto Cyrillo anno 430. in epist. ad Nestorium, quæ approbata & adoptata est à Concilio Ephesino generali, act. 5. anno 431. sic loquitur: *Confitemur, incruentum in Ecclesia sacrificium nos celebrare, utpote participes sacræ carnis, & pretiosi sanguinis Christi effectos . . . Quamvis enim dicat Joan. 6. Nisi manducaveritis carnem, & biberitis, &c. neutiquam communem carnem, hoc est, hominis naturæ conditionis carnem esse existimare debemus, sed verè illius propriam, qui nostri causa Filius hominis factus & appellatus est.* Ergo universalis Ecclesiæ, quam repræsentabat Concilium Ephesinum, doctrina est in sexto cap. Joan. nobis promitti veram Christi carnem in Eucharistiæ Sacramento. Similia habet Epiphanius Act. 6. Concilii Nicæni II. anno 787. *Nullus aliquando incruentum nostrum sacrificium imaginem corporis Christi dixit . . . sed audiunt Evangelicè dicentem eum, nisi manducaveritis carnem, &c.* Tract. esset prolixior, si exscriberentur omnium SS. Patrum testimonia, Irenæi lib. 4. c. 4. Cypriani lib. de oratione Dominica, Ambrosii lib. de initiandis c. 8. Cyrilli Jerosolymitani catech. 4. Chrysostomi homil. 45. in Joan. Epiphaniî hæresi 55. Cyrilli Alexandrini in cap. 6. Joan. Theodoreti lib. 4. hist. cap. 2. Leonis serm. 6. de jejuniis septimi mensis; Damasceni lib. 4. orthodoxæ fidei c. 14. & aliorum, qui omnes usque ad duodecimum sæculum intellexerunt citatum cap. de Eucharistia; quin & Concilium Tridentinum licet in hanc rem nihil definierit, tamen ex cap. 6. Joan. reperit hujus Sacramenti mirabiles effectus, sess. 13. c. 2.

Enimvero de iis nulla alibi mentio : absurdum est autem, Christum, qui Baptismi, & aliorum Sacramentorum virtutem & necessitatem edocuit Apostolos, priusquam illa institueret, ipsis nec præparatis, nec præmonitis corpus & sanguinem distribuisset.

Dices 1. Multi Patres exponunt hanc tertiam capitis partem ; alii de verbo Dei, ut S. Clemens lib. 1. Pædagogi, Origenes in lib. Num. & S. Basilius Epist. 141. Alii de Scriptura sacra ut S. Hieronymus in Psalm. 147. Alii de Baptismo, in quo infantes Christo incorporantur ; ita Innocentius I. Epist. ad Patres Concilii Millevitani : alii de Passione Christi suaviter recollenda, ut S. Augustinus lib. 3. de doctr. Christ. cap. 16. *Facinus*, inquit, *vel flagitium videtur jubere*, (Christus, cum dicit, nisi manducaveritis, &c.) *figura ergo est præcipiens Passioni Domini esse communicandum ; & suaviter atque utiliter in memoria recordendum, quod caro ejus pro nobis crucifixa & vulnerata sit.* Tract. verò 26. in Joan. & serm. 16. de divers. nunc 271. dicit per hunc cibum & potum intelligendam esse societatem corporis & membrorum Christi, quod est Ecclesia. *Corpus ergo Christi*, inquit cit. serm. 16. *Si vis intelligere, audi Apostolum*, vos estis corpus Christi.

Respondeo, familiare esse non solum Patribus, sed & scriptoribus sacris sic prosequi sensum tropicum & moralem, ut non negent sensum literalem. Numquid enim Apostolus negat veritatem historiæ veteris Testamenti, dum scribit 1. Cor. 10. omnia Judæis in figuram contigisse, & Gal. 4. Agar esse montem in Arabia, Saram verò esse Jerusalem ? Quod autem Patres

tres in objectione laudati intellexerint de Eucharistia, quod legitur Joan 6. *nisi manducaveritis*, &c. constat ex eorum scriptis. Nam Sanctus Basilius lib. 1. de Baptismo cap. 3. & in regulis moralibus, reg. 21. & Sanctus Hieronymus epist. ad Helvidiam, locum illum de præcepto Eucharistiæ percipiendæ interpretantur. Origenes verò in librum Num. sic scribit: *Bibimus sanguinem Christi, & ritu Sacramentorum, & cum sermonem ejus accipimus.* Sanctus quoque Augustinus lib. 1. de pecc. mer. cap. 20. *Audiamus*, inquit, *non de Sacramento Baptismi, sed de Sacramento mensæ dicentem, nisi manducaveritis.*

Quod affertur ex S. Innocentio nimis probat; nam inde sequeretur, Sanctum Pontificem exclusisse Eucharistiam è numero Sacramentorum, quod apertè falsum est, & contra Novatorum doctrinam. Vult ergo, parvulos post Baptismum decedentes, non percepta Eucharistia, manducasse carnem Christi in voto, ac proinde vita æterna minimè privari, ut dicetur infra, ubi de præcepto communicandi.

Instabis; saltem sequitur ex allatis textibus, præsertim Sancti Augustini, non probari ex cap. 6. Joan. corpus Christi realiter manducari: quia, ut loquitur Sanctus Doctor, verba illa flagitium sonant, ideoque figuratè sunt accipienda; unde expositione in Psalm. 98. Christum loquentem proponens, sic scribit: *Verba quæ locutus sum vobis, spiritus & vita sunt: Non hoc corpus, quod videtis, manducaturi estis & bibituri illum sanguinem, quem fusuri sunt, qui me crucifigent? Sacramentum aliquod vobis commendavi, spiritualiter intellectum vivificabit vos; etsi necesse est illud visibiliter celebrari, oportet*

tet tamen invisibiliter intelligi. Quod ita certum fuit Sancto Doctore, ut idipsum crebro repetat. Nam cap. 12. contra Adimantum Manichæum, explicans, quomodo anima in veteri Testamento dicatur esse in sanguine, sic scribit: *Possum etiam interpretari illud esse in signo positum; non enim dubitavit Deus dicere, hoc est corpus meum, cum signum daret corporis sui.* Item epistola 23. num. 98. ad Bonifacium, docet, Baptismum rectè dici fidem, Eucharistiam quoque corpus Christi, quia eorum sunt signa; *Si enim Sacramenta, inquit, quandam similitudinem earum rerum, quarum Sacramenta sunt, non haberent, omnino Sacramenta non essent.* Ex hac autem similitudine signa plerumque etiam ipsarum rerum nomina accipiunt. Sicut ergo secundum quendam modum Sacramentum corporis Christi corpus Christi est, ita Sacramentum fidei fides est. Ergo sicut Baptismus non est verè & propriè fides, sed tantum ejus signum ut causa, sic nec Eucharistia corpus Christi.

Ex quibus colligit S. Doctor lib. 21. de Civitate Dei cap. 25. malos nec recipere corpus Christi in cœna, nec fidem in Baptismo. *Non se dicat, (peccator) aut existimet manducare corpus meum, aut bibere sanguinem meum.* Nam in ejus sententia accipit solum signum corporis Christi in Eucharistia, & signum fidei in Baptismo. Clarius adhuc mentem suam aperit laudato serm. 16. de diversis, nunc 271. quæ cum sit quædam catechesis pro infantibus mox communicaturis, debuit propriis verbis Ecclesiæ doctrinam exponere, & sine metaphoris enodare difficultatem, quam proponit in hunc

hunc modum : *Dominus noster Iesus Christus, quo die voluit, in cœlum ascendit, illuc levavit corpus suum, ibi est modò sedens ad dexteram Patris, quomodo est panis corpus ejus.* En difficultas infantibus explicanda, ut sciant, qua fide ad Eucharistiam debeant accedere. Sic autem solvit : *Ista, fratres, ideo dicuntur Sacramenta, quia in eis aliud videtur, aliud intelligitur : quod videtur, formam habet corporalem; quod intelligitur, fructum habet spirituales.* Corpus ergo Christi, si vis intelligere, audi Apostolum : *Vos estis corpus Christi.* Ergo mysterium vestrum in mensa Domini positum, &c. Hoc est, Eucharistia est corpus Domini, quatenus fideles in illo Sacramento unum corpus Christi mysticum evadunt. Hic exultant Novatores, & sibi plausum faciunt, nec verentur dicere, *totus noster est Augustinus*, sed inanis hæc gloria, est in confusione ipsorum; siquidem vel uno Augustino, hæreticorum malleo, Novatorum error conteritur, & in pulverem redigitur. Itaque

Nego sequelam, utpote quæ fit contra expressam Sancti Augustini mentem in expositione tum Psalmi 33. tum Psalmi 98. in objectionem laudati. In priori loco conc. 1. expendens, quod de David legitur 1. Reg. 21. *ferebatur manibus suis*, quando immutavit faciem suam coram Adversariis, sic scribit : *quomodo fieri possit in homine, quis intelligat, quis enim portetur manibus suis? manibus aliorum potest portari homo, manibus suis nemo portatur.* Quomodo intelligatur in ipso David ad literam non invenimus, in Christo autem invenimus; ferebatur enim in manibus suis Christus, quando commendans ipsum corpus suum, ait : *Hoc est corpus meum : ferebat enim in manibus suis illud corpus.* Idipsum repetit S. Doctor concione 2. in

eundem Pſal. *Quomodo, inquit, ferebatur in manibus ſuis? quia cū commendaret ipſian corpus ſuum accepit in manus ſuas quod norunt fideles, & ipſe portabat quodammodo, &c.* At, inquiunt Adverſarii, quid eſt, *quodammodo*, niſi improprie, figuratè, metaphoricè? Novas ergo ſignificationes imponunt nominibus: quis enim unquam his terminis, *quidem homo*, intellexit hominem depictum & in figura? Omnes, tum docti, tum indocti concipiunt verum hominem, ſed indeterminatum. Similiter his vocabulis, *quodammodo* omnes intelligunt aliquem verum modum, ſed indeterminatum. Quis autem ſit ille modus, non determinat S. Doctor, & quidem, ut videtur, de induſtria; ait enim, *norunt fideles*; nimirum, quia prioribus ſæculis Paſtores myſterium Eucharistiæ occultabant, non ſolū Infidelibus, ſed & Catechumenis, de quibus S. Auguſt. ſic ſcribit *Tract. II. in Joann. Si dixerimus Catechumeno, credis in Chriſto? Respondet, Credo, & ſignat ſe cruce Domini ſui, ecce credit in nomine ejus. Interrogemus eum, manducas carnem Filii hominis, & bibis ejus ſanguinem? neſcit, quod dicimus.*

Sed quicumque tandem ſit ille modus, quo Dominus ſe ipſum in manibus ferebat, talis eſt, ex Sancto Auguſtino, ut ſit impoſſibilis aliis omnibus hominibus, quod Zvvinglianorum & Calvinistarum errorem manifeſtè deſtruit, cū certum ſit, quemlibet poſſe portare vel ſuam imaginem aut figuram, vel virtutem ſubſtantialem corporis ſui, imo & partem ſubſtantiae ſuæ, ſed nullus corpus ſuum integrum. Chriſtus ergo in doctrinam Sancti Auguſtini, verum & proprium corpus in
mani-

manibus suis portabat, cum id præstiterit, quod impossibile est omnibus hominibus.

Quòd si quæras, quis sit ille modus, quo Dominus seipsum in manibus suis portabat,

Respondeo uno verbo, esse modum sacramentalem, sed amplius non quæras; nam ex Concilio Tridentino sessione 13. cap. 1. *Et si verbis exprimere vix possumus, tamen possibilem esse Deo, cogitatione per fidem illustrata, assequi possumus.*

Non minùs clarè S. Augustinus fidem Catholicam exponit, citata expositione in Psalm. 98. quæ licèt sit prolixior, necessarium tamen videtur eam exscribere, tum quia Novatores ex ea palmare suum argumentum eruunt contra Catholicos; tum quia vel hinc discent omnes, quàm mala fide Novatores producant SS. Patrum truncatos textus, quos si integros proferrent, non solum evanesceret difficultas, sed sæpe contra aggressores retorquerentur.

Igitur Sancto Augustino quærenti, quod sit scabellum pedum Dei, de quo ait laudato Psal. 98. *Adorate scabellum pedum ejus*, occurrit illud Isaïæ 66. *Cælum mihi sedes est, & terra scabellum pedum meorum.* At quomodo adorabimus terram, cum dicat apertè Scriptura: *Dominum Deum tuum adorabis*, Deuteron. 6. & Matth. 4. Respondet S. Doctor: *Fluctuans converto me ad Christum..... suscepit enim de terra terram: quia caro de terra est, & de carne Mariæ carnem accepit. Et quia in ipsa hic ambulavit, & ipsam carnem nobis manducandam ad salutem dedit, nemo autem illam carnem manducat; nisi priùs adoraverit; inventum est, quemadmodum adoretur tale scabellum pedum Domini, & non solum non peccemus adorando, sed peccemus non adorando.* Quod ergo manducatur

ducatur in cœna, adoratur, ex Sancto Augustino, & quidem ea adoratione, quæ soli Deo debetur; de hac enim sola anxius erat S. Doctor: atqui figura aut virtus substantialis corporis Christi hoc modo nequit adorari, ut agnoscunt Calvinistæ, qui eam non adorant: Ergo S. Augustinus aliud confitetur in Eucharistia, quàm figuram & virtutem substantialem. Dicant ergo Novatores, quid illud sit, nisi Christus Dominus, verus Deus, & verus homo? Pergit S. Doctor. *Nunquid autem caro vivificat? ipse Dominus dixit, cum de ipsa commendatione ejusdem terræ loqueretur, Spiritus est, qui vivificat, caro autem nihil prodest. Ideo & ad terram quamlibet cum te inclinas atque prosternis, non quasi terram intueris, sed illum Sanctum, cujus pedum scabellum est, quod adoras, propter ipsam enim adoras . . . & cum adoras, ne cogitatione remaneas in carne, & à spiritu non vivificeris, Spiritus, inquit, vivificat; caro autem nihil prodest. Tunc autem, quando hoc Dominus commendavit, de carne sua locutus erat, & dixerat, nisi quis manducaverit, &c. scandalizati sunt quidam Discipuli ejus . . . acceperunt illud stultè, carnaliter illud cogitaverunt, & putaverunt, quòd præcisurus esset Dominus particulas quasdam de corpore suo, & daturus illis, & dixerunt, durus est hic sermo. Ipsi erant duri, non sermo; etenim si duri non essent, sed mites essent, dicerent sibi, non sine causa dicit hoc, nisi quia est ibi aliquod Sacramentum latens, quod illis discedentibus, qui remanserunt, didicerunt. Ille autem instruxit, & ait illis, Spiritus est, qui vivificat, caro autem nihil prodest; verba, quæ locutus sum vobis, spiritus & vita sunt, non hoc corpus, quod videtis, manducaturi estis, &c. Quid ais, o Doctorum oculatissimè? contradictoria nobis videris loqui; modò enim dixisti, Dominum in Sacramento dedisse carnem*

nem suam, ex Maria Virgine natam, graviterque monuisti nos peccaturos, nisi prius eam adoraverimus, quàm manducemus : nunc verò dicis, *non hoc corpus, quod videtis, manducaturi estis.* Nunquid corpus, quod videbant Apostoli, natum non erat ex Maria Virgine ? Quomodo ergo hæc verba tua cohærent cum præcedentibus ?

Sub diverso respectu corpus est idem & non idem ; idem in substantia, non idem in forma visibili : videbatur ab Apostolis in forma humana, & creditum est ab ipsis in forma invisibili sub signis visibilibus. Hoc sensu dixit Apostolus 1. Corinth. 16. corpus, quod sepelitur, idem & non idem resurrecturum : idem in substantia, non idem in accidentibus : seminatur in corruptione, in ignobilitate, & infirmitate, surget in incorruptione, in gloria, & in virtute : seminatur corpus animale, surget corpus spiritale.

Apostoli ergo non erant manducaturi corpus quod videbant, hoc est, in forma visibili & humana : nec dentibus dilaniaturi ; nam, præterquam quod caro sit mortua & concisa, non prodest quidquam, hic modus manducandi grande esset flagitium, quare ad mentem Sancti Doctoris cit. lib. 3. de Doctr. Christ. verba illa, *nisi manducaveritis*, &c. figuratè dicuntur, & intelligenda sunt de Sacramento seu signo, quod dentibus comminuitur.

Porrò signum illud seu Sacramentum dicitur corpus Christi ; *signa enim plerumque ipsarum rerum nomina accipiunt*, ex cit. epistola ad Bonif. Sic Baptismus dicitur fides, quia est signum fidei. Signum autem illud non excludit rem significatam, sed eam præsentem denotat, nempe panis seu species panis corpus Christi, ut & Baptismus fidem ; quemadmodum

admodum ex Sancto Doctore citato lib. contra Adimantum, sanguis ita est signum animæ, ut eam in corpore contineat, & Baptismus fidei, ut eam infantibus tribuat; unde cum baptizantur, verè dicuntur credere; *quid est enim credere, nisi fidem habere?* cit. epistola ad Bonifacium. Enimverò nisi Sacramentum visibile Eucharistiæ contineret realiter & substantialiter carnem Christi, quomodo sine crimine idololatriæ ibi adoraretur? Augustinus enim monet prius adorandam, quàm manducetur.

Duobus ergo modis in doctrina S. Augustini, quæ est & Ecclesiæ, manducatur caro Christi. 1. sacramentaliter tantum, 2. sacramentaliter & spiritualiter simul. Priori modo illam manducant peccatores, Sacramentum terunt, & comminuunt dentibus suis, non ipsam carnem, quia illa non est cibus corporis, sed animi: id est, facultas animalis nutritiva vim suam non exerit in carnem Christi, non eam concidit, non comminuit dentibus, non convertit in substantiam; nam manducare non est cibus simpliciter trajici in stomachum, ut patet ex hypothese, quòd trajiceretur cibus in stomachum cadaveris: non idcirco diceretur cadaver manducare, licèt cibus realiter & substantialiter transmitteretur in ejus stomachum. Quòd autem in doctrina Sancti Augustini peccatores, etsi sacramentaliter tantum carnem Christi manducant, eam tamen realiter & substantialiter ore accipiant, constat tum ex ejus expositione in Psal. 21. ubi docet peccatores, quamvis carne Christi non saturentur, eam tamen manducare in Sacramento, & adorare; tum ex cap. 8. lib. 5. de Baptismo, ubi sic scribit: *indignè quisque sumens Dominicum*

nicum Sacramentum , non efficit , aut quia ipse malus est , malum sit , aut quia ad salutem non accipit , nihil accipit ; corpus enim Christi Domini nihilominus erat in illis , quibus dicebat Apostolus : qui manducat indigne , reus erit corporis & sanguinis Domini.

Soli itaque iusti carnem Christi spiritualiter manducant , & inde saturantur juxta illud Ps. 21. *Edent pauperes , & saturabuntur* , interprete S. Augustino. Ideo autem iusti dicuntur pauperes , quia Dominum requirunt , terrenis despectis : saturantur , quia Christum Dominum imitantur , passionibus ejus communicantes ; saturitas eorum fides & justitia , eructatio laus Dei : vivent corda eorum in sæculum sæculi , qui enim manducat hunc panem , vivet in æternum. Ita ferè S. Augustinus in hunc locum.

Quod autem objiciunt adversarii ex Serm. Sancti Augustini ad infantes , efficacius in ipsosmet retorquetur : ex ipsis quippe S. Augustinus catechesim instituit , ut infantes præparet ad sacram Cœnam , debuitque propterea explicare , quæ sunt præcipua in hoc mysterio , sine quibus non annumeraretur inter Sacramenta novæ Legis , nempe quòd sit signum carnis Christi pro nobis assumptæ , & crucifixæ , contineatque virtutem substantialem ejusdem carnis : atqui S. Doctor illa præcipua prætermittit , docetque , ideo panem dici corpus Christi , quia est signum societatis fidelium : ergo in ejus mente Eucharistia ne quidem est signum corporis Christi , ex Maria Virgine nati , neque continet virtutem ejus substantialem. Ergo ulterius concludet Socinianus , non est Sacramentum , cùm instituta non sit ad significandam promissionem gratiæ fide apprehendendam. Viderint Cal-

Calvinistæ, quomodo se expediant ex his vinculis, in quæ imprudenter se conjecerunt, asserendo, Sanctum Augustinum eo loci docere, infantes quidquid posse & credere debeant de Eucharistia. Nos interim respondemus Sanctum Doctorem alloqui infantes jam probatos & admissos ad sacram Mensam, ac proinde edoctos quæcumque pertinent ad naturam & proprietatem hujus Sacramenti, sed documenta quædam moralia ipsis tradere desumpta ex aliquali significatione hujus mysterii; quod ut intelligas,

Advertes Eucharistiam esse signum tum rememorativum rei præteritæ, scilicet Passionis Christi, ejus humilitatis, obedientiæ & charitatis erga homines: tum prognosticum rei futuræ, puta beatitudinis æternæ: tum demonstrativum rei præsentis, nimirum præsentia realis, gratiæ sanctificantis, unionis, quam inter se habere debent fideles, tanquam membra corporis Christi mystici, *unus panis, unum corpus multi sumus omnes, qui de uno pane participamus*, 1. Corinth. 10. Porro monuimus jam familiare fuisse, atque etiam nunc esse Pastoribus Ecclesiæ unam aut alteram ex his significationibus moraliter prosequi ad informandos mores audientium. Legatur sermo qui objicitur, & perspicuum erit eum non habere rationem catecheseos, utpote qui moralia quædam documenta solum contineat.

Hic diutiùs immorari oportuit, tum ut palam fieret Sanctum Augustinum expresse & constanter docuisse præsentiam realem, Novatoresque ejus scriptis abuti ad suum errorem confirmandum: tum ut veluti clavem ministraremus ad aperienda, quæ clausa utcunque occurrunt in operibus aliorum

aliorum Patrum; quæcunque enim apud eos difficulta sparsim leguntur, ea ferè omnia in scriptis Sancti Augustini collecta reperiuntur. Quare quæ per ordinem hic digessimus, accurratè sunt observanda & retinenda.

Dices 2. Nomina illa, *cibus*, *panis*, in contextu ejusdem orationis usurpata debent eodem sensu proferri, aliàs deciperentur auditores: atqui nomina illa ex concessis in secunda parte cit. cap. 6. dicuntur de fide Incarnationis: ergo & in tertia.

Confirmatur. Si quid cogeret interpretari alio sensu laudata verba in 3. parte capitis 6. maximè, quia ibi conjunguntur cum verbo futuri temporis, *panis*, *quem ego dabo*, quod innuit Christum promittere alium panem ab eo, quem offerebat præsentem in 1. parte capitis: atqui hæc ratio nulla est: tum quia panis etiam conjungitur in 2. parte cum verbo futuri temporis: *operamini . . . cibum . . . quem Filius hominis dabit vobis*: tum quia in 3. parte dicitur in præsentem tempore, *caro . . . mea verè est cibus . . . qui manducat hunc panem, vivet in æternum*: atqui non erat tunc cibus Eucharisticus & sacramentalis: ergo erat cibus objectivè, quatenus erat objectum fidei, quam commendabat Christus Dominus, quo sensu seipsum dicit in 2. parte capitis, panem vivum, qui de cœlo descendit. Tum denique, quia Dominus ipse in 3. parte amputat omnem cogitationem carnalem à mentibus auditorum. *Caro*, inquit, *non prodest quidquam; verba, quæ locutus sum vobis, spiritus & vita sunt*. Id est, rem spiritalem significant, nempe fidem in ipsum.

Distinguo majorem, nisi qui loquitur certis signis indicet se illa nomina ad alium sensum trans-

ferre , Concedo : secus , Nego maj. Adversarii enim coguntur fateri panem duplici sensu accipi in hoc Christi sermone sed tertium sensum , quem crassiores Capharnaitæ deprehenderunt , agnoscere detrectant. Panis itaque & cibus hîc tripliciter sumuntur.

Dicuntur 1. de pane materiali , quem Dominus multiplicaverat ad quinque hominum millia reficienda. Cùm autem propter hujusmodi panem Christum quærerent , ipse pro more mentes illorum ad sublimiorem panem erigit ; quemadmodum mulierem Samaritanam , cum qua loquebatur de aqua ex puteo haurienda , excitat ad quærendam fidem nomine aquæ designatam , Joan. cap. 4. Et Marthæ loquenti de vita temporali & actuali , respondet de vita æterna & spiritali , Joan. cap. 21. Sic in hoc serm. Capharnaites panem materiale quærentibus , proponit panem spiritualem , nempe seipsum per fidem apprehendendum , *operamini* , inquit , *non cibum , qui perit , sed . . . quem Filius hominis dabit vobis : dabit ; inquam , si in eum credatis , id est , gustabitis quàm sit suavis panis ille vivus , qui de cœlo descendit ; alloquitur enim non credentes , qui defectu fidei , cœlesti illo pane , licèt præfente , nondum fruebantur. Nomina ergo illa , panis , cibus , hîc secundam habent significationem , quam Capharnaitæ facile perceperunt , nec quidquam in hoc sermone durum senserunt , nisi ubi Christus dixit se de cœlo descendisse , nonne , inquit , hic est Jesus filius Joseph ? quomodo ergo dicit hic , quia de cœlo descendi ? Ad credendum verò ipsum esse panem vivum , majora solùm exigebant miracula , quod ergo , inquit , tu facis signum , ut videamus , & creda-*

credamus tibi? Patres nostri manducaverunt manna in deserto, nihil majus fecisti multiplicans quinque panes. Christus, exposita necessitate gratiæ ad credendum, quòd sit panis vivus per fidem percipiendus, transit ad præstantiorem modum sumendi illum panem, jamque in tertia significatione nomina illa, *panis, cibus*, accipit, nempe pro Sacramento, quod erat instituturus, *panis*, inquit, *quem ego dabo, caro mea est pro mundi vita.* Hoc non dicitur iis, qui non credunt, sed omnibus credentibus: quamvis enim per fidem jam habeant panem vivum, qui de cælo descendit, nondum tamen per Sacramentum illum possident, sed eis promittitur. Nec refert, quòd addat: *caro . . . mea verè est cibus*, non verò, erit cibus; nam semel demonstrata re futura, solent homines deinceps loqui de ea quasi esset præsens, beneficium, inquirunt; tibi conferam, quod est pretiosissimum; sic Christus ubi dixit Joan. 17. electos sibi datos à Patre, ut det eis vitam æternam, quod sanè futurum est, de ea subdit, *hæc est autem vita æterna, ut cognoscant te, &c.* Porro iste sensus verborum Christi ita est naturalis, & obvius fuit Capharnaitis, ut ea intellexerint de carne, non per fidem apprehendenda, sed revera manducanda. Hinc eorum murmur; *quomodo potest hic nobis carnem suam dare ad manducandum?* Supra dicente Domino, *ego sum panis vivus*, responderunt, *quod facis signum, ut . . . credamus tibi?* intelligebant enim illa dici de fide. Hic verò, *quomodo potest hic nobis carnem suam dare ad manducandum?* errarunt quidem existimantes carnem Christi dentibus comminuendam, quam carnalem cogitationem amputat his verbis, *caro non prodest quidquam;*

verba quæ locutus sum vobis, spiritus & vita sunt, id est, caro mortua, & à Verbo separata, nihil prodest; verba quæ locutus sum, intelligenda sunt de manducatione sacramentali & spirituali. Sed ne videamus nostra proferre, audiat S. August. tract. 27. in hunc locum, ubi sic loquitur: O Domine! Magister bone, quomodo caro non prodest quidquam, cum tu dixeris, nisi quis manducaverit carnem meam, non habebit vitam æternam. . . . caro non prodest quidquam, quomodo illi intellexerunt carnem; quippe sic intellexerunt, quomodo in cadavere dilaniatur, aut in macello venditur, non quomodo spiritu vegetatur. Proinde sic dictum est, caro non prodest quidquam, quomodo dictum est, scientia inflat. Jam ergo debemus odisse scientiam? absit. Et quid est, scientia inflat? sola sine charitate, ideo adjunxit, charitas ædificat. Adde ergo scientiæ charitatem, & utilis erit scientia; non per se, sed per charitatem. Sic etiam nunc caro non prodest quidquam, sed sola caro: accedat spiritus ad carnem, & prodest plurimum. Nam si caro nihil prodesset, Verbum caro non fieret. Et ita corruunt, quæ profert Aubertinus ad confirmandam objectionem.

Confirmatur nostra responsio. 1. Si Christus Dominus nullatenus de Sacramento Eucharistiæ locutus fuisset, amota jam cogitatione Capharnaitarum, Discipuli nihil in ejus verbis explicatis ad mentem Novatorum deprehendissent, quod offendere debuisset; verba enim sic explicata aliud non continent, quàm quod ab initio crediderant, nempe Christum descendisse de cælo, ut per fidem det vitam spiritualem mundo, quomodo panis materialis dat vitam corporalem. Ex hoc tamen, inquit Sacer Textus, multi discipulorum ejus abierunt retrò, & jam non cum illo ambulabant. 2. S. Joannes Evan-

Evangelista nihil de Sacramento Eucharistiæ scripsisset. Nec opponant adversarii auctoritatem Sancti Hieronymi monentis, S. Evangelistam solummodo suscepisse narranda, quæ ab aliis Evangelistis fuerant prætermissa; namque ab aliis relata ipse repetit, quoties circumstantias quasdam ab illis omittas recensendas sibi proponit. Sic de Baptismo Joannis non filet cap. 1. quamvis de illo scripsissent alii Evangelistæ, quia de Sancto Præcuratore multa alia scripturus est. Similiter cap. 6. iterum attingit miraculum, quo satiati sunt quinque millia hominum, quia fuit occasio sermonis, quem Christus Dominus habuit ad Capharnaitas. Et cap. 12. ubi multorum meminit, quæ ab aliis fuerant omissa, inserit ea, quæ ipsi retulerunt, v.g. de effusione unguenti, & de solemni ingressu Christi Domini in urbem Jerusalem; illa enim sic inter se connexa videbantur, ut unum sine alio describi non posset. Cum igitur cap. 13. Sanctus Evangelista narret, quo ordine Christus ultimam cœnam instituerit, quomodo ad eam Apostolos præparaverit per pedum lotionem, de qua nihil apud alios Evangelistas, ratio instituti exigebat ut aliquid de Eucharistia scriberet, maximè cum præmisset initio capitis Christum meditatum fuisse opus eximiæ virtutis & potentiæ, *sciens*, inquit, *quia omnia dedit ei Pater in manus . . . surgit à cœna*: tum describit quomodo laverit pedes, & nihil prætereà, in quo eluceat omnipotentia, de qua tam magnificè fuerat prælocutus. Quid ita, nisi quia jam de hoc mysterio fusè scripserat c. 6. Denique cum laudata verba, *sciens quia omnia dedit ei Pater in manus*, sicut & ista, *in finem dilexit eos*, referantur ad Sacramentum Eucharistiæ, cogunt

nos intelligere in eo singulare miraculum, & signum eximii amoris; porro nihil esset singulare, si nonnisi figuram corporis contineret, aut ad summum, virtutem quandam ejusdem corporis. Nonne corpora cœlestia virtutem suam naturaliter usque ad terram diffundunt? Nonne Judæi, saltem religiosiores, per fidem manducaverunt & biberunt carnem & sanguinem Christi, quem manna & petra figurabant? Hic tamen longè præstantior cibus & potus promittitur.

CAPUT XI.

Utrùm præsentia realis probetur ex verbis institutionis, *Hoc est Corpus meum?*

R. Probatur efficaciter; quia Scripturæ verba naturali, proprio, & obvio sensu debent intelligi, quando nihil continent, quod repugnet aut bonis moribus, aut fidei, & aliis ejusdem Scripturæ verbis clarioribus: atqui laudata verba, *Hoc est Corpus meum, hic est Sanguis meus*; nihil continent, quod repugnet aut bonis moribus, aut fidei, & aliis Scripturæ verbis clarioribus: ergo debent intelligi naturali, proprio, & obvio sensu.

Major, quam S. August. lib. 3. de doctrina Christiana c. 1. tradit veluti regulam certissimam ad interpretandas sacras scripturas, probatur; quia cum verba sint instituta ad significandum aliquid determinatè, v. g. *homo*, ad significandum animal rationale, dubitandum non est, quin Spiritus sanctus ea usurpaverit in illo sensu, quem habent
ex

ex hominum instituto; aliàs Scripturæ essent exaratae, non ad docendum, sed ad decipiendum, quod est blasphemia. Deinde si relicto naturali verborum sensu, omnia ad tropos & metaphoras transferre liceret, omnia fidei dogmata, & divina præcepta convellerentur; una siquidem posset esse omnium responsio, metaphora est: v. g. ubi dicitur, *Verbum caro factum est*, significatur Deum ab adventu Christi specialem curam rerum humanarum gerere; item, *Deus spiritus est*, id est, corpus subtile, quemadmodum aer dicitur spiritus; item *baptizantes eos*, &c. sensus est, subijcientes fidei, quæ conscientias lavat, & ita de cæteris.

Metaphoras quidem nonnunquam homines intexerunt in suis sermonibus: sed præterquam quodd raræ sunt, facile intelliguntur, vel ex usu recepto, vel ex modo loquendi, vel ex antecedentibus & consequentibus: sic fert hominum usus, ut continens nominetur pro contento, homo depictus pro ejus imagine: v. g. dicatur vas effundi, *hic est calix qui pro vobis fundetur*, Luc. 22. hic est Cæsar, demonstrata ejus imagine. Similiter in ironia nullum est mendacium, nullusve decipitur; quia ex modo loquendi, stupidissimi intelligunt nec seriam, nec simplicem esse orationem. Ex contextu etiam sermonis figurata locutio percipitur, ut si quis describens victorias Alexandri magni, leonem eum diceret, ea ratione perspicuum fuit Apostolis Christum Dominum figuratè loqui, quando se dixit vitem veram, Joan. 15. id enim colligebant ex consequentibus, ubi eodem vocat palmites, & Patrem agricolam; sicut enim sentiebant se non esse propriè palmites, sic facile colligebant Christum non esse propriè vitem,

Denique si nullis indiciis possit deprehendi metaphora, qui loquitur solet mentem explicare: sic Christus Lucæ 12. *attendite à fermento Phariseorum*, subdit, *quod est hypocrisis*.

Dixi, nisi repugnet bonis moribus, aut fidei, quia cum impossibile sit Deum aliquid inhonesti præcipere, vel contradictoria loqui, ubi verba ejus flagitium, aut contradictionem præ se ferunt, necesse est ad sensum figuratum recurrere. Majore sic explicata,

Minor, nempe verba illa, *Hoc est corpus meum* in sensu naturali, proprio, & obvio nihil continere, quod repugnet bonis moribus, fidei, & aliis Scripturæ textibus, probatur,

1. Certum est voces illas, *Hoc est corpus meum*, propriè ex hominum instituto significare rem ipsam, quam demonstrant, nempe corpus Christi, quemadmodum hæ propositiones, *hic est Petrus*, *hoc est aurum*, significant verum hominem in individuo, verum aurum.

2. Nihil cogit aut determinat ad accipiendas prædictas voces in sensu metaphorico & improprio.

Non flagitium, aut facinus, si in proprio sensu intelligantur. Quale enim flagitium, si corpus Christi sacramentaliter, & modo spiritali accipiat cum reverentia & devotione, uti debet ad animæ sanctificationem? Nonne est opus religiosum & laudabile? An dicent adversarii flagitium aut facinus esse, quod Christus Dominus verus Deus & homo, supremo cultu dignus exponatur contumeliis? Hæc objectio utcunque toleranda esset in homine pagano, aut Sociniano, qui negat mysterium Incarnationis, quo admisso, ut admittunt adversarii, sequitur Christum
verum

verum Deum & hominem inclusum fuisse per novem menses in visceribus Virginis, fasciis infantilibus ligatum, furentibus Judæis expositum, ab eis crudeliter occisum, tandemque in sepulchro conditum. *Totum Dei mei penes vos dedecus*, inquit Tertullianus lib. 2. contra Marcionem c. 27. *Sacramentum est humanæ salutis . . . illa quidem Deo indigna, homini autem necessaria, & ita jam Deo digna, quia nihil tam dignum Deo, quam hominis salus.*

Non repugnant fidei, aut aliis Scripturæ textibus. Nullum hætenus Novatores protulere, nec proferent contrarium, in quo Scriptura, vel clarius, vel æquè clarè neget, quod affirmat his propositionibus, *Hoc est corpus meum, hic est sanguis meus.* Quinimò, quod S. Matthæus primus retulit, illud ipsum iisdem verbis omnes alii Evangelistæ, & S. Paulus 1. ad Cor. 11. confirmarunt, & quidem variis in regionibus, & diversis temporibus; nunquam monuerunt fideles ad sacram Mensam accedentes, nomine corporis Christi, ejus figuram aut virtutem esse intelligendam, sed constanter docuerunt, spirituales cibum, qui eis administrabatur, esse corpus Christi. Quin exigebatur ab eis illud responsum, *Amen*, quæ consuetudo pluribus sæculis in Ecclesia permansit. Quæro jam ab Adversariis, utrùm metaphora possit esse continua, non solum apud eundem Scriptorem sacrum, sed apud omnes, quamvis scripserint diversis temporibus, & variis occasionibus, quæ sæpius exigunt, ut mutetur modus loquendi? Quis possit cogitare, vel audeat dicere Scriptores sacros nunquam Eucharistiam proprio nomine appellasse, scilicet figuram corporis Christi, licèt de ea sæpius sermonem habuerint,

sed constantes usos verbis metaphoricis? Non ausus est ipse Lutherus, quamvis supra testatus sit se ardentem id exoptasse.

Non ex communi usu loquendi hominum colligitur sensus figuratus, quemadmodum imago v. g. Regis, aut Christi Domini in cruce pendentis dicitur Rex, aut Crucifixus, juxta illud S. Augustini, *signa rerum, quas significant, nomina accipiunt*. Namque panis nec naturaliter nec ex instituto hætenus fuerat signum, aut imago corporis Christi, ut eo demonstrato posset dici, *Hoc est corpus meum*. Ut staret ergo adversariorum interpretatio, Christus debuisset prius monere Discipulos, se daturum panem in signum corporis sui, ut hoc signo jam instituto, de eo posset dicere, hoc est corpus meum; sicut Dominus, præmonitis Judæis cap. 12. Exodi, sanguinem agni fore eis signum, quando pertransiret percutiens primogenitos Ægyptiorum, dixit, *est enim phase, id est transitus Domini*.

Non denique ex modo loquendi, nempe ex contextu sermonis colligitur figurata locutio; quinimò illa ipsa proprietatem sensus determinant. 1. Christus jam jam moriturus, Discipulos uti amicos & filios alloquitur. Quis autem magister, sive pater discipulis aut filiis ultimum vale dicat, & intima cordis sui explicet verbis figuratis & metaphoricis? 2. Legem sancit præcipuam, sine qua vitam æternam non habebunt, testamentum condit, in quo expandit amoris sui divitias secundum plenitudinem potestatis à Patre acceptæ, *cum dilexisset suos, qui erant in mundo*, inquit Joan. Evangelista cap. 13. *in finem dilexit eos . . . sciens quia omnia dedit ei Pater in manus . . . surgit à cæna,*

cæna, &c. Notanda sunt illa magnifica verba, quæ innuunt Dominum dedisse Apostolis eximium & singulare amoris sui pignus, & ad illud exhibendum opus ei fuisse omnipotentia divina. In cujus autem mentem veniet ista præparare Discipulos ad accipiendam meram figuram corporis, ut vult Zwinglius; aut ad summum virtutem quandam ejusdem corporis, ut fingit Calvinus; cum hujus rei figuras nobiliores habuerint Judæi, nec ad id præstandum extraordinaria omnipotentia requiratur, ut suadet exemplum corporum cælestium, quæ naturaliter virtutem suam ad terras diffundunt? Quis verò tam imprudens legem suam concipit verbis metaphoricis, ut eam subditi ad libitum interpretentur, & negligent? Quis pater in testamento suo, tam figuratè & ænigmaticè loquitur, ut legatarii decipiantur, & pro prædiis & domibus legatis figuram tantum accipiant? non tam impiè Apostoli, & eorum successores de Legislatore sapientissimo, & de Patre optimo judicarunt, ut patebit ex capite sequenti.

Objiciunt tamen Novatores levia quædam. Primum, sæpius in Scripturis verbum substantivum, *est*, sumitur pro verbo, *significat*, ut Exodi cap. 12. *est enim phase, id est, transitus Domini*. Joan. 15. *Ego sum vitis vera*. Matth. 11. de Joanne Baptista, ait Dominus, *ipse est Elias*; Ergo & in hac propositione, *hoc est corpus meum*; ponitur, *est*, pro *significat*, quod ipse Dominus declaravit Joan. 6. ubi sic Apostolos allocutus est, *caro non prodest quidquam, verba quæ locutus sum vobis, Spiritus & vita sunt*. Secundum Christus expressè monuit Apostolos, Joan. 12. se secundum humani-

tatem

tatem non remansurum in terris, *pauperes*, inquit, *semper habebitis vobiscum*, *me autem non semper habebitis*. Tertium, tractans de Sacramento Eucharistiæ, sic habet, *hoc facite in meam commemorationem*; commemoratio autem non est rei præsentis, sed absentis. Quartum, Actuum 3. v. 21. dicitur de Christo, *quem oportet cælum recipere usque in tempora restitutionis omnium*: ergo non est quærendus in terra; licet enim nobis eodem argumento uti, quo Angelus ad mulieres quærentes corpus Jesu in sepulchro, *surrexit*, inquit, *non est hic*. Si autem corpus Christi posset esse simul in diversis locis, vana fuisset Angeli consequentia, quod cum nefas sit dicere, simili argumento concludimus: Christus in cælum levavit corpus suum: ergo non est in terra. Quintum, Christus post resurrectionem noluit in terris manibus tangi, sed solum per fidem in cælo apprehendi, *Noli me tangere*, inquit ad Magdalenam, *nondum enim ad Patrem ascendi*, Joan. 20. Sextum, tres Evangelistæ expressè nos monent, ne credamus dicentibus Papistis, Ecce illic est Christus, in domibus, in penetralibus, Matth. 24. Marci 14. & Lucæ 21. Septimum, ne Apostoli ad literam acciperent, quod Christus dixerat, *hic est sanguis meus*, subdidit: *non bibam amodo de hoc genimine vitis, usque in diem illum, cum illud bibam vobiscum novum in regno Patris mei*, Matth. 26.

Calix ergo est genimen vitis, nec post tam clara verba aliud Apostoli cogitare potuerunt. Præterea quod Dominus eis bibendum dedit, illud ipsum erat, quod ipse post resurrectionem quam vocat regnum Dei, bibiturus erat novum, id est, novo modo; qui jam non ex infirmitate,
& ad

& ad reparandas corporis vires : atqui post Resurrectionem non bibit suum proprium sanguinem, sed merum vinum, cum Eucharistiam non celebraverit : Ergo non dedit Apostolis, nisi vinum bibendum. Hi fuerunt vani prætextus scindendi Ecclesiam & avellendi populos à suis Pastoribus.

Respondeo sigillatim.

Ad primum, fallacia est crassissima & ridicula, qualem videre est in hoc syllogismo similiter vitioso : multa animalia sunt asini : atqui Petrus est animal : Ergo Petrus est asinus. Ideo enim peccat ille syllogismus, quia præmissæ sunt particulares, ex quibus nihil potest concludi. Porro tales sunt propositiones hujus syllogismi Zwingliani ; multæ sunt Scripturæ propositiones, in quibus, *est*, ponitur pro, *significat*, qualis est ista, *phase est transitus Domini* ; atqui verba illa, *hoc est corpus meum*, sunt Scripturæ propositio : Ergo in illis, *est* ponitur pro, *significat* : Hæc ratiocinii fallacia Zwinglium persuasit, ut supra testatus est, commovitque ad horrenda sacrilegia patranda, seditiones excitandas, ex quibus innumeræ cædes sunt secutæ. Quod verò addunt in confirmationem præclari illius ratiocinii, *caro non prodest quidquam*, capite præcedenti exposuit Sanctus Augustinus.

Ad secundum, non dixit Christus se omni modo abfuturum : futurus enim erat præsens, saltem præsentia majestatis, juxta illud Matth. 28. *ecce ego vobiscum sum usque ad consummationem sæculi* : itaque modo quodam, scilicet visibili, me semper non habebitis, ut hæc pietatis officia mihi exhibere possitis. Quæro enim ab adversariis, an
non

non vera esset adhuc illa Christi propositio, me semper non habebitis, in hypothesi, quòd post Resurrectionem in cœlum non ascendisset, sed in terris jam immortalis, & ut plurimum invisibilis remansisset? Propter hunc novum existendi modum, quem habuit à mortuis suscitatus, sic affatus est Apostolos Luc. 24. *hæc locutus sum vobis, cum essem vobiscum*, quasi jam ipsum non haberent.

Instabis, Sanctus Augustinus in hunc locum sic scribit, *Secundum (carnem) ascendit in cœlum: & non est hic: ibi sedet ad dextram Patris . . . & hic est, non enim recessit præsentia majestatis . . . Habuit illum Ecclesia secundum præsentiam carnis paucis diebus: modo fide tenet, oculis non videt.* Ergo, inquit Aubertinus, Sanctus Augustinus non agnovit præsentiam carnis realem in Sacramento, etiam invisibilem, aliàs sicut confitetur invisibilem majestatis præsentiam, sic & humanitatis invisibilem præsentiam non diffiteretur.

Nego conseq. Nunquid enim Pastores Ecclesiæ Romanæ negant Christi præsentiam realem in Sacramento, quia in Catechesibus quotidie docent Christum per ascensionem à nobis recessisse secundum præsentiam corporalem, nobiscum verò permanere secundum divinitatem? Hæc & similia dicuntur, quia divinitas hic adest suo conaturali modo ubique operans, preces nostras audiens, interiùs nos admonens, & multifariam gubernans; sicque homines præsertim justi fruuntur ejus præsentia; quod de humanitate Christi dici nequit; licèt enim in Sacramento realiter existat, tamen nobiscum non versatur, oculis eam non videt Ecclesia, sed tantùm fide tenet, præsentiam ejus non experimur, non eam alloquimur,

quimur, non respondet, non sensibilibiter operatur, sed Deus merito illius multa nobis beneficia præstat.

Ad tertium, distingo: commemoratio non est rei præsentis, tum menti, tum sensibus, Concedo: præsentis tantum menti, Nego. Nam licet Deus sit ubique præsens, attamen iusti memores illius esse dicuntur, *memor fuit Domini in toto corde suo*, cap. 1. Tobiae. Et cap. 14. vers. 8. *ut sint memores Dei, & benedicant eum omni tempore.*

Ad quartum, credit Ecclesia Romana non esse impossibile apud Deum omne verbum: verbum autem Dei est, *ascendo ad Patrem meum*, item *hoc est corpus meum*: utrumque credunt Catholici: Valeant ergo Novatores, qui, ut excusent præsumptam à se Ecclesiæ reformationem, magna cum ambitione profitentur se Scripturam sequi verbo ad verbum, cum eam temere rejiciant, & ejus loco propriæ mentis fœtum, tanquam fidei argumentum substituant. Scriptum est, inquit *oportet eum cælum recipere*. Hoc credunt omnes, nulla hîc controversia. Sed & scriptum est, *hoc est corpus meum*; illud ergo nobiscum credite. Absit, reponunt illi, hæc propositio ad literam credibilis non est. Quid ita? quia impossibile est idem corpus esse simul in diversis locis, & ex eo quod scriptum sit, *oportet eum cælum recipere*, rectè colligimus eum non esse substantialiter in Eucharistia. Hæc est fides vestra? Ergo fides vestra verbo Dei non nititur, sed verbo hominum; Deus enim non dixit, sed vos ipsi dicitis, Christus non est substantialiter præsens in Eucharistia. Ubi magnifica illa verba Apostoli vestri supra relata? *meminerimus*, ajebat supra Calvinus lib.

lib. 4. Institut. c. 32. §. 10. *quantum supra sensus omnes nostros emineat Spiritus Sancti virtus, & quam stultum sit ejus immensitatem modo nostro velle metiri. Quod ergo mens nostra non comprehendit, concipiat fides.* Jam ad ingenii vestri angustias totum redigitis, ut negetis Deum posse, quod vobis impossibile videtur. Probanda est ergo Socinianorum interpretandi ratio, quibus figuratæ & metaphoricæ sunt hæ propositiones: *Verbum caro factum est, Ego & Pater unum sumus*; quia impossibile est tres personas realiter distinctas, esse unum realiter & idem in natura.

At, inquiunt Calvinistæ, non nos, sed Sanctus Augustinus docet & inculcat impossibile unum corpus esse simul in cælo & in terra, *sursum est Dominus*, inquit, tract. 30. in Joan. *sed etiam hic est veritas Dominus: Corpus enim Domini, in quo enim resurrexit, uno loco esse oportet; veritas autem ejus ubique diffusa est.* Lib. 2. contra Faustum cap. 11. probat Christum secundum præsentiam corporalem simul & in Sole & in Luna, & in Cruce esse non potuisse. Et libro contra epist. Manich. cap. 16. sic scribit: *Nec omnino potest esse aliquod corpus, sive cæleste, sive terrestre, quod non minus sit in parte, quam in toto... sed aliud hic & aliud ibi, per quelibet spatia locorum distantia distenditur... tolle spatia locorum corporibus, & nusquam erunt; & quia nusquam erunt, nec erunt.*

R. 1. Fides nostra non nititur auctoritate Sancti Augustini, sed verbo Dei, nec ullius est ponderis auctoritas cujusquam hominis, si sit contraria sacre Scripturæ. Absit autem, ut tam infauſta de tanto Doctore maximè hic suspicemur; cum tam clarè de præsentia reali scripserit. Conſule,

fule, quæ ex ejus operibus exscripsimus capite præcedenti. Restat ergo, ut secundum regulam ab ipso traditam, obscurius dicta per clariora explicentur, ne contradictoria scripsisse videatur; itaque

R. 2. Distinguendo, Corpus Domini in uno loco esse oportet, naturaliter, Conc. Quo sensu intelligendus est Angelus ad mulieres, *surrexit, non est hic*, in hypothesi tamen, quod ratio-cinetur, ut supponunt Adversarii; nam simpliciter mysterium exponit, non est hic jacens in sepulchro mortuus, sed surrexit: in uno loco esse oportet supernaturaliter, Nego. Et quidem ad mentem sancti Doctoris; nam cit. tract. 3. in Joan. ostendit hoc esse discrimen inter veritatem, & corpus, quod veritas, quæ Dominus est, exigat ubique diffundi; corpus verò non item. Similiter lib. 20. contra Faustum, confutat Manichæorum deliria; docebant enim illi Jesum esse ligatum in Sole, Luna, arboribus, & aliis corporibus, probatque modum illum existendi in pluribus locis, esse contra naturam corporum, utrùm autem id supernaturaliter fieri possit, non expendit. Potest tamen colligi ex ejus verbis Deo non esse impossibile; nam de spiritu subdit ipsum in cruce pati non potuisse, cum tamen in ejus sententia spiritus reproborum per ignem materialem supernaturali virtute torqueantur. Ex quibus liquet sanctum Doctorem loqui de rebus secundum ordinem naturalem spectatis; maxime cum capite 17. libro de Cura pro mortuis, dubitet num spiritus cujusdam Monachi, qui manens in suo Monasterio, apparuit in somniis alteri longè posito, in duobus locis simul extiterit.

Simile dubium proponit de anima Martyris, quæ in diversis locis miracula operatur, num scilicet, ibi adsit realiter præsens; nulla esset quæstio, si hoc crederet etiam divinitus impossibile.

Confirmatur hæc responsio, tum ex Scriptura 1. Corinth. 15. Christus in cælo existens visus est Sancto Paulo: *Novissime autem omnium*, inquit, *tanquam abortivo visus est & mihi*. Et capite 9. *non sum Apostolus? nonne Christum Jesum Dominum nostrum vidi?* Porro hæc visio non fuit in imagine solum, aut per phantasma; cum per eam probet veritatem resurrectionis. Tum ex Patribus capite sequenti laudandis, qui de Eucharistia tractantes, agnoscunt insigne miraculum, & opus singulare omnipotentiae divinæ, quod Christus eodem tempore sit in cælo & in terra.

Dices: Contradictoria sunt absolute impossibilia; nec possunt esse objectum omnipotentiae divinæ: atqui contradictorium est idem corpus esse simul in diversis locis, quia esset à seipso divisum, & non esset; idem acciperet esse, & non acciperet. Illa enim sunt divisa, inter quæ medium existit, medium autem existeret inter corpus Christi existens in cælo, & corpus Christi existens in Eucharistia, & tamen supponitur unum & idem corpus. Item corpus Christi produceretur per verba consecrationis: ergo transiret à non esse ad esse, sicque esse acciperet, quod supponitur jam habere. Similiter contradictionem involvit corpus Christi esse sine quantitate & extensione; corpus enim humanum, nisi organicum sit, jam non est corpus, sed massa informis: organicum autem esse non potest, sine aliqua extensione: Ergo.

Respon-

Respondeo distinguendo majorem, quæ verè contradictoria sunt, Conc. Quæ talia apparent propter tenuitatem humanæ rationis, quæ non potest objecta supernaturalia attingere, Nego major. Similiter distinguo minorem, & Nego conseq. Enimverò quæ oculorum aciem fugiunt, tanquam caligine circumfusa cernuntur, sed errorem sensus corrigit ratio; sic quæ humani ingenii acumen superant, ea statim repugnare videntur; at fides verbo Dei innixa, intellectum roborat, erigitque ad credendum non esse impossibile Deo omne verbum; alioquin quomodo ipsi Novatores mysteria SS. Trinitatis & Incarnationis vindicarent contra inanes impossibilitatis causas, quas Sociniani objiciunt?

Cæterum Philosophorum Scholæ multis ostendunt contradictorium non esse, i. rem eandem existere absque sui divisione in diversis locis; namque anima rationalis existit tota in toto corpore, & in qualibet parte corporis, nec censetur divisa, licet medium intercedat inter caput, in quo est tota, & pedes, in quibus etiam tota existit. Deinde si pes aut caput præscinderetur, quidni Deus per omnipotentiam suam conservaret animam tum in parte præcisa, tum in reliquo corpore? An Deus à seipso divideretur in hypothese, quod crearet alium mundum, in quo præsens adesset sicut in isto? Divisio enim est inter partes realiter distinctas. Cum autem hic supponatur eadem substantia in diversis locis, non ipsa, sed loca dividuntur. 2. Si secundum fidei nostræ articulum idem corpus potest reproduci diversis temporibus, nempe dum resurget immortale; quidni & in diversis locis? Nonne in conserva-

tione, quæ est ejusdem rei jam existentis continuata productio, intelligitur quædam reproductio? Cum primum res producitur, transit à non esse simpliciter ad esse simpliciter; cum verò secundum transit à non esse secundum quid, ad esse secundum quid; hoc est, accipit novum essendi modum, v. g. in hoc loco, hoc tempore, quem ante non habebat.

3. Philosophi etiam secundum suas diversas opiniones circa quantitatem, & alia accidentia, explicant quomodo corpus organicum possit divinitus reddi indivisibile, qui essentiam quantitatis reponunt in impenetrabili radicali, seu in exigentia, ut partes sese expellant ab eodem loco, efficiantque materiam actu extensam, docent corpus in punctum redactum remanere organicum, retinereque suam quantitatem, qua partes ordinatæ sunt respectu sui, non respectu loci. Item, secundum eos, essentia accidentis consistit in exigentia ad inhærendum & informandum subiectum; unde illa exigentia ne divinitus quidem potest separari ab accidente; sed actu inhærere, aut informare, est effectus tantum secundarius, sine quo Deus potest conservare accidens.

Philosophi vero moderni, qui contendunt nec extensionem externam, nec alia accidentia realiter distingui à materia, dicunt 1. corpus Christi in Eucharistia non esse sine aliqua extensione, quæ tamen ita est exigua & parva, ut ipsum corpus nec dividi, nec frangi possit, cum dividuntur aut franguntur species, ratione quarum figuratè dicitur corpus Christi frangi, aut dividi. An verò difficilius est Deo corpus humanum ita redigere, quàm camelum per foramen acus transmittere, Matth. 10. v. 26.? 2. Fracta hostia corpus

pus Christi sub qualibet parte specierum existere, ut expresse definit Concilium Trid. sess. 13. can. 3. quemadmodum fracto speculo imago, quæ una ante repræsentabatur, jam multiplex apparet, sed utrum ante separationem sit totum in qualibet parte hostiæ, Concilium non explicat. 3. in Eucharistia remanere quidem species, seu apparentiam panis & vini, ut docent Tridentini Patres cit. sess. 13. quantitatem verò, & alia accidentia minime, utpote quæ non distinguantur à substantia panis & vini, quæ non superest. Quid autem sint illæ species, sive illa apparentia, nec attingunt laudati Patres, nec eodem modo explicant illi Philosophi; sed in eo conveniunt omnes, mysterium Eucharistiæ manifestam non includere contradictionem. Unum hic monemus circa tam varios Philosophorum opinandi modos, in hac materia, scilicet omnem opinionem à Scholis Philosophicis esse eliminandam, nisi conciliari possit cum doctrina Ecclesiæ; quod enim veritati repugnat, illud est necessario falsum. Imo Christianus Philosophus illam sententiam præferet, quæ ad ornatum Sanctuarii subserviat, & mysteria Religionis nostræ felicius explicet.

Ad quintum; cum locus ille fatis sit obscurus, diversimodè exponitur: alii, ut S. Augustinus & S. Thomas, existimant hæc verba, *noli me tangere*, esse Christi increpantis Magdalenam ob fidei defectum, quasi dixerit, nolo me tangas, cum me Patre minorem credas, necdum in mente tua ad æqualitatem Patris ascenderim: alii magis ad literam, ut videtur, sic explicant: noli hic immorari, sed vade ad Discipulos, & nuntia, quæ vidisti, poteris postea me tangere & videre,

non enim statim ascendo ad Patrem. Sed inaudita est, & manifestè contraria verbo Dei Calvinistarum interpretatio, nam Christus ipse dixit Apostolis omnibus: *Videte & palpate*, Luc. 24. & speciatim S. Thomæ, *infer digitum tuum huc*, Joan. 20.

Ad sextum, hic subit mirari, qua audacia Calvinistæ sacris Scripturis abutantur; tam clare enim Christus loquitur de Pseudo-Prophetis, qui surgent novissimis diebus, ut verba ejus nullatenus ad Eucharistiam detorqueri possint: *Surgent*, inquit Matth. 24. *Pseudo-Christi & Pseudo-Prophetae, & dabunt signa magna & prodigia, ita ut in errorem inducantur, si fieri potest, etiam electi. Ecce prædixi vobis. Si ergo dixerint vobis, ecce in deserto est, nolite exire; ecce in penetralibus, nolite credere, &c.* Quid inde contra Eucharistiam concludi potest?

Ad septimum, 1. certum est Christum non consecrasse totum vinum in mensa appositum, sed partem ejus. Dubium autem est, utrum verba ejus, *non bibam de hoc genimine vitis*, cadant in Calicem Eucharisticum, an in communem. Posterius videtur colligi ex S. Luca cap. 22. Nam refert illa verba quasi dicta fuerint in cœna communi, & antequam instituta esset Cœna Eucharistica. Sed prius Adversariis concedamus, hæc dixerit Christus de Calice Eucharistico. Respondemus 2. Calix Eucharisticus dicitur vinum, seu genimen vitis, vel quia est ex vino in sanguinem Christi converso, quo sensu dicitur Matt. 11. *cæci vident, surdi audiunt*; vel quia habet speciem vini: vel denique quia est verus potus fidelium. Hoc sensu Ecclesia Romana etiam nunc in

in Officio publico, & Pastores in Pulpitis vocant Eucharistiam panem, vinum germinans virgines : *Ecce panis Angelorum, factus cibus viatorum, verè panis filiorum. Panis Angelicus fit panis hominum.* Adde hæc verba, *non bibam*, &c. secundum alios Interpretes esse referenda ad regnum cœlorum, in quo electi recumbent cum Abraham, Isaac, & Jacob, Matth. 8. Hunc sensum insinuant verba Sancti Lucæ, cap. 22. *donec impleatur in regno Dei, donec regnum Dei veniat*; sicque spiritualiter intelligendum, *non bibam ex hoc genimine vitis*; nam in regno cœlorum nec Christus, nec electi propriè bibunt.

CAPUT XII.

Utrum præsentia realis habeatur ex Traditione?

Aubertinus & Blondellus fatentur, præsentia realis dogma à septimo sæculo invaluisse, illiusque prima fundamenta jecisse Anastasium Sinaitam circa annum 636. Is audacior Claudius, non ita pridem pseudo-minister, contendit hujusce opinionis primum auctorem fuisse Paschasium Radbertum Corbejenfis Monasterii Abbatem, in libello, quem circa annum 831. edidit de corpore & sanguine Domini, aitque zizania erroris, ut ipsi videtur, ita excrevisse dormientibus Pastoribus decimi sæculi, quo tenebræ peccati & ignorantia, universam Ecclesiæ faciem occuparunt, ut Berengarius, qui Spiritus Sancti impulsu agrum Domini purgandum suscepit, tanquam Novator & Hæreticus fuerit proscriptus. Sed contra

R. Ecclesia universalis semper, & ubique præsentiam realem credidit & docuit, nullumque è mysteriis nostris isto clariùs elucet in Traditione.

Probatur ex sanctis Patribus.

S. Ignatius, qui senex Martyr Romæ occubuit anno 108. sic scribit epist. ad Smyrnæos: *Hæretici ab Eucharistia & Oratione abstinent; eo quòd non confiteantur, Eucharistiam carnem esse Salvatoris nostri Jesu Christi, quæ pro peccatis nostris passa est.* Hæc autem epistola est ex legitimis & genuinis: ergo tempore sancti Ignatii Ecclesia credebatur, Eucharistiam esse veram carnem.

S. Justinus, Apologia 2. quam scripsit circa annum 150. hæc habet: *Quemadmodum per verbum Dei homo factus Jesus Christus, Salvator noster, & carnem, & sanguinem, salutis nostræ causa habuit; ita etiam eam, in qua per preces verbi ejus ab ipso profecti gratiæ sunt actæ alimoniam incarnati illius Jesu carnem & sanguinem esse edocti sumus.* Hic non potest recurrere Claudii distinctio carnis & sanguinis in figura, aut in virtute; nam ex sancto Martyre eo modo per verba consecrationis Eucharistia sit caro & sanguis Christi, quo modo per Incarnationem Verbi Jesus Christus habuit carnem & sanguinem.

S. Irenæus Lugdunensis Episcopus & Martyr, Discipulus sancti Polycarpi, qui fuit auditor S. Joannis Evangelistæ, scripsit circa annum 180. lib. 4. cap. 32. *Panem, in quo gratiæ actæ sunt, corpus esse Domini, & calicem sanguinis ejus.* Et cap. 44. *Quemadmodum, inquit, qui est de terra panis, percipiens invocationem Dei, jam non communis panis est, sed Eucharistia, ex duabus rebus constans, terre-*

terrena, & cœlesti; sic & corpora nostra percipientia Eucharistiam, jam non sunt corruptibilia, spem resurrectionis habentia. Et paulò post de pane & vino, quæ percipientia verbum Dei, Eucharistia fiunt, quod est corpus & sanguis Christi.

Tertullianus, qui floruit secundo & tertio sæculo, sic habet libro de resurrectione carnis cap. 8. *Caro abluitur, ut anima emaculetur: caro ungitur, ut anima consecretur Caro corpore & sanguine Christi vescitur, ut & anima de Deo saginetur.* Ubi notandum 1. carnem vesci corpore Christi: Ergo non solum fide & spiritualiter accipitur corpus Christi, sed etiam ore & materialiter. 2. Eodem modo caro vescitur corpore Christi, quo abluitur & ungitur: atqui non abluitur nec ungitur in figura: ergo neque in figura vescitur. Et libro 4 contra Marcionem capite 40 probans Deum esse auctorem veteris Testamenti sicut & novi, ex eo quòd in posteriori adimpleverit figuras prioris, hæc verba Jeremiæ figurata, *mittamus lignum in panem ejus*, ostendit fuisse impleta, dum Christus Dominus panem fecit corpus suum, additque, quòd in verbis Jeremiæ figura non fuisset, si veritas non esset subsecuta: ergo in mente Tertulliani, Christus Dominus non figuram, sed veritatem corporis sui dedit, verba illius sunt: *Acceptum panem & distributum discipulis, corpus suum illum fecit, hoc est corpus meum, dicendo, id est, figura corporis mei. Figura autem non fuisset, nisi veritatis esset corpus.* Ubi Tertullianus nomen, *figura*, non ad corpus, sed ad panem refert, per figuram, quam hyperbaton vocant, quæque satis frequens est apud illum auctorem; namque cap. 19. libro contra Praxeam habet, *Christus mortuus est, id est, unctus.* Et lib. 4.

contra Marcionem cap. 11. *aperiam in parabolam aurem meam, id est, in similitudinem*; quodd autem Tertullianus utatur hyperbato in allato textu referatque nomen, *figura*, ad panem, evidens est, tum ex ejus instituto, tum ex verbo, *fuiſſet*, quod designat rem longè ante præteritam, nempe in veteri lege, in qua panis figura corporis Christi non fuiſſet, nisi post Christi verba, corporis ejus veritas nunc eſſet; ubi *fuiſſet*, & *eſſet*, denotant diverſa tempora; at verò idem tempus ſpectarent, ſi nomen illud, *figura*, in propositione referretur ad nomen immediatè præcedens, nempe ad *corpus*. S. Cyprianus Episcopus Carthagenenſis, & Martyr anno 258. tract. de lapsis, & epist. 63. diſertè agnoſcit in Eucharistia corpus & sanguinem Christi Domini.

S. Cyrillus creatus Episcopus Jerofolymitanus anno 356. ſic myſterium explicat recens baptizatis catech. 4. *Cum ipſe de pane pronuntiaverit, ac dixerit; hoc eſt corpus meum, quis audebit deinceps ambigere? Et cum idem tam aſſeveranter dixerit: hic eſt ſanguis meus; quis unquam dubitaverit, ut dicat non eſſe ejus ſanguinem?* Et allato exemplo aquæ in vinum converſæ in urbe Cana, ſubdit: *Cum omni certitudine ea tanquam corpus ipſius & ſanguinem ſumamus etiamſi guſtus panem eſſe ſentiat tametſi ſenſui guſtus vinum eſſe videatur cave autem, ne quid inde excidat tibi: quod enim amittes, hoc tanquam ex proprio membro amiſeris.* Hic deficiunt omnes diſtinctiones Aubertini & Claudii; nec enim Concilium Tridentinum & Catechiſmi noſtri clariùs loquuntur. S. Hilarius ejusdem ætatis teſtem produximus cap. 10. omni exceptione majorem.

Sanctus Gregorius Nyssenus, qui florit circa finem quarti sæculi, sic loquitur oratione catechetica cap. 37. *Recte Dei verbo sanctificatum panem in corpus Dei Verbi transmutari credo, & addit, quæ excludunt omnes Novatorum cavillationes, 1. Corpus Christi in nostrum corpus ingredi: ergo non per solam fidem sumitur. 2. Quemadmodum panis, quem Dominus in cibum sumebat, transmutabatur in substantiam ejus, efficiebaturque corpus Verbi, sic per verbum consecrationis panem convertit in corpus Dei Verbi.*

S. Ambrosius, qui obiit anno 396. libro de initiandis cap. 9. sic confirmat nutantem circa Christi realem præsentiam in Eucharistia: *Fortè dicas, aliud video, quomodo tu mihi asseris, quod Christi corpus accipiam? quantis utimur exemplis, ut probemus non hoc esse, quod natura firmavit, sed quod benedictio consecravit? Et allato exemplo virgæ Moïsi in Serpentem mutatæ, subdit: Non valebit Christi sermo, ut species mutet elementorum? sermo Christi, qui potuit ex nihilo facere quod non erat, non etiam potest ea, quæ sunt, in id mutare, quod non erant? non minus est novas rebus dare, quàm mutare, naturas. Præter naturæ ordinem Virgo generavit, & hoc quod effcimus, corpus ex Virgine est. Eadem habet lib. 4. de Sacramentis, si tamen opus illius sit.*

S. Chrysostomus, qui fato functus est quinto ineunte sæculo, sic ait homil. 88. in Matth. *Quoniam ipse dixit, hoc est corpus meum, nulla teneamur ambiguitate, sed oculis intellectus id perspiciamus. Hom. 83. Quis Pastor unquam propriis membris oves nutrit? Et quid dico Pastores? multæ matres sæpè aliis nutritibus infantes dederunt; ipse verò non ita; sed ipse nos sanguine proprio nutrit. Et hom. 46. in Joann. Non modo*

modò secundum charitatem, sed etiam ipsa re unum corpus cum Christo efficimur id quippe sit per cibum, quem largitus est ardenter amantium hoc est. Hoc Job significat de servis, qui suum amorem præferentes dicebant, quis det de carnibus ejus, ut saturemur? . . . Elias Melotem discipulis reliquit: Filius autem Dei ascendens suam nobis carnem dimisit: sed Eliam quidem exutus, Christus autem & nobis reliquit, & ipsam habens ascendit. Illud enim corpus, Juda, quod triginta denariis vendidisti: id quod est in calice, est id quod fluxit ex latere, & illius sumus participes. Quid est hoc horribilius? quid autem amabilius? Sicut enim corpus illud utitur Christo, ita & nos ipsi Christo per panem illum utimur. An Catholici possint nunc clarioribus verbis mysterium explicare? At, inquiunt Novatores, S. Chrysostomus desiderantibus Christum videre, respondet, ipsum in paupere vides, ipsum tangis. Quid tum? id ipsum hodie dicunt Concionatores nostri, quia nimirum pauperes sunt membra corporis mystici, & sibi datum computat Christus, quod pauperi dederimus; an propterea negant corpus Christi physicum existens in cælo, & in Eucharistia?

S. Augustini testimonium supra cap. 10. retulimus: obiit autem S. Doctor anno 430.

S. Cyrillus Alexandrinus, qui præfuit Concilio Ephesino generali an. 431. sic habet lib. 10. in Joan. *Non negamus, recta nos fide charitateque sincera Christo spiritualiter conjungi; sed nullam nobis communicationis rationem secundum carnem cum illo esse, id profecto pernegamus. An fortassis putat, ignotam nobis mysticæ benedictionis virtutem esse, quæ corporaliter quoque facit communicatione carnis Christi, Christum in nobis habitare? Unde considerandum est non habitudine*
tan-

tantum, quæ per charitatem intelligitur, Christum in nobis esse, sed & per participationem naturalem.

Quid ad hæc Novatores? Cyrillus, inquiunt lib. 6. in Joan. scribit, Christum subduxisse præsentiam humanitatis, non divinitatis. Alibi etiam negat Eucharistiam esse antropophagiam.

Respondeo. Vel ex tali objectionem colligas quàm frustra, & quàm mala fide Catholicis opponant textus sanctorum Patrum. Namque 1. libri sextus, septimus, & octavus non est opus S. Cyrilli, sed Clémentis Doctoris Parisiensis, qui decimo sexto sæculo fuit strenuus defensor præsentiae realis contra Sacramentarios. Ergo quæ leguntur apud Antiquos, minùs accuratè expressa, non nocent præsentiae reali; cùm Catholici Doctores nonnunquam eodem modo hodie mentem suam explicent. 2. Sanctus Cyrillus scribit contra Nestorium carnem, quam in Sacramento percipimus, non esse carnem puri hominis, ut volebat ille hæresiarcha, sed carnem filii Dei. Solutio patet ex Epistola Synodica cap. 10. supra laudata, ad asserendum præsentiam realem quinto sæculo fuisse in universali Ecclesia creditam: hanc enim Epistolam in Conc. Ephesino generali fuisse probatam citato cap. ostendimus.

Confirmatur: Nestoriani, qui in Concilio Ephesino ab Ecclesia separati sunt, hætenus permanent in fide præsentiae realis, sicut & Euty-chiani etiam præcisi in Concilio Chalcedonensi ann. 450. ut constat ex testimoniis authenticis contra Claudium prolatis in eximio opere de perennitate fidei circa Eucharistiam. Certè hanc doctrinam non hauserunt à Catholicis, ex quo ab
eis

eis recessere. Restat ergo dicendum, ipsos retinuisse hanc fidem, quem ab Ecclesia ante suam hæresim acceperant.

S. Leo, qui per suos Legatos præfuit Concilio Chalcedonensi anno 450. sic loquitur Serm. 6. de jejunio septimi mensis: *sic sacræ mensæ communicare debetis, ut nihil prorsus de veritate corporis & sanguinis Domini ambigatis; hoc enim ore sumitur, quod corde creditur, & frustra ab illis, Amen, respondetur, à quibus contra id, quod accipimus, disputatur.* Et Epistol. 23. ad Clerum Constant. *In Ecclesia Dei, inquit, in omnium ore tam consonum est, ut nec ab infantium linguis veritas corporis & sanguinis Christi inter communionis Sacramenta taceatur: credimus veram carnem.*

S. Gregorius Magnus, qui Ecclesiam rexit sexto & septimo sæculo, ejusdem fidei testis est hom. 22. in Evang. *Quid sit, inquit, sanguis Agni, non jam audiendo, sed bibendo didicistis, qui sanguis super utrumque postem ponitur, quomodo non solum ore corporis, sed etiam ore cordis hauritur. Quid enim prodest corpus & sanguinem illius ore percipere, & ei perversis moribus contraire? An non Lectori hæc videntur extracta ex Catechismis nostris?*

Anastasius Sinaita, qui floruit circa annum 635. in Odigo, id est, viæ duce, sic respondentem Gajanitam, sive Eutychianum inducit c. 23. *Ab sit, ut dicamus sacram Communionem esse tantum figuram corporis Christi, aut nudum panem, sed ipsum corpus & sanguinem Christi filii Dei incarnati, & ex sacratissima Deipara, & semper Virgine Maria nati verè accipimus. Orthodoxus reponit, sic credimus & confitemur.... Non enim dixit, hoc est figura, seu quid vices gerens corporis & sanguinis mei. Hic exploditur illa virtus*

tus à Calvino efficta; est enim quid gerens vices corpus Christi. Hoc fatetur Aubertinus contendens hoc sæculo fidem Ecclesiæ fuisse immutatam. Sed vanam prorsus præsumptionem demonstrant Patres supra laudati; qui verbis non minus claris, quàm Anastasius, præsentiam realem confitentur.

Objiciunt tamen 1. Origenem, qui in c. 15. Matth. sic scribit : *Quod ingreditur in os, non sanctificat hominem, etiamsi à simplicioribus credatur, scilicet is, qui vocatur panis Domini, non suapte natura sanctificat juxta id, quod materiale habet, in ventrem abit; nec materiæ panis, sed qui super illum dictus est sermo, prodest.* Ergo ex Origene Eucharistia non per se sanctificat, sed per solam fidem. 2. S. Augustinus Epist. 205. alias 146. ad Consentium, vult Christi in cælo non habere sanguinem. Quomodo ergo nunc in Eucharistia fumeretur ejus sanguis, nisi in figura & virtute? 3. Facundus Hermianensis in opere, quod sexto sæculo scripsit pro defensione trium Capitulorum, quæ damnata sunt in Concilio generali V. hæc habet : *Potest Sacramentum adoptionis (nempe Baptismus) adoptio nuncupari, sicut Sacramentum corporis & sanguinis ejus, quod est in pane & poculo consecrato, corpus ejus & sanguinem dicimus, non quod proprie corpus ejus sit panis, & poculum sanguis, sed quod in se mysterium corporis ejus & sanguinis contineant quocirca sicut Christi fideles Sacramentum corporis & sanguinis ejus accipientes, rectè dicuntur accipere corpus & sanguinem Christi; sic & ipse Christus Sacramentum adoptionis filiorum cum suscepisset, rectè dici potuit adoptionem filiorum suscepisse.* En Calvinistarum Achilles.

R. 1. generatim. 1. Etiam si unus & alter ex antiquioribus circa Eucharistiam contra omnium fidem erraverit, non nutabit propterea universalis Ecclesiæ traditio. An non ex constanti traditione definitum est valere Baptismum apud hæreticos collatum, licet Tertullianus, S. Cyprianus, & S. Firmilianus contrarium docuerint? 2. Cum Eucharistia duabus constet partibus, materiali & cœlesti, cur non credamus aliquos ex Antiquioribus illam inadæquatè spectasse & secundum faciem exteriorè, maximè cum alii contemporanei de ea ex professo & adæquatè tractantes, disertè asseruerint esse verum corpus Christi ex Maria Virgine natum? Nonne ipse Paschasius, quem auctorem novi dogmatis de præsentia reali asserit Claudius; Eucharistiam vocat mysterium, quod in pane celebratur? *Hæc, inquit, mystica sunt, in quibus veritas carnis & sanguinis, in mysterio tamen & figura.* Sic & Hincmarus, quem Adversarii rejiciunt, tanquam Paschasio adhærentem, scripsit Christum Dominum tradidisse novum testamentum in pane & vino aqua mixto, transtulisse mysterium Passionis suæ in creaturam panis & vini. Sic Carolus Magnus epistola ad Alcuinum, ait: *Jesus Christus dedit panem & calicem in figura sui corporis.* Sic sanctus Fulbertus Episcopus Cranotensis, sub cujus disciplina Berengarius aliquandiu egerat, docet Christum reliquisse salutare pignus sui corporis. Sic sanctus Bernardus, qui post Berengarium floruit, ait: *Nec oportet Sacramenti cortice esse contentum, carnis fursure cum pari jucunditate sumitur memoria & præsentia.* Hæc & similia, si Novatores legerent in Veterum scriptis, victoriam carerent. Cum ergo hæc scripta sunt ab iis, quos Adversarii

farii agnoscunt credidisse præsentiam realem, nonne æquum & necessarium est eodem sensu accipere nonnulla à veteribus minùs accuratè dicta, & in speciem pugnantia cum his, quæ vel ipsi, vel alii, sive coætanei, sive antiquiores clariùs scripserunt?

R. 2. Sigillatim ad singula.

Ad primum 1. Illæ homiliæ Origenis in Matth. sunt dubiæ auctoritatis, siquidem Erasmus eas primus edidit, qui nec profert textum Græcum, nec dicit ubi; aut unde acceperit. 2. Origenem eo nomine à Theophilo Alexandrino, epistola 1. Paschalis fuisse reprehensum, quòd ad allegorias traxerit *panem divinum; quo Salvatoris corpus ostenditur*, 3. Lib. 8. contra Celsum, Origenes agnovit realem præsentiam: *Oblatos panes, inquit, edimus, sanctum corpus quoddam sanctificans eos, qui cum sancto proposito utuntur*. Quibus posterioribus verbis patet quo sensu dixerit in cap. 15. Matth. panem non suaptè natura sanctificare, etiamsi à simplicioribus credatur; subdit enim eo loci, *nam si ita esset, sanctificaret quòd indignè comedit Dominum*. Et homil. 7. in lib. Num. ait: *Tunc in ænigmate cibus* (nempè manna) *nunc autem in specie caro Christi, & verus cibus, sicut ipse dicit, Caro mea verè est cibus*. 4. Eucharistia dicitur ab Origene corpus typicum; quia, ut suprà ait Paschasius, hoc Sacramentum est figura & veritas: figura, id est, species, quæ cum sint aliquid materiale, in ventrem & in secessum abeunt.

Ad secundum. Legatur epistola S. Augustini, & nebula, quam injiciunt Adversarii, evanescet; vult enim duntaxat Christum non habere sanguinem in cœlo corruptioni obnoxium, nutrientem

& vegetantem corpus ejus, quod est omninò incorruptibile; unde explicans verba Apostoli, *caro & sanguis regnum Dei non possidebunt*, dicit hæc de corruptione mortalitatis esse intelligenda. Quòd autem S. Doctor agnoverit fideles in Sacramento bibere sanguinem Christi, constat ex cap. 10. libro 12. contra Faustum, ubi sic loquitur: *Habet magnam vocem Christi sanguis in terra; cum eo accepto ab omnibus gentibus respondetur, Amen; hæc est clara vox sanguinis, quam sanguis ipse exprimit ex ore fidelium.* Et cap. 20. docet à fidelibus bibi, quod è latere Christi emanavit. Ex quibus colliges Adversarios textus Scripturæ & SS. Patrum legere, non ut instruantur & doceant, sed ut decipiantur, vel decipiant.

Ad tertium. 1. Facundus pugnat contra judicium universalis Ecclesiæ, quæ in Concilio Quinto generali damnavit Theodorum Episcopum Mopsuestenum, olim Nestorii præceptorem, quòd scripsisset Christum Dominum esse Filium Dei adoptivum. Cum ergo Facundus malam causam tueatur, non mirum est, si leviora argumenta proferat, & ex eis malè concludat. Igitur in argumentum suæ causæ adducit Baptismum, quem Dominus suscepit, ex quo concludit, Christum posse dici Filium adoptivum; nam in ejus principiis ille est filius adoptivus, qui adoptionem suscepit: atqui Christus suscipiendo Baptismum, adoptionem suscepit; nam rectè dicitur adoptionem recipere, qui signum adoptionis, hoc est, Baptismum recipit, quemadmodum fideles, dum recipiunt signum corporis Christi, in Eucharistia, dicuntur recipere corpus Christi.

Porro ex ratiocino Facundi ad ejus mentem
 expo-

exposito, non evertitur fides realis præsentiae, quinimò astruitur; nam sicut in mente Facundi, Baptismus ita est signum adoptionis, ut eam contineat verèque conferat, sic panis, licèt propriè non sit corpus Christi, dicitur tamen corpus Christi, quia est ejus signum; signum, inquam, non vacuum, sicut nec Baptismus est signum vacuum adoptionis, sed est signum plenum, continens rem significatam, nempe corpus Christi, ideòque Fideles in cœna Dominica verè & propriè sumunt corpus Christi, quamvis panis ipse non propriè dicatur corpus Christi. 2. Ecclesiæ fides circa aliquod mysterium non eruitur ex scriptis Veterum, ubi auctor, ut Facundus, ex occasione tractat de illo mysterio, & ex eo solum deducit similitudines & mysticas rationes ad aliud suadendum; sed consulenda sunt scripta, in quibus ex professo mysterium asseritur contra Hæreticos, ut Eucharistia in epistola sancti Ignatii ad Smyrnæos: in Conciliis Alexandrino, ac Ephesino jam laudatis, & in Nicæno II. mox citando: vel explicatur, sicut in Apologia S. Justini, in catechesibus SS. Cyrilli Jerosolymitani, & Ambrosii, ubi Patres doctrinam Ecclesiæ simpliciter exponunt. Ex his autem probatum manet præsentiam realem semper & ubique creditam fuisse usque ad ætatem Anastasii Sinaitæ, hoc est, usque ad septimum sæculum inclusivè.

Quod verò spectat posteriora sæcula, dissentiunt Adversarii nostri; Blondellus enim & Aubertinus ultrò fatentur abhinc mutatam fuisse fidem Ecclesiæ, ut jam monuimus; solus Claudius contendit illam mutationem referendam ad 10. sæculum, hujusque mutationis mala femina Paschasium nono sæculo jecisse. Sed tanquam cæcus palpat

in meridiana luce, atque hujusce veritatis testes sunt ex benemultis

Primò, S. Joannes Damascenus scripsit circa annum 740. lib. 4. de fide cap. 14. *Quemadmodum naturaliter per comestionem transmutatur panis in corpus comedentis, & fit alterum corpus; sic propositus panis, itemque vinum & aqua per invocationem & adventum Spiritus-sancti spiritualiter transmutantur in corpus Christi & sanguinem. Et non sunt duo, sed unum corpus.... non est panis & vinum figura Christi, & sanguinis, absit, sed corpus.*

Secundò, Epiphanius Diaconus in Concil. Nicæno II. quod est septimum generale anno 787. Iconomachos, qui in Conciliabulo Constantinopolitano ante annos triginta coactodixerant, unam Christi imaginem esse retinendam, sic arguit act. 6. *Non dixit Christus, recipite & manducate, hoc est imago corporis mei, sed, hoc est corpus meum.... patet igitur nec Dominum, nec Apostolos, nec Patres vocasse imaginem sacrificium incruentum, sed semper apellasse ipsummet corpus, ipsum sanguinem. Dona post consecrationem appellantur, sunt, & creduntur propriè corpus & sanguis. Sed Iconoclastæ, dum volunt nobis auferre usum sacrarum Imaginum, aliam introduxerunt, quæ non est imago, sed corpus & sanguis. Postea tamen mendacium deferentes, ad veritatem redeunt, dicendo: hanc imaginem fieri divinum corpus. Sed si est imago hujus corporis, impossibile est esse ipsummet corpus.*

Hanc oppositionem imaginem inter & corpus urget Nicephorus Patriarcha Constantinopolitanus, nono ineunte sæculo, apud Allatum lib. 3. collationis utriusque Ecclesiæ cap. 15. *Constantinus Iconomachus, inquit, vocat imaginem Jesu Christi, quod Jesus Christus nobis dedit manducandum. Quomodo au-*
tem

tem potest esse simul imago Jesu Christi, & corpus Jesu Christi? omnis enim imago distinguitur ab eo, cujus est imago. Verum quidem est Scripturam appellare filium imaginem patris: sed si à patre non distinguitur natura, saltem hypostasi & persona distinguitur. Si ergo sanctum corpus, quod accipimus in communione, est imago Jesu Christi, inde concluditur ipsum distingui à corpore Jesu Christi: Sin autem dicatur non distingui à Jesu Christo, sed esse partem ipsius corporis, dividitur corpus illud in duo, & sic dicendum erit Jesum Christum innumera habere corpora. Similia leguntur in libris de cultu Imaginum, qui Carolini dicuntur, ex eo quòd Carolo Magno fuerint ascripti & in epistola Adriani Summi Pontificis ad eundem Carolum Magnum.

Insigne est aliud testimonium. Namque 1. est totius Ecclesiæ, tum Occidentalis, tum Orientalis, etiam Iconomachorum, qui tum schismate erant divisi; licet enim Eucharistiam appellarent imaginem corporis Christi, simul etiam confitebantur esse ipsummet ejus corpus ex Epiphanio, & Nicephoro, qui solum eos arguunt, quòd contradictoria loquerentur, contendentes unum & idem non posse esse ejusdem imaginem & corpus. 2. Hic deficiunt artes & sophismata Claudii, quibus probare nititur per corpus intelligendam esse virtutem substantialem corporis. Enimvero idèd Iconoclastæ omnem aliam imaginem, etiam Christi Domini rejiciebant, quia illæ imagines periculo idololatriæ, ut rebantur, exponunt; imago enim Christi sub forma humana depicta, non repræsentat nisi humanitatem ejus, quæ per se non est adoranda, sed propter divinitatem, quæ in illa imagine non attenditur; at verò panis Eucharisti-

cus, quem appellabant imaginem Christi, repræsentat corpus Christi, divinitati unitum, & in ea subsistens; didicerant enim à suis patribus, Eucharistiam non esse antropophagiam, id est, non in ea manducari carnem puri hominis, sed carnem unitam Verbo Divino, ut suprâ S. Cyrillus Alexandrinus, & Patres Ephesini contra Nestorianos argumentabantur. Unde Iconomachi concludebant talem imaginem sine idololatria adorari. Ergo Eucharistiam non habebant ut imaginem plenam virtute corporis Christi, quemadmodum Claudius suadere conatur. Talis enim imago sine idololatria non adoratur, ipsomet fatente. Restat ergo ut nobiscum agnoscat Iconomachos præsentiam realem credidisse. Hanc etiam fuisse fidem Orthodoxorum contra Iconomachos pugnantium constat ex eorum ratiocinio. Non repugnat, inquit illi, Filium in divinis esse imaginem Patris, licet habeat eandem naturam cum illo, quia hypostaticè saltem ab eo realiter distinguitur: sed est omninò impossibile, & contradictorium unum & idem esse sui ipsius imaginem: debet enim esse realis distinctio inter imaginem, & id quod repræsentat. Atqui Eucharistia, pergunt illi, non distinguitur à corpore Jesu Christi, sed est ipsum corpus, non divisum in partes, sed realiter unum & idem: ergo nullatenus potest dici ejus imago. Porro si Eucharistia contineret solum virtutem, aut proprietatem corporis Christi, vel etiam ejus partem, realiter ab ipso distingueretur: ergo in sententia illorum Patrum rectè dici posset imago corporis Christi, quod tamen impossibile unanimiter asserunt; ac proindè ratiocinium illorum efficacius Claudium revincit, quàm Iconoclastas. Nihilominus nondum arma deponit,

obstina-

obstinatusque luci circumfulgenti oculos aperire detrectat; Hæretici quippe ratione convinci possunt, persuaderi verò non nisi gratia, fides enim donum est, quod ipsis adprecemur.

Nonum sæculum plures è Patribus Nicænis ingressi sunt; omnes enim obiisse intra spatium tredecim annorum, quod fluxit à Concilio Nicæno usque ad nonum, nemo dixerit. Porro dubium non est quin illi, & quos instituerunt Discipulos, prædicaverint in illo sæculo, sicut & in præcedenti, Eucharistiam non esse imaginem, sed ipsum corpus, panem per adventum Spiritus Sancti transmutari in carnem Christi, quemadmodum alimenta, quæ sumimus, in carnem nostram convertuntur. Sic etiam docuerunt Theodorus Abucara in Dialogo cum Saraceno: Petrus Siculus contra Manichæos, Amalarius epistola quæ habetur in Spicilegio: Remigius Altissiodorensis in expositione Missæ: Auctor homiliarum, quæ circumferuntur sub nomine S. Eligii, qui omnes nono sæculo floruerunt. His addendus Paschasius Radbertus Abbas Corbejensis in Gallia, qui anno 831. libellum de veritate corporis & sanguinis Domini (quem Catechismum dixeris) nuncupavit Varino Novæ Corbejæ Abbati, in gratiam juniorum Saxonum, illic ad fidem converforum, & recognitum misit ad Carolum Calvum an. 844. cum Abbas electus est, in quo sic scribit: *Licet in figura panis & vini mysteria peragantur, omnino nihil aliud quam caro Christi & sanguis post consecrationem credenda sunt.* Similia repetit morti vicinus, hoc est an. 865. in epistola ad Feudegardum.

Paschasium sibi adversari fatentur Claudius, & ejus asseclæ. Quærentem autem ab eis, quid

Paschasius scripserit, quod non dixerint Nicæni Patres, & Joannes Damascenus & posteriores Scriptores mox laudati? Nonne iisdem prorsus verbis mysterium explicant?

At, inquit Claudius, Novator fuit Paschasius, & antiquam universalis Ecclesiæ fidem immutavit.

Contra. Hæc mutatio quam supponit Claudius, longè majus fuit miraculum in Paschasio, quàm orbis conversio in Apostolis, & Apostolicis viris. Namque 1. mysterium præsentiae realis videtur creditu difficilius, quàm mysterium Incarnationis. 2. Primi Ecclesiæ Pastores Judæos & Gentes ad Christum non adduxerunt, nisi magnis laboribus, conflictationibus, stupendis miraculis, nec susceptum opus perficere potuerunt, nisi cùm post trecentos annos, Principes jam sanguine eorum satiati, & Christiani facti subditos suo exemplo & sanctissimis legibus ad veri Dei cultum transtulerunt. At Paschasius non egressus septa Monasterii, nec miraculis coruscans, nec persecutionem passus, nec Principum potentia & milite munitus, sicut Lutherus & Calvinus spatio quadraginta annorum, universæ Ecclesiæ Latinæ, scilicet & omnibus Orientalibus, licèt inter se divisis, persuasit panem, quem hætenus crediderant esse figuram aut imaginem corporis Christi, equidem virtute ejus plenam, jam adorandum uti verum ejus corpus, in cælis & in terris indivisum existens. Hoc miraculum in mente Claudii potuit error, quod non potuit veritas, dum Berengarius voluit deceptos fideles ad antiquam Patrum fidem reducere.

Respon-

Respondet Claudius sparsum virus in libello Paschasii, non penetrasse in Orientem, sed in Occidentem solum, nec uno momento, sed paulatim & sensim, ita ut Pastores non adverterent. Contendit insuper Orientales Ecclesias avitam fidem retinuisse, atque hactenus credere Eucharistiam non esse, nisi figuram corporis & sanguinis Christi, quod suaderi potest vel ex Cyrillo Luchare Patriarcha Constantinopolitano, qui nomine Ecclesiæ Orientalis professionem fidei emisit Calvinistarum doctrinæ prorsus consonam.

Refellitur. Primò, quoad Orientales: Constat enim eos idem de Eucharistia hactenus sensisse cum Latinis. 1. Ex Patribus Nicænis, S. Joanne Damasceno, & Nicephoro mox relatis. 2. Ex Lanfranco Cantuariensi Archiepiscopo, qui undecimo sæculo in Dialogo cum Berengario sic scribit: *Interroga Græcos, Armenos denique omnes Christianos cujuscunque sint nationis, & respondebunt se esse ejusdem fidei nobiscum.* Non negavit Berengarius, sed Ecclesiam defecisse respondit. Quærem autem à Claudio, unde Ecclesiæ Orientales initio undecimi sæculi hauserant talem doctrinam? An à Paschasio Corbejæ quiescenti? non audet asserere rem tam incredibilem, quia evidenter impossibilem. An ab Ecclesia Latina per Paschasium seducta? nec id etiam fieri potuit; nam Photius eodem nono sæculo in Sede Constantinopolitana intrusus schismate, quod nunc perseverat, divisit illas Ecclesias, atque, ut crimen excusaret, necessariasque separationis causas ostenderet, cepit proprias Latinorum consuetudines, ut cœlibatum Clericorum, usum panis azymi, jejunium Sabbati, veluti contrarias Apostolicæ Traditioni.

Porro quis sanæ mentis fingere possit Latinos Græcis ita invisos, præsentiam realem ipsis inspirasse? Quin necessariò inde evincitur utramque Ecclesiam in hoc præcipuo fidei dogmate ante Paschasii ætatem convenisse; cum nec Græci Latinis unquam objecerint Eucharistiæ cultum. Quasi vero gravius sit in azymis consecrare, quam in idololatriam impingere. Deinde nec ipsi Latini contra Græcos pro præsentia reali hætenus pugnauerunt, imò inter utrosque pax semel & iterum sancita est, nempe in Concilio Lugdunensi II. anno 1274. & Florentino anno 1439. (utinam Græcorum levitas à pactis non recessisset:) in his autem Conciliis nulla controversia, nulla quæstio circa præsentiam realem. In Concilio Florentino Eugenius IV. Summus Pontifex Missæ Sacrificium peregit, Græcis & Latinis astantibus, & simul adorantibus, quid plura? ipsi Novatores cum explorare voluissent, quæ esset Græcorum mens circa hunc fidei articulum, missa ad eos Confessione Augustana, hoc Jeremiæ Patriarchæ Constantinopolitani responsum acceperunt anno 1570. *Multa de vobis referuntur, quæ à nobis nullo pacto probari possunt. Ecclesiæ igitur sanctæ illud judicium est in sacra Cæna post consecrationem & benedictionem, panem in illud ipsum corpus Jesu Christi & vinum in illum sanguinem virtute Spiritus Sancti transire ac immutari.* Idipsum confirmavit Synodus Græcorum Jerosolymitana anno 1668. & Bethlehemitica anno 1672. quarum authentica instrumenta asservantur Lutetiæ in Bibliotheca Sancti Germani, & exscripta reperies tomo 1. & 2. perpetuitatis fidei circa Eucharistiam.

Ad Cyrillum verò Lucarem respondeo, ipsum quidem fraudibus, quibus Sedem Constantinopolitanam invaserat, illud crimen addidisse, quòd pecunia seductus, Batavo apud Ottomannorum Imperatorem Legato professionem hæreticam privatim dederit sub nomine Ecclesiæ Orientalis; sed ipso è sede expulso & strangulato, successor ejus Cyrillus Beroensis in Synodo 23. Episcoporum anno 1635. pronuntiavit anathema Cyrillo dogmatizanti, & credenti non transubstantiari panem propositionis, & insuper vinum in verum corpus & sanguinem Christi. Quod judicium confirmavit Parthenius Cyrilli successor in Synodo 25. Episcoporum anno 1642. cui judicio adhæserunt tres Patriarchæ, Alexandrinus scilicet, Antiochenus, & Jerosolymitanus.

Secundò, quoad Latinos. 1. Si obdormierint Pastores Latini, ut supponit Claudius, Græci Schismatici maligno animo invigilarunt, ut haberent unde Ecclesiam Latinam accusarent: atqui ex dictis Græci, nec nono sæculo quo exortum est schisma, nec undecimo, quo amplius exarsit, aliquid Latinis circa Eucharistiam objecerunt, nisi quod in azymo eam conficerent: Ergo Latini idem de Eucharistia semper credidere, quod Græci. 2. Præter recensitos Auctores Latinos noni sæculi, qui eodem sensu, quo Paschasius, mysterium Eucharistiæ exponunt, Hincmarus Remensis, non solum præeminentia Sedis, sed & doctrina & vigilantia conspicuus, non modo non obstitit, ne juniores ex libello Paschasii Religionem Christianam ediscerent, quin arguit c. 41. lib. de prædestinatione, Joannem Scotum, qui contra Paschasium negabat corpus Christi esse in Eucharistia.

Objicit

Objicit tamen Claudius, doctrina tum censetur nova, cum audientium animos offendit, eique communiter contradicitur: atqui talis fuit doctrina Paschasii. Ergo.

Minor probatur, 1. ex ipsomet Paschasio, qui in Epistola ad Feudegardum scribit multos obloqui contra suum libellum de corpore & sanguine Domini. 2. Rabanus Archiepiscopus Moguntinus in epistola ad Heribaldum Antissiodorenssem Episcopum, hæc habet contra Paschasium. *Quidam nuper de ipso Sacramento corporis Domini non recte sentientes, dixerunt hoc ipsum corpus Domini, quod de Virgine natum est . . . idem esse quod sumitur de altari: cui errori, quantum potuimus, ad Egilonem Abbatem scribentes, de corpore ipso quid verè dicendum sit, aperuimus*, tom. 4. Analect. Mabillonii. 3. Anonymus (quem Cellotius edidit ad calcem Historiæ Gothescalci, quemque Sigebertus & alii volunt esse Herigerum Abbatem Lobienssem in Belgio) Paschasio coævus, & alter anonymus Gemblacensis narrant improbatum à pluribus, quod Paschasius scripsisset in altari eam carnem sumi, quæ de Maria Virgine nata est. Denique tam intoleranda fuit doctrina Paschasii, ut Ratramnus, sive Bertramnus Monachus Corbejenfis in Abbatem suum Paschasium insurrexerit, librumque ejus confutaverit in opere, quod Carolo Calvo obtulit: Ergo luce clarius est novam fuisse Paschasii doctrinam, & ante nonum sæculum in Ecclesia Latina inauditam.

Confirmatur. Joannes Erigena seu Scotus eodem tempore scripsit Eucharistiam esse solum figuram corporis & sanguinis Domini, nemine contradicente, nisi fortè Hincmaro, qui alia ineruditè

ditè reprehendit, v. g. quòd à quibusdam diceretur, *Trina Deitas*; liber ejus ad examen & judicium Episcoporum non fuit delatus, nisi undecimo sæculo, nempe cùm jam opinio præsentiae realis, faventibus tenebris decimi sæculi, prævaluerat. Unde invincibiliter eruitur nono sæculo communem in Ecclesia Latina fuisse sententiam corpus Christi sumi solùm in figura.

Distinguo maj. doctrina censetur nova cùm audientes offendit, si propositio intelligatur de sapientioribus, & Ecclesiae Prælati communitè, Concedo: si de privatis quibusdam minùs erudit. Nego maj. nunquid novam doctrinam tradiderunt S. Augustinus de gratia, S. Cyrillus Alexandrinus de unitate personæ in Christo, S. Flavianus de duabus naturis in Christo impermixtis, quia multos experti sunt contradicentes? Cùm mysteria nostra accuratiùs explicantur, novæ exurgunt difficultates, quæ Traditioni Ecclesiae nullatenus nocent, sed elucet, prævaletque veritas in Conciliis, si necessaria sint ad sopiendas controversias.

Similiter distingo min. Talis fuit doctrina Paschasii respectu quorundam minùs eruditorum, Transeat: respectu Pastorum Ecclesiae, subdistinguo; circa nonnullas Eucharistiæ circumstantias, Concedo; circa ipsam substantiam mysterii, hoc est realem præsentiam, Nego min. & consequ. Namque

Primò Paschasius sic scribit ad Feudegardum de iis, qui obloquebantur contra ejus libellum: *Quamvis quidam ignorantia errent, nemo tamen est adhuc in aperto, qui hoc ita esse contradicat, quod totus orbis credit & confitetur.*

Nec

Nec dicas fidem non mereri Paschasium testem in propria causa; id enim verum esset, si de re incognita, & ab oculis Feudegardi remota scriberet, quemadmodum Claudio mendaciter asserenti Ecclesias Orientales à nobis remotissimas, esse ejusdem fidei cum Calvinistis, fidem dene-gavimus, & mendacem eum prodidimus. Sed sicut Claudius eò dementiæ venire non potuit, ut scriberet in Gallia universum orbem Occiden-talem consentire dogmati Calviniano; sic nec Paschasius potuit aliter exponere Feudegardo, quàm ipse propriis oculis cernebat: imo addit in eadem epist. Paschasius, *dicit te sic antea credidisse, & in libro, quem de Sacramentis ediderit, ita legisse.*

Secundò Rabanus disertè asserit præsentiam realem lib. 3. de sacris Ordinationibus cap. 10. his verbis: *Quis unquam crederet quod panis in carnem po-tuisset converti, nisi ipse Salvator diceret qui panem & vinum creavit?* Item Herigerus: *Paschasium, inquit, sufficiat excusatum, librumque ejus plurimorum auctoritate defensum; in hoc tamen peccavit, quod de sententia Am-brosii non verbum de verbo, sed sensum de sensu expressit.* Anonymus etiam Gemblacensis sic habet: *Senten-tia Ambrosii, qui dixit, quòd ista caro Christi non est alia, quàm quæ de Maria nata est, solummodo & va-let, & debet intelligi ut subaudiatur, naturaliter non est alia; quia non sunt carnes duæ: ipsa est caro, quæ pro mundi vita offertur, ipsa, inquam, naturaliter, ut sit tamen alia specialiter.*

Hæc posteriora verba aperiunt statum contro-versiæ, quæ erat illo sæculo: nempe discepta-bant, utrùm Corpus Domini, prout realiter existens in Eucharistia, dicendum esset natum ex Maria Virgine? affirmabat Paschasius, negabant Raba-

Rabanus, & Anonymi laudati hac ratione moti, quòd corpus Domini in Eucharistia fiat ex pane : ergo subsumebant, non ex Maria Virgine. Sententia Ambrosii, ait Anonymus, qui dixit, quòd illa caro non est alia, quàm quæ de Maria nata est, (quam sententiam laudaverat Paschasius) debet intelligi, ut subaudiatur, non est alia naturaliter, seu quoad substantiam, quia non sunt carnes duæ, sed est alia specialiter, hoc est, quoad modum existendi. Nihil clarius. Sic alter Anonymus : *Cognoscetis, inquit, non quidem, quod absit, naturaliter, sed specialiter aliud esse corpus, quod ex substantia panis & vini pro mundi vita consecratur.* Eodem sensu scribit Florus Lugdunensis Paschasio cœvus in veteri Homiliario Ecclesiæ Lugdunensis, *aliud erat corpus, quod loquebatur (scilicet in ultima cœna,) aliud, quod tradebatur (nempe Apostolis) corpus, quod loquebatur, erat substantiale ; quod verò tradebatur, mysticum.* Per corpus autem mysticum intelligit ipsum corpus substantiale, quod in mysterio traditur, hoc est, sub figura panis ; subdit enim, *sub figura panis, veritatem corporis Dominici intelligimus.*

Confirmatur hæc responsio & explicatio ex ipsis Auctoribus, qui undecimo sæculo pro præsentia reali contra Berengarium decertarunt ; hi enim admittunt istam duplicem acceptionem corporis Christi ; Lanfrancus dialogo contra Berengarium contendit verè dici & ipsum corpus, quod de Virgine sumptum est, & tamen non ipsum : ipsum quidem quantum ad essentiam, veræque carnis proprietatem : non ipsum verò, si spectes panis vinique speciem. Item Algerus lib. I. cap. 17. *banc duplicitatem, inquit, non substantiæ, sed formæ Sancti vocarunt, quoties de corpore Christi ipsum, & non ipsum*

ipsum dixerunt : ut ipsum secundum substantiam non ipsum secundum figuram.

Instabis; illi Anonymi dicunt eandem carnem Christi esse in Sacramento, & extra, nempe in cœlis: quomodo est eadem caro viri & uxoris, Joseph, qui venditus est, & fratrum, qui illum vendiderunt. Item quomodo idem est Spiritus Dei, & hominis Deo adhærentis: Ergo non crediderunt esse idem substantialiter corpus, quod ex Virgine natum est, & quod in Eucharistia existit.

Nego consequent. aliàs sibi contradicerent. In exemplis non omnimoda similitudo exigitur, sed ea solum, quæ confert ad propositum, nempe sicut caro viri & uxoris, Josephi & fratrum est vera caro humana; sic caro ex Virgine nata, & in Eucharistia existens, est vera Christi caro, non duæ, ut supra monebant, sed una. *Credendum est*, inquit Anonymus Gemblacensis, *vinum esse sanguinem; qui, Domino pendente, fusus est in cruce, & eo postmodum benedicente creatur consecratus, in calice.* Alter verò Anonymus, *aliud est naturaliter homo exterior, alius interior*, qui certe non sunt duo substantialiter homines.

Quodd autem impeteretur Paschasius eo nomine, quodd dixisset, non quidem corpus Christi esse realiter & substantialiter in Eucharistia, sed quodd idem esset Corpus, quod ex Maria Virgine natum est, patet, tum ex anonymo Gemblacensi: *Miror*, inquit, *auctorem hujus voluminis*, nempe Paschasium, *istud sibi posuisse*: tum ex altero anonymo, seu Herigero referente plures contra Paschasium scripsisse ex Hieronymo in cap. i. ad Ephesios, duplex Christi

Christi corpus. admittendum, imò & triple^m ex Augustino, scilicet corpus ex Maria natum, corpus sub specie panis traditum, & corpus mysticum, nempe Ecclesiam: tum ex ipso Paschasio in Epist. ad Feudegardum: *Ne sequaris*, ait, *ineptias de tripartito Christi corpore.*

Ex alio capite Paschasium impetebant ejus æmuli, quasi scripsisset corpus Domini in Eucharistia videri, tangi, & dentibus conteri, non quidem in specie humana, sed in figura panis. De tali calumnia conqueritur Paschasius morti vicinus, tum in cap. 26. Matth. scribens, tum in Epist. ad Feudegardum; *Audiui quosdam*, ait, *me reprehendere, quasi ego in eo libro, quem de Sacramentis edideram, aliquid his dictis, hoc est corpus meum, plus tribuere voluerim, aut aliud, quàm ipsa repromittit veritas.* Quid autem illud sit, explicat: *Timetis fortè ne partes facere voluerim, & ejus per singula membra dividere concissa & dispertita, sicut illi putarunt, qui scandalizati dicuntur & abierunt retro.* Hunc errorem videtur Rabanus Paschasio tribuere apud Anonymum Gemblacensem, in quo sic legitur: *Quia Christum dentibus vorare fas non est, voluit in mysterio hunc panem & vinum verè Carnem & Sanguinem consecratione Spiritus-sancti potentialiter creari, creando verò quotidie pro mundi vita mysticè immolari.* Quomodo hanc carnem Christi vorari fas est, si de Maria nata? . . . præsertim cum ita glorificata sit, ut vorari non possit? Sed Herigerus Paschasium ab hac labe immunem declarat c. 10. his verbis, *quod etiam obijciunt eum (Paschasium) dixisse Christum pati, quoties missas contingat ubique celebrari, ego certè in ejus libro non reperi.*

Ratramnum multi suspicati sunt esse ipsummet Joannem Erigenam, cui tribuerunt librum de corpore,
D. Habert Theolog. Tom. V. Kk pœre,

pore & sanguine Domini conscriptum, ut ipsis videbatur, contra Paschasium. Nunc verò ex manuscriptis noni sæculi, & aliis testimoniis, quæ profert Pater Mabillonius quarto sæculo Ordinis Benedictini, constat apud omnes communiter librum de corpore & sanguine Domini esse Ratramni Monachi Corbejenfis viri laudatissimi, tum ob pietatem, tum ob singularem eruditionem, quem Trythemius refert inter viros illustres Ordinis S. Benedicti cap. 48. & Sigebertus anno 1112. inter Scriptores Ecclesiasticos c. 95. Scripsit enim contra Græcos libros quatuor, rogantibus Episcopis Gallicanis anno 868. Item de Nativitate Christi, de Prædestinatione & de Anima.

Quæstio est utrum contra Paschasium Abbatem suum scripserit librum de corpore & sanguine Domini? Affirmat Anonymus suprà laudatus, seu Herigerus Lobienfis. Nec mirum videri debet, Monachum contra suum Abbatem pugnasse, cùm inter eos ageretur de circumstantiis Eucharistiæ nondum elucidatis illo sæculo, ut jam monuimus: quin & ipse Ratramnus, salva pace & reverentia, contra Hincmarum Archipræsulem suum propugnavit, tum eam canendi formulam, quam Ecclesia recepit, *Te trina Deitas, unaque poscimus*, tum doctrinam S. Augustini de Prædestinatione.

Liquet tamen ex ipsa electione librum Ratramni non esse exaratum contra Paschasium, cùm eadem contineat, quæ scripserat Paschasius. Sed quia ex dictis Paschasius accusabatur, sed falsò, docuisse corpus Christi in Eucharistia videri, tangi, & dentibus atteri, & ita visum est Anonymo Gemblacensi, existimaverunt illi Anonymi Ratramnum, qui impugnat hanc sententiam, Paschasium

schasium impetere; hic est enim unicus scopus Ratramni, ut colligitur ex præfatione ad Carolum Calvum, cujus jussu opus susceperat. *Vestra Majestas petit*, ait Ratramnus, *utrum corpus & sanguis Jesu Christi, qui ore fidelium sumitur, sine velo ullius mysteriorum fiat, ita ut quidquid geritur in hoc mystico, sensibus deprehendatur.*

Quæstio igitur elucidanda non est, utrum corpus Christi realiter in Eucharistia existat? hoc fidei dogma supponunt Carolus Calvus & Ratramnus, sed controversia illius sæculi in eo versabatur, an corpus Christi sensibus deprehenderetur? Amalarius horum coætaneus in Epistola sua, quæ habetur in Spicilegio, non putat hic quidquam definiendum; postquam enim docuit consecratione naturam simplicem panis & vini mutari in naturam realem corporis & sanguinis Christi; corpus idem esse in cœlis & in terra, quando vult subdit, *ita verò sumptum corpus Domini bona intentione, non est mihi disputandum, utrum invisibiliter assumatur in cœlum, an reservetur in corpore nostro usque ad diem sepulturæ, aut exhaletur in auras, aut exeat de corpore nostro cum sanguine, aut per poros emittatur, dicente Domino, quod intrat in os, in ventrem vadit, & in secessum emittitur, hujus sententiæ patroni foetido nomine vocati sunt Stercoranistæ.*

Verum Ratramnus Amalario minùs timidus, totus est in suo libro ad confutandum hunc errorem: *Ille panis, inquit, qui per Sacerdotum ministerium corpus Christi efficitur, aliud exterius humanis sensibus ostenditur, aliud interiùs fidelium mentibus clamat. Exteriùs quidem panis, quod ante fuerat, (nota fuerat, non vero est) figura prætenditur, color ostenditur, sapor accipitur. At interiùs aliud multo præstantius inti-*

matur.... exterius igitur quod apparet, non est ipsa res, sed imago rei, mente verò quod sentitur & intelligitur, veritas rei. Quæ sanè verba supponunt præsentiam realem, & transubstantiationem. Ne autem hæc consequentia Lectoris minùs perspicacis mentem fugeret, ipse Ratramnus verbis expressis fidem suam, quam dicit esse omnium fidelium, sic profitetur: Non putamus ullum fidelium dubitare panem illum fuisse corpus effectum, quod discipulis donans, dixit: Hoc est corpus meum. Et infra inducit Christum sic loquentem: Verè per mysterium panem & vinum in corporis & sanguinis mei substantiam à credentibus sumenda..... nonne majus est novas res dare creando, quàm mutare naturas? dicit Ambrosius. En doctrina Paschæ, imò totius Ecclesiæ luculenter expressa. Hoc posito fundamento, Ratramnus argumenta & similitudines colligit, ut probet contra nonnullos non ipsum corpus Christi, sed signum ejus, seu imaginem & figuram videri, tangi, dentibus configurat ablutionem interioriorem; sic figura, seu species panis sunt figura & imago panis spiritualis, nempe corporis Christi, atque etiam in eo Ratramnus consentit suo Abbati sic scribenti in laudato libello, reliquit nobis hoc Sacramentum, visibilem figuram & characterem carnis suæ.... disce ò homo, aliud gustare, quàm quod ore carnis sentitur, aliud videre, quàm quod oculis istis carnis ministratur; si enim hoc totum visibile fieret, nullum in eo mysterium.... nulla alia res, quàm quæ oculis & gustui subjacet.

At, inquires; Ratramnus distinguit inter carnem Christi, quæ crucifixa est, & carnem quæ ministratur in Sacramento, vera utique caro, inquit, quæ crucifixa est: verè ergo carnis illius Sacramentum est..... Quam diligenter, quàm prudenter facta

facta distinctio! Ergo contra Paschasium pugnat; hic enim docet eandem esse carnem, & veram utrobique; Ratramnus verò contendit veram fuisse in cruce, non verò in Eucharistia, sed solum ejus Sacramentum.

Distinguo antecedens ad mentem Ratramni, carnis Sacramentum est secundum figuram exteriorem & visibilem, Concedo : secundum invisibilem substantiam, ut loquitur, Nego antec. *Ex his omnibus, inquit, monstratum est, corpus & sanguinem Christi, quæ fidelium ore in Ecclesia percipiuntur, figuram esse secundum speciem visibilem, at verò secundum invisibilem substantiam, id est, divini potentiam verbi, verè corpus & sanguis existunt.* Tum num. 13. de forma consecrationis hæc addit, *si nihil est hic permutatum, non est aliud quàm ante fuit : est autem aliud, quoniam panis corpus, & vinum sanguis Christi facta sunt.* Sed hæc in specie geruntur, ut probat ille Auctor ex collecta Ecclesiæ, non in veritate, id est, in rei manifestatione, veritas enim est, ut scribit num. 8. *rei manifesta demonstratio.* Quo autem sensu neget Ratramnus eandem esse carnem in Eucharistia cum ea, quæ de Maria Virgine nata est, & cruci affixa, explicat num. 72. *Non sunt ergo idem; illa namque caro, quæ crucifixa est, ossibus & nervis compacta . . . at verò caro spiritualis, quæ populum credentem spiritualiter pascit, secundum speciem, quam gerit exterius (nota) frumenti gravis, & artificis manu consistit, nullis nervis ossibusque compacta.* Ubi manifestè loquitur de Eucharistia inadæquatè sumpta secundum faciem exteriorem. Hinc docet corpus Christi non esse corporaliter, sed spiritualiter eo sensu, quo scribit ipse Paschasius in Epist. ad Feudgardum,

gardum , totum spirituale est , quod celebratur in Sacramento.

Instabis ; Ratramnus scribit num. 84. non posse dici de Christo in Eucharistia existente , quòd sit Deus & homo. Et num. 22. sic loquitur : *Idem Christus est , qui & populum in deserto sua carne pavit (per manna) suo sanguine tunc potavit (per aquam è petra eductam) & in Ecclesia nunc populum sui corporis pane , sui sanguinis unda pascit , atque potat.* Ergo negavit Ratramnus corpus Christi realiter & substantialiter in Eucharistia existere.

Respondeo duriora quidem esse verba , & liberiori stylo emissa : quod excusandum in Scriptore , qui in adversarium toto fertur conatu , cum aliunde nihil sibi cavendum videat pro præsentia reali , quæ à nullo impetebatur. Hæc itaque adducit Ratramnus , ut probet id , quod oculis in Eucharistia cernitur , non esse propriè corpus Christi , cum de illo dici non possit esse Deum & hominem , sed eodem modo credendum corpus , quomodo manna & petra dicuntur Christus aut caro Christi ; ubi Eucharistiam inadæquatè considerat , nempe secundum faciem exteriorem , quam adversarii ejus contendebant esse verum Christi corpus.

Ceterum hæc dicta sint non minus ad nostræ causæ defensionem , quam ad viri bene de Ecclesia meriti famam tuendam , nihil enim noceret constanti Ecclesiæ traditioni circa præsentiam realem , si unus , & alter contra omnes eam sæculo nono negassent. Annon multi quarto sæculo negarunt Filium Dei esse Patri consubstantialem , & septimo duplicem in Christo voluntatem ?

tem? Nunquid propter eos incerta est utriusque dogmatis Traditio?

Monemus insuper 1. Berengarium non adduxisse Ratramnum in suæ causæ patrocinium. 2. Lutheranos Magdeburgenses librum Ratramni sibi contrarium agnovisse. 3. Doctores Lovanienses in indice expurgatorio Belgii anno 1571. nihil reprehendendum in illo libro judicasse, nisi obscuritatem elocutionis & vocum, quarundamque sententiarum ineptam usurpationem & interpretationem. In indicem tamen librorum prohibitorum rejectus est, vel quia nomen sui auctoris non præ se ferebat, vel quia à Lutheranis in lucem fuerat editus, atque ideò suspectus maximè ob verborum ambages.

Ad confirmationem Claudii

R. 1. Falsum esse Joannem Scotum ab uno Hincmaro fuisse impugnatum, nam ex cap.9. constat illum notatum tanquam inimicum hominem, qui zizania superfeminaret, à Nicolao I. à Prudentio Trecensi, & à Concilio Lingonensi. Ex judicio autem contra auctorem lato satis intelligebantur libri ejus proscripti, maximè cum nulli eos laudarent, sed omnes communiter detestarentur usque ad Berengarii ætatem, qui undecimo sæculo libellum Joannis Scoti, quasi ex pulvere suscitavit, ex eo multorum fidem pervertit, atque ideò necesse fuit, ut liber ille similem obtineret sortem, qualem scripta Theodori Mopsuesteni, quæ post centum annos ad judicium Ecclesiæ delata proscripta sunt, cum propter illa pax Ecclesiæ jam turbaretur. At Paschasii fama ante & post mortem ejus permansit integra: ante annos duodecim evulgarat libellum de corpore & sanguine Domini, cum præ-

fectus est suo Monasterio, & renuntiatus Abbas : Patres Concilii Parisiensis ann. 845. vocant illum venerabilem Fratrem, atque ejus causa privilegium Monasterio Corbejensi concedunt : Egelomus Sueffionensis in carmine panegyrico illum dicit Ecclesiæ columnen, post mortem anno 1073. levato è terra ejus corpore, Corbejæ colitur ex auctoritate Sedis Apostolicæ. Ejus libellus celebris fuit, dum viveret, ex eo juvenes in Religione Christiana instituebantur, quod non sustinuisent Episcopi, si contra communem omnium fidem scripsisset. In Conciliis Carisiaco I. & II quibus præfuit Hincmarus, Valentino, Ligonensi, & Tullensi, nullus ibi Paschasium accusavit, sed plures adversarium ejus Joannem Scotum proscripserunt: ergo non Paschasius, sed Joannes Scotus novator est habitus.

R. 2. Multi ex Episcopis noni sæculi decimum attingere, in eo reliquerunt Discipulos, & successores, qui docuerunt quod à Magistris didicerant. Stephanus Æduensis Episcopus circa annum 950. (ut volunt nonnulli) scripsit in canonem Missæ, exposuitque fidem Ecclesiæ circa Eucharistiam ea perspicuitate, qua eam legimus in Catechismo Romano. S. Fulbertus Carnotensis & alii Episcopi, qui, ut dictum est c. 9. in Aurelianensi Concilio anno 1017. damnarunt quosdam Manichæos negantes veram esse Christi carnem in Eucharistia, ex decimo sæculo prodierant, atque in eo doctrinam hauserant, quam fidelibus undecimi sæculi refuderunt : Ergo fides noni sæculi in nulla parte decimi eclypsim passa est, ut garrit Claudius. Non diffitemur flagitiosos & perditos homines sacram Apostolorum Sedem invasisse, tenuisseque per aliquot annos; sed reliquæ partes orbis Christiani

stiani clara luce perfruebantur. Extant egregia monimenta singularis vigilantiae in Episcopis, Concilia frequentius habita, multiplices leges sanctitae ad disciplinam tuendam, perficiendamque, collaborantibus Imperatoribus & Regibus sanctissimis, Ordines religiosi, vel novi instituti, ut Camaldulensium, auctore S. Romualdo, vel antiqui in pristinum splendorem restituti, ut Benedictinorum à Sancto Odone Cluniacensi anno 937. adeò ut decimum saeculum, quod Claudius veluti infelix exhibere conatur, rectius felicissimum dixeris.

CAPUT XIII.

Per quam actionem praesens sistitur Corpus Domini in Eucharistia?

Quidam è Discipulis Berengarii, confessi tandem praesentiam realem, dixerunt Christum sibi praesentem in Eucharistia per impanationem, hoc est, per unionem hypostaticam Verbi divini cum pane & vino, adeo ut quemadmodum propter unionem Verbi divini cum humanitate rectè dicimus de Christo homine, *hic homo est Deus*, ita liceat dicere de pane Eucharistico, *hic panis est Christus*, ex Guitmondo lib. 1. de veritate corporis & sanguinis Christi, & ex Algero in prologo 1. de Sacramento corporis & sanguinis Domini, qui ambo contra Berengarianos decertarunt. Hanc sententiam amplexus est Osiander Lutheranus, ut refert Melancthon lib. 2. Epist. 447. Ejus auctorem Rupertum facit Bellarminus lib. 3. de Sacramento Euchar. cap. 11. hic enim Berengario

suppar, sic scribit in cap. 9. Joannis, *Verbum jamdudum caro factum, panis visibilis fit, non commutatum in panem; sed assumendo, & in unitatem suæ personæ transferendo panem.* Sed illum ab hoc errore vindicat quidam Monachus Benedictinus, edita ex professo apologia, in qua fusius ostendit Rupertum expressis verbis scripsisse; panem & vinum in veram corporis & sanguinis Domini transire substantiam, ex quibus necesse est in benignum sensum flectere, quod docet panem ipsiusve substantiam manere, & à Christi persona assumi, nempe substantiam secundum residuas species manere & assumi panem in unitatem personæ, mediante scilicet corpore, in quod convertitur. Ait enim in cap. 6. Joannis corpus illud non esse obnoxium secessui.

Cùm autem Henriciani, Albigenes, & alii hæretici, de quibus supra cap. 9. damnatam Berengarii hæresim identidem suscitaverint, Concilium Lateranense IV. generale sub Innocentio III. anno 1215. definiit cap. *Irminter*, Corpus Domini fieri præsens in Eucharistia per transubstantiationem, his verbis: *Credimus & confitemur corpus & sanguinem Christi sub speciebus panis & vini veraciter contineri, transubstantiatis pane in corpus, & vino in sanguinem potestate divina.*

Novatores calumniantur illud verbum, *transubstantiare*, tanquam novum & inauditum in Ecclesia. Quibus merito reponimus, quod S. Athanasius lib. de Decretis Synodi Nicænæ responderebat Ario rejicienti cum sequacibus Concilium Nicænum propter Novitatem nominis, *consubstantialis*, quo cavillationes hæreticorum subvertebat: *an novitate offenderis, an etiam rei ipsius veritatem,*
quæ

quæ hoc est sortita vocabulum, refugis? Res enim antiqua novum nomen accepit, non vocabulo rei veritas accessit etiamsi voces ita in Scripturis non extent, sententia tamen quam continent, verè in Scripturis habetur.

Quanquam nec illud nomen, *transubstantiatio*, à Concilio Lateranensi excogitatum fuit, cum eo utantur Stephanus Æduensis tract. de Sacramento altaris capite 13. Petrus Blesensis Epistola 104.

Quid vero nomine *transubstantiationis*, Concilium intellexerit, variè opinati sunt Scholastici ante Concilium Trid. ut colligitur ex Cardinali de Alliaco Episcopo Cameracensi decimo quinto sæculo, sic enim scribit in 4. dist. 6. art. 11. *licet Catholici concordaverint in hoc, quod corpus Christi sit in Sacramento, circa modum ponendi fuerunt diversæ sententiæ. Prima quod substantia panis sit corpus Christi. Secunda, quod non remanet substantia panis, sed reducitur in materiam per se stantem, vel aliam formam recipientem, & hoc sive in eodem loco, sive in alio, & corpus Christi coexistit accidentibus panis. Et hæc opinio non potest reprobare, nec per evidentem rationem, nec per auctoritatem cogentem. Tertia fuit, quod remaneret substantia panis. Quarta & communior est, quod substantia panis non remanet, sed simpliciter desinit esse. Addit se eam opinionem amplecti; quia magis favet determinationi Ecclesiæ, & SS. Doctorum placitis.*

Enimverò Clemens IV. anno 1252. in Epistola ad Guidonem Narbonensem, hæc habet: *Ad nostrum pervenit auditum, quod in nostra existens curia dixisti corpus Domini nostri Jesu Christi essentialiter in Eucharistia non esse, sed tantum sicut signatum sub signo, & hanc*

Et hanc celebrem esse Parisiensem opinionem. Nimirum quidam Parisiis docebant Deum non posse facere accidens sine subjecto, nec plures dimensiones esse simul: quam propositionem Stephanus Parisiensis de consilio Doctorum proscripsit anno 1270.

Joannes Parisiensis Dominicanus anno 1306. hanc excogitavit opinionem, ex Thoma Valdensi tom. doctrin. cap. 65. & ex continuatore Wilhelmi Langii ad annum 1304. Nempe ut salvaretur apparentia circa species sensibiles, quæ remanent, sic explicabat transubstantiationem à Concilio Lateranensi propositam, ut diceret panem corpus Christi effici, quatenus per consecrationem hypostaticè assumeretur à Verbo non quidem immediatè, ne diceretur, Deus est panis, sed mediante corpore. Quamvis autem illam sententiam modestè proponeret, subjiceretque iudicio Ecclesiæ, Guidoni tamen Carmelitæ sic placuit, ut si Papa fuisset, eam decrevisset eligendam, ait Thomas Valdensis; tamen cæteris Theologis ei contradicentibus, Willelmus Parisiensis de consilio quorundam Episcoporum & Doctorum prædicto Joanni silentium imposuit.

Durandus Episcopus Aniciensis, insignis Theologus, docuit circa idem tempus solam panis formam transire in corpus Christi, *salvo tamen*, inquit, *meliori iudicio*; suamque opinionem probat auctoritate SS. Patrum; qui docent panem in altari converti in corpus Christi, quomodo ipse convertit aquam in Cana Galilææ in vinum, & panem, quem mortalis in cibum assumebat, in propriam carnem; atqui in hujusmodi mutationibus materia eadem remanebat, & nihilominus
verum

verum erat dicere, quod nihil aquæ superesset vino producto, nihil panis, nutritione perfecta. Item quod caro ex alimentis successive accrescens esset eadem, quæ ex virgine nata est, & cruci affixa : Ergo. Cardinalis Cajetanus in eandem descendisse sententiam videtur in 3. p. S. Thomæ quæst. 75. art. 4. quod advertit Dominicus Soto in 4. dist. 9. quæst. 2. art. 4.

Concilium Trid. his Theologorum opinionibus circa transubstantiationis acceptionem finem imposuit hac sua explicatione sess. 13. cap. 4. his verbis : *Sancta hæc Synodus declarat, per consecrationem panis & vini conversionem fieri totius substantiæ panis in substantiam corporis Christi Domini, & totius substantiæ vini in substantiam sanguinis ejus, quæ conversio convenienter & propriè à sancta Catholica Ecclesia transubstantiatio est appellata.*

Transubstantiatio dicitur 1. *conversio*, ut excludatur simplex unio panis cum corpore, vel cum personalitate Christi Domini, hoc est, cum Verbo ; namque unio dici non potest conversio, ut constat ex Sanctis Patribus, qui ita propugnaverunt contra Nestorium unionem hypostaticam naturæ humanæ cum persona Verbi, ut negaverint contra Eutychetem conversionem naturæ humanæ in personam divinam, & vicissim.

Dicitur 2. *totius substantiæ panis*, quo distinguitur transubstantiatio ab aliis mutationibus substantialibus, in quibus remanet saltem pars substantiæ, scilicet materia ; unde transubstantiatio vocatur à Concilio Tridentino sessione 13. canone 2. *mirabilis & singularis conversio*, cujus exemplum non extat, aut exitit in rerum natura. Satis ergo non fuit Patribus Tridentinis prædicare
illam

illam conversionem, tanquam mirabilem, & insigne miraculum, sed insuper illam singularem, & sine exemplo dixerunt. Conversiones aquæ in vinum, virgæ Moyſis in serpentem, & uxoris Loth in statuam ſalis, quas SS. Patres ad explicandum hoc myſterium aſſumunt, valent quidem ad explicandum, quomodo per verbum operatorium Chriſti Domini panis ſic convertatur in carnem, ut deſinat eſſe panis, & ſi ita velis, nihil ejus ſubſtantię ſpecificè ſumptæ, quod panis dici poſſit, remaneat. At aptæ non ſunt ad exhibendam totaliter tranſubſtantiationem; in omni enim comparatione eſt quædam diſſonantia & diſparitas, aliàs non eſſet comparatio, ſed identitas. In eo autem tranſubſtantiatio eſt ſingularis converſio, quod totum illud ſubſtantiale quod prius dicebatur panis, quo nomine non intelligitur ſola forma, convertatur in corpus Domini. Atque ea parte notat Bellarminus proſcribi ſententiam Durandi, eamque hæreticam pronuntiat ex can. 2. jam laudato. Bellarmino favet omnium Theologorum ſilentium.

Enimverò ex illa ſententia ſequuntur multa abſurda, Eccleſiæ Traditioni, & doctrinæ Concilii Tridentini contraria. 1. Corpus Domini non eſſet ſub figura in hoc Sacramento, ſed videretur, tangeretur eo modo, quo videtur homo in humana forma. 2. frangeretur, divideretur. 3. Chriſtus Dominus in Eucharistia non eſſet propriè homo; ad eſſentiam enim hominis non ſufficit anima rationalis, ſed inſuper requiritur corpus organicum; hinc in hypotheſi, quòd anima rationalis uniretur ferro, aut lapidi, compositum illud non eſſet verus homo. 4. Corpus Eucharisti-

charisticum, nec physicè, nec moraliter esset idem corpus, quod ex Maria Virgine natum est, & cruci affixum: non physicè; quia materia illa, quæ ante erat sub figura panis, non est extracta ex visceribus beatæ virginis, nec cruci affixa, ut patet: non moraliter, quemadmodum corpus hominis grandævi, licèt non sit physicè idem, quod ex sanguine matris formatum est, quia materia illa continuo exhalatur, & ejus loco alia succedit, mediante nutritione, tamem moraliter est idem corpus; quia partes paulatim deperditæ, etiam paulatim per alimenta reparantur, quo fit ut corpus censeatur moraliter unum, sicut domus dicitur eadem, quàmvis à prima ejus ædificatione toties reparata fuerit, ut nihil ferè remaneat ex lapidibus, lignis, & cæmentis, quæ à primo artificè adhibita fuerant. At si nova integrè ædificaretur, quamvis in eadem forma, & figura, non diceretur eadem cum priore. Sic nec novum Christi corpus integrè conflatum ex eadem materia, quæ ante erat materia panis, moraliter idem censeretur, quod ex Virgine natum, & cruci affixum. 5. Concilium Tridentinum sess. 13. cap. 3. docet vi verborum solum corpus poni sub speciebus panis, per concomitantiam verò, animam & divinitatem. Sed in sententia Durandi anima poneretur vi verborum, cum materia panis non fiat corpus Christi, nisi ex unione cum anima. 6. Licèt eadem sit anima in toto corpore, non sequitur, quòd pes sit idem cum capite aut humeris; sic nec eadem Christi anima existens in omnibus altaribus, & informans diversas panum materias, efficeret unum & idem corpus, sed diversum, aut saltem diversas ejusdem

dem corporis partes, nec fidelis acciperet Lute-
tiæ eandem partem materialem, quam alter Lug-
duni, unde aliud sequitur absurdum, nempe cor-
pus Christi cresceret in immensum adjectione tan-
tæ quantitatis, quemadmodum corpus humanum
augetur per alimenta pinguiora.

Nec dicas non fore transubstantiationem, sed
annihilationem, nisi eadem materia à forma pa-
nis transiret ad formam hominis, quæ est anima
rationalis, sicut videre est in hypothese, quòd
Deus Angelum destrueret, & alium continuo
crearet, prior Angelus non diceretur in postero-
rem conversus, sed prorsus annihilatus. Id enim
verum est, si hæc fiant actione distincta: falsum
verò, si eadem actio esset destructiva & produ-
ctiva; quia tunc esset vera conversio. Porro
transubstantiatio est unica actio, qua corpus Chri-
sti ita fit præsens, ut desinat tota substantia pa-
nis, quemadmodum adveniente calore, expelli-
tur frigus.

Quæ autem sit illa actio, non conveniunt
Theologi. Sancti Thomæ discipuli opinantur
esse reproductionem corporis Domini: Scoti-
starum Schola esse actionem adductivam, qua
corpus Domini in cælo existens, absque nova
productione fit præsens sub Speciebus Eucharis-
ticiis. Nempe, inquiunt illi, quamvis corpus
non possit naturaliter acquirere novam præsen-
tiam, nisi per motum localem, & recessum à prio-
re loco; supernaturaliter tamen id fieri potest per
productionem alicujus entitatis modalis, qua
corpus aut res aliqua fit formaliter alicubi præ-
sens. Alii contendunt, nec reproductionem, nec
actionem adductivam sufficere ad transubstantia-
tionem,

tionem, quæ est vera & specifica conversio unius substantiæ totalis in aliam, sed requiri insuper actionem, virtute cujus prior substantia desinat esse, & in alia substituatur. Quare docent transubstantiationem esse actionem, sive productivam, sive adductivam, & simul unitivam corporis Domini cum speciebus Eucharisticis, non quidem ut corpus Domini tanquam subjectum eas sustentet, hoc enim falsum est, sed ut ad eas habeat habitudinem, tanquam contentum substantiale. Namque substantia panis in eorum sententia duo habet munia; primum quod sit accidentium subjectum, cui inhærent. Secundum quod sit contentum substantiale ipsis sub eo respectu unitum. Porro actio transubstantiativa efficit illam unionem corporis Christi, per quam solvitur prior unio substantiæ panis, & sic definit forma substantialis panis, quæ sicut naturaliter non potest produci sine accidentibus, sic nec conservari; sunt enim dispositiones necessariae. Porro destructa forma substantiali, materia non potest naturaliter remanere spoliata omni forma; unde necesse est ipsam quoque desinere. Verum ad ejusmodi quæstiones tutius respondetur cum Magistro sententiarum in 4. dist. 11. *mysterium fidei credi salubriter potest, investigari salubriter non potest*, nam, ut advertit Vasquez 3. p. q. 56. disput. 18. c. 1. his Philosophiæ quæstionibus effectum est, ut mysterium fidei nostræ, non modo difficilius ad explicandum, sed etiam adversariorum nostrorum argutiis & cavillationibus magis expositum fuerit. *Quid mirum*, inquit S. Hieronymus Epist. ad Magnum, *si & ego sapientiam sæcularem . . . de ancilla & captiva Israelitidem facio?*

sed Domini voce præceptum, mulieris captivæ radendum caput, supercilia, & ungues corporis amputandos, & sic eam habendam in conjugio, nempe Deut. cap. 21. v. 12. Hoc est, Philosophiam profanam cum sacra Theologia ita esse conjungendam, ut illa Christiana fiat, non ista ejusmodi connexionione profana evadat, & mere naturalis. Serviat illa, ista dominetur ancillæ & captivæ, supercilia radat, arrogantiam coerceat, & petulantiam comprimat, circumcidat ungues, ne ad supernaturalia manus mittens, ea potius deturpet, quàm elucidet. Quapropter Tridentini Patres sapienter silentium imposuere Theologis in Concilio Philosophicas illas quæstiones agitantibus.

Cæterum Aubertinus & Claudius frustra conantur roborare suum errorem ex recensitis Theologorum opinionibus. Namque Theologi conveniunt, ut liquet, in dogmate fidei, dissentiuntque solum in modo illius explicandi. Nunquid ideo incerti sunt Catholici an secunda persona sanctissimæ Trinitatis sit verè filius procedatque per generationem, quia Theologi variè opinantur, ubi assignanda est ratio cur hæc processio sit generatio? Quot Lutheranorum opiniones circa hæc Domini verba, *hoc est corpus meum*, ex quibus omnes evincunt præsentiam realem?

Lutherus lib. de captivitate Babylonica reliquerat liberam transubstantiationis fidem, ut scrupulos conscientiarum de medio tolleret. At anno 1522. mutato consilio sic scribit contra Henricum VIII. Angliæ Regem, *Nunc transubstantiare volo sententiam meam, & dico, antea posui nihil*

nihil referre; sive sic, sive sic sentias de transsubstantiatione; nunc autem decerno impium & blasphemum esse, si quis dicat panem transsubstantiari. Hinc Lutherani dicuntur Consubstantiatores, quia utramque panis & corporis Christi substantiam in Eucharistia conjungunt.

CAPUT XIV.

Utrum fide divina credendum sit Corpus & Sanguinem Christi Domini existere in Eucharistia per transsubstantiationem?

R. Ita expressè declaravit, & definiit Concilium Trident. contra Lutheranos sess. 13. can. 2. his verbis: *Si quis dixerit in sacro-sancto Eucharistie Sacramento remanere substantiam panis & vini unum cum corpore & sanguine Domini nostri Jesu Christi: negaveritque mirabilem illam & singularem conversionem totius substantie panis in corpus & totius substantie vini in sanguinem, manentibus dumtaxat speciebus panis & vini, quam quidem conversionem Catholica Ecclesia aptissimè transsubstantiationem appellat; anathema sit.*

Q. 2. Quomodo probatur hæc Concilii doctrina, & definitio?

Durandus, Paludanus, & alii numero pauci contendunt probari ex sola Traditione (quæ certe sufficit ad revincendos Novatores) negant verò ex Scripturis deduci argumentum efficax ad transsubstantiationem stabiliendam, in quo recedunt à communi Theologorum, imo & Patrum sententia, quemadmodum Tridentini Pa-

tres sess. 13. cap. 4. declarant his verbis : *Quoniam autem Christus Redemptor noster corpus suum id, quod sub specie panis offerebat, verè esse dixit ; ideo persuasum semper in Ecclesia Dei fuit, idque nunc denudè sancta hæc Synodus declarat, per consecrationem panis- & vini conversionem fieri totius substantiæ panis, &c. quin & ipse Calvinus, Lutheranos infectans, agnoscit verba institutionis non posse in sensu proprio intelligi, quin intelligatur transsubstantiatio : De Papistis, inquit in refutatione consensus Orthodoxorum, non loquor, quorum tolerabilior, vel saltem magis verecunda est doctrina..... si opinio ex his duabus eligenda esset, mallet nos præsentiam Christi sub speciebus & accidentibus credere, quàm cum Zwinglianis veram & realem præsentiam contra tam aperta Christi verba negare. Itaque*

R. Probatur I. Efficaciter transsubstantiatio ex his Scripturæ verbis, *hoc est Corpus meum, hic est sanguis meus.* Ex dictis cap. 11. & 12. & ex consensu Lutheranorum, hæc verba verè & propriè corpus Christi Domini demonstrant, non verò ejus imaginem, seu figuram, aut virtutem : atqui falsa essent, si substantia panis & vini remaneret : Ergo reverà non remanet.

Minor ostenditur. Pronomen, *hoc, hic,* est demonstrativum substantiæ sensibiliter præsentis : atqui in hypothesi Lutheranorum substantia sensibiliter præsens est panis & vinum : Ergo illa substantia solum demonstratur. Porro falsum est, quod panis sit corpus Domini, & vinum sanguis ejus : Ergo necesse est ut dicatur non esse aliam substantiam sub speciebus panis & vini quàm corpus & sanguinem Domini.

Dices :

Dices: veræ sunt istæ propositiones, 1. de ferro candente, *hoc est ignis*. 2. De Christo Domino, *hic est Deus*. 3. De dolio vini, *hoc est vinum*. Atqui in illis propositionibus demonstratur substantia in alia contenta: Ergo similiter vera erit hæc propositio, *hoc est corpus meum*, etiamsi corpus includatur in substantia panis.

Dist. maj. Veræ sunt propositiones propter aliquas rationes, quæ non conveniunt Eucharistiæ, Concedo: Propter rationes, quæ Eucharistiæ competant, Nego maj. 1. Vel substantia ignis occupat poros ferri candentis, vel non: si primum, simpliciter vera dici potest propositio, quia non cernitur in ferro nisi ignis, ac proinde de eo affirmari potest, sicut de carbone ardente, quod sit ignis: si secundum, vera non est in sensu proprio, sed solum metaphorico, quatenus effectus sumitur pro causa, calor summus pro igne. 2. De Christo in specie humana apparente verè dicitur, *hic est Deus*; quia in hac propositione demonstratur suppositum, seu persona ipsa quæ est unica, habens naturam divinam & humanam; hoc enim nomine, *Deus*, significatur habens naturam divinam, sicut & nomine, *homo*, intelligitur habens naturam humanam: porro verum est, quòd *hic* sit habens naturam divinam & humanam: ergo de eo propriè dicitur, *hic est Deus*. At sicut dici non potest natura humana est natura divina; ita nec panis est corpus Christi, quia pars non potest prædicari de parte. 3. Ideo ostenso dolio dicitur, *hoc est vinum*; quia dolium se habet per modum vasis vinum continentis: ex communi autem hominum usu, non fas, sed contentum demonstratur; quis verbi gratia, ferens la-

genam plenam quærenti à se, quid præ manibus habeat, responderet seridè lagenam? hæc enim responsio est manifestè contra mentem interrogantis; quia ubi sermo est de vase, homines non attendunt continens, sed contentum: atqui panis, aut vinum non est vas institutum ad continendum aliud. Unde ridicula esset enuntiatio de pane, in quo nummus occultaretur, hoc est nummus.

Nec dicas Christum Dominum instituisse panem, tanquam vas ad continendum corpus suum. Namque 1. id gratis & sine fundamento diceretur. 2. Omnium aures offenderet, qui contenderet guttulam vini esse vas aliquod à Christo Domino institutum ad continendum sanguinem.

Instabis; De Sacramento, seu signo rem significatam continente, propriè affirmatur ipsa res significata, v. gr. de Columba, quæ apparuit in Baptismo Christi Domini, rectè dici potuit: *hic est Spiritus Sanctus*. Item, de linguis igneis, quæ infederunt capitibus Apostolorum: atqui Eucharistia est signum continens corpus Christi: ergo dici potest, *hoc est corpus Christi*; etiamsi remaneat panis.

Distinguo maj. Si res contenta per effectus sensibiles se prodat, Conced. maj. Tunc enim signum habet rationem alicujus vestientis, quod non attenditur, sed res ipsa vestita: hinc de Angelo, qui apparuit Abrahamo in forma humana, rectè dici potuit, *hic est Angelus*: si res contenta nullatenus exterius se prodat, Nego maj. Quis enim ostenso vel Baptismo, vel Sacramento Confirmationis, diceret, *hic est Spiritus Sanctus*, quia
sunt

sunt signa Spiritus Sancti; signa, inquam, non vacua, sed plena? Sicut ergo nec de infusione aquæ, nec de impositione manus, quamvis iis adsit Spiritus Sanctus, dici potest, *hic est Spiritus Sanctus*; quia non adest sensibilibiter, sicut adfuit in specie Columbæ, & linguarum ignearum, in quibus visibilibiter operabatur movendo & agitando illas; sic nec de pane, aut vino dici posset, *hic est Christus*, cum sensus minimè eum deprehendant.

His illud addere liceat, quod etiam si in verbis institutionis remaneret aliqua difficultas, non sequeretur propterea transubstantiationem ex Scripturis probari non posse. Annon mysteria Sanctissimæ Trinitatis, Incarnationis, & prædestinationis eruimus ex Scripturis, quamvis Hæretici eas variis explicationibus obvolvunt? Ecclesiæ est asserere quis sit verus Scripturarum sensus. Semper autem intellexit verba institutionis sensu à nobis exposito, ut mox constabit.

Probatur itaque 2. transubstantiatio ex constanti Traditione Ecclesiæ. 1. Patres laudati capite 12. pro præsentia reali, ac præsertim SS. Cyrillus Jerosolymitanus, Ambrosius, Gregorius Nyssenus, Joannes Damasc. clarè transubstantiationem agnoscunt; dicunt enim panem converti, & transmutari in corpus Domini, quomodo aquæ in nuptiis Canæ mutatæ sunt in vinum, & panis, quo vescabatur Christus Dominus, in propriam carnem vertebatur. Quòd autem testimonia hæc non possint intelligi de conversione solius formæ substantialis, remanente eadem materia, contra Durandum demonstravimus cap. 13. 2. Explicatio Lutheranorum, qui

consubstantiationem, seu unionem duarum substantiarum propugnant, inaudita est apud omnes Ecclesias Orientales: Nestoriani & Jacobitæ; qui sæculo quinto à Catholica Ecclesia recessere; Græci qui à nono sæculo divisi à Latinis permanent schismatici transubstantiationem consentunt, ut patet ex cap. 12. Ecclesia verò Latina impanantium & consubstantiantium errorem proscripsit, uti doctrinæ suæ contrarium, cum primum se prodidit, nempe undecimo sæculo in duobus Conciliis Romanis contra Berengarianos: in Concilio Lateranensi IV. anno 1215. contra Albigeneses: in Constantiensi etiam generali anno 1414. contra Wiclefum: in Florentino, seu in Decreto Eugenii IV. an. 439. ac tandem in Tridentino contra Lutheranos.

Dices 1. S. Chrysostomus Epist. ad Cæsarium scribit, etiamsi sint in Christo Domino duæ naturæ impermixtæ, esse tamen unum Filium, & unam personam, quemadmodum panis, *divina illum sanctificante gratia, mediante Sacerdote liberatus est appellatione panis, etiamsi natura panis in eo permanserit, & non duo corpora, sed unum corpus Filii prædicatur.* Ergo quarto sæculo non credebatur transubstantiatio. Ignorabatur etiam sæculo 5. Sic enim Theodoretus loquitur in Dialogo 1. contra Eutychianum, quem Eranistam vocat: *Salvator noster nomina permixxit, & corpori quidem id quod erat symboli nomen imposuit: symbolo verò, quod erat corporis sui. Hoc est, corpus suum appellavit panem, panem verò nomine corporis sui dignatus est. Sic vitem, inquit, seipsum qui nominavit, sanguinis nomen symbolo tribuit.* Et Dialogo 2. addit, *non naturam mutans, sed natura gratiam addens.* En, inquiunt Calvinistæ, sententia nostra

nostra clarè expressa, panis in Cœna manet, sed gratia & virtus substantialis corporis Christi ei additur. Non minùs expressè in eodem Dialogo, negat Theodoretus transubstantiationem, quàm præsentiam realem. Cùm enim Eutychianus probet naturam humanam in divinitatem esse conversam, exemplo Eucharistiæ, in qua substantia panis convertitur in corpus Domini, sic respondet Theodoretus: *Retibus, quæ ipse tenuisti, captus es; neque enim symbola mystica post sanctificationem recedunt à sua natura, manent enim in priore substantia, & figura, & forma, & videri tangique possunt, sicut prius.* Testis quoque est Gelasius suo sæculo, hoc est, sexto, eandem fuisse Ecclesiæ doctrinam, nempe substantiam panis & vini remanere, quemadmodum in Christo substantia inconfusa permansit: ait enim in libro de duabus naturis: *Sacramenta quæ sumimus, corporis & sanguinis Christi, divina res est, propter quod & per eadem divine efficimur confortes naturæ, & tamen esse non desinit substantia vel natura panis & vini.* Ergo.

Respondeo distinguendo anteced. Natura seu substantia panis non desinit, sed remanet, si per naturam intelligantur proprietates naturales, quo sensu nonnunquam usurpatur à Patribus tum Latinis, tum Græcis, Conc. Si intelligatur ipsa radix proprietatum, Nego anteced. Itaque veteres non infrequenter per naturam intellexerunt complexionem sensibilibus proprietatum, quam vulgus solet apprehendere tanquam rei cujusque naturam: *Substantia*, inquit Tertullianus libro de anima cap. 32. *est lapis, ferrum: duritia lapidis, & ferri est natura substantiæ, duritia communicat, substantia discordat;* S. August. in Psal. 68. conc. prima, ait ho-

minem per peccatum lapsum esse à substantia, in qua factus est. Et S. Petrus Chrysologus serm. 82. dixit Christum per resurrectionem non mutasse personam, sed substantiam, ubi substantia ponitur pro proprietatibus accidentalibus. Sic sanctus Chrysostomus homil. 4. ad populum de tribus Juvenibus in fornace ardenti Illæsis: *Potestas, inquit, rerum naturam mutavit.* Et Theodoretus citato Dialogo 2. de corpore Christi resurgentis scribit, *priorem suam retinuit formam, figuram, circum-scriptionem, & ut semel dicam, corporis substantiam.*

Quodd autem locis in objectione laudatis, Patres nomine naturæ, aut substantiæ panis intellexerint proprietates, probatur ex eorum scopo. Sanctus enim Chrysostomus agit contra Apollinaristas, ex quibus postea errorem hauserunt Euty-chiani, contra quos pugnant Theodoretus & Gelasius. Porro illi Apollinaristæ, seu, Polemiani, sic dicti ab auctore suo Polemio, docebant, Verbum ab æterno habuisse carnem, seu substantiam humanam, sed materiæ expertem, incircumscriptionem, permixtam cum divinitate, & ab ea indistinctam; & ita Verbum etiam in humanitate esse Patri consubstantiale: in Incarnatione verò assumpsisse formam exteriorem, circumscriptionem, & omnes humani corporis affectiones & proprietates, in quibus passus est mortuus, divinitate vices supplente animæ humanæ; peracto autem redemptionis mysterio post Ascensionem, Christum deposuisse illam humanam formam, & circumscriptionem. Ita refert ex S. Athanasio sanctus Epiphanius hæresi 77. Sanctus Gregorius Nazianzenus epist. ad Nectarium, & Facundus lib. 9. cap. 7. Ex quo perspicuum est, nec S. Chrysost.

soft. nec alios Patres habuisse probandum in Christo remanere essentiam carnis, cum hæretici illi contenderent, illam à divinitate esse inseparabilem; sed tota eorum controversia erat de proprietatibus, de circumscriptione, & complexione accidentium; negabant illi Hæretici ista retinere Christum, asserebant contra Patres laudati; & ad illud suadendum, proferebant exemplum Eucharistiæ, quæ ita dicitur corpus Christi, ut in ea remaneant impermixtæ naturales proprietates panis, quas Patres eo liberiori stylo naturam, seu substantiam nuncupabant, quod cavendos non haberent, sicut nos hodie, consubstantiantes Hæreticos; sic Scriptores secundi & tertii sæculi durioribus verbis mysterium Sanctissimæ Trinitatis expresse runt, quibus abstinendum fuit post exortam Arianorum hæresim.

Confirmatur I. Hæc responsio, quoad sanctum Chrysostomum. I. Ex ejusdem S. Doctoris verbis in citata epistola; ait enim de natura panis permanente. *Et non sunt duo corpora sed unum corpus Christi prædicatur; sic etiam hic divina insidente corpori natura, unum Filium, unam personam utrumque constituit.* Quæro autem à Lutheranis epistolam illam objicientibus, quomodo substantia panis, & corpus ex Virgine natum, non sint duo corpora? Non respondebunt cum impanatoribus, id fieri per unionem hypostaticam, propter rationes supra allatas, cum tamen fingi aliter non posset substantiam completam panis evadere unum corpus cum corpore ex Virgine nato. Restat ergo ut dicant cum Catholicis, solas species panis remanere, ac sub iisdem contineri corpus Christi, per modum contenti substantialis; sic enim efficitur, ut
sicut

sicut ante consecrationem species illæ, & substantia panis non erant duo corpora, sed unum corpus; ita post consecrationem, species panis & corpus Christi gerentes vices contenti substantialis, evadant unum corpus. 2. Ex Liturgia S. Chrysostomi, in qua dicitur panis mutari in corpus Christi, quæ verba hætenus intellecta sunt à Græcis de mutatione substantiali: & hom. 33. in Matth. *Ipse est, inquit, qui hæc dona sanctificat, transmutat.*

Confirmatur 2. quoad Theodoretum. Centuriatores Magdeburgenses Lutherani sentiunt Theodoretum ipsis adversari, monentque ipsum periculosè legi. 2. Nisi constans fuisset doctrina quinti sæculi, panem in corpus Domini converti, Eranistes seu Eutychianus non protulisset exemplum Eucharistiæ ad confirmandum suum errorem, quo docebat, ut monuimus, post Ascensionem desiisse naturam humanam modo supra explicato. Eutychianus ergo supponit conversionem panis, tanquam dogma à Catholicis receptum, ut ex eo contra ipsos argumentaretur. Enimverò nullus è Scriptoribus sive antiquis, sive recentioribus, meminit Eutychianos errasse circa Eucharistiam, quemadmodum S. Ignatius asserit de Ebionitis, & posteriores de Manichæis, quòd ex principiis erroris sui negaverint Eucharistiam esse veram Domini carnem. Orthodoxus autem in citato Dialogo exemplum Eucharistiæ, qua parte favet propriæ causæ, retorquet in adversarium, nempe circumscriptio, seu quantitas; & aliæ affectiones exteriores panis manent in sua natura & substantia, videntur, tanguntur: ergo à pari Christus Dominus cælum conscendens, non dimisit quæ erant carnis propria in quibus crucifixus est: Cor-

pus igitur Christi, inquit concludendo ratiocinium, *priorem habet formam & circumscriptionem*, & , *ut semel dicam corporis substantiam*; ubi vides sermonem esse de natura, seu forma exteriori tantum, non de interiori & essentiali; ultro enim Eutychiani fatebantur hanc semper mansisse unitam Divinitati.

Instabis: Theodoretus ait Dialogo secundo, Christum Dominum non naturam mutasse, sed naturæ gratiam addidisse, & visibilia symbola corporis sui appellatione tantum honorasse: Ergo.

Distinguo anteced. Ut supra naturam exteriorem, Concedo: Naturam interiorem, Nego anteced. Non dicit autem quam gratiam ei addat, an benedictionem, seu consecrationem, an ipsum Christum Dominum, qui ab Apostolo dicitur per excellentiam gratia Dei, Hebr. 2. vers. 9. In posteriori verò objectionis parte, nulla est difficultas; scribit enim Theodoretus *symbola corporis sui appellatione honoravit*, sine adverbio, *tantum*.

Urgebis; docet Theodoretus Patriarcham Jacob appositè appellasse vinum sanguinem uvæ, Genes. 49. sicut nos mysticum altaris vinum, sanguinem Christi vocamus & panem, corpus ejus; quia ipse se dixit vitem veram, Joan. 15. & granum frumenti, Joan. 12. Ergo in mente Theodreti, Eucharistia non est alio modo corpus & sanguis Domini, quàm ipse est vitis; & granum frumenti.

Nego conseq. Eruitur enim manifestè contra Theodreti mentem verbis ejus expressam: *Post sanctificationem*, inquit Eranistes, *quomodo hæc (symbola) appellat?* Orthodoxus, *corpus & sanguinem Christi*. Eranistes, *& credis te corpus Christi & sanguinem*

acci-

accipere? Orthodoxus, ita credo. Et cum negaret. Eranistes corpus Christi in cruce pendentis esse nostræ salutis meritum, urget illum Orthodoxus: Quod si tibi parvum & vile videtur corpus Christi in cruce, quomodo ejus typum (Eucharistiam) venerabilem & salutarem existimas? Cujus autem typus adorandus est salutaris, quomodo archetypum ipsum potes despiciere? Quæro ab Adversariis, utrum hæc possint intelligi de figura & imagine vacua, præsertim cum ipsi omnem cultum imaginibus denegent, nec panem in Cœna propositum ulla adoratione dignentur, quantumcumque virtute corporis Christi plenum existiment? Scribit Theodoretus symbola post invocationem mutata esse, & facta aliud, intelliguntur, inquit, ea esse quæ facta sunt, & creduntur, & adorantur, ut quæ illa sint quæ creduntur. Et in cap. II. I. ad Corinth. sic habet: Sacratissimam noctem in memoriam revocavit Apostolus, in qua typico Paschæ finem imposuit Dominus, & verum typi archetypum ostendit . . . non solum Apostolis, sed etiam Judæ proditori pretiosum corpus & sanguinem impertiit . . . significat (Apostolus) quod quemadmodum tradidit illum Judas, ita eum ignominia afficiunt, qui sanctissimum ejus corpus immundis manibus accipiunt. Sanè Calvinista non ita scriberet de Eucharistiæ Sacramento; quamquam Theodoretus voluit ex professo obscure scribere & ea reticere, quæ infidelibus creditu difficiliora viderentur, aperte dicendum non esse, inquit Dialogo 2. verisimile enim est aliquos abesse mysteriis non initiatos. Respondet Eranistes; Respondetur ænigmaticè. Vel ex his posterioribus verbis perspicuum est non satis æquos esse erga Theodoretum, qui arbitrantur ipsum malè sensisse de transubstantiatione; quæ enim æquitas insignem

Docto-

Doctorem , & benè de Ecclesia meritum erroris insimulare , propter verba obscura , ænigmatica , & mentem obvelantia , ne augustissimum Religionis nostræ mysterium indignis propalaretur? quin recta ratio hoc ab unoquoque iudicium exigit ipsum corde credidisse , quod præreverentia , qua affectus erat , non est ausus verbo aut scripto exprimere ; nisi sub figuris & ænigmatibus.

Dices 2. Si remanentibus speciebus panis & vini , desineret eorum substantia , Deus homines deciperet , ut probant Patres contra Marcionem docentem , Verbum non assumpsisse substantiam carnis humanæ , sed solum exteriores ejus species : imò Tertullianus contendit Verbum apparuisse sanctis Patriarchis in vera carne , *non quidem moritura* , inquit , *quia nondum nata* , sed statim dimittenda , aliàs mendacium fuisset in ejus sententiâ , si solam humani corporis formam oculis exhibuisset : Ergo

Distinguo anteced. Deus homines deciperet , nisi præmoneret non esse panem & vinum , Transeat : si præmoneret , Nego antec. Nam supposita revelatione , nec sensus decipiuntur cùm tale sit objectum , quale renuntiant ; est enim verus color , verus sapor panis & vini , vera quantitas & extensio. Ex his quidem signis naturalibus pronum est menti humanæ colligere substantiam ; quia secundum naturalem rerum ordinem ista nunquam separantur : sed cùm possint supernaturaliter separari , vir prudens hîc non ita certo unum ex alio inferet , quin judicet rem extraordinarie posse aliter se habere ; sicque Deus non decipiebat Patriarchas , sed locum dabat deceptioni , quod
certè

certè non est per se malum; aliàs incarnatio, per quam in specie humana exhibetur persona divina, esset mera deceptio: peccarentque homines, qui iusta de causa se occultant sub aliena veste, unde contingit alios decipi; sed illa deceptio eorum imprudentiæ est tribuenda.

Porro cùm Deus revelat rem non esse talem, qualis objicitur sensibus, jam nulla potest esse deceptio; omnes enim credere debent Deo loquenti. Hinc sancti Patres efficaciter revincebant Marcionitas negantes Christum Dominum fuisse verum hominem: quia cùm divinitus sit revelatum, Verbum factum fuisse carnem, sequitur Deum decepisse homines, si exteriorem speciem carnis tantùm præsetulerit.

Dices 3. ex speciebus Eucharisticis produci-
tur alia substantia, puta vermes: atqui substantia non potest naturaliter produci, nisi ex alia substantia. Ergo reverà species Eucharistiæ non sunt sine aliqua substantia materiali.

Distinguo maj. Producitur alia substantia supernaturaliter, Deo creante de novo materiam ad occultandum mysterium, ne experimentum humanæ rationis tollat fidei meritum, Conc. Naturaliter, & sine concursu Dei extraordinario. Nego major.

C A P U T . XV.

Utrùm Christus Dominus sit totus sub qualibet specie?

Negavit quidam nomine Præpositus tempore Alexandri III. hoc est, 12. sæculo. Bohemi pugnantes

pugnantes pro communione sub utraque specie, 15. sæculo eundem errorem amplexi sunt. Calvinus ex falso principio, quo supponit Eucharistiam non exhibere, nisi virtutem substantialem corporis Domini, consequenter deducit Christum totum in ea non contineri: *Sanè*, inquit lib. 4. Institut. cap. 14. §. 45. *si designare se totum voluisset, dicere poterat Christus: Ego sum.* Lutherus dubius fuit circa propositam quæstionem, quam dixit inutilem; quæritur tamen se falsò culpari, quòd non existimaret totum Christum esse sub utraque specie. Discipuli ejus in hac re inter se dissentiunt.

R. De fide est totum Christum contineri sub qualibet specie; ita enim definiit Concil. Tridentinum sess. 13. can. 3. *Si quis negaverit in Sacramento Eucharistiæ sub unaquaque specie . . . totum Christum contineri; anathema sit.* Præiverat Eugenius IV. in suo Decreto, his verbis: *Totus Christus continetur sub specie panis, & totus sub specie vini.* Et ante eum Martinus V. in Concilio Constantiensi sess. 45. ubi vult inquiri à suspecto de hæresi, num credat & asserat quòd peracta consecratione, sit vera caro, sanguis, anima & totus Christus.

Probatur 1. ex Scriptura Joan. 6. *Qui manducat me, & ipse vivet propter me*, non ait: *Corpus meum*, sed, *me*. Christus autem est totum constans ex duabus naturis, & personalitate divina.

Probatur 2. ex Traditione.

S. Ignatius Martyr epist. ad Smyrneneses scribit Eucharistiam esse carnem Verbi, quæ passa est, & quam *Pater suscitavit*. Non vivet autem, nisi adjuncto sanguine & anima.

S. Ephrem lib. de non scrutanda natura divina cap. 5. ait : *Agnum ipsum integrè comedis.*

S. Hieronymus contra Jovinianum, asserit nos in Eucharistia accipere Christum.

S. Cyrillus Jerosolymitanus catech. 4. dicit eos, qui communicant, esse Christiferos.

Sanctus Chrysostomus libro 3. de Sacerdotio sic exclamat : *O miraculum, qui cum Patre sedet sursum, in illa hora omnium manibus pertractatur !*

S. Augustinus supra laudatus docet Christum, cum instituit Eucharistiam, seipsum manibus portasse.

Sanctus Cyrillus Alexandrinus, & Concilium Ephesinum, de quibus supra, asserunt contra Nestorium, Eucharistiam non esse antropophagiam, sed vivificam Verbi carnem.

Huc referri debent, quæ supra de adoratione Eucharistiæ diximus; caro enim non est adoranda, nisi propter unionem cum divinitate. Ergo tota Traditio agnovit divinitatem in Eucharistia; ac proinde Patres Tridentini novam doctrinam non induxerunt, sed antiquam, & ab Apostolis traditam asseruere.

Q. 2. *Quomodo Christus Dominus totus redditur præsens in Eucharistia, cum verba institutionis & promissionis non indicent, nisi corpus ejus & sanguinem.*

Resp. Patres Tridentini sess. 13. cap. 3. *Existere . . . corpus . . . sub specie panis, & sanguinem sub vini specie, ex vi verborum; ipsum autem corpus sub specie vini, & sanguinem sub specie panis, animamque sub utraque, vi naturalis illius connexionis & concomitantiae, qua partes Christi Domini, qui jam ex mortuis resurrexit, non amplius moriturus, inter se copulantur : divinitatem por-*
rò

ro propter admirabilem illam ejus cum corpore & anima hypostaticam unionem. Cum verò totus sit in Verbo Pater, sicut & Spiritus Sanctus propter circumin-
fessionem, de qua in Tract. de Trinitate, sequi-
tur tres Personas SS. Trinitatis præsentem esse,
adorari & sumi in Eucharistia.

Q. 3. *Quare solum corpus ex vi verborum ponitur sub specie panis, & solus sanguis sub specie vini?*

R. Quia ex dictis, ubi de Sacramentis in ge-
nere, verba seu formæ Sacramentorum in tan-
tum operantur, in quantum significant: atqui
hæc verba, *hoc est Corpus meum, hic est Sanguis meus*,
significant, priora quidem corpus, posteriora ve-
rò sanguinem, & nihil amplius. Ergo reverà po-
nunt corpus sub specie panis, sanguinem verò sub
specie vini, nihil prætereà. Qua propter colli-
gunt Theologi, quòd si in triduo mortis conse-
crassent Apostoli, corpus fuisset sub specie panis
sine anima & sanguine; & sanguis sub specie vini,
sine corpore & anima; quia tunc nec anima ne-
cessariam habebat connexionem cum corpore &
sanguine, nec sanguis cum corpore, & vicissim;
cùm tunc temporis hæc ab invicem essent separa-
ta. Secus dicendum est de Divinitate, quæ cor-
pori etiam mortuo, sic ut sanguini fuit semper
conjuncta.

Q. 4. *Hæc doctrina estne credenda fide divina?*

R. Quamvis sit apud Catholicos certissima, de
fide tamen non est: tum quia Concilium non ita
eam definiit, nec in canonibus expressit: tum quia
nec in Scriptura, nec in Traditione expressè ha-
betur, quomodo Christus totus contineatur in
Eucharistia, sed solum colligitur ex forma quam

diximus cap. 8. ita reponendam in recensitis Domini verbis, ut hæreseos non sint arguendi, qui preces necessariò addendas existimant.

Q. 5. *Estne de fide Christum totum contineri in qualibet parte hostiæ, seu calicis?*

R. De fide est totum contineri, facta separatione; sic enim definiit Concil. Tridentinum sess. 13. can. 3. his verbis: *Si quis negaverit in venerabili Sacramento Eucharistiæ sub unaquaque specie, & sub singulis cujusque . . . partibus, separatione facta, totum Christum contineri; anathema sit.* Probatur autem ex constanti universalis Ecclesiæ Traditione, quæ peracta consecratione, eundem panem frangere consuevit in plures distribuendum, sicut & eundem calicem omnibus assistantibus porrigere, exemplo Christi Domini, qui de Calice dixit, *bibite ex hoc omnes*, Matth. 26.

Dixi, *facta separatione*; Nam ante separationem non ita certum est contineri totum in qualibet parte, quamvis Theologi communiter id asserant; cum per separationem non fiat nova consecratio, quæ de novo sistat corpus Christi præsens, sicut per fractionem speculi fit nova reflexio, ex qua apparet duplex imago. Neque propterea erit pluries replicatum corpus Christi in unica hostia, sicut nec replicatur anima rationalis in uno corpore, licet sit tota in singulis ejus partibus; numerus enim supponit divisionem.

Q. 6. *Christus Dominus in Eucharistia existens, potestne agere, v. gr. videre, audire, movere se, aut moveri?*

R. Non potest elicere ullam actionem, quæ dependeat à sensibus; quia hujusmodi actio requirit aliquam extensionem in organo, qua caret cor-

corpus Christi. Potest tamen moveri per accidens ad motum specierum, quemadmodum ad motum navis movetur nauta.

Dixi, *actionem*, quæ dependeat à sensibus; Nam actus scientiæ infusæ, & visio beatifica, cum non pendeant ab organo corporis, elici possunt.

Q. 7. *Peccatores recipiuntne verum Christi corpus?*

R. Constat tum ex Scriptura, tum ex Traditione, illud verè & realiter recipere, sed in judicium & condemnationem: *Qui enim manducat & bibit indignè*, ait Apostolus I. Cor. II. *judicium sibi manducat & bibit, non dijudicans corpus Domini.* Ad quæ verba S. Augustinus contra Cresconium cap. 26. *Ecce quomodo obsunt divina & sancta malè utentibus; cur non hoc modo & baptisumus?* Supple, erit verus & bonus, licèt non profit malè dispositis. Huc revocandi sunt plures è textibus Patrum laudatis pro præsentia reali & transubstantiatione, qui evincunt constantem Ecclesiæ traditionem circa propositam quæstionem.

Dices: S. Cyprianus serm. de lapsis, refert quendam idololatriæ crimine pollutum, cum ausus fuisset ad sacram mensam accedere, non reportasse nisi cineres. S. Augustinus disertè scribit tract. 26. in cap. 6. Joan. peccatores non manducare corpus Domini; *Hoc est*, inquit, *illam manducare carnem in Christo manere, & illum in se manentem habere, ac per hoc qui non manet in Christo, & in quo non manet Christus, procul dubio non manducat carnem ejus licèt carnaliter & visibiliter premat dentibus Sacramentum corporis & sanguinis Christi, sed magis tantæ rei Sacramentum ad judicium sibi manducat.* Unde tract. 59. in Joan. sic loquitur: *Apostoli manducabant panem Dominicum, hic (Judas) pa-*

nem Domini contra Dominum. Innocentius quoque tertius libro 4. Myster. Missæ cap. 11. negat corpus Domini corrodi à muribus, sed tunc pristinam panis substantiam redire. Eandem sententiam prius docuerant Guitmondus libro 2. & Magister Sententiarum in 4. dist. 13. & alii apud Estium dist. 9. part. 3.

Respondeo Sigillatim.

Ad S. Cyprianum, textus sancti Doctoris favet doctrinæ Catholicæ; cur enim symbola in manibus sacrilegi conversa sunt in cineres, nisi quia, iis manentibus integris, non recedit corpus Domini? Sacrilegus ergo ille manducasset corpus Domini, si species integras sumpisset.

Ad S. Augustinum, Distinguo, non manducat spiritualiter carnem Domini, in quo Dominus non manet, Concedo: Non manducat sacramentaliter, Nego: Namque ex Concilio Tridentino sess. 13. cap. 8. *Rectè & sapienter Patres nostri tres rationes hoc . . . Sacramentum accipiendi distinxerunt.*

Quidam, ut peccatores, sacramentaliter duntaxat recipiunt: alii spiritualiter tantum, nimirum qui fide viva, quæ per dilectionem operatur, Christo uniri cupientes, sine sacramentio fructum sacramenti ex parte percipiunt. Tertii sacramentaliter & spiritualiter, qui rectè dispositi ad sacram mensam accedunt. Posset addi quartus modus, sed extraordinarius sumendi hoc Sacramentum, nempe materialiter tantum: nam infidelis nequidem sacramentaliter ederet Eucharistiam, cum non sit homini nondum baptizato signum gratiæ, comederet itaque sacra dona sicut corrodi possunt à muribus.

Con-

Confirmatur solutio , & quidem ad mentem S. Augustini , observando tria in manducatione contineri. Primum est comminutio cibi , quæ fit in ore , dentium ministerio. Secundum est trajectio cibi in stomachum. Tertium, & illud præcipuum, est ipsa refectio , seu nutritio , quæ fit in naturali manducatione per conversionem cibi materialis in substantiam comedentis. Hoc postremo deficiente , verè & propriè dicimus hominem , cujus stomachus exceptum cibum statim rejicit , cibum non capere , manducare non posse , quamvis alimenta dentibus conterat , & in stomachum trajiciat.

Quemadmodum autem nutritio materialis & animalis fit calore naturali ; sic nutritio supernaturalis & spiritualis fit fide viva , sive habituali , ut in infantibus ; sive actuali & habituali simul , ut in adultis ; per hanc enim unimur Christo Domino , & in eum transformamur. Quæ cum desit in peccatoribus ; verè scripsit S. Augustinus , peccatores panem Dominicum non manducare , sed panem Domini : quia licèt symbola corpore ejus plena accipiant ; ipso tamen spiritualiter non reficiuntur. Illud ipsum discrimen exponit S. Doctor in Commentario in Psal. 21. concione prima , ubi docet justos in mensa Domini edere & saturari , laudemque Dei esse eructationem saturitatis eorum ; peccatores verò manducare quidem , & adorare idem corpus , sed minimè saturari.

Verum quidem est Patres Tridentinos hunc trinum communicandi modum non proposuisse tanquam fide divina credendum , cum nihil de eo in Canonibus expresserint : attamen hæc doctrina tam constans est apud Catholicos , ut Gregorius

XI. apud Reginaldum prohibuerit, ne quidam Professores Cæsaraugustani contrarium docerent.

Ad Innocentium III. & alios, non ita clarè eruitur ex Scriptura & Traditione corpus Domini remanere; dum species sacramentales corroduntur à muribus, quàm cùm à peccatoribus comeduntur; unde circà illum extraordinarium casum liberius opinati sunt veteres. Nihilominus cùm fide divina constet Eucharistiam esse Sacramentum permanens, sequitur corpus Christi adesse speciebus, quamdiu integræ perseverant; nec ullum est fundamentum in Scriptura aut traditione admittendi illam exceptionem, imò S. Bernardus inter errores Abailardi recenset ipsum negasse corpus Domini à muribus corrodi; & Optatus Milevitanus scripsit quarto sæculo Donatistas Eucharistiam à Catholicis consecratam projecisse canibus, qui statim in rabiem conversi, dominos suos uti reos corporis Domini, dilaniarunt.

CAPUT XVI.

Quis est Minister Eucharistiæ?

Sanctus Irenæus lib. i. cap. 9. adversus hæreses, refert de quodam Marco hæretico & mago ipsum mulieres adhibuisse ad conficiendam Eucharistiam. Idem testatur sanctus Epiphanius hæresi 49. de Collyridianis.

Waldenses tribuebant potestatem consecrandi laico probo, quam negabant Sacerdoti impio, ex Reinerio lib. contra Waldenses cap. 5. *De Sacramento Eucharistiæ*, ait ille de Waldensibus loquens, dicunt quòd *Sacerdotes in mortali non possint conficere.*

Luthe-

Lutherus lib. de captiv. Babyl. cap. de Ordinatione contendit omnes Fideles virtute Baptismi habere potestatem consecrandi Eucharistiam, sed neminem ea potestate uti debere, nisi sit legitime vocatus.

Contra hujusmodi errores ad quæstionem propositam,

R. Primò solus Sacerdos est Minister faciendæ Eucharistiæ: est de fide; ita enim definiit Concilium IV. Lateranense cap. *Firmiter*, his verbis: *Hoc itaque Sacramentum nemo potest conficere, nisi Sacerdos, qui ritè fuerit ordinatus*: Concilium Tridentinum quoque sess. 22. cap. 1. de Apostolis loquens, sic habet: *Eisdem, eorumque in Sacerdotio successoribus, ut offerrent, præcepit per hæc verba, hoc facite in meam commemorationem, uti semper Catholica Ecclesia intellexit, & docuit*. Et can. 2. *Si quis dixerit illis verbis, hoc facite in meam commemorationem, Christum non instituisse Apostolos Sacerdotes, aut non ordinasse, ut ipsi, alique Sacerdotes offerrent corpus & sanguinem suum; anathema sit*.

Probatur 1. ex Scriptura, Luc. 22. *Hoc facite in meam commemorationem*, quæ verba ex concilio Tridentino mox laudato, diriguntur ad solos Sacerdotes.

Probatur 2. ex Traditione Ecclesiæ.

S. Justinus Apol. 2. sic exhibet ordinem cœtuum Christianorum: *Qui fratribus præest, rerum universarum Patri per nomen Filii & Spiritus Sancti, offert Eucharistiam juxta mandatum, quod Apostolis Christus dedit, cum accepto pane, dixit, hoc facite, &c.*

Tertullianus libro de præscript. cap. 41. arguit Hæreticos, quod laicis Sacerdotalia munia

concederent. Et libro de Corona militis cap. 3. refert ad traditionem Apostolicam, quòd Eucharistiam non de aliorum manu, quàm præsidentium sumimus.

Concilium Nicænum primum generale, canone 18. vetat ne Presbyteri *ab iis* (Diaconis) *qui potestatem non habent offerendi, Christi corpus accipiant.*

S. Epiphanius Epist. ad Joannem Jerosolymitanum, se excusat, quòd in ejus Diœcesi Presbyterum ordinavit, hac ratione: *Ne multitudo sanctorum fratrum ibidem degentium sacris privarentur mysteriis, cum non haberent, qui sibi divina Sacramenta conficerent.*

S. Hieronymus Dialogo contra Luciferianos tanquam rem certissimam apud omnes Catholicos supponit solum Sacerdotem posse Eucharistiam conficere: *Hilarius Sardus, inquit, cum Diaconus de Ecclesia recesserit neque Eucharistiam conficere potest, Episcopos & Presbyteros non habens; Ecclesia enim non est, quæ non habet Sacerdotes.*

Denique à quinto sæculo, quo obiit S. Hieronymus, usque ad præsens tempus, Ecclesia sive Orientalis, sive Occidentalis, credidit solis Sacerdotibus competere potestatem conficiendi Eucharistiam, nec hactenus passa est inferiores Clericos illud munus sibi arrogare.

Dices: Neque ex Scriptura, neque ex Traditione certò colligi potest, potestatem consecrandi corpus Domini ita esse Sacerdotibus propriam, ut aliis, præsertim Diaconis, committi nullatenus possit. Non ex Scriptura, siquidem laudata verba, *hoc facite in meam commemorationem*, S. Paulus 1. ad Cor. 11. intelligit dicta omnibus fidelibus,

bus; ut cum grata recordatione Passionis Christi Domini ad sacram mensam accedant. Deinde etiam si quis eas extenderet ad Apostolos tanquam Ministros designatos tanti Sacramenti, non continuo excludendi essent ab hoc ministerio cæteri fideles; nonne enim Apostolis dictum est, *docete omnes Gentes, baptizantes eos in nomine Patris, &c.*? An propterea Diaconi & reliqui fideles, etiam mulieres, non possunt baptizare? Nonne per Baptismum omnes Christiani facti sunt Deo regnum & Sacerdotes, ut habetur Apoc. 1. & 1. Petri cap. 2.? Nonne colligitur quoque ex Traditione? Namque 1. Tertullianus lib. de Castitate cap. 7. potestatem offerendi sicut & baptizandi omnibus communem facit, sic enim scribit: *Nonne & laici Sacerdotes sumus? Scriptum est, regnum quoque nos & Sacerdotes Deo & Patri suo fecit, differentiam inter ordinem & plebem constituit Ecclesiæ auctoritas ubi tres, Ecclesia est, licet laici Igitur si habes jus Sacerdotis in temetipso, ubi necesse est; habeas oportet etiam disciplinam Sacerdotis, si necesse sit habere jus Sacerdotis, nempe ut laicus non sit bigamus, & à secundis nuptiis absteineat; nam Sacerdotes bigami ministrare prohibentur: in necessitate autem laicus tingit & offert: ergo laicus non debet esse bigamus. En ratiocinium Tertulliani secundas nuptias improbantis. 1. Primis Ecclesiæ sæculis Diaconi præficiebantur Parochiis regendis, ut constat ex Concilio Eliberitano can. 77. & ex Epistola 11. sancti Cypriani, 3. Concilium Ancyranum anno 314. de Diaconis lapsis, sic statuit can. 2. *Diaconi similiter, qui immolaverunt, honorem quidem habeant, cessare verò ab omni sacro ministerio, sive à pane, sive à calice offerendo, vel prædi-**

prædicando, debent. Ergo tunc temporis oblatio panis & calicis inter munera Diaconalia numerabatur. Sed ubi crevit numerus Sacerdotum, placuit Ecclesiæ ut illorum esset singulare privilegium. Sic enim loquuntur Patres in Concilio I. Arelatenſi can. 15. de Diaconis, quos cognovimus multis in locis offerre, placuit minimè fieri debere. 4. Ex Theodoro lib. 1. hist. cap. 22. Frumentius à sancto Athanasio ordinatus Indorum Episcopus, cum esset adhuc laicus, suavit Mercatoribus in Indiam commeantibus, ut ex more institutoque Romanorum simul convenirent, ad divina mysteria celebranda. Ergo in casu saltem necessitatis, Eucharistia ab aliis, quàm à Sacerdotibus, potest confici.

Nego antec. Et ad singula momenta in ejus confirmationem prolata respondeo.

Ad primum ex Scriptura petitem. Mirum non est si Apostolus verba Domini, *hoc facite in meam commemorationem*, ad communicantes restringat, cum illos solos alloquatur; omnes enim tam qui participant, quàm qui conficiunt, id debent agere in memoriam Passionis Dominicæ. Cæterum Adversarii non concedent laudata Domini verba de sola Eucharistiæ perceptione esse intelligenda; aliàs nullum in Scriptura haberent præceptum celebrandi suam cœnam. Quod autem *hoc facite*, non extendatur ad laicos in casu necessitatis, sicut, *docete baptizantes*, habemus ex perpetua universalis Ecclesiæ Traditione & praxi; disparitatis verò ratio est sola Domini voluntas; quanquam hæc afferri possit convenientia, quòd Eucharistia non sit tantæ necessitatis, ut omnis homo debeat esse ejus Minister sicut & Baptismi.

Bapti-

Baptizati quidem dicuntur Sacerdotes, sicut & reges; sed in sensu mystico quatenus dominantur suis affectibus, & offerunt spirituales hostias, ut loquitur S. Petrus, hoc est fructum labiorum suorum, orationes, & bona opera: *non utique*, ait sanctus Augustinus lib. 20. de Civ. cap. 1. *De solis Episcopis dictum est*, Apocal. 20. *qui propriè jam vocantur in Ecclesia Sacerdotes: sed sicut omnes Christianos dicimus propter mysticum chrisma; sic omnes Sacerdotes, quoniam membra sunt unius Sacerdotis. De quibus Apostolus Petrus inquit, plebs sancta, regale Sacerdotium. Igitur sicut improprie sunt reges, sic & Sacerdotes.*

Ad secundum, duplex est responsio, alii contendunt Tertullianum hunc scripsisse librum, cum jam ad Montanum defecisset, ac proinde nullius esse momenti, quæ inde proferuntur: *De Tertulliano nihil respondeo*, inquit S. Hieronymus contra Helvidium, *quam Ecclesiæ hominem non fuisse. Et Vincentius Lirinensis capite 18. ait, consequens error hominis, detraxit scriptis probabilibus auctoritatem*, maxime cum videatur retractare in libro de castitate, quæ Catholicus antea scripserat libro de præscript. cap. 41. contra hæreticos pro veritate, quam hic tuemur: *Mulieres hæreticæ*, inquit, *quam procaces, quæ audeant docere. forsitan & tingere. Ordinationes eorum temerariæ, leves, inconstantes. . . alius hodie Episcopus, cras alius; hodie Diaconus, qui cras lector; hodie Presbyter, qui cras laicus, nam & laicis Sacerdotalia munera injungunt.* Alii conantur eum conciliare cum semetipso: nempe lib. de præscript. negat laicos esse Sacerdotes strictè & propriè loquendo; libro vero de castitate, affirmat sumpto nomine Sacerdotis

dotis in latiori significatione, quatenus laici per Baptismum fiunt membra Christi Summi Sacerdotis, & in illo offerunt spirituales hostias, ut loquitur S. Petrus, scilicet fructus labiorum, seu laudes divinas, & alia bona opera.

Ad tertium, Diaconi præficiébantur Parochiis, ubi deerant Presbyteri, ut obirent ea officia, quæ pertinent ad Diaconos; plebem regerent, docerent, baptizarent: Eucharistia à Sacerdotibus confecta reficerent, psalmodia & laudibus divinis recrearent. Sed nulla auctoritate probari potest eos consecrasse, & peccata remisisse contra universalis Ecclesiæ Traditionem, qualem exposuimus.

Ad quartum, Patres Ancyрани supponunt Diaconorum esse offerre, distingo: offerre suo modo nempe ministrando, & cooperando Sacerdoti, Concedo: modo Sacerdotum proprio, Nego. Nam Diaconi ex can. 4. Concilii IV. Carthaginensis, non ad Sacerdotium, sed ad Ministerium consecrantur. Unde S. Hieronymus Epist. 85. ad Evagrium, reprimens audaciam Diaconorum qui cum haberent curam rerum temporalium, atque ideo impensius observarentur juxta illud proverbium, *pecuniæ obediunt omnia*, supra Presbyteros sese extollebant, sic scribit: *Quis patiatur, ut mensarum, & viduarum minister (Diaconus) supra eos sese offerat, ad quorum preces Christi corpus, sanguisque conficitur?* Itaque Diaconi offerunt i. quia ad ipsorum officium pertinet à populo oblationes accipere, & ex iis seligere materiam sacrificii, quam præparant benedicendo apud Græcos, & in quibusdam Galliæ Ecclesiis, ut Ambianensi, & Virdunensi, ubi Diaconus benedicit aquam, quam vino admiscet, deinde offert calicem Sacerdoti, cum

cum quo pronuntiat consuetam orationem sustentando calicem, *offerimus tibi Domine calicem*, &c. Quo sensu potest admitti lectio actuum passionis S. Laurentii apud Sanctum Ambrosium l. 1. de Officiis cap. 41. ubi sic refert Sanctum Martyrem Xystum alloquentem, *Experire utrum dignum Ministrum elegeris, cui commisisti Dominici sanguinis consecrationem*; quamquam editio Romana habeat, *Dominici sanguinis dispensationem*. Hanc oblationem præparatoriam & ministerialem innuere videntur Patres Ancyрани; siquidem de Diaconis lapsis; aliter statuunt, ac de Presbyteris similiter lapsis; de his enim can. 1. simpliciter & absolute pronuntiant debere offerre, de illis vero can. 2. prohibitionem restringunt ad panem & vinum. *Cessent*, inquiunt, *à pane, sive à calice offerendo*. 2. Diaconi offerunt corpus & sanguinem Christi Domini, quatenus populo distribuunt; hoc sensu Cyprianus tract. de lapsis, scribit Diaconum calicem præsentibus offerre.

Quod spectat Concilium Arelatense, Morinus; & nonnulli Theologi existimant Diaconos quidem aliquando præsumpsisse Eucharistiam conficere, atque adversus tantam audaciam Patres Arelatenses insurgere; verum alii Theologi contendunt non agi de ipsa confectioe Eucharistiæ, alias Concilium inultum non reliquisset illud crimen; sed de distributione Eucharistiæ, quam Diaconi sine conscientia Presbyteri, aut Episcopi sibi arrogare non debent, ut habetur can. 18. ejusdem Concilii, & mox dicturi sumus.

Ad quintum, per divina mysteria intelligi debent orationes; Rufinus enim, ex quo Theodoretus historiam mutatus est, sic refert lib. 1. hist.

ut ritu Romano orationis causa confluerent. Socrates etiam ante Theodoretum sic scripserat lib. 1. cap. 19. ut Christianorum more Deum precarentur : cœvus quoque Sozomenus lib. 2. c. 24. ut orationis causa in unum convenirent, ac Romano more collectas celebrarent.

R. 2. Eucharistiæ dispensandæ Minister ordinarius est solus Sacerdos : extraordinarius vero Diaconus.

Prima pars probatur, tum ex Scriptura jam laudata, hoc facite in meam commemorationem, quæ verba ex dictis ad solos Sacerdotes diriguntur, tum ex Traditione. Verba Sancti Justini, & Tertulliani supra retulimus, quibus testantur Eucharistiam percipi de manibus Præsentium.

Secunda pars probatur ex constanti universalis Ecclesiæ Traditione. S. Cyprianus cit. tractatu de lapsis, observat Diaconum offerre calicem præsentibus. Concilium Nicænum dum improbat can. 18. quod Diaconi Eucharistiam porrigerent Presbyteris, supponit solitos fuisse eam omnibus fidelibus distribuere. Idipsum testantur acta passionis Sancti Laurentii, liber octavus Constitutionum Apostolicarum cap. 28. & Ordo Romanus. Unde Concilium Aquisgranense c. 7. sic loquitur, sicut in Sacerdote consecratio, ita in Ministro dispensatio Sacramenti est : ille oblata sanctificat, hic sanctificata dispensat, si tamen accedat licentia Episcopi aut Presbyteri, quemadmodum de Baptismo solemni diximus. Diaconus, inquit Concil. IV. Carthaginense canone 38. præsentem Presbytero Eucharistiam corporis Christi, populo, si necessitas cogat, jussus eroget. Verum cum apud nos usus ille amplius non vigeat, & rei novitas scandalum movere posset, à solo Episcopo licentia

centia expectanda est, nisi obstet urgens necessitas, qualis censeretur, si Viaticum deferendum esset ad periculose decumbentem, absente Presbytero.

Q. 2. *Clerici Diaconis inferiores possuntne Eucharistiam dispensare?*

R. Non possunt solemniter, & in cœtu publico, possunt in casu necessitatis, utraque responsionis pars probatur ex usu & praxi Ecclesiæ. Pro priori parte habemus S. Cyprianum tract. de lapsis, acta passionis S. Laurentii, Concilium Arelatense I. Nicænum I. & Carthaginense IV. in quibus munus illud non aliis Ministris, quàm Diaconis tribuitur; quin & Concilium Laodicænum sub Sancto Sylvestro sic statuit cap. 25. contra Subdiaconos, *non oportet Subdiaconos panem dare, vel calicem benedicere.* Posterior pars probatur, tum ex actis passionis Sancti Tharsici, de quo Martyrologium Romanum ad diem decimam quintam Augusti, & ex Epistola Innocentii I. quibus constat Acolythos olim detulisse Eucharistiam ad absentes: tum ex historia sæpius laudata Eusebii lib. 6. cap. 44. referentis Presbyterum per famulum misisse Eucharistiam ad Serapionem ægrotantem; tum ex dictis cap. 3. ubi fusc ostendimus, fideles primis sæculis solitos fuisse Eucharistiam domum asportare ad spiritualem suam refectionem. Cæterum quamvis usus ille hodie inoleverit, ut Eucharistia per inferiores Ministros, vel etiam laicos dispensetur, potest tamen ea, iudicio Episcopi, necessitas occurrere, v. gr. tempore grassantis pestis, ut iis facultas illa concedatur.

D. Habert Theolog. Tom. V.

Nn

Q. 3.

Q. 3. *Potestne quis sibi ipsi Eucharistiam ministrare?*

R. 1. Potest Sacerdos celebrans; ita definiit Concilium Tridentinum sessione 13. canone 13. *Si quis dixerit non licere Sacerdoti celebranti seipsum communicare, anathema sit.* Probatur, tum exemplo Christi Domini, qui seipsum communicavit, ex Sancto Chrysostomo hom. 83. in Matth. & Sancto Hieronymo quæst. 2. ad Hebidiam, ubi Christum vocat convivam, & convivium: tum ex usu constanti universalis Ecclesiæ, qui ab Apostolis descendere credendus est, cum S. Justinus secundo sæculo apol. 2. & Tertullianus tertio sæculo lib. de corona militis cap. 3. testentur, eum, qui præest sacris, Eucharistiam ita præsentibus distribuere, ut eam ab ipsis non accipiat. Debet tamen Sacerdos non celebrans in ægritudine seipsum communicare, si nullus adsit nisi Diaconus. Ita Durandus in 4. dist. 14. q. 4. & Suarez, 3. parte q. 32. sect. 3. idipsum posse eundem Sacerdotem diebus solemnioribus ibidem docet Suarez, & alii nonnulli Theologi, modo non adsit scandalum.

Dices, nullus potest sibi ministrare alia Sacramenta: ergo.

Nego conseq. 1. quia non est paritas quærenda in iis, quæ ex mera Dei voluntate pendent. Deinde Christus Dominus ab alio baptismum suscepit, non verò Eucharistiam. 3. alia Sacramenta in usu consistunt, & ex vi formæ dicunt habitudinem ad personam distinctam. *Ego te baptizo, Ego te absolvo.*

R. 2. Licet antiquitus Ecclesia ob graves & urgentes rationes indulgeret laicis, ut Eucharistiam

ristiam in proprias domos referrent, eamque privatim propriis manibus sumerent; attamen cum à pluribus sæculis eadem rationes non existant, Concilium Trident. sess. 13. cap. 8. declarat retinendum morem, quem dicit ab Apostolis descendere, ut laici à Sacerdotibus communionem accipiant. Ab hac disciplina dispensatum esse ferunt decimo sexto sæculo cum Maria Scotorum Regina, quæ in carcere detenta, & morti proxima Eucharistiam quam apud se servabat, sibi ministravit.

Q. 4. *Licetne cuilibet Sacerdoti Eucharistiam ministrare?*

R. Cum Pastorum sit oves pascere, non licet aliis Sacerdotibus sine pastorum licentia Eucharistiam, & alia Sacramenta administrare. Communiter autem præsumitur licentia, primò, cum admittitur Sacerdos ad sacrum faciendum; optat enim Synodus Tridentina sess. 22. cap. 6. ut in singulis Missis fideles astantes sacramentali Eucharistiæ perceptione communicent. 2. cum ex privilegio in quibusdam oratoriis conservatur Eucharistia, ibidem distribui potest fidelibus, etiam extra Missæ Sacrificium, ad hoc enim præcipue conservari permittitur.

Dixi, *communiter*; namque 1. Viaticum non licet ministrare, nisi Pastori, aut aliis Sacerdotibus ab eo deputatis, hæc exceptio expressè habetur in Regularium privilegiis. Quod si contra præsumperint, excommunicationem latæsententiæ summo Pontifici reservatam incurrunt, Clementina *Religiosi* de privilegiis, nisi fortè abessent aut renuerint illi, quorum interest ministrare. 2. infantes non admittendi sunt prima

vice ad sacram Mensam sine iudicio & consensu proprii Pastoris juxta disciplinam, quæ ubique viget; aliàs multi ignorarent fidei rudimenta, regulas vitæ Christianæ, & dispositiones necessarias ad dignam Sacramentorum perceptionem; cùm experientia constet plebeios, nisi hujusmodi necessaria disciplina, non posse compelli ad ista perdiscenda. 3. expresse prohibitum est privilegiatis Eucharistiam ministrare die Sancto Paschatis, ut exprimitur in eorum privilegiis. Unde vel fictitia est Bulla Nicolai V. qua tollitur talis exceptio, ut multi Theologi contendunt, vel saltem usu recepta non est, ut constat ex praxi. Cùm autem multi Episcopi hanc extendant prohibitionem à Dominica Palmarum usque ad Dominicam in Albis inclusivè, dubium non est, quin ejusmodi disciplinæ faveat laudata Clementina contra Regulares, qui sine jurisdictione Communionem laicis administrant. Nec excusandi sunt, qui illis diebus Eucharistiam ministrant his duntaxat laicis, qui devotionis causa accedunt, cùm jam præcepto Communionis Paschalis satisfecerint, aut sint deinceps satisfacturi; siquidem non tantum finis, sed & verba legis, quæ hic absolute loquitur, attendenda sunt. Non liceret Clerico verb. gratia contra prohibitionem ingredi tabernas ad manducandum, & bibendum, sub eo prætextu, quòd ibi se gereret absque scandalo & intemperantiæ vitio, quæ Legislatores sua lege amovere solum intendit; nam Theologorum effatum est legem obligare, etiamsi finis illius respectu aliquorum tantum desinat.

Q. 5. *Nunquid privilegiati possunt tempore Paschali Eucharistiam ministrare vagis & peregrinis, qui nullam habent Parochiam?*

R. Minimè; hi enim eam fortiuntur Parochiam ad quam deveniant; nec in ægritudine sua Viaticum & Extremam Unctionem accipiunt ab alio, quàm à Parocho, aut ab eo deputatis.

Cum autem præceptum Communionis Paschalis semper urgeat eos, qui tempore præscripto non satisfecere, ad Parochum remitti debent, si in anni decursu ad extraneum accedunt.

Q. 6. *Quoties tenentur Pastores Eucharistiam ministrare?*

R. Tenentur non solum cum urget Communionis præceptum, ut tempore Paschali, ægritudinis, pestis, & persecutionis, propter mortis periculum, in quo fideles versantur, sed etiam quoties subditi rationabiliter petunt; 1. quia officium Pastoris est, non solum necessaria, sed & utilia gregi suo subministrare. *In pascuis uberrimis pascameas*, ait exemplar omnium Pastorum Ezech. 34. *quod infirmum fuerat, consolidabo: & quod pingue & forte, custodiam.* 2. quia cum ea sit piæ matris Ecclesiæ voluntas, ut fideles panem illum supersubstantialem frequenter petant, dubium non est, quin à Pastoribus exigat, ut spiritua-lem subditorum famem pietate verè materna expleant, tumque gemat cum Propheta, *parvuli petierunt panem, & non erat, qui frangeret eis*, Thren. 4. cum audit quosdam ægrè ferre, quòd subditi ad hunc gratiarum fontem sæpe recurrant. 3. quia Eucharistia est medium, etsi non absolutè, ut dicetur infra, saltem secundum quid necessarium ad perseverandum, superandas ten-

Nn 3

tatio.

tationes, & vitanda peccata, *sioni autem voluit* (Christus) Sacramentum hoc tanquam spirituales animarum cibum, quo alantur & confortentur viventes vita illius quo liberentur à culpis quotidianis, & à peccatis mortalibus præserventur. Concilium Tridentinum sess. 13. c. 2. Hinc quotquot hætenus in Christiana Religione floruerunt probati Pastores, mortis pericula constanter subiere, ut tam potenti subsidio fideles recrearent.

Q. 7. *Cum defunt minores formulæ, licetne celebranti partem majoris, in qua consecravit, detrahere, ut eam aliis administraret?*

R. Licet, si vaticum sit continuò ministrandum periculose decumbenti, ex S. Thoma in 4. dist. 17. non verò, si ex sola devotione petatur communio, quia est contra praxim.

CAPUT XVII.

Utrùm ex præcepto divino Eucharistia sit omnibus administranda sub utraque specie?

R. **N**egari non potest, quin communio sub utraque specie communiter, saltem in publicis cœtibus, administrata sit: in Ecclesia quidem Græca usque ad hodiernam diem, in Latina verò usque ad XII. sæculum, à quo tempore faventibus quibusdam Episcopis usus unius speciei, panis scilicet, sensim invaluit. Obstiterunt in Bohemia decimo quarto ineunte sæculo Petrus Dresdensis Ludimagister, & Jacobellus Misnensis, ob concionum elegantiam famosus, docentes, speciem etiam vini esse laicis necessariam,

riam, accusantesque Ecclesiam Romanam ignorantiae aut negligentiae, quod calicem subtrahi passa fuisset, ex Ænea Sylvio lib. hist. Bohemorum cap. 35. Horum sequaces dicti sunt Calixtini, quibus se adjunxit Joannes Hus, à quo Hussitæ.

Constantiense Concilium generale, ut nascentem errorem comprimeret, sanxit anno 1415. sess. 13. consuetudinem communicandi sub una specie, legitime introductam, & diutissime observatam pro lege esse habendam, erroneumque pronuntiavit, si dicatur, hunc communicandi modum esse illicitum, cum sub qualibet specie Christus totus contineatur. Idipsum paulò post, scilicet anno 1435. Concilium Basileense confirmavit sess. 30. amore tamen unitatis & pacis obtulit Bohemis licentiam communicandi pro more patriæ sub utraque specie, modo agnoscerent talem communionem præcepto divino non esse necessariam.

Lutherus circa præsentem controversiam initio varius fuit, ex Bellarmino lib. 4. de Eucharistia cap. 20. tandem lib. de Captivitate Babyl. cap. de Missa, definit esse impium & tyrannicum, laicis negare utramque speciem. Concinit Calvinus lib. 4. Institut. capite 17. §. 4. his verbis: *Ex diaboli prodiit officina constitutio, quæ dimidiam cœnæ partem meliori populi Dei numero furata est.*

Proposita igitur quæstio duo complectitur capita. Primum, utrum communio sub utraque specie necessaria, etiam non sacrificantibus, vel necessitate Sacramenti, vel necessitate præcepti divini, quæ quæstio ad fidem pertinet.

Secundum, utrùm concedenda vel neganda sit laicis utraque species. Quæstio est meræ disciplinæ, circà quam non una fuit sententia Patrum Tridentinorum. Nam ex Palavicino sexaginta novem Episcopi, præsertim ex Gallia & Germania, reclamantibus 79. aliis, censuerunt laicis concedendum calicem ad vota Imperatoris & Caroli noni Regis Christianissimi, & ut visum fuerat plurimis Antistitibus in Colloquio Pissiano. Sed Concilium retenta consuetudine communicandi non sacrificantes sub unica panis specie, iudicio Summi Pontificis detulit in fine sess. 22. utrùm usus calicis alicui nationi vel regno concedendus esset, & quibus conditionibus; juxta quod Decretum Pius IV. anno 1564. instante Ferdinando Imperatore, usum calicis quibusdam Germaniæ populis restituit; at idipsum contigit apud illos populos, quod dudum apud Bohemos, ut nimirum in errore pertinaciores fierent, teste eodem Palavicino lib. 24. cap. 14. His compendiosè & historice expositis, jam satisfaciendum quæstioni propositæ, quoad utramque partem. Quare

R. 2. Quoad primam, communio sub utraque specie fidelibus non conficientibus, necessaria non est ex necessitate Sacramenti, neque ex divino præcepto. Est de fide definitum can. primo Concilii Tridentini sess. 21. his verbis: *Si quis dixerit ex Dei præcepto, vel necessitate salutis omnes & singulos Christi fideles utramque speciem sanctissimi Eucharistiæ Sacramenti sumere debere, anathema sit.* Et can. 2. *Si quis dixerit sanctam Ecclesiam Catholicam non iustis causis & rationibus adductam fuisse, ut laicos, atque etiam Clericos non conficientes, sub panis tantummodò specie communicaret, aut in eo errasse; anathema sit.*

Pro-

Probatur 1. ex Scriptura, 1. negativè, quia nullus afferri potest textus, in quo expressè præcipiatur hujusmodi communio omnibus fidelibus, ut patebit ex objectionum solutione. 2. Positivè, quia multi textus innuunt sumptionem unius speciei sufficere, Joann. 6. *Si quis manducaverit ex hoc pane, vivet in æternum. Qui manducat hunc panem, vivet in æternum.* Ubi eadem vita promittitur solam carnem manducanti, quæ manducanti carnem, & simul bibenti sanguinem. Ergo sumptio utriusque speciei non requiritur necessitate Sacramenti, sed in unica stat verum Sacramentum, cum totus ejus effectus ex illa percipiatur: Actorum 2. de primis fidelibus legitur, *erant . . . perseverantes in doctrina Apostolorum, & communicatione fractionis panis.* Quæ Calvinistæ, sicut Catholici, intelligunt de Eucharistia.

Respondent Adversarii potius divinando, quàm interpretando, hæc scripta esse per sinecdochen, qua sumitur pars pro toto, species panis pro utraque specie. Verùm hæc responsio manifestè repugnat Traditioni universalis Ecclesiæ, cujus est Scripturam interpretari, ubi habet aliquid obscuritatis. Quare

Probatur 2. constanti Traditione, quæ non nisi ab Apostolis manare potuit. Namque 1. ex dictis cap. 3. de permanentia Eucharistiæ, constat solitos olim fideles Eucharistiam domi, & in desertis locis servare, & in itinere secum deferre ad spiritalem refectionem. Quodd autem in unica panis specie fumerent, colligitur tum ex circumstantiis, quæ vix admittebant, ut fideles secum gestarent vini speciem: tum ex silentio Historiæ Ecclesiasticæ, in qua quidem legitur Chri-

stianos panem Eucharisticum accepisse alicubi nudis manibus, alibi verò linteo, quod dominicale & orarium dicebatur, at de vase apto ad vini species suscipiendas, an deberet esse argenteum, cupreum, vitreum, testaceum, nulla prorsus mentio, cum tamen de eo specialiter aliquid fuisset præscribendum. Quid ita? nisi quia species vini nunquam concessa fuit ad hujusmodi privatas communiones. Sed detur adversariis aliquando concessam, ut contendunt etiam aliqui ex Orthodoxis, saltem negari non potest, quin identidem privata illa communio in sola panis specie peracta sit; illud enim evincitur, tum ex testimonio Tertulliani lib. 2. ad uxorem cap. 5. *Non sciet maritus, inquit, quid secretò ante omnem cibum gustes? & si sciverit, panem non illum credit esse, qui dicitur.* En communio in sola panis specie: tum ex Solitariorum exemplo, qui ad annum sacrum viaticum accipiebant, ex prato Spirituali cap. 79. Porro vinum tamdiu conservari non potuit, præsertim in calidissimis regionibus.

Secundò, mos dandi Eucharistiam infantibus viguit in Ecclesia Latina usque ad duodecimum sæculum; apud Græcos verò etiam nunc viget: atqui hic non una fuit Ecclesiæ disciplina: aliquando quippe sub utraque specie; aliquando verò sub sola panis aut vini specie Eucharistiam dispensavit. De sola vini specie testes sunt I. S. Cyprianus, serm. de lapsis, ubi de infantula, quam nutrix, nescia matre, contaminaverat infundendo ori ejus de idolothytis panem vino mixtum, tum postea in Ecclesiam delata, sic refert: *Solemnibus adimpletis, calicem Diaconus offerre præsentibus cæpit, & accipientibus cæteris, locus ejus*

ejus advenit, faciem suam parvulam instinctu divinæ Majestatis avertere, os labiis obturantibus premere. Perstitit tamen Diaconus, & reluctanti licet, de Sacramento calicis infudit; tunc sequitur singultus & vomitus, in corpore atque ore violato Eucharistia permanere non potuit. Hic fingi non potest prius speciem panis ministratam Sancto Cypriano, qui sacris præerat, nam speciem illam perinde evomisset. Neque panem vino tinctum accepisse, 1. quia illius mixtionis usus ignotus erat primis sæculis, nec de ea habetur mentio apud Latinos ante septimum sæculum, nempe in Concilio secundo Braccarensi canone 2. in quo improbata est anno 675. 2. Hugo Victorinus lib. 1. de Sacramentis cap. 20. describit Ecclesiæ disciplinam suo sæculo, nempe duodecimo, atqui Eucharistiam in specie vini infantibus ministrandam esse digito Sacerdotis, quem facile fugere possunt, & expressè Paschalis II. epist. ad Pontium Cluniacensem Abbatem ann. 1118. præcipit, ut Eucharistia parvulis & infirmis, qui panem absorbere non possunt in solo sanguine communicetur, vetatque utramque speciem misceri, quam mixtionem permiserat Concilium Claromontanum sub Urbano II. anno 1095.

Tertiò Eucharistiam sub una specie infirmis ministratam evincunt, 1. factum Serapionis à S. Dionysio Alexandrino probatum 3. sæculo. Eusebius illud refert lib. 6. hist. cap. 44. narratque Presbyterum fortè ægrotantem, cùm ad Serapionem in extremis positum pergere non posset, misisse per puerum exiguam Eucharistiæ partem, ac jussisse ut in aqua intinctam seu madefactam, moribundo porrigeret, qua ille paulatim absorpta, continuò animam exhalavit. Ubi observandum quòd

quòd non Presbyter ipse intinxerit , puer non in vino , sed in aqua , ne suspicentur Adversarii Presbyterum miscuisse particulam cum sanguine Domini. 2. Concilium XI. Toletanum can. 11. an. 675. concedit infirmis solam speciem vini dispensari, *quia solent tanto siccitatis pondere deprimi, ut nullis ciborum illationibus possint refici.* 3. Constitutio Paschalis II. mox laudata , & à Baronio relata tom. 12. ad annum 1118. 4. Græci feria quinta majoris hebdomadæ pro infirmis panem consecrant ; consecratumque Christi sanguine leviter humectant ; sed ut per annum à corruptione immunis servari possit ; cunctum humorem exprimunt sacro disco ignem subjicientes , ex Goardo in notis ad Rituale Græcorum , & ex Arcudio lib. 3. de Eucharistia cap. 55. & 56. Fatendum tamen est aliquando utramque speciem infirmis fuisse concessam ; nam Sanctus Hieronymus epist. ad Rusticum , laudat S. Exuperium , Episcopum Tholosanum , quòd in sublevandis pauperibus ita se spoliasset , ut corpus Domini in canistro vimineo , & sanguinem in vase vitreo portaret.

Quartò , à primis sæculis Eucharistia sub una specie identidem , etiam in conventibus publicis dispensata fuit. 1. S. Hieronymus epist. 22. ad Eustochium , meminit quarundam Virginum , quæ Romæ ita erant abstemiæ , ut in ipsis mysteriis speciem vini non sumerent , proptereaque à maledicis Manichææ vocitabantur , Manichæi enim hac vana superstitione ducti , quòd vinum esset fel draconum , ab eo etiam in sacris mysteriis abstinebant ; unde Sanctus Leo ser. 4. de Quadragesima , ut eos Romæ latitantes detegeret , monuit plebem observandos eos , qui in sacra
mensa

menſa ſanguinem redemptionis noſtræ haurire declinarent. In quo ſanè non latuiſſent, quin imò ſeipſos prodidiſſent, ſi Catholicis liberum non fuiſſet aliquando unicam ſpeciem ſumere. Verùm ut certius eſſet illud ſignum; Gelafius Sancti Leonis ſucceſſor, præmonitus nonnullos, *nescio quia ſuperſtitione*, à calice abſtinere, ſic ſtatuit (ſitamen fides habeatur Gratiano de conſecratione diſt. 2. cap. 12. hæc enim non leguntur apud Gelafium) *aut integra Sacramenta percipiant, aut ab integris arceantur; quia diviſio unius ejusdemque myſterii ſine grandi ſacrilegio non poteſt provenire.* Hæc de iis, qui ſuperſtitione ſpeciem vini declinabant, atque ut faciliùs innotefcerent, omnes etiam Catholici ad utramque ſpeciem aſtringuntur lege generali, quæ mutatis circumſtantiis abiit in diſſuetudinem, ut liquet ex jam dictis, & mox dicendis de Miſſa præſanctificatorum, hoc eſt, in qua Sacerdos omiſſa conſecratione, ſumit ſpeciem panis altera die conſecratam. Hic mos eſt perantiquus in utraque Eccleſia, obſervatur in Latina feria ſexta Paraſceves; ſic enim habetur in veteri Ordine Romano, *Pontifex in Officio ferie quintæ hebdomadæ ſanctæ ſumat oblatas integras ad ſervandum uſque manè diei Paraſceves, de quibus communicent* (fideles eo ſiquidem die non ſolus Sacerdos communicabat) *abſque ſanguine Domini: ſanguis verò eadem die* (ſcilicet feria quinta) *peritus conſumatur.* Habemus igitur ex eo libro communionem publicam apud Latinos à ſexto ſæculo in ſola panis ſpecie peragi abſque ulla neceſſitate, ſed ſolum ad quandam ſignificationem myſticam, quod clarè evincit Eccleſiam nulum agnoviſſe divinum præceptum ſumendi utramque ſpeciem. In Eccleſia verò Græca toto Qua-

dra-

dragesimali tempore celebratur ex præsanctificatis, præter dies exceptos in Synodo Quinisexta, seu Trullana anno 692. can. 52. his verbis : *In omnibus sanctæ Quadragesimæ jejunii diebus, præterquam Sabbato, & Dominica, & sancto Annunciationis die, fiat sacrum præsanctificationum ministerium.* Ubi advertes Concilium non novam legem statuere, sed confirmare veterem, cujus initium multi ducunt à Concilio Laodicensi. Sic enim habet can. 49. *Non oportet in Quadragesima panem offerre, nisi Sabbato, & Dominica tantum.* Quamquam multi interpretentur de pane benedictio, quem Concilium prohibet distribui in Quadragesima, ne solvatur jejunium.

Novatores vim hujus argumenti, quo illorum confoditur error, totis viribus eludere conantur, contenduntque in Missa præsanctificationum Eucharistiam sub utraque specie sumi tum apud Latinos tum apud Græcos.

At ud Latinos quidem; namque in Ordine Romano loco jam cit. legitur de Sacerdote, *sumit de sancta (Hostia) & ponit in calicem . . . sanctificatur enim vinum non consecratum per consecratum panem, & communicant omnes cum silentio.* Nec dicas hæc intelligenda de sanctificatione quadam morali, qualis intelligitur in vase ex contactu corporis aut sanguinis Domini, non verò de sanctificatione physica & per transubstantiationem facta. Subdit enim Ordo, *Pontifex confirmatur* (id est sibi ipse administrat sanguinem Christi) *in calice sancto, de quo parum refundit Archidiaconus in majorem calicem, ut ex eodem sacro vase confirmetur populus, quia vinum non consecratum, sanguini Domini commixtum, sanctificatur per omnem modum Et infra. Archidiaconus*
con-

confirmat omnes Sanguine Dominico, quos communicaverat Pontifex Corpore Dominico. Ubi vinum vocatur sanguis Domini, & dicitur sanctificatum per omnem modum; quod sane non potest intelligi, nisi de sanctificatione per conversionem vini in sanguinem Christi: & ita intellexerunt communiter, qui de Ritibus Ecclesiasticis scripsere, ut Micrologus cap. 19. In parasceve, inquit, vinum non consecratum cum Dominica Oratione, & Dominici Corporis immixtione jubet (Ordo Romanus) consecrare, ut populus plene possit communicare.

Amalarius lib. de Officiis Ecclesiasticis, scribit Sacerdotem die Parasceves per commixtionem corporis Christi vinum consecrare juxta Ordinem Romanum. Hanc interpretationem supponunt Theodulphus in suo Capitulari cap. 41. & Walfridus Strabo lib. de Rebus Ecclesiasticis, ubi testantur die Parasceves populum communicare corpori & sanguini Dominico, Pontificale Remense anno 1500. Noviomense pro communicatione infirmorum volunt dici, cum de sacrificio mittitur in calicem, *fit consecratio vel commixtio corporis & sanguinis Domini nostri Jesu Christi.* Missale Suesionense ad diem Parasceves, consecratur vinum per commixtionem factam in calice corporis Christi. Trevirense anno 1547. & Rothomag. anno 1513. *Sumendo calicem (die Parasceves) dicat: Sanguis Domini nostri Jesu Christi, &c.* Omitto plura alia Missalia, ut Andegavense ann. 1551. & Viridunense ann. 1554. quæ eandem sententiam exprimunt: ergo publica communio nunquam peracta est apud Latinos, ne quidem die Parasceves, nisi sub duplici specie.

Apud Græcos verò , vel ex eo liquet quòd constanter credant & doceant communionem ex præcepto divino faciendam sub utraque specie. Unde Dominicis Diebus Quadragesimæ panem consecratum madefaciunt sanguine Christi , ex qua mixtione partem servant ad Missam præsanctificationum , reliquas verò præsentibus distribuunt cum cochleari ad hunc usum apto ; sic enim per annum utramque speciem ministrant , ut effusionis periculum vitetur. Verùm

Refellitur 1. hæc responsio quantum ad Latinos. Quod enim adducitur ex Ordine Romano , non spectat Missam præsanctificationum , qualis celebratur die Parasceves , sed Missam plenam , in qua utraque species consecratur , ut legenti patebit. In ea autem Missa Pontifex ex calice consecrato partem refundit in calicem majorem jam vino plenum , ex quo Diaconus ministrat fidelibus , qui propter illam mixtionem verè dicuntur sumere sanguinem Domini , cùm species consecratæ misceantur cum aliis vini partibus ; & ita intelligendum Pontificale Remense , & Noviomense ; hoc enim modo species vini consecrati ministrabatur fidelibus , tum in Ecclesia , tum in lecto decumbentibus. Amalarius autem , si per verbum , *consecratur* , aliud intellexit quàm , *sanctificatur* , deceptus est , sicut & auctor Micrologii , qui non potuit scribere , nisi undecimo exeunte sæculo , cùm laudet Gregorium VII. qui obiit an. 1085. repugnantque illi Scriptores ipsi Ordini , in quo legitur , *sumat oblatas ad servandum usque mane diei Parasceves , de quibus communicent absque sanguine Domini*. Negandum tamen non est , quin aliqui in hunc errorem inciderint vinum per contactum

cor-

corporis Christi, vel per Orationem Dominicam converti in sanguinem. Sed reclamarunt alii, ut Joannes Beletus, Scholæ Parisiensis lumen, circa annum 1162. cap. 99. de Ritibus Missæ. *Quamvis, inquit, complurimum scripta illud asserere videantur, nos tamen veritatem magis sequentes, & ea quæ sancti Patres tradiderunt, dicimus vinum illud non esse omnino consecratum ex illo contactu; sed sanctificatum.* Et Durandus libro sexto Rationalis, *dicimus illud non consecrari, sed sanctificari.* Aliàs æquè dici posset, panem profanum transmutari in Corpus Christi, ex contactu specierum consecratarum; & ita Sacramentum Eucharistiæ sine verbis perficeretur, quod est contra communem sententiam Patrum & Catholicorum. Nec refert quòd fideles dicantur recipere die Parasceves corpus & sanguinem Domini; nam in una specie utrumque sumitur. Ad do vinum non consecratum alicubi ob repræsentationem sanguinis Christi vocari sanguinem, sic Pontificale Metense anno 1552. *Communicet infantem de simplici vino ter digitum intinctum apponendo ori infantis dicens, corpus & sanguis Domini, &c.* Et vetus Pontificale Ecclesiæ Antissiodorensis de comunione infantum, intingit digitum in modico vino, & ponit in ore infantis, dicens, *Sanguis Domini nostri, &c.*

Refellitur 2. responsio quantum ad Græcos, 1. usus miscendi utramque speciem in Missa præsanctificatorum non est ita apud eos antiquus, ut liquet ex eorum Eucologiis, quæ simpliciter præscribunt asservendam esse speciem panis, ut advertunt Allatius in Dissertatione de Missa præsanctificatorum, Arcudius lib. 3. de Eucharistia cap. 5. & seq. & Goarius ad Eucologium Græcorum, *D. Habert Theolog. Tom. V.* O o col.

colligiturque ex Concilio Trullano an. 692. canone 101. ubi statuit Eucharistiam esse dandam in manibus fidelium, quod sanè repugnaret, si species essent madidæ Sanguine Domini. Denique Michael Cerularius Patriarcha Constantinopolitanus, & Schismatis instaurator undecimo sæculo, in libro, quem scripsit pro defensione præsanctificationum, asserit nullam in panibus consecratis infundi guttam sanguinis. 2. Licet ex Græcis schismaticis plures hodie Lutheranis in hac parte consentiant, ut patet ex responsione Jeremiæ Patriarchæ Constantinopolitani ad Lutheranos cap. 10. ubi sic habet, *utriusque speciei participes esse oportere dicitis: & recte dicitis: tamen sic tingunt sanguine Domini species panis reservandas pro Missis præsanctificationum, ut nullus humor possit remanere, nam eas exsiccant supponendo ignem facro disco.* Constat itaque ex constanti universalis Ecclesiæ Traditione, communionem sub utraque specie non esse necessariam non conficiantibus, sive necessitate Sacramenti, sive necessitate præcepti divini; ac proinde Ecclesiæ est judicare an sit concedenda, an neganda: declarat enim Conc. Trid. sess. 21. cap. 2. *banc potestatem perpetuo in Ecclesia fuisse, ut in Sacramentorum dispensatione, salva illorum substantia, ea statueret vel mutaret, quæ suscipientium utilitati, seu ipsorum Sacramentorum venerationi, pro rerum, temporum, & locorum varietate magis expedire judicaret.*

Supereſt autem altera quæſtionis pars, utrùm conveniat speciem vini negare non conficiantibus? Ad quam

R. Justis de causis Ecclesia approbavit consuetudinem

tudinem distribuendi calicem solis sacrificantibus, eamque pro lege habendam decrevit, donec tanti Sacramenti venerationi, & populorum pietati aliter consulendum judicaverit.

Probatur iisdem ferè rationibus, quas Patres Basileenses attigerunt. Prima est proximum effusionis periculum, adeo ut vix porrigeretur calix, quin aliquæ ex eo sanguinis guttæ deciderent, aut barbæ & vestibus adhærerent, ut retulerunt testes oculati. Secunda est inopia vini non solum in regionibus Septentrionalibus, & aliis, in quibus vinum non crescit, sed etiam in plerisque pagis, ob tenuitatem & paupertatem incolarum, qua fit, ut etiam hodie vix possit haberi ad sacrificium offerendum, proptereaque identidem moveantur lites, quas non ita facile Episcopi dirimunt. Quid si vinum in ea copia, quæ omnibus sufficeret, ex locis remotioribus compararetur asservandum ad aliquod tempus? sæpius acefceret, aut alio modo corrumpetur. Conquesti sunt nonnunquam fideles hujusmodi vinum sibi ministratum. Tertia multi horrorem concipiebant ex eodem vase, aut eodem calamo cum aliis bibendi, metuentes ne aut contagioso morbo inficerentur, aut sordes à vilibus hominibus contraherent, foetidosque halitus exciperent. Quod autem hujusmodi incommoda non Oratoris stylo extollantur, sed simpliciter exponantur, colligere licet ex communi fidelium sensu, qui propria sponte, & nulla præeunte Lege Ecclesiastica, à calice abstinerunt. Id ex benemultis testantur 13. sæculo (hoc est, ducentis ferè annis ante Concilium Constantiense, ubi primum sancita est lex pro communione sub unica specie) Alensis par-

te 4. quæst. 11. sic scribit : *Licet sumere Corpus Christi sub specie panis tantum, sicut ferè ubique fit à Laicis in Ecclesia.* Et Sanctus Thomas in 4. dist. 11. *populo non datur sanguis.* S. quoque Bonaventura eadem hist. *quòd dicitur utranque speciem accipi oportere, hæresis planè est.* Idem ergo contigit circa calicem, quod circa immersionem, in qua diximus Baptismum per duodecim sæcula fuisse administratum; sed propter difficultates & incommoda, sensim abiit in dissuetudinem, & infusio ubique inducta est. Novatores scripturam non prætexerunt, ut immersionem, utpote difficiliorem, restituerent, quemadmodum prætexunt ad restituendum calicem, in quo sanè majora occurrunt incommoda, ut constabit expendenti rationes allatas, propter quas Catholici sensim propria sponte à calice abstinerunt. Hic enim observare oportet non fideles & Ecclesiæ subditos, sed hæreticos & rebelles armata manu calicem postulasse, Præsulesque Galliæ & Germaniæ, non minùs ad vota Catholicorum explenda, quàm ad hæreticorum motus sedandos, laborasse in Concilio Tridentino pro calice restituendo. Non occlusit aures pia Mater Ecclesia, ut merebantur rebelles, imò semel & iterum tentavit, num hujusmodi indulgentia ad meliorem frugem reduci possent. Verùm efferaiores & magis contumeliosos experta est, ut jam diximus de Bohemis, & quibusdam Germanis.

Objiciunt illud Joan. 6. *Nisi manducaveritis carnem Filii hominis, & biberitis ejus sanguinem, non habebitis vitam in vobis.* Ibi, inquiunt, Christus expressè præcepit, ut bibamus ejus sanguinem. Ergo.

Respon-

Respondeo 1. immeritò hunc locum objici ab Adversariis, utpote qui contendant hic non agi de Eucharistia : ubi observa hominum levitatem & cæcitatem.

Respondeo 2. retorquendo argumentum, ibi præcipitur utriusque speciei sumptio : qua ergo auctoritate utramque negatis infantibus contra expressum Domini præceptum, & contra universalis Ecclesiæ Traditionem, quæ ab Apostolis usque ad duodecimum sæculum, Eucharistiam infantibus ministravit, & etiam nunc ministrat in Oriente? Siccine juxta professionem vestram Scripturæ inhæretis, quam patenter relinquitis ubi est observatu difficilior? infantes baptismo initiandos non immergitis, quamvis eum Dominus per immersionem susceperit, & eodem modo Apostoli, eorumque successores baptizaverint; neque jam initiatos Eucharistia perficitis contra illud præceptum, *nisi manducaveritis*, &c. Deinde Calvinistæ cap. 12. art. 7. Disciplinæ Ecclesiast. sic habet: *Panis cœnæ administrandus est iis, qui vinum bibere nequeunt, modò testentur se id non facere in defectum.* Et art. 10. dicunt, *posse non dari calicem iis, quibus grave est post alios eum sumere.* Jure itaque iis applicetur illud Apostoli, *eadem agis quæ judicas*, Rom. 2. Sacramentum mutilas, divinum præceptum transgredieris in iisdem circumstantiis, in quibus Ecclesiæ Catholicæ exprobras.

Respondeo 3. cum una species contineat corpus & sanguinem Domini, sub unica caro ejus manducatur, & sanguis bibitur; nec exprimitur in eo loco, an duplici specie utrumque sumendum sit; imò satis colligitur sufficere alterutram sume-

re; sicut enim dicitur in illo capite, *qui bibit meum sanguinem, habet vitam æternam*: sic etiam dicitur, *qui manducat hunc panem, vivet in æternum*. Enimverò particula conjunctiva (&) non rarò sumitur in Scripturis pro particula disjunctiva (*vel.*) Sic Exodi 21. in Hebræo habetur, *qui percusserit patrem & matrem, morte moriatur*. Quæ sanè in sensu disjunctivo accipienda sunt, neque enim necesse est ut quis utrumque parentem percutiat, quò reus mortis censeatur, sic Act. 3. *argentum & aurum non est mihi*, id est, neque argentum, neque aurum. Denique si obscuritas sit in allato textu, à quo interpretatio accipienda est, nisi ab universali Ecclesia?

Instant, locus ille explicatur per verba institutionis, Matth. 26 *accipiens calicem, gratias egit & dedit illis, dicens: Bibite ex hoc omnes*. En, inquit Calvinus, *edictum æterni Regis*; quia prævidit futuros, qui fideles calice fraudarent, expressè dixit de calice, *bibite ex hoc omnes*. In Apostolis autem cuncti fideles intelliguntur, quibus æquè bibere præceptum est ex calice, ac manducare ex pane: ergo singuli tenentur ex calice sumere.

Nego conseq. namque i. *bibite, manducate*, sunt potiùs invitantis, quàm præcipientis. Præceptum verò communicandi habetur Joan. 6. *nisi manducaveritis, &c.* Et Luc. 22. *hoc facite in meam commemorationem*. Cur autem expressiùs ad calicem, quàm ad panem Dominus addiderit vocem (omnes,) ratio in promptu est, nempe quia panem fregit & distribuit in partes, quibus satis significabat, non uni, sed omnibus panem fuisse benedictum & consecratum. At verò calix erat unus ex quo bibendum; ideoque monuit ut omnes ex eo

sumerent. *Dividite inter vos*, ait Luc. 22. 2. Etiam-
 si verbum (bibite) præceptum contineat, vox
 (omnes) non se extendit, nisi ad Apostolos, &
 eorum Successores sacrificantes, quemadmodum
 verba illa, *docete omnes gentes*, Matth. 28. Sæpe
 enim Christus solos Apostolos alloquebatur. Un-
 de S. Petrus Luc. 12. *ad nos dicis hanc parabolam, an
 & ad omnes?* Et Christus Dominus, Marci 13. *quod
 autem vobis dico, omnibus dico, vigilate.* Cum ergo
 Christus non expresse, se aliis omnibus dixisse,
bibite omnes, restat, ut doceamur ab Ecclesia, *quæ
 est columna & firmamentum veritatis*, 1. Tim. 3. utrum
 singuli hæc sibi dicta intelligere debeant. 3. Sup-
 posito, non concesso, verbum, *bibite*, se exten-
 dere ad singulos fideles, ut contendit Georgius
 Cassander in opere de communione sub duplici
 specie, & nonnulli in Concilio Tridentino, qui
 ideo suspecti fuere, nihilominus Adversarii non
 possent Ecclesiam Romanam erroris arguere; nam
 præceptum divinum, quod non est ad salutem
 necessarium, non obligat, ubi sine nimia difficul-
 tate & cum reverentia sacris mysteriis debita ob-
 servari nequit: atqui talis est administratio cali-
 cis, ut constat ex dictis: Ergo.

Confirmatur ex ipsis Adversariis: Cur enim
 stante præcepto divino, ut contendunt, à calice
 liberant eos, qui ægrè ferunt labia post alios ad
 eundem calicem admove, & omnes abstemios?
 neque enim desunt media, quibus odor & sapor
 vini sensum haurientis effugerent. Cur utramque
 speciem negant parvulis, & periculose decum-
 bentibus?

Urgent, saltem Ecclesia Romana liberam vini
 speciem cuilibet fidei relinquere debuit; potestas

enim inferior superiorem ligare non potest : Christus autem cuilibet permisit ex calice sumere.

Distinguo : liberam debuit relinquere speciem vini , si nulla obsit ratio , Concedo : si obsit , qualem mox retulimus , Nego . Hanc enim potestatem Christus dedit Ecclesiæ , ut in Sacramentorum dispensatione , salva illorum substantia , ea statueret , vel mutaret , quæ suscipientium utilitati , seu ipsorum Sacramentorum venerationi , pro rerum , temporum , & locorum varietate , magis expedire judicaret , ex Concilio Tridentino sess. 21. cap. 2. Non igitur ligat divinam potestatem , sed ea innititur . Nonne ipsi Adversarii facultatem sibi arrogant negandi parvulis utramque speciem , cujus capaces illos effecit Christus , ut capite sequenti dicetur ?

Contra hanc solutionem instabis . 1. Atqui calix pertinet ad substantiam Sacramenti : Ergo .

Distinguo antec. calix consecrandus , Concedo : Distribuendus , Nego antec. Verum quidem est , utriusque speciei consecrationem pertinere ad integritatem Sacramenti , ut fusè probavimus cap. 4. ideoque Ecclesia nunquam consecravit in unica specie . Sed cum ipsa distributio supponat Sacrificium jam perfectum , nullatenus pertinet ad substantiam Sacramenti . Consule quæ ibi dicta sunt ad ea , quæ contra objiciuntur .

At , inquires , idè Christus Dominus utramque speciem instituit , ut repræsentaretur ipsius mors & passio , in qua sanguis separatus est à corpore : atqui non solum sacrificantes , sed etiam communicantes annuntiant mortem ipsius , ut expressè docet Apostolos 1. Cor. 11. *Quotiescunque . . . manducabitis panem hunc , & calicem bibetis , mortem*

Domi-

Domini annuntiabitis, donec veniat. Ergo communicantes debent utramque speciem sumere.

Distinguo min. Communicantes annuntiant mortem Domini, quatenus sumunt corpus ejus sine sanguine repræsentatum, & vi verborum in Sacrificio separatum, Conc. Sanguis enim inest tantum per concomitantiam sub specie panis: quatenus utramque speciem sumunt, Nego min. Deinde etiamsi demus, communicantes sumendo utramque speciem expressius annuntiare mortem Domini, non sequitur ex præcepto divino utramque ab ipsis esse sumendam, quemadmodum concessimus immersionem in Baptismo distinctius sepulturam Domini repræsentare, quàm infusionem, nec propterea sequitur etiam in sententia Adversariorum, qui initiandos non immergunt, Baptismum non posse celebrari, nisi per immersionem.

Instabis 2. contra allatam solutionem. Ex concessis Ecclesia debet dispensare Sacramenta, prout expedit utilitati suscipientium: atqui suscipientibus esset utilius utramque speciem sumere; Sacramenta enim novæ Legis operantur quatenus significant. Porro species vini significant sanguinem Christi, non vero species panis: ergo species vini habent efficaciam producendæ gratiæ, qua carent species panis.

Respondeo 1. Vera sit sententia Gregorii Caspandri, quam ex Palavicino lib. 12. cap. 2. quidam Theologi, ut Melchior Canus, in Concilio Tridentino propugnarunt, & post Concilium Vasquesius 3. parte disput. 215. cap. 2. & alii ab eo appellati, sine impietate dici nequit præferendam utilitatem communicantium reverentiæ

Sacramento debitæ, contra quam ostendimus peccari in generali distributione specierum vini. Hoc venerationis motivo ducta Ecclesia à primis sæculis, quosdam peccatores, quamvis pœnitentes, à sacra mensa repulit per plures annos, quin & per totam eorum vitam. Nec inficias ire possunt Novatores, qui exemplum Ecclesiæ Romanæ secuti, parvulis negant Eucharistiam, quamvis fructus ejus capaces sint, ut dicturi sumus. His adde laicos per frequentiorum panis Eucharistici sumptionem, damnum quod ex privatione calicis paterentur, facile posse resarcire.

Respondeo 2. Cummunem esse Catholicorum sententiam, non plus fructus percipi ex duabus, quam ex unica specie; quia sub qualibet totus continetur Christus, ratione cujus species significant & operantur gratiam. Nec refert, quod sanguis sit solum per concomitantiam sub specie panis, neque enim divinitas sub ulla specie verborum continetur, nihilominus tamen ab ea totam efficaciam hauriunt corpus & sanguis Christi, ipsum Sacramentum.

Igitur in forma ad objectionem respondendum est distinguendo; species vini seorsim gratiam significant ratione contenti, Conc. Per se solas, Nego. Ergo gratiam operantur, Distinguo: Si separatim à speciebus panis sumantur, Conc. Si simul cum speciebus panis sumantur, Nego conseq. Quia Christus sub specie vini non aliam gratiam significat, quam sub specie panis, nempe gratiam nutritivam, quæ est animæ cibus, & potus; hæc enim in spiritualibus sunt unum & idem juxta illud, Matth. 5. *Beati, qui esuriunt & sitiunt justitiam.*

Ergo,

Ergo, inquires, frustra Christus instituit utramque speciem.

Nego conseq. Utraque enim species est essentialis sacrificio; conducitque ad expressiorem repræsentationem, tum Passionis, tum refectionis spiritualis.

CAPUT XVIII.

Quodnam est Eucharistiæ subjectum?

R. **O**mnis & solus homo baptizatus, & viator, est capax hujus Sacramenti, fructus verò illius, non nisi qui accedit dispositus.

Dixi 1. *Omnis . . . baptizatus*; Quia character baptismalis se habet per modum potentiæ passivæ ad recipienda alia Sacramenta.

Dixi 2. *Solus*; Quia non baptizatus, etiam si sit catechumenus, caret potentia ex institutione Dei necessario prærequisita ad suscipienda alia Sacramenta. Hinc Baptismus dicitur janua omnium Sacramentorum. Reciperet quidem corpus Christi, qui nondum initiatus est, sed materialiter tantum, quemadmodum in pyxide recipitur.

Dixi 3. *Viator*; Quia Sacramenta non nisi pro viatoribus instituta sunt. Unde Eucharistia vocatur Viaticum, id est, viatorum cibus. Hinc Concilium III. Carthaginense cap. 6. damnans quorundam abusum, sic habet cap. 6. *Placuit ut corporibus defunctorum Eucharistia non detur: dictum est enim à Domino, accipite & edite: cadavera autem nec accipere possunt, nec edere.* Idem prohibetur in Concilio Antissiodorensi anno 563. cap. 12. & in Trullano can. 83.

Dixi

Dixi 4. *Sacramenti*; Non vero fructus Sacramenti; quia ex dicendis de dispositionibus ad Eucharistiam, soli iusti sunt illius capaces.

Dices: Eucharistia datur per modum cibi spiritualis: atqui peccatores, utpotè peccato mortui, non sunt capaces cibi spiritualis: ergo neque Eucharistiæ.

Dist. min. Non sunt capaces cibi spiritualis cum fructu recipiendi, Conc. Sine fructu recipiendi, Nego min. Itaque peccatum in eo cum morte naturali convenit, quòd sicut mors privat vita animali, sic peccatum gratia sanctificante, quæ est animæ vita supernaturalis; sed in aliis differt; namque mors naturalis nihil vitale, nullam potentiam animalem in cadavere relinquit. At peccatum non tollit fidem, spem, characterem baptismalem, quæ sunt veluti potentiæ supernaturales. Unde peccator sub eo respectu comparandus est cum homine ægrotante, in quo remanet potentia nutritiva, quæ non adeò malè per morbum afficitur, ut alimenta in stomachum vitaliter trajicere nequeat, etsi inde refici non possit. Similiter peccator characterem baptismi insignitus, tanquam potentia supernaturali, capax est recipiendi sacramentaliter corpus Christi, sed non ad salutem, ut dictum est cap. 15.

Instabis; Peccator obstinatus incapax est Sacramenti pœnitentiæ: Ergo & Eucharistiæ.

Nego conseq. Disparitas est, quòd contritio in Pœnitentia non solum sit dispositio, sed etiam pars essentialis: quod reperire non est in aliis Sacramentis.

Q. 2. *Estne ministranda Eucharistia bis omnibus, quos illius capaces esse diximus?*

R. Mi-

R. Minimè, sed observanda est imprimis quæ sit Ecclesiæ disciplina, quæ dispositiones accedentium, quæve circumstantiæ, in quibus accedunt.

Q. 3. *Quenam est Ecclesiæ disciplina circa infantes?*

R. Per duodecim prima sæcula iis ministravit Eucharistiam; sunt enim capaces non solum Sacramenti, ut jam dictum est, sed & fructus ejus, cum per Baptismum effecti sint justi. Justis tamen de causis contrariam induxit disciplinam, quam Concilium Trident. probavit, retinendamque sanxit sess. 21. cap. 4. & can. 4. sic habet: *Si quis dixerit parvulis, antequam ad annos discretionis pervenerint, necessariam esse Eucharistiæ communionem; anathema sit.*

Dices contra priorem responsionis partem, ex Apostolo I. Cor. 11. v. 29. indigne sumit, qui corpus Christi non dijudicat: atqui parvuli non dijudicant: ergo indigne sumunt, ac proinde iis illicitè administravit Ecclesia.

Dist. maj. Indignè sumit adultus, Concedo: Nam de adultis hic loquitur Apostolus, ut legenti patebit: parvulus, Nego maj. Sicut enim in fide & pietate matris Ecclesiæ accipiunt Baptismum, & Confirmationem, sic & Eucharistiam recipere possunt. Quæ objici solent contra præsentem Ecclesiæ disciplinam, commodius solventur ubi de necessitate hujus Sacramenti.

Q. 4. *Cur Ecclesia mutata disciplina tam antiqua, Eucharistiam parvulis denegat?*

R. Cum parvulorum Communio vix peragi possit, nisi sub speciebus vini, sensim desit in Occidente cum usu calicis propter easdem ferè ratio-

rationes cap. præcedenti recensitas, nempe propter difficultatem distribuendi speciem vini, & periculum effusionis & irreverentiæ erga Sacramentum. Fuit & alia specialis ratio mutandi antiquam illam disciplinam, scilicet fidelium remissa devotio & tepescens pristinus ardor manducandi cœlestem illum panem, quo factum est, ut eorum filii adhuc impuberes, & nondum usu rationis plene potiti, Eucharistiam tanquam panem communem fumerent, atque deficientibus domesticis pietatis exemplis, in consueta irreverentia reliquum vitæ tempus percurrerent. Cui malo ut occurreret Ecclesia, pueros à sacra mensa removet, donec annos discretionis attigerint, atque à pastoribus edocti & probati fuerint.

Q. 57. Quid circa amentes observandum?

R. Vel amentia est perpetua, & à nativitate, vel non. Si primum, neganda est eis Eucharistia; quia pro infantibus sunt habendi. Si secundum, vel habent lucida intervalla, & hæc spectanda sunt, ut illis Eucharistia ministretur: vel non habent, & his concedendam Eucharistiam præscribunt Concilium Nicænum primum can. 18. & Carthaginense quartum, anno 398. can. 76. & plerique libri rituales, modo tamen laudabilem vitam duxerint, aut saltem pœnitentiæ signa dederint, nullumque sit irreverentiæ periculum, v.g. vomitus, aut expuitionis. Cum autem experientia constat, hujusmodi infirmos Eucharistiam recens acceptam plerumque expuere, Pastores reverentiæ securitati Sacramenti prospicient, si prius immittant in os infirmi, qui rationis compos non est, formulam non consecratam.

Dices,

Dices, ex Concilio Eliberitano anno 305. can. 1. & seq. deneganda est Communio etiam in morte graviorum criminum reis, licet pœnitentibus & petentibus. Præiverat sanctus Cyprianus Epistola 52. his gravissimis verbis: *Rogare illos non delicti pœnitentia, sed mortis urgentis admonitio compellit; nec dignus est accipere solatium, qui se non cogitavit moriturum.* Idem statuit Concilium Arelaten-
se I. anno 314.

R. Duplex in hac parte fuit Ecclesiæ disciplinæ observatio: prior durior, inquit Innocentius I. Epist. 3. ad Exuperium Tolosanum: posterior, interveniente misericordia, inclinatio. In Gallia tamen & Hispania etiam nunc Eucharistia reis ad mortem damnatis non conceditur. Quin eisdem apud nos ante annum 1396. sacramentalis absolutio denegabatur. Hunc morem abrogavit Carolus VI. anno 1396.

Q. 6. *Quid de semifatuus, energumenis, hoc est, à dæmone possessis, de surdis & mutis à natiuitate?*

R. 1. Non expedit semifatuos frequenter admittere ad participationem corporis Christi, ne Sacramenti dignitas vilescat; sed urgente præcepto, ut in Paschate, & in mortis articulo denegari non debet; possunt enim habere necessariam dispositionem.

R. 2. Primis Ecclesiæ sæculis Eucharistia non concedebatur energumenis, nisi urgeret mortis periculum, ut patet ex Concilio Eliberitano can. 29. & 37. & ex veteri disciplina, quæ eos oblationis tempore à fidelibus separabat, Diacono clamante, *omnes Catechumeni, omnes possessi discedite.* At subsequentibus sæculis fuere participes Eucharistiæ quoties ad eam cum fructu & reverentia per-

percipiendam visi sunt dispositi. Ita sanctus Thomas 3. part. quæst. 80. art. ad secundum.

R. 3. Non est deneganda Eucharistia sicut nec absolutio mutis & surdis à nativitate, qui peccata vitare, atque in virtute proficere fatagunt, pœnitentiæ quoque ac devotionis signa non levia præferunt, quæ ut præstent, invigilare debet parentum & Pastoris pia sollicitudo; quamvis enim fides non nisi per auditum soleat suscipi, ut monet Apostolus Rom. 10. Attamen S. Augustinus agnoscit libro de dono persever. cap. 19. quibusdam, licet paucissimis, donatum esse: *Ut nullo homine sibi prædicante, per ipsum Dominum, vel per Angelos cœlorum doctrinam salutis accipiant.* Et sanctus Thomas in 3. Sent. dist. 25. quæst. 4. in his, quæ sunt necessaria ad salutem, nunquam Deus homini quærenti suam salutem deest vel deficit, nisi ex culpa sua. Unde explicatio eorum, quæ sunt necessaria ad salutem, vel divinitus providetur homini per prædicatorem, sicut patet de Cornelio Act. 10. & Eunicho Candacis Reginae, Act. 8. vel per revelationem. Similia docet de hujusmodi surdis Alexander de Ales part. 3. q. 82. memb. 3. art. 4. Quod si dubitetur de eorum dispositionibus, consulatur Episcopus.

Q. 7. *Estne deneganda Eucharistia peccatori petenti?*

R. 1. Deneganda est, si peccatur sit publicus, nec egerit pœnitentiam. 1. Quia Christus Dominus sic præscripsit Apostolis Matth. 7. *Nolite dare sanctum canibus.* Ad quæ verba respiciens Ecclesia, canit: *Ecce panis Angelorum, factus cibus viatorum, verè panis filiorum, non mittendus canibus.* 2. Quia non licet cooperari peccato alterius. Unde sanctus Chrysostomus hom. 83. in Matth. sic alloquitur ministrantes, non parva vobis im-

minet

minet ultio, si quenkum ullius culpæ conscium hujus mensæ participem esse concedatis. Sanguis ejus de manibus vestris exquiratur. Sive quis dux militiæ sit, sive præfectus, sive Princeps diademate coronatus, indigne ne accedat prohibe. Majorem illo potestatem habes. Hoc vestra securitas est, hoc omnis corona. Publicus autem esse potest vel evidentia juris, ut si peccatum fuerit confessus, aut per sententiam judicis condemnatus; vel evidentia facti, ita ut nulla possit tergiversatione celari, aut excusari, quales sunt histriones, de quibus sanctus Cyprianus Epistola 61. sic respondet: *Consulendum me existimasti, quid mihi videatur de histrione quodam qui . . . magister & doctor non erudiendorum, sed perdendorum puerorum, id quod male didicit, cæteris quoque insinuat, an talis debeat communicare nobiscum?* Puto nec majestati divinæ, nec evangelicæ disciplinæ congruere, ut pudor & honor Ecclesiæ tam turpi & infami contagione fædetur. Quod si peccator ita laboret infamia, ut tergiversatione crimen excuset, nec privatis consiliis obtemperet Pastoris, consulendus est Episcopus.

R. 2. Peccatori occulto, si secreto & absque ullis testibus petat, deneganda est communio propter rationes in præcedenti responsione allatas. Excipiunt communiter Theologi, nisi Sacerdos ex sacramentali confessione peccatum cognoverit, quanquam nonnulli etiam magni nominis hanc exceptionem non admittant. Saltem monendus videretur, qui minus ex malitia, quam ex simplicitate Eucharistiam sine teste peteret; constat enim experientia rudiores expleta confessione pro more ad sacram mensam pergere, non attendentes, fuerintne absoluti, necne. In quo

casu, ubi supponitur nullum esse periculum infamiæ aut scandali, Sacerdos potest quærere ab hujusmodi homine, num absolutionis beneficium fuerit consecutus?

R. 3. Peccatori occulto publicè petenti concedenda est Eucharistia. 1. Quia Dominus ita nos suo exemplo edocuit, dum Judæ proditori corpus suum non denegavit. 2. Quia sic in Ecclesia semper fuisse observatum testis est S. Augustinus hom. 50. in qua hæc habet: *A Communionione prohibere quenquam non possumus, (quanquam hæc prohibitio nondum sit mortalis, sed medicinalis,) nisi aut sponte confessum, aut in aliquo judicio, sive seculari, sive Ecclesiastico nominatum, atque convictum. Quis enim utrumque sibi audeat assumere, ut cuique ipse sit accusator & Judex?* 3. Quia ex ejusmodi repulsa injustè læderetur proximi fama, ad quam tuendam jus habet, quamdiu crimen ejus est occultum, turbaretur pax Ecclesiæ, & gravia sequerentur scandala, inimicitiae, rixæ, & lites, & Sacerdos infenso animo, & simultatis causa agere crederetur; imo nonnunquam re vera contingeret, aliquos hoc prætextu privatas injurias ulcisci.

Dices; Nunquam licet, quod per se malum est, v. g. mentiri ad vitanda homicidia: atqui Sacramenta ministrare indignis, est actio per se mala, cum sit sacrilega: Ergo.

R. 1. Argumentum nimis probat; Nam ex illo æquè concludi potest Sacerdotem, qui ex sola confessione Sacramenti novit crimen, non debere Eucharistiam ministrare, cum in illa hypothesis æquè cooperaretur sacrilegio alterius: itaque,

R. 2.

R. 2. Concessa majori, distinguo minorem; Sacramenta publicè ministrare peccatori publico, est actio per se mala, Concedo: Peccatori occulto, Nego minor. Cùm enim non sit diffensionis Deus, sed pacis, 1. Cor. 14. vers. 33. secundum legem æternam, qua ut provisor generalis ita concurrit ad hominum flagitia, ut ipsi imputari non possint, sed ab eo tantum permitti dicantur, decrevit ut Sacerdos in proposita hypothese tanquam minister publicus, (ne pax societatis turbetur,) agat non ex scientia privata, sed ex publica, ministretque peccatori occulto, sic publicè irruenti ad sacram mensam, ut ministerium alteri Sacerdoti peccatum ignorantibus sine scandalo demandare non possit; nec dicendus est communicare peccato alterius, sed illud permittere.

Confirmatur: Ille non peccat, dum indigno tradit corpus Domini, qui sequitur exemplum & voluntatem Domini: atqui talis est Sacerdos, de quo hic sermo: Dominus enim Judæ peccatori occulto porrexit proprium corpus, ut docent sancti Patres, paucis exceptis, ut sancto Hilario: Ergo.

CAPUT XIX.

Quinam sunt Sacramenti Eucharistiæ effectus?

Novatores ex falso suo principio, quo docent peccatorum justificari sola fide, seu fiducia in promissionibus divinis, ad quam excitandam Sacramenta unice esse instituta existimant; colligunt solam fidem esse præparationem

nem sufficientem homini gravium peccatorum conscio, ut Sacramentum Eucharistiæ dignè percipiat, sicque interpretantur hæc Apostoli verba: *Probet autem seipsum homo, & sic de pane illo edat*, 1. Cor. 11. quasi accedentes ibi moneantur solum seipsos tentare, num certo & absque ulla diffidentia credant, se per Corpus Christi consecuturos remissionem peccatorum; ait enim ipse in Evangelio, *non veni vocare justos, sed peccatores*, Matth. 9. item, *panis, quem ego dabo, caro mea est pro mundi vita; qui manducat hunc panem, vivet in æternum*. Porro, inquit, non datur vita jam viventibus, sed mortuis. Unde Calvinus libro 4. Institut. cap. 17. §. 24. scribit has epulas non prodesse justis. Et Lutherus libro de præparat. ad Eucharistiam, sic habet, *optima dispositio, quæ pessimè es dispositus*. Et in tract. de Communionem populi, vult non admittendos ad Communionem, nisi qui habent conscientiam peccati mortalis, proptereaque eorum discipuli Catholicos, qui à sacra mensa remonent peccatores, traducunt quasi essent Pharisæorum sectatores, qui indigne ferebant, quòd Dominus manducaret cum Publicanis & peccatoribus, sineretque se tangi a muliere peccatrice, Luc. 7. Matth. 9.

Contra errorem tam impium, extant duo Canones, quintus & undecimus Concilii Tridentini sess. 13. *Si quis dixerit, vel præcipuum fructum sanctissimæ Eucharistiæ esse remissionem peccatorum, vel ex ea alios effectus non provenire; anathema sit*. Item: *Si quis dixerit, solam fidem esse sufficientem præparationem ad sumendum sanctissimæ Eucharistiæ Sacramentum; anathema sit*. Itaque.

R. De fide est nec unicum, nec primarium Eucharistiæ effectum esse remissionem peccatorum.

Probatur 1. ex Scriptura, Joan. 13. Christus Dominus lavit Discipulorum pedes, antequam ad Convivium Eucharisticum illos admitteret; quo exemplo edocuit plenam animæ purgationem, & munditiem ad illud prærequiri. Matth. 22. severissime punitur, qui sine veste nuptiali ad regium convivium intrare præsumpsit. Convivio autem illo adumbratur Eucharistia, ad quam nemo sine charitate habituali accedere debet, ut interpretantur communiter SS. Patres. Denique habetur I. Cor. 11. *Probet autem seipsum homo, & sic de pane illo edat.* Quibus verbis Apostolum exigere à communicantibus immunitatem ab omni labe peccati saltem mortalis concors est SS. Patrum sententia, ut ex dicendis patebit. Peccatores quidem, imo & infideles Christus vocavit ad pœnitentiam, ad fidem, & ad Baptismum, non verò ad Eucharistiam; aliàs danda esset paganis, & cæteris peccatoribus nondum baptizatis, quod non concedent Adversarii. Eucharistia est spiritualis animæ cibus: cibus autem non ordinatur ad mortuos, sed ad viventes, & quamvis supponat vitam, eam tamen conferre dicitur, quia vegetat, roborat, & conservat viventem.

Probatur 2. ex Traditione, in qua nihil clarius, nihil inculcatius, quàm non nisi munda & purgata conscientia ad tremendum altaris mysterium accedendum. Prioribus Ecclesiæ sæculis pœnitentes cum Catechumenis à conspectu Eucharistiæ arcebantur. Quotquot hætenus celebrata sunt Concilia, peccatores à Communio-

ne rejiciunt, nisi prius peracta saltem ex parte pœnitentia, ut Eliberitanum can. 78. & 79. An-
cyranum can. 4. 5. & 7. Nicœnum I. can. 11. A-
rausicanum I. can. 3. Ex innumeris SS. Patrum
testimoniis hæc pauca feligimus. Sanctus Justi-
nus Apol. 2. *Nulli alii participare licitum est, quàm
ei, qui ita vivit, ut Christus tradidit.* S. Cyprianus
Epistol. 9. *nondum pœnitentia acta, nondum exomolo-
gesi facta, nondum manu ab Episcopo & Clero eis (pec-
catoribus) imposita, cum scriptum sit: Qui ediderit
panem, vel biberit indignè, &c.* S. Chrysost. Hom.
83. in Matth. *nullus itaque Judas assistat, nullus ava-
rus; nam tales mensa non suscipit; ait enim, cum
Discipulis meis facio Pascha.* S. Ambrosius lib. 6.
in cap. 9. Lucæ, *ubique mysterii ordo, ut prius per
remissionem peccatorum vulneribus medicina tribuatur,
postea alimonia mensæ cœlestis exuberet.* Sanctus
Augustinus Tract. 26. in Joann. num. 11. *inno-
centiam ad Altare apportate Peccata etsi sint quo-
tidiana, vel non sint mortifera, antequam ad Al-
tare accedatis, attendite, &c.* S. Gregorius li-
bro 2. in 1. Reg. cap. 1. *qui quotidie non exhau-
rit, quod delinquit, etsi minima sint peccata quæ
congerit, paulatim anima repletur, atque ei meritò
auferunt fructum internæ salubritatis. Hac repletio-
ne nos evacuare Paulus insinuans ait: Probet seipsum
homo, & sic de pane illo edat, &c.* Ex quibus col-
ligas, qua fronte, quave impudentia Novatores
Scripturam ad suum errorem detorquere ausi
fuerint.

Dices: Ecclesia in Liturgia sic precatur:
*Hæc nos Communio purget à crimine, sit ablutio sce-
lerum, sit fortitudo fragilium.* Sanctus Cyprianus
Epist. 65. scribit hoc Sacramento fieri, ut mæ-
stum

stum pectus & triste, quod prius peccatis ingentibus premebatur, divinæ indulgentiæ lætitia resolvatur. Sanctus Chrysostomus quoque homil. 4. in Matth. Hoc Sacramento omnis morbus extinguitur. Similia habent sanctus Ambrosius serm. 18. in Psalm. 118. accedite ad eum, & absolvimini, quia remissio peccatorum est: & sanctus Joannes Damascenus libro 4. de fide cap. 14. Et quidem juxta Dei promissionem: Hic est enim sanguis meus..... ait, Matth. 26. qui pro multis effundetur in remissionem peccatorum. Ergo remissio peccatorum est proprius Eucharistiæ effectus.

Distinguo conseq. Remissio peccatorum est proprius Eucharistiæ effectus, ut sacrificium est, Conc. Ut Sacramentum, Subdistinguo: Peccatorum venialium, ut infra dicetur, Concedo: Mortalium, Nego conseq. Iidem enim Patres, qui obijciuntur, disertis verbis pœnitentiam exigunt à peccatoribus, priusquam Eucharistiæ fiant participes. Neque verò Christus dixit Calicem bibi in remissionem peccatorum, sed ex ipso hauriri ipsummet Sanguinem, qui fundendus erat per Passionem in remissionem peccatorum, usus enim est verbo futuri temporis, *qui pro multis effundetur.*

Q. 2. *Nunquid saltem indirecte & secundo Eucharistia remittit peccata mortalia in eo, qui bona fide accedit invincibiliter ignorans se esse reum peccati mortalis, de quo saltem in genere imperfecte contritus est?*

R. Certum est Eucharistiam in allata hypothesis, remota saltem & ex opere operantis, peccatum mortale posse remittere, quatenus scilicet communicans ad præsentiam corporis Domini, perfectum contritionis aut charitatis motum concipit.

Difficultas est utrum per se, immediate, & ex opere operato, in hac hypothefi peccatum mortale remittat. Affirmant S. Antoninus 3. p. tit. 14. cap. 12. Durandus, Paludanus in 4. distinct. 9. Soto dist. 12. q. 1. art. 4. Sylvius in 3. p. S. Thomæ, quæst. 79. art. 3. & alii, qui in suam sententiam Doctorem Angelicum trahere conatur: sic enim habet cit. art. 3. *Fortè primò non fuit sufficienter contritus (communicans) sed devotè, ac reverenter accedens consequitur gratiam charitatis, quæ contritionem perficiet & remissionem peccati.* Dubium autem est, an ex opere operato consequatur, an vero ex opere operantis? Primum contendunt, qui stant pro affirmante sententia; secundum vero, qui pro opposita.

Negant, & ut nobis videtur probabilius, Eucharistiam hunc producere effectum immediate, & ex opere operato, S. Bonaventura, Gabriel, Major in 4. distinct. 9. Vasquesius in 3. part. quæst. 79. disp. 205. cap. 4. & alii quamplurimi. Ratio est, quia Sacramenta non efficiunt id, quod non significant: atqui Eucharistia non significat remissionem peccati mortalis, datur namque sub ratione cibi & potus, qui sanè non significant resurrectionem à morte peccati, sed solum nutritionem, quæ supponit hominem vivum. Deinde opposita sententia nullum habet fundamentum in Scriptura, neque in Traditione, ex quibus tamen Theologus suas conclusiones deducere debet: ergo non est admittenda illa exceptio.

Dices: Durum est hominem damnandum, qui bona fide particeps sit corporis Domini.

Distinguo: Damnandum propter illam Communionem, Concedo: Quia, ut supponitur, in ea non

non peccat, damnandum propter peccatum mortale, cujus reus est, nec curavit eluere per Sacramentum Pœnitentiæ, aut Extramæ-Uñctionis saltem in voto, Nego. Hanc enim pœnam exigit divina iustitia.

Q. 3. *Qui sunt ergo veri effectus Sacramenti Eucharistiæ?*

R. Cùm Dominus expressè dixerit : *Caro mea verè est cibus, & Sanguis meus verè est potus*, Joan. 6. dubium non est quin idem in anima efficiat Eucharistia, quod cibus materialis in corpore; Sacramenta enim id præstant, quod significant: atqui cibus materialis quatuor habet effectus in corpore. 1. Auget ejus vires, eique incrementum tribuit, quamdiu virilem & perfectam ætatem non attigit. 2. Vires per laborem & calorem naturalem deperditas reparat. 3. Vitam conservat. 4. Delectat, & cum voluptate à rectè valentibus percipitur. Ergo Eucharistiæ Sacramentum totidem effectus significat, operaturque in anima communicantis, modò non ponat obicem: *Hujus Sacramenti effectus*, inquit Eugenius IV. in suo Decreto, *quem in anima operatur dignè sumentis, est adunatio hominis ad Christum: & quia per gratiam Christo incorporatur, & membris ejus unitur, consequens est, quòd per hoc Sacramentum in sumentibus dignè gratia augeatur, omnemque effectum, quem materialis cibus & potus quoad vitam agunt corporalem, sustentando; augendo, reparando, & delectando; Sacramentum hoc, quoad vitam operetur spirituale.*

Primus itaque Eucharistiæ effectus, est gratia sanctificans, non quidem prima, qua deletur peccatum mortale, cùm sit Sacramentum vivorum,

non mortuorum, ut jam dictum est; sed secunda, seu augmentum gratiæ sanctificantis, qua homo fit sanctior, Deo gravior, Deo conjunctior, & arctiori vinculo ei unitus, atque ideo fortior & vegetior, tum ad comprimendos inordinatos concupiscentiæ motus, qui spiritualem animæ vitam corrumpere possent: tum ad implenda legis præcepta, & cætera, quæ Deo placent; ait enim Joan. 6. v. 55. *Qui manducat meam carnem, & bibit meum sanguinem, habet vitam æternam.* Et vers. 58. *Sicut misit me vivens Pater, & ego vivo propter Patrem; & qui manducat me, & ipse vivet propter me.*

Dices: Gratia sanctificans in omnibus Sacramentis est ejusdem speciei. Ergo in quolibet Sacramento habet eosdem effectus.

Distinguo anteced. Gratia sanctificans physice sumpta, est ejusdem speciei & naturæ in omnibus Sacramentis, Conc. Et hoc sensu est communis omnium Sacramentorum effectus: moraliter spectata, & ut est res Sacramenti, hoc est, significata per signum exterius, quod dicitur Sacramentum tantum, Nego anteced. Gratia enim sub eo respectu est propria cujuslibet Sacramenti, diciturque gratia Sacramentalis; quia ut sic est ordinata ad proprium Sacramenti finem, estque titulus seu arrha, & si dicere liceat, jus quoddam ad accipienda auxilia specialia, ut operetur quod per Sacramentum significatur; namque sine hujusmodi auxiliis & gratiis actualibus, gratia sanctificans iners remanet. Igitur per Confirmationem, & per Extremam Unctionem augetur gratia sanctificans, sicut per Eucharistiam: & augmentum illud physice spectatum, est in his tribus Sacra-

Sacramentis ejusdem rationis & speciei : sed quia sub diversis signis confertur, ad diversos quoque effectus à Deo ordinatur : in Confirmatione datur ut roborativa contra exteriores fidei & pietatis hostes, cujus rei signum est sive impositio manus, qua adumbratur specialis Dei protectio, sive unctio, quæ est ad roborandum athletam. In Extrema Unctione, in qua unctio adhibetur ad leniendum dolorem, & perficiendam sanitatem, ut forma verborum indicat, gratia tribuitur ut lenitiva, & sanitatis spiritualis perfectiva; ideòque pro diversitate signi exterioris, diversa auxilia actualia gratiæ sanctificanti respondent.

Cùm ergo in Eucharistia conferatur gratia sub speciebus cibi & potus, debet esse nutritiva. Porro in nutritione materiali 1. Fit nova accretio substantiæ corporis. 2. Ex cibo & potu generantur spiritus vitales & animales, in quibus robur animalis consistit, adeò ut, si minuantur, ut contingit in senibus, debilitentur vires : si verò exuberent ex luculentiore cibo, naturalis corporis habitudo evadat robustior. Sic anima saginata corpore Christi, in quo habitat plenitudo Spiritus & divinitatis, sanctior evadit per augmentum gratiæ sanctificantis, charitatis & aliarum virtutum. Deinde novo fervore concepto per gratias actuales, idest, per inspirationes & illustrationes mentis exquisitiores, & motiones voluntatis fortiores inardescit ad divina, spernit terrena, & ei sordescit quidquid oblectamenti ex sensibus solebat percipere. Namque, ut hic ratio cinatur S. Thomas exemplo appposito, si cera exponatur ad ignem, incalescit, & mollescit; si verò propius admoveatur, amplius ardet, & omninò liquefit;

quiescit; si verò in ignem conjiciatur, protinùs inflammatur, & ignis evadit: atqui per hoc Sacramentum anima Deo, qui ignis consumens est, Deuteron. 4. intimè conjungitur: necesse est ergo, ut (nisi obicem ponat) tota amore Dei flagret.

Confirmatur hoc S. Thomæ ratiocinium traditione, & auctoritate SS. Patrum.

S. Cyprianus epist. 65. ait: *Calix Dominicus sic bibentes inebriat ut sobrios faciat, ut mentes ad spiritalem sapientiam redigat, ut à sopore isto sæculari ad intellectum Dei unusquisque resipiscat: & quemadmodum vino isto communi mens solvitur, & anima relaxatur, & tristitia omnis; ita & potato sanguine Domini, expoliatur memoria veteris hominis, & fit oblivio conversationis pristinae sæcularis, & mæstum pectus ac triste, quod prius peccatis ingentibus premebatur, divinæ indulgentiæ lætitia resolvitur.* Hoc salutari poculo beatus Martyr censuit, sæviante persecutione, inflammandos pœnitentes, etiamsi præscripta pœnitentiæ tempora non decurrissent; *Quia*, inquit, epist. 54. *Non est idoneus ad martyrium, qui ab Ecclesia non armatur ad prælium: quia mens deficit, quam recepta Eucharistia non erigit & accendit.*

Similia docet auctor Serm. in Cœna Domini inter opera S. Cypriani: *Quàm præclarus est calix iste, inquit! quàm Religiosa hujus potus ebrietas, per quam excedimus Deo, non habentes sensum hujus mundi.... à sapientibus hujus sæculi judicamur amentes.... vident hæc Sacramenta pauperes spiritu, & hoc uno contenti ferulo, omnes hujus mundi delicias aspernantur; & possidere supellectilem dedignantur.* Suprà dixerat, celebrantes Sacramenta commonemur, quasi ungulam findens & ruminans pecus, revocare ad fauces, & minutatim com-

commolere divinæ institutionis exemplum, ut semper passio sit in memoria, nec terreant Crucifixi heredes mortis supplicia, sed pascant & reficiant maturatæ resurrectionis lætabunda solemnia. Eucharistia quippe dicitur à S. Ignatio Epistol. ad Smyrnæos, pharmacum immortalitatis, antydotum ne moriamur, sed vivamus perpetuo per Jesum Christum.

S. Chrysostomus hom. 46. in Joan. *Tanquam leones igitur ignem spirantes; ab illa mensa recedamus, facti diabolo terribiles.*

S. Bernardus Serm. de Cœna Domini: *Duo, inquit, operatur in nobis Sacramentum Dominici corporis, ut scilicet minuat sensum in minimis, & in gravioribus peccatis consensum omninò tollat. . . . Si quis vestrùm non tam sæpe modò; non tam acerbos sentit iracundiæ motus, invidiæ. . . . gratias agat corpori & sanguini Domini, quoniam virtus sacramentalis in eo operatur.*

Dices; Hi & similes textus innuunt solùm quid operari debeat fides suscipientis, non verò quid per se efficiat Sacramentum: Ergo. Probatur anteced. Quia Sacerdotes, paucis exceptis, licèt à pluribus annis quotidie celebrent, non evadunt sanctiores iis, qui rarò sacræ mensæ fiunt participes. Ergo nullum ex Eucharistia fructum percipiunt.

Nego anteced. Verba præsertim S. Bernardi non patiuntur hanc explicationem.

Respondeo ad confirmationem, 1. Multis non immeritò illud diceretur, *nomen habes, quod vivas; & mortuus es*, Apoc. 3. quia licèt gravioris peccati conscii exterius non appareant, intus tamen cupiditas latens dominatur; minuta enim peccata, si negligantur, occidunt, non quidem formaliter,

maliter, quia quantumcunque multiplicentur, non evadunt mortalia, sed dispositivè, quatenus augendo cupiditatem, ad hoc disponunt animam, ut se ipsam & propria commoda plus amet, quàm Deum: *Hoc facit sentina neglecta*, inquit S. Augustinus tract. 12. in Joan. *quod facit fluctus irruens. Paulatim (aqua) per sentinam intrat, sed diu intrando & non exhauriendo, mergit navem. Quid est autem exhaurire, nisi bonis operibus agere, ut non obruant peccata, gemendo, jejunando, tribuendo, ignoscendo?*

Respondeo 2. supposita gratia sanctificante, seu charitate habituali in hujusmodi communicantibus, quia tamen accedunt sine devotione actuali, ideoque irreverenter, propter peccata venialia, quæ fervorem charitatis impediunt, mentemque distrahunt; plures Theologi magni nominis, ut S. Bonaventura in 4. dist. qu. 12. art. 2. qu. 1. S. Thomas eadem dist. quæst. 2. art. 1. quæstiunc. 3. Alensis qu. 41. membro 3. art. 2. sanctus Antonius 3. part. tit. 13. cap. 6. Durandus qu. 4. ad 2. Cajetanus in 4. part. S. Thomæ qu. 79. & non pauci ex recentioribus docent Eucharistiam sic perceptam omni fructu carere, tum quia indignè, nec sine peccato saltem veniali percipitur. Absurdum autem videtur hominem eodem actu sanctificari, quo peccat. Tum quia nullum est vestigium in illis hominibus crescentis sanctitatis, charitas enim, si magna sit, magna operatur; & si operari renuit, charitas non est, ait S. Gregorius: tum denique repugnat homines tam tepidos, & tam carnaliter viventes, fore in Cælo beatiores; beatitudo enim percipitur secundum gradum sanctitatis & charitatis.

Quodd

Quodsi contra hanc sententiam objicias, ex ea sequi hujusmodi communicantes peccare mortaliter, quia ex omnium consensu, qui fictè, hoc est sine prærequisitis dispositionibus accedit ad aliquod Sacramentum, v. g. Baptismi, reus fit gravioris peccati; verum est: secus si ex solo veniali procedat; nam, inquiunt, qui in Sacramento Pœnitentiæ non nisi peccata venialia declarat sine sufficiente attritione, venialiter tantum peccat, etiamsi nullum consequatur Sacramenti effectum.

Verum major pars Theologorum hanc distinctionem non admittit, contenditque reatum peccati mortalis incurrere; quicumque obicem ponit, sive ex mortali, sive ex veniali culpa totali Sacramentorum effectui. Sed durior ipsis videtur, nec satis fundata sententia affirmans irreverentiam venialem esse obicem gratiæ habituali per Eucharistiam producendæ, cum certum sit eam formaliter non opponi peccatis venialibus. Nec absurdum putant illi Theologi, quod quis venialiter peccando proficiat in gratia sanctificante; quia profectus ille est ex virtute Sacramenti, quod agit ad modum causarum naturalium, quæ necessariò operantur, ubi non inveniunt obicem. Ratio verò, cur nullum ex Sacramento Pœnitentiæ consequatur effectum, qui cum solis venialibus, sed sine debito dolore accedit, repetenda est ex defectu materiæ essentialis Sacramenti, dolor enim est veluti pars materialis pœnitentiæ, sine qua Sacramentum est omnino irritum, ac proinde sine ullo effectui. Porro non est levis culpa in eo, qui sciens & volens, sacramenti partem essentialem subtrahit, v. g. qui aquam pro vino subministrat ad Sacrificium.

Censent itaque illi Theologi irreverentiam venialem ob minuta peccata non retractata, private communicantem nonnullis quidem Eucharistiæ fructibus, puta remissione peccatorum venialium, & fervore charitatis, sed non omnibus, præsertim augmento gratiæ habitualis. Hanc sententiam tandem amplexus est S. Thomas 3. part. quæst. 79. art. 8. ubi revocavit quæ Junior scripserat in 4. Sent. *Peccata venialia, inquit, non ex toto impediunt hujus Sacramenti effectum, sed in parte . . . non tollitur augmentum habitualis gratiæ, vel charitatis.* Quare juxta hujus sententiæ principia

Respondeo 3. Etsi affectus ad peccatum veniale non sit obex gratiæ habituali, tamen contrarius est fervori charitatis, & spirituali nutritioni, quæ ex dictis consistit in auxiliis & gratiis actualibus. Enimverò gratia actualis, ut sæpe monuimus, est illustratio mentis, cogitatio divinitus immissa, qua mens elevatur ad divina, & obliviscitur terrena, cui respondent pia affectio; & motio, qua voluntas accenditur, & fertur ad cœlestia, sprete mundi & carnis oblectationibus: peccatum verò veniale est conversio ad creaturam, hoc est, cogitatio, & amor rerum temporalium: quam autem hæc duo sint opposita, patet ex ipsa terminorum apprehensione. Porro gratia, seu charitas habitualis sine gratiis actualibus, est omnino otiosa & iners, & qui posterioribus obicem ponit, priorem in injustitia detinet, non habet unde illam conservet, quin multiplicando peccata venialia, illam facile amittit. Venialia quippe sunt veluti ægri tudines animi, & dispositiones ad peccatum lethale, quemadmodum morbus corporalis ad mortem, nisi curetur. Unde timendum
non

non est, ne illi carnales ex frequenti Eucharistiæ perceptione, in æterna beatitudine potiores partes obtineant; Deus enim non irridetur, ait Apostolus Gal. 6. sed justus est & vindex illicitarum cupiditatum : *Qui quotidie non exhaurit, quod delinquit*, ait S. Gregorius, lib. 2. in 1. Reg. cap. 1. *et si minima sint peccata, quæ congerit, paulatim anima repletur, atque ei merito auferunt fructum internæ saturitatis.* Hac repletionem nos evacuare Paulus insinuans ait : *Probet seipsum homo, & sic de pane illo edat. De repletis subdit, qui enim manducat & bibit indignè, judicium sibi manducat & bibit.* Ex quibus liquet eundem posse aliquandiu esse habitu sanctiorem, & actu elatum, superbum, ac cupidum.

Instabis : Gratia habituali respondent gratia actuales : Ergo.

Distinguo anteced. Si subjectum non ponat obicem, nec his auxiliis indignum se præbeat, Conc. Si obicem ponat, & indignum se præbeat, Subdistinguo : Gratia sufficientes & remotæ, quibus possit affectum inordinatum deponere, Conc. Gratia efficaces, & proximæ, quibus actu & de facto perseveret in gratia habituali, manente illo tempore & affectu inordinato, Nego ant.

Secundus Eucharistiæ effectus est remissio peccatorum venialium. Ita Concilium Trid. sess. 13. cap. 2. ubi sic habet : *Sumi autem voluit (Christus) Sacramentum hoc tanquam antidotum, quo liberemur à culpis quotidianis.*

Probatur 1. ex Traditione. S. Chrysostomus homil. 45. in Joannem : *Hic sanguis, inquit, nostrarum animarum salus est, hoc lavatur anima, hoc ornatur, hic incenditur; mundat squallorem & sordem.* S. Augustinus epistola 118. cap. 3. vocat Eucharistiam

stiam quotidianam medicinam, quia quotidianis morbis sanandis destinata est : Si peccata, inquit, *tanta non sunt, ut excommunicandus quisquam homo judicetur, non se debet à quotidiana medicina Domini Corporis separare.* Sanctus Ambrosius, sive auctor operis de Sacramentis lib. 5. cap. 4. de Euchar. sic scribit : *Isle panis quotidie sumitur in remedium quotidianæ infirmitatis.* Et lib. 4. cap. 6. *Si quotiescumque effunditur sanguis Christi, in remissionem peccatorum effunditur, debeo semper accipere, qui semper pecco, debeo semper habere medicinam.* Denique S. Joannes Damasc. lib. 4. orthodoxæ fidei c. 14. *Ignis ejus, quod in nobis est, inquit, desiderii, assumens eam, quæ ex carbone, id est, ex hoc Sacramento, ignitionem, comburet nostra peccata, & illuminabit corda nostra, ut participatione divini ignis, igniamur, & deificemur.*

Probat 2. ratione Theologica. Sacramenta novæ legis operantur quod significant : atqui Eucharistia significat refectionem spiritualem, cum detur per modum cibi : in refectione autem corporali reparantur vires deperditæ per laborem & calorem naturalem : ergo & in refectione spirituali refarciuntur detrimenta, quæ ex concupiscentiæ inordinato calore patitur charitatis fervor, in quo consistit robur animæ. Illa autem detrimenta spiritualia sunt peccata venialia, quæ quidem habitum charitatis non minuunt, sed ejus actum impediunt & fervorem.

Dices : vel Eucharistia remittit omnia peccata venialia, vel aliqua tantum, vel nulla : atqui non remittit omnia, aliàs suscipiens Eucharistiam, posset esse sine peccato, contra illud 1. Joan. cap. 1. *Si dixerimus, quoniam peccatum non habemus, ipsi nos seducimus.* Non etiam aliqua, cur enim po-
tius

tius unum remitteret, quàm aliud? Ergo nulla remittit.

Concessa maj. Nego min. Namque si quis accedat verè contritus, saltem imperfectè de omnibus & singulis peccatis venialibus, omnia delet Eucharistia: si de aliquibus, illa sola remittit: si de nullis, nulla etiam expungit. Tum quia nullum peccatum est remissibile, quandiu ad illud manet affectus, tum quia gratia seu charitas habitualis secundum se præcisè non expellit peccata venialia, ut jam diximus, utpote quæ cum ea non habeant veram oppositionem, unde potest crescere & augeri per Sacramentum, multiplicatis peccatis venialibus. Delet itaque illa, quatenus infunditur prævio dolore & sincero proposito strenuè, & viriliter contra illa pugnandi.

Ad confirmationem respondet S. Thomas q. 79. art. 4. ad 2. mentem Apostoli non esse quòd homo brevi tempore non possit stare sine aliquo veniali peccato; sed docere solum vitam etiam sanctissimam non esse immunem ab omni labe peccati saltem venialis.

Tertius Eucharistiæ effectus est perseverantia in bono. Est tanquam antidotum, inquit Concilium Trident. sess. 13. cap. 2. *quo & à peccatis mortalibus præservemur.*

Probatur tum ex Scriptura Joan. c. 6. *qui manducat hunc panem, vivet in æternum.* Item, *qui manducat me, & ipse vivet propter me.* Tum ex Sanctis Patribus supra laudatis pag. 604. & 605. *in gravioribus consensum omnino tollit,* ait ibidem Sanctus Bernardus: tum ratione Theologica, cibus assumitur ad conservandam vitam animalem: Ergo cum detur Eucharistia per modum cibi spiritualis, vitam supernaturalem, quæ

in gratia habituali consistit, similiter conservat, mediantibus scilicet gratiis actualibus, seu sacramentalibus, quæ fervorem charitatis excitant, mentem à terrenis retrahunt, & ad pietatis officia applicant. Hunc itaque fructum non sperent post communionem desides & nugis distracti.

Quartus Eucharistiæ effectus, est delectatio spiritualis juxta illud, pinguis est panis Christi, & præbebit delicias Regibus. *In hoc Sacramento, inquit Clemens V. in Concilio Viennensi, habetur omne delectamentum, & omnis saporis suavitas, ipsaque dulcedo Domini degustatur. Ita ut dicere liceat accedentibus: Gustate, & videte quoniam suavis est Dominus, Psalm. 33. ut constat ex textibus supra allatis pag. 604. & 605. Hanc tamen suavitatem non percipiunt nauseantes, & sensuum delectione præoccupati. Hinc Sanctus Bernardus serm. 5. de Ascens. Domini: Unde spiritualis gratiæ inopia tanta quibusdam, cum aliis copia tanta exuberet præoccupatum nempe sæcularibus desideriis animum delectatio sancta declinat: nec misceri poterunt vera vanis, æterna caducis, spiritualia corporalibus, summa imis, ut pariter sapias quæ sursum sunt, & quæ super terram.*

Cæterum monendi sunt fideles, hanc dulcedinem plerumque sensibus non percipi, quin nonnumquam, tam occultè infundi, ut etiam viri Sancti eam sibi deesse existiment, Deo ita disponente ad exercitium virtutis, præsertim humilitatis, pœnitentiæ, & patientiæ. Verùm ex effectibus debet colligi. Nam sancti Augustini effatum est, quod magis delectat, secundum illud operemur necesse est. Ac proinde qui post communionem humilior de se sentiunt, orant frequentius, pœnitentiæ, & aliarum virtutum operibus alacrius incumbunt,

cumbunt, interiori suavitate delinitos esse oportet; quia anima operatur secundum quod magis delectatur. Ex eodem verò principio sequitur eos, qui percepto Christi corpore, ea, quæ sunt carnis & mundi sectari non desinunt, spirituali illo sapore privari, licet forte in ipsa Sacramenti perceptione sensus illorum suaviter afficiantur, ut contingit in mulierculis.

Q. 3. *Eucharistia remittitne temporalem pœnam peccatis debitam?*

R. Ut Sacramentum est, non remittit directe, & ex opere operato; remittit tamen indirectè, & ex opere operantis.

Prima pars probatur; quia Sacramenta in tantum operantur, in quantum significant; atqui Eucharistia, ut Sacramentum est, non significat illum effectum; nam datur per modum cibi spiritualis, qui non datur ad satisfactionem Deo exhibendam.

Dixi, *ut Sacramentum*; nam ut Sacrificium est, offertur in remissionem peccatorum, ut infra dicitur.

Secunda pars probatur 1. quia ex dictis Eucharistia per se remittit peccata venialia: atqui tum tollitur culpa, minuitur pœna peccato debita. Ergo Eucharistiæ Sacramentum indirectè remittit pœnam temporalem. 2. Vi Eucharistiæ producitur fervor charitatis, & incenditur homo ad bona opera, quæ satisfactoria sunt: ergo ex opere operantis valet Eucharistiæ Sacramentum ad remissionem pœnæ temporalis. Ita ferè S. Thomas hic art. 5.

Q. 4. *Eucharistiæ Sacramentum prodestne aliis quàm summentibus?*

R. Ex opere operato non prodest; quia cibus per se non prodest nisi sumenti: ex opere verò ope-

rantis prodesse potest aliis; quia bona opera, ut eleemosynæ, sunt aliis meritoria de congruo, quando in illorum utilitatem Deo offeruntur. Atqui sumere Eucharistiam cum debita devotione est opus bonum: ergo utile est aliis Eucharistiam piè sumere in illorum gratiam ac proinde jure merito sacra Cardinalium Congregatio eorum sententiam damnavit sub Alexandro VIII. qui morem communicandi pro defunctis carpebant.

Q. 5. *Eucharistia, ut Sacramentum est, habetne aliquam efficaciam circa corpus sumentis?*

R. 1. Certum est quòd directè tribuat aliquam sanctitatem moralem corpori, in quo dignè recipitur. Quia si vasa inanimata ex contactu corporis Christi sacra & veneranda evadunt, à fortiori justorum corpora, quæ non solum materialiter, sed & sacramentaliter illud recipiunt, *animam & corpus sanctificat*, inquit S. Cyrillus Jerosolymitanus catech. 4.

R. 2. Quamvis cibus Eucharisticus non nisi animam nutriat, tamen indirectè saltem operatur in corpus. Ita Sanctus Thomas quæst. 79. art. 1. ad tertium ubi sic habet, *licet corpus non sit immediatum subiectum gratiæ, ex anima tamen redundat effectus gratiæ ad corpus*, quatenus nempe ex augmento & fervore charitatis concupiscentia minuitur. Potest etiam dici Eucharistiam aliquando directè operari circa corpus, in quantum ejus intuitu Deus speciali providentia invigilat, ne recurrant phantasmata, quibus solent acriores tentationes insurgere.

Probatur autem nostra responsio ex Traditione.

Sanctus Chrysostomus hom. 4 in Matth. sic loquitur: *Quonam modo ab hac tam noxia peste (ira) liberabi-*

berabimur? si illam utique potionem sumamus, quæ omnes intra nos vermes serpentesque mortificat.

S. Cyrillus Alexandrinus lib. 3. & 4. in Joan. *sedat, cum in nobis manet Christus, sævientem membrorum nostrorum legem.*

S. Joannes Damascenus lib. 4. orthod. fidei c. 14. *cedit in anima corporisque præsidium. Et infra, corpus & sanguis Christi est ad animæ & corporis nostri incolunitatem tendens.*

Catechismus Romanus docet, hoc Sacramentum sensum libidinis cohibere, juxta illud Zachariæ 9. *quid enim bonum ejus est, & quid pulchrum ejus, nisi frumentum electorum, & vinum germinans virgines? quod S. Hieronymus exponit de Sacramento Eucharistiæ.*

3. Eucharistiæ Sacramentum est causa immortalitatis & gloriæ corporis. *In futuro, inquit S. Thomas art. 1. ad tertium, corpus nostrum fortietur incorruptionem & gloriam animæ, scilicet beneficio hujus Sacramenti.*

Probatur 1. ex Scriptura Joan. 6. *patres vestri manducaverunt manna in deserto, & mortui sunt qui manducat hunc panem, vivet in æternum.* Hoc mysterium adumbrabat lignum vitæ sic dictum, quia vim habebat conservandi vitam animale[m] hominis innocentis, & reddendi corpus ejus immortale. Hinc Adamus inobediens factus, & in pœnam peccati morti addictus, è paradiso emittitur, *ne fortè, inquit Scriptura Gen. 3. v. 22. sumat etiam de ligno vitæ, & comedat, & vivat in æternum.* Similiter Deus instituit Eucharistiam, ut immortalitas per peccatum deperdita reparetur. Atque ob eam causam meritò nominatur panis vitæ, à quo publici peccatores arcentur gladio excommunicationis.

Probatur 2. ex SS. Patribus.

S. Ignatius Epist. ad Ephesios vocat Eucharistiam *pharmacum immortalitatis*.

S. Iræneus lib. 4. *corpora nostra, ait, percipientia Eucharistiam, jam non sunt corruptibilia spem resurrectionis habentia.*

S. Chrysostomus lib. 6. de Sacerdotio, scribit animas eorum, qui hoc Sacramentum in fine vitæ suscipiunt, ab Angelis propter assumptum illud Sacramentum, hinc recta via in cœlum educi: eorum verò corpora ab iisdem Angelis satellitum more custodiri in vitam æternam.

S. Augustinus tract. 26. in Joan. *eos à quibus sumitur (Eucharistia) immortales, & incorruptibiles facit.*

S. Cyrillus Alexandrinus lib. 20. in Joan. *non poterat aliter corruptibilis hæc natura corporis ad immortalitatem & vitam perpetuam traduci, nisi naturalis vitæ corpus illi conjungeretur.*

Difficultas est, quomodo Eucharistia hunc præstet effectum.

Nonnulli existimarunt Eucharistiam directè id efficere infundendo corpori quasdam qualitates, veluti dispositiones ac dotes gloriosas resurrectionem subsecuturas. Verùm hæc sententia omnifundamento caret, tum in Scriptura, tum in Traditione, nec satis intelligitur, quomodo qualitates illæ maneant incorruptæ in corpore corrupto, & in cineres redacto.

Eucharistia ergo indirectè tantum hunc producit effectum, quatenus instituta est ut medium adultis necessarium saltem secundum quid, ad perseverandum usque in finem, quod præfiguravit cibus Eliæ ab Angelo ministratus, in cujus fortitudine
ambu-

ambulavit usque ad montem Dei, ut habetur 3. Regum cap. 19. Qui enim perseveraverit, certò & infallibiliter gloriam consequetur, Matth. 24. v. 13.

Q. 6. *Quo tempore Eucharistia producit recensitos effectus?*

R. 1. Gratiam habitualement producit in ipsa manducatione; Sacramenta enim operantur in ipsa applicatione, sive in usu signi exterioris, v. g. Baptismus in ablutione, Confirmatio in manuum impositione: Ergo & Eucharistia in manducatione, quæ est usus ciborum. Manducatio autem est trajectio cibi in stomachum, non vero ipsa nutritio, quæ propriè est manducationis effectus, neque cibi comminutio, quæ fit dentibus; qui enim comminutum cibum expueret, non censeretur manducasse.

Hinc sequitur 1. eum, qui sacras species in ore detineret, aut expueret, nullum ex Sacramento fructum percepturum. 2. vanam esse observationem, quam inquisitores fidei damnarunt in Hispania, si grandiores formulæ sumantur, vel major vini copia infundatur in calicem ut speciebus diutius in stomacho permanentibus uberior gratia producat.

CAPUT XX.

Quæ dispositiones in adultis requiruntur ad Eucharistiam dignè recipiendam.

R. Aliæ spectant animam, aliæ corpus.

Q. 2. *Quæ dispositiones requiruntur ex parte animæ?*

Q 9 5

R. 1.

R. I. Accedens ad sacram mensam debet sibi proponere, & sincero animo intendere finem hujus Sacramenti; namque in celebratione cujuslibet Sacramenti intercedit quoddam pactum inter Deum & initiandum; Deus ex sua parte offert gratiam & auxilia, quibus finis ad quem ordinatum est Sacramentum, attingi possit, initiandus verò promittit se daturum operam mediantibus illis auxiliis, ut propositum finem assequatur, aliàs Sacramentum fictè acciperet: ver. gr. in Confirmatione signatur ad militiam Christianam, Deus promittit arma spiritualia & necessaria; ergo in consignando requiritur propositum laborandi, ut decet bonum militem Christi, 2. Timoth. cap. 2. Porro Eucharistiam eo fine Christus instituit, ut vivamus propter ipsum, *sicut misit me vivens Pater*, inquit Joan. 6. *& ego vivo propter Patrem. Et qui manducat me, & ipse vivet propter me.* Quæ verba sic interpretatur Sanctus Augustinus tractat. 26. in Joan. num. 19. *ut ego vivam propter Patrem, id est, ad illum tanquam majorem referam vitam meam, exinanitio mea fecit, in qua me misit. Ut autem quisque vivat propter me, participatio facit, qua manducat me. Ego itaque humiliatus vivo propter Patrem, ille erectus vivit propter me.*

2. Quemadmodum tria requiruntur, ut quis cibo corporali refici possit, 1. debet esse vivens. 2. sanitate gaudere, alimenta enim noxia sunt febre laborantibus. 3. quiescere, quia labor distrahit spiritus vitales ad nutritionem necessarios. Similiter ad dignam Eucharistiæ perceptionem, quæ sub signo cibi spiritualis peragitur, triplex dispositio in communicante exigitur.

Prima

Prima est gratia sanctificans, in qua consistit vita spiritualis. Ita Concilium Trid. sess. 13. c. 2. *sumi voluit* (Christus) Sacramentum hoc, tanquam spirituale animarum cibum, quo alantur & confortentur viventes vita illius. Et cap. 7. diligentius cavere ille debet, ne absque magna reverentia & sanctitate ad id percipiendum accedat; præsertim cum illa plena formidinis verba apud Apostolum legamus, qui manducat & bibit indignè, judicium sibi manducat, &c. Quare communicare volenti revocandum est in memoriam ejus præceptum, Probet seipsum homo. Ecclesiastica autem consuetudo declarat eam probationem necessariam esse, ut nullus sibi conscius mortalis peccati, quantumvis sibi contritus videatur, absque præmissa Sacramentali confessione ad sacram Eucharistiam accedere debeat, quod à Christianis omnibus hæc sancta Synodus perpetuo servandum esse decrevit. Probatur autem hujus dispositionis necessitas ex dictis capite præcedenti contra Lutherum, Eucharistiam non esse institutam ad remittendum peccatum mortale.

Specialem legem citato cap. 7. sanxit Concilium pro Sacerdotibus, quibus gravioris peccati consciis instat celebrandi necessitas, deestque copia Confessarii; iis quippe præcipit ut peracto Sacrificio prævia contritione, *quamprimum confiteantur*. Cum verò nonnulli Casuistæ hanc particulam, *quamprimum*, temerè sic interpretati essent, *cum Sacerdos suo tempore confitebitur*, Alexander septimus & Clerus Gallicanus anno 1700. hanc interpretationem damnarunt.

Sed difficultatem quis movere posset, utrum in hypothesi, quòd beneficium absolutionis fuerit consecutus, & recordetur se aliquod crimen ex oblivione inculcata non fuisse confessum, teneatur

neatur Confessarium convenire ante Communionem, utpotè qui sit indirectè ab illo peccato absolutus? Nihilominus est communis Theologorum sententia hujusmodi teneri, si absque scandalo & infamiæ periculo id possit, quale contingeret si jam sacrae mensae astaret. Ratio est, quia probatio ab Apostolo requisita debet fieri examine & judicio Sacerdotis. Unde si Sacerdos aliquis celebrare coactus est non præmissa confessione illius peccati, debet quamprimum confiteri.

S. Thomas q. 80. art. 4. & 5. expendit quale sit peccatum ejus, qui cum conscientia peccati mortalis accedit ad hoc Sacramentum, docetque 1. peccatum illud esse mortale, ut colligitur ex verbis Apostoli, *quicumque manducaverit panem hunc, vel biberit calicem . . . indigne, reus erit corporis & sanguinis Domini judicium sibi manducat*, 1. ad Corinthios cap. 11. 2. etsi peccato illo sint quædam graviora, nimirum ea, quæ Divinitatem impetunt, ut infidelitas, blasphemia, Christo ipso iudice Matthæi cap. 12. *quicumque dixerit verbum contra Filium hominis, remittetur ei: qui autem dixerit contra Spiritum Sanctum, non remittetur ei: & quæ contra humanitatem in propria specie commissa sunt à judæis & militibus tempore Passionis, quia fiebant animo nocendi Christo: veruntamen longè gravius delinquere peccatorem percipiendò Eucharistiam, quàm si alia Sacramenta reciperet; quia crescit sacrilegium pro dignitate rei sacrae, quæ violatur. Hinc quia sanctitas loci sacri ordinatur ad sanctitatem hominis, qui in loco sacro cultum Deo exhibet, gravius peccatum est, inquit S. Doctor 2. 2. quæst. 99. art. 3. *sacrilegium,*
quo*

quo peccatur contra personam sacram, quam quo peccatur contra locum sacrum similiter etiam & tertia species sacrilegii, quæ circa alias res sacras committitur, diversos habet gradus secundum differentiam rerum sacramentum. Inter quas summum locum obtinent ipsa Sacramenta, quibus homo sanctificatur: quorum præcipuum est Eucharistiæ Sacramentum, quæ continet ipsum Christum. Et ideo sacrilegium, quod contra hoc Sacramentum committitur, gravissimum est inter omnia.

Duo sibi objicit S. Doctor. Primum, peccator communicans, ab Apostolo comparatur Judæis, qui crucifixerunt Dominum: ergo ejus peccatum est omnium gravissimum, saltem eorum, quæ in Christi humanitatem committi possunt. Secundum, Publicani & peccatores sine peccato Christum Dominum in propria specie contingebant: ergo & in specie Sacramenti licite tangere possunt.

Respondet ad primum, comparari secundum aliquam similitudinem, non verò secundum criminis quantitatem. Ad secundum vero negat consequentiam & paritatem. Ratio disparitatis est, quòd Sacramentum Eucharistiæ sit signum unionis perficiendæ cum Christo & ejus membris: ergo qui per peccatum mortale est à Christo separatus, falso usurpat illud signum, ac proinde graviter peccat. Nulla verò occurrebat falsitas in peccatoribus, ad Christum, tamquam ad Medicum, à quo sanarentur, concurrentibus.

Secunda dispositio est immunitas ab affectu ad peccata venialia.

I. Quia affectus ille est obex gratiæ sacramentali, ut fuse ostensum est præcedenti cap. hic consu-

consulendo. Namque cibus corporalis, præsertim solidus, non modo non reficit febrientes, ut contra illis noxius sit, & à Medicis interdicatur: febris autem animæ, inquit S. Ambrosius in c. 4. Lucæ, avaritia est, libido est, ambitio est, iracundia est.

2. Quia hujusmodi affectus contrarius est reverentiæ tanto Sacramento debitæ. *Sed dicis*, inquit S. Augustinus, vel potius Sanctus Cæsarius ferm 244. nunc in appendice 292. num. 6. *peccatum quidem est, sed tamen parvum est. Nec nos dicimus quia capitale peccatum est, sed tamen si frequentius exerceatur, nimis immundam animam facit . . . Et cum nullus homo velit cum tunica sordibus plena ad Ecclesiam convenire, nescio qua conscientia cum anima, quæ per luxuriam (scilicet venialem in immoderato usu matrimonii; de quo sermo est) sit inquinata, præsumit ad altare accedere, non timens illud . . . qui . . . manducat . . . indigne, si erubescimus . . . Eucharistiam manibus sordidis tangere, plus debemus timere ipsam in anima polluta suscipere. Et ferm. 41. de Sanctis, de levioribus culpis sic habet, ita animam velut quibusdam pustulis, & quasi horrenda scabie replentes deformem faciunt, ut eam ad amplexus sponsi cælestis aut vix, aut cum grandi confusione venire permittant.*

3. Quia sicut morbus corporalis fastidium parit, ita affectus ad leviora peccata, utpote qui sit animæ ægritudo & febris, extinguit famem spiritualem, hoc est, desiderium perfectioris cum Christo unionis, quæ per hoc Sacramentum significatur & promittitur, fervorem charitatis expellit, teporem immittit, efficitque, ut homo vel cum fastidio, vel saltem perfunctoriè, & quasi ex sola consuetudine ductus ad sacram mensam
acce-

accedat, quodd maximè timendum docent Sancti Patres. *Ne torpeamus*, inquit Sanctus Chrysostomus hom. 85. in Matth. *tanta digni charitate. Nonne videtis quanto impetu parvuli labia uberibus infigunt? Accedamus cum tanta nos quoque alacritate ad banc mensam, & unus sit nobis dolor hac esca privari.* Ethom. 46. in Joan. *Aquilarum, non monedularum hæc est mensa.* Homilia quoque 70. ad populum, nemo accedat cum nausea, nemo resolutus, omnes accensi, omnes ferventes, & excitati. Sanctus Gregorius in cap. 1. lib. Reg. *non saturantur nisi famelici, qui à vitiiis perfectè jejunantes divina Sacramenta percipiunt & quia sine peccato electi etiam viri esse non possunt, quid restat, nisi ut à peccatis, quibus eos humana fragilitas maculare non desinit, evacuari quotidie conentur . . . hac repletionem nos evacuare Paulus insinuans ait; probet seipsum, &c.* Multum cavere debet homo, inquit Sanctus Bonaventura lib. de præparat. ad Missam; *ne cum tædio ad illud Sacramentum accedat.*

Tertia dispositio est singularis reverentia erga Christum in Sacramento præsentem. *Quia in hoc Sacramento præsens est divina Majestas, debet recipi cum honore*, ait S. Bonaventura tract. de præparatione ad Missam. Reverentia autem illa ex duobus necessariis exurgit, nimirum ex attentione, & ex actuali devotione.

Attentionem exigunt hæc Apostoli verba, 1. Cor. 11. *Qui . . . manducat & bibit indignè, iudicium sibi manducat & bibit, non dijudicans corpus Domini, hoc est, juxta SS. Patrum interpretationem, non attendens, non ponderans doni magnitudinem. Oportet accedentem ad corpus & sanguinem Domini, inquit S. Basilius lib. 1. de Bapt. cap. 9. & ad*
memo-

memoriam ejus, qui pro nobis est mortuus & surrexit, non solum purum esse à quovis inquinamento carnis & spiritus, ne ad judicium edat ac bibat; sed evidenter ostendere & exprimere memoriam ejus, qui pro nobis mortuus est ac revixit, in eo quod mortificatus est peccato, mundo, ac sibiipso, & Deo vivit in Christo Jesu Domino nostro. Et regul. 21. cap. 7. qui ad communicationem corporis & sanguinis Christi accedit, neque rationem illam considerat, cujus causa instituta est, utilitatis ex ea fructum nullum reportat.

S. Chrysostomus hom. de non contemnendis Ecclesiæ mysteriis, hanc attentionem vehementi stylo expostulat, nemo, inquit, animo resolutio sacras illas & mysticas laudes ineat; nemo rerum ac humanæ vitæ consilia illo tempore volutet: sed omni terrena sorde animo pulsa, in cælum quisque se transferat, utpote qui propinquus solio Dei cum Seraphinis volitet.

S. August. tract. 47 in Joan. num. 2. scriptum est, inquit (nempe Proverb. 23.) si sederis . . . ad mensam potentis, sapienter intellige quæ apponuntur tibi & mitte manum tuam, sciens, quia talia te oportet præparare. Mensa potentis, quæ sit, nostis, ubi est corpus & sanguis Christi qui accedit ad talem mensam, præparat talia.

Devotionem cum attentione conjungit S. Bonaventura in Brevil. parte 6. cap. 9. his verbis: Quoniam capacitas nostra ad Christum efficaciter suscipiendum non est in carne, sed in spiritu . . . & mens Christum non attingit, nisi per cognitionem & amorem . . . idèd quod aliquis digne accedat, oportet quod spiritualiter comedat, & ut sic Christum per recordationem fidei mastice, & per devotionem amoris suscipiat. Propter quod manifeste colligitur, quod qui tepide, inde-

votè,

votè, & inconsideratè accedit; *judicium sibi manducat & bibit*. Similem regulam tradit S. Thomas quæst. 80. art. 10. *requiritur, inquit, ut cum magna devotione, & reverentia ad hoc Sacramentum accedat*. Quod addit S. Bonaventura tract. de præparatione ad Missam, est notatu dignissimum. *Majorem, inquit, efficaciam credo, quòd recipiat homo in una manducatione cum bona præparatione, quàm in multis, si non se præparet diligenter*.

Ex his faciliè satisfit nonnullis quæstionibus, quæ solent moveri.

Prima, utrùm qui contritus, ut putat, peccata mortalia in Sacramento pœnitentiæ deposuit, possit statim ad sacram mensam accedere?

Secunda, utrùm qui nocturno pollutus est somnio, vel qui actum conjugalem exercuit, debeat die proximè sequenti à sacra Communionē abstinere?

Enimverò ex dictis necessaria est reverentia, attentio, & actualis devotio ad dignam Eucharistiæ perceptionem: ergo si ea, de quibus est quæstio, hanc animi dispositionem impediunt, procul dubio a sacra mensa saltem ad tempus retrahere debent. Ita Salazar Societatis Jesu Religiosus in eximio opere, quod Hispanicè edidit de frequenti Communione.

Porro certum est 1. eum, qui in peccatum mortale lapsus, statim contritus est & confessus, pati quandam mentis hebetudinem (majorem quidem in venereis) quæ tollit fiduciam, de qua 1. Joh. 3. vers. 21. turbat animæ intuitum, ligat quodammodo affectum, quo minus ad divina assurgat. Quamobrem auctor operis de Ecclesiastica Hierarc. testatur c. 3. hanc fuisse Eccle-

siæ praxim, ut excluderentur à sacra synaxi illi, quos erratorum quidem suorum pœnitebat, quique anteaetæ vitæ nuntium remiserant, sed nondum perfectè puri erant; *quia*, inquit S. Chrysostomus expendens hom. 17. in Epist. ad Hebr. hæc verba Diaconi ad communicantes, sancta sanctis, *sanctum non facit liberatio à peccatis, sed etiam præsentia spiritus, & bonorum operum copia.* Hinc Petrus Cantor Parisiensis Theologus hanc certam statuit regulam apud Morinum lib. 9. de Pœnitentia cap. 17. n. 11. *Nullus consecrare, vel percipere debet Eucharistiam, qui fuerit in mortali, nisi peracta pœnitentia tota, vel saltem ex magna parte, cum serenata est conscientia, & homo confidit sub Deo non casurum.* Eandem doctrinam tradit S. Thomas in 4. dist. 9. art. 4. q. 1. *non esse, inquit, consulendum alicui, quòd statim post peccatum mortale etiam contritus, & confessus ad Eucharistiam accederet; sed deberet, nisi magna necessitas urgeret, per aliquod tempus propter reverentiam abstinere.*

Dices, legitur in vita Sancti Marcelli Episcopi Parisiensis, quendam peccati mortalis consci-um voluisse cum aliis ad sacram mensam accedere, at miraculo prohibitum, fuisse crimen confessum, à quo statim absolutus per sanctum Pontificem, continuò Eucharistiam accepit: Ergo.

Nego conseq. namque miracula in exemplum trahi non debent; cum per miraculum conversio illa contigerit, credendum est fuisse adeo perfectam, ut stigmata & cicatrices peccati, quæ reverentiam impediunt, prorsus deleverit.

2. Actus conjugalis, licet in se legitimus, quia tamen præter immunditiam quandam corporalem, quæ eum semper comitatur, mentem deprimit, ejus-

ejusque evagationem & distractionem inducit maximè cum non ex debito, sed ex captandæ voluptatis desiderio, atque ideo cum peccato veniali exercetur (ut declaravit Innocentius XI. anno 1679. damnans opinionem contrariam) à sacra Communionem retrahere debet, nisi obftet aliqua necessitas.

Confirmatur 1. ex Scriptura, 1. Cor. 7. *no-
lite fraudare invicem, nisi fortè ex consensu . . . ut va-
cetis orationi.* Et 1. Petri 3. *ut non impediatur ora-
tiones vestræ.* In priorem autem locum sic scribit
Sanctus Hieronymus lib. 1. contra Jovinianum,
*quid est majus orare, an corpus Christi sumere?
si ergo per coitum, quod minus est impeditur, multo
magis quod majus est.* Attamen Sanctus Chryso-
stomus & alii communiter intelligunt Apostoli
locum de oratione sacrificii, in quo fidelibus Eu-
charistia administrabatur, contenduntque Aposto-
lum monere conjugatos, ut se separent ob reve-
rentiam utriusque, tum Sacrificii, tum Commu-
nionis. Unde Sanctus Hieronymus cit. loco re-
prehendit conjuges; quia ita utrumque distingue-
bant, ut continentia non servata, ab ingressu
quidem templi, & oratione publica abstinerent,
sed Eucharistiam ad se per Diaconum deferri cu-
rarent, cum tamen majus sit corpus Christi sume-
re, quàm orare.

Confirmatur 2. ex Traditione. Concilium
Eliberitanum sic habet can. 3. *omnis homo ante
sacram Communionem à propria uxore abstinere debet
tribus, aut quatuor, aut octo diebus.* Refertur
dist. 2. de consecrat. Sanctus Gregorius in re-
sponsione ad Aug. Anglorum Episcopum, lib.
12. regist. referturque 33. quæst. 4. & 5. inter

conjuges distinguit his verbis : *Si quis sua conjugē non cupiditate voluptatis, sed solummodo creandorum filiorum gratia utitur, profecto iste de ingressu Ecclesiæ, sive de sumendo Dominici corporis sanguinisque mysterio, suo est judicio relinquendus; quia per nos prohiberi non debet, qui in igne positus nescit ardere. Quod de reddente, quàm de exigente debitum facilius creditur. Si verò, pergit sanctus Doctor, non amor procreandæ sobolis, sed voluptas dominatur in opere, tunc prohiberi debet, ne accedat ad hoc Sacramentum. Sic Nicolaus I. respondit c. 6. ad consulta Bulgarorum. Sic docuerunt Sanctus Thomas quæst. 80. art. 7. ad secundum Sanctus Bonaventura, Scotus, & alii communiter.*

3. Nocturna pollutio quandoque sic accidit in somno ut nullatenus mentem afficiat; vixque vigilans meminerit, quid sibi somniando contigerit, in quo casu videtur omnino contemnenda, quamvis primis Ecclesiæ sæculis esset impedimentum communionis propter immunditiam & fœditatem, quam ex ea corpus semper contrahit, idque patet, tum ex responsione S. Basilii ad interrogationem 309. in regulis brevioribus, tum ex ferm. jam laudato 244. de tempore inter opera Sancti Augustini, tum ex Casiano collat. 22. cap. 4. ubi excipiendam censuerunt Patres, quæ accidit ex astutia dæmonis, ut hac occasione ab Eucharistia retrahat. Id ipsum naturaliter præstat nimius timor, ne hujusmodi turpia in somno recurrant, cum instat dies festus ad communionem destinatus; quare his, qui juxta prædicta sunt dispositi, consulendum est, ut confidenter ad Eucharistiam accedant.

Sed

Sed plerumque ex illa somniorum illusione turbatur anima, lanquet affectus, atque ideo tollitur dispositio tertio loco ad communicandum requisita. *Ex quadam congruentia impedit, inquit Sanctus Thomas quæst. 80. art. 7. evagatio mentis, quæ sequitur pollutionem nocturnam, præcipue quando cum turpi imaginatione contingit hoc autem impedimentum postponi debet propter aliquam necessitatem.* Ita ferè omnes Scholæ Principes, Albertus Magnus, Alensis, & alii ad hanc quæstionem. Sed Sanctus Bonaventura præ cæteris distinctionem à nobis allatam confirmat his verbis: *Si sentit iniquationem illam multum animam inclinasse, quia in illo actu fit homo caro, sive in somnis; sive in vigiliis, consulendum ei esset facere reverentiam Sacramento: si autem sentit naturam magis expeditam, & ulterius devotio trahat tunc arbitraret ipsum sine remorsu posse accedere.*

Idem dicendum de crapula ex hesterno cibo venialiter immoderato: inde enim prævagatur animus, & difficile ad supernaturalia assurgit, ita S. Thomas q. 80. art. 8. ad quintum.

Atque hætenus de dispositionibus animæ ad Eucharistiam requisitis.

Q. 2. *Quæ dispositio ex parte corporis requiritur?*

R. Præter munditiem, de qua mox diximus, Ecclesiastico præcepto requiritur jejunium naturale; placuit Spiritui Sancto, inquit Sanctus Augustinus Epist. ad Januarium 118. nunc 54. *ut in honorem tanti Sacramenti in os Christiani prius Dominicum corpus intraret, quam exteri cibi. Nam ideo per universum orbem mos iste servatur. Hanc Ecclesiæ legem agnoscunt, & confirmant Concilia Carthaginense III. can. 5. VII. Toletanum can. 2.*

Dixi *1. præcepto Ecclesiastico*; namque ideo, inquit Sanctus Augustinus cit. Epistola, *non præcepit (Dominus) quo deinceps ordine sumeretur, ut Apostolis, per quos Ecclesias depositurus erat, servaret hunc locum.* Nam si hoc ille monuisset ut post cibos alios semper acciperetur, credo quod eum morem nemo variasset. Attamen S. Doctor non reprehendit morem quorundam Africanorum, qui in memoriam Cœnæ Dominicæ feria quinta majoris hebdomadæ, ad Vesperam post assumptum cibum, corporis Christi fiebant participes; siquidem probatus fuerat in Concilio Carthag. III. canone 29. qui refertur dist. 1. de consecrat. sed consuetudinem illam Ecclesia gravibus de causis postea abrogavit.

Porro S. Augustinus in eadem Epist. docet originem illam sumendi Eucharistiam ante omnem cibum ab Apostolis descendere, colligitque ex cap. 11. 1. ad Cor. ubi Apostolus improbens inordinatas Corinthiorum epulas, scribit, *cætera, cum venero, disponam.* Quæ verba expendens S. Doctor, sic habet: *Unde intelligi datur. . . . ab ipso ordinatum esse, quod nulla morum diversitate variatur.*

Enimvero quod ubique & semper, nec ab ullo Concilio institutum videtur, ab Apostolis traditum censeri debet, atqui talis est mos sumendi Eucharistiam ante omnem cibum: Ergo.

Minor probatur ex Tertulliano lib. 2. cap. 5. ad uxorem; *non sciet maritus, quid ante omnem cibum gustes.* Ex Sancto Chrysostomo hom. 3. in primam ad Corinth. *priusquam communicēs, jejunas.* Ex Socrate lib. 5. hist. cap. 22. & ex Sozomeno lib. 7. cap. 19. referentibus in multis urbi-

urbibus ac vicis Ægypti fideles contra receptam omnium consuetudinem, jam pransos, sacra mysteria percipere. Itaque Apostolus, juxta interpretationem Sancti Augustini, ut occurreret corruptelis, quas jam inter Corinthios grassantes deprehenderat, statuit ne deinceps post cœnam Eucharistia distribueretur : *quin autem ita faciendum sit : disputare, insolentissimæ insanie est*, idem S. Aug. ibid. Audiant nostri Novatores, qui hanc legem carpere ausi sunt. Liberum quidem Dominus reliquit, an pransi, an jejuni accederent fideles, ut agnoscit S. Doctor, sed Apostolis determinandum reliquit.

Dixi 2. *jejunium naturale*; quo excluditur quidquid per modum cibi in stomachum trajicitur à media nocte per primum horologii pulsum designata, sive illud nutriat, sive non nutriat, ut medicina, nummus, charta, &c. quæ solvunt jejunium naturale non Ecclesiasticum, ut patet ex dictis, præsertim ex Tertulliano & S. Augustino. Quæ vero per modum salivæ, aut respirationis in stomachum decidunt, ut sanguis & pituita è cerebro; reliquiæ vini & aquæ, quibus os abluatur, vel cibi in ore remanentes, floccus nivis, vel culex jejunio naturali non nocent. Secus dicendum de saccharo, & aliis hujusmodi, quæ si post mediam noctem liquefacta in stomachum defluant, communionem debent impedire; quia non sumuntur per modum salivæ, aut respirationis.

Q. 3. *Suntne casus, in quibus liceat non jejunis Eucharistiam sumere?*

R. Licet in duobus casibus.

Primo, in mortis articulo, aut periculo; quia ex dicendis tum urget divinum communicandi

præceptum, cui Ecclesiasticum cedere debet. Hinc ubi non obstat contraria consuetudo, ministranda est Eucharistia mortis supplicio plectendis, etiamsi non sunt jejuni, & periculose decumbentibus, quando jejuni sine gravi incommodo Eucharistiam recipere non possunt. Nec deferenda est hora intempestiva, v. gr. immediate post mediam noctem, ut ante omnem cibum aut potum recipiatur, quia id non fert usus ob nimiam difficultatem, & Sacramenti reverentiam. Si autem infirmitas sit diuturnior & maneat mortis periculum, sacrum Viaticum potest sæpius ministrari non jejuno.

Secundus casus est necessitatis, quæ contingit. 1. cum Sacerdos celebrans loco vini consecrati, aquam hausit, ut notatur in Rubricis. 2. quando Sacerdoti post consecrationem deficienti, non potest substitui, nisi Sacerdos jam pransus. 3. Si reliquæ consecratæ post ablutionem sumendæ sunt, quod ad formulas integras extendendum est, ubi servari non possunt: quia hæc ad unum Sacrificium pertinent. 4. Si Sacerdos inchoata Missa solemni, meminit se non esse jejunum, nec recedere potest sine gravi scandalo.

Ergo, inquit, Sacerdos, qui nocte Nativitatis ex inadvertentia sumpsit ablutionem, poterit, ad vitandum scandalum, celebrare duas alias Missas, si desit alius Sacerdos, ut in pagis contingit.

Nego conseq. non enim majus erit scandalum in illa hypothesi, quam si Sacerdos in morbum incidisset, ubi impedimentum plebi innotuerit.

Instabis; ex dictis infirmus non jejunus potest Eucharistiam sumere: Ergo si nullæ sint formulæ

mulæ consecratæ, Pastor non jejunos eas consecrare poterit. Namque ex præcepto divino oves pascere tenetur.

Nego conseq. cujus confirmationem distinguo, tenetur pascere in debitis circumstantiis & salva Sacramenti reverentia, Concedo : secus, Nego : aliàs posset consecrare sine sacris vestibus, & omisso ritu Sacrificii, si morbus urgeret, quod nemo dixerit ; honos enim Christo debitus sine dubio anteponendus est hominis utilitati. Porro si sic liceret consecrare ad subveniendum infirmo, mysteria nostra gravibus exponerentur injuriis, qualis supponi potest, si Sacerdos è ludo vel potatione, vino temulentus festinanter ad altare ascenderet.

CAPUT XXI.

Utrùm sacra Communio debeat esse frequens, aut rarior?

Respondeo cum Salazare in opere jam laudato, si Eucharistia absolutè spectetur, communio debet esse quam frequentissima : si respectivè, pro ratione dispositionis Fidelium communio debet esse rarior vel frequentior : sed reprehensione digni sunt, qui non ita vivunt, ut tanto tamque utili beneficio frequentius licitè frui possint. Tres sunt responsionis partes probandæ.

Primapars probatur. Eucharistia instituta est sub specibus panis & vini, per modum cibi spiritualiter nutrientis in vitam æternam, estque in Ecclesia, quod lignum vitæ in medio paradisi terrestri : Ergo ad eam Fideles frequenter accedere debent, juxta intentionem illius auctoris.

Hæc consequentia est ad mentem universalis Ecclesiæ, ut constat ex constanti ejus praxi & Traditione.

Primò, Fideles sub disciplina Apostolorum *erant perseverantes in communicatione fractionis panis & orationibus*, Act. 2. quod Albertus Magnus, Alexander de Hales, S. Thomas, Sanctus Bonaventura & alii intelligunt de Communionem Eucharisticam; nam & versio Syriaca habet, *in Communionem sanctæ Eucharistiæ*.

Secundò, S. Justinus describens mores sæculi, in quo florebat, sic habet Apol. 2. *Et solis qui dicitur, die (hoc est, die Dominica) . . . in eundem locum conventus fit . . . & distributio communicatioque fit eorum, in quibus gratiæ acta sunt, cuique præsentis, absenti autem per Diaconos mittitur*. Quin & fideles domum Eucharistiam asportarunt quatuor saltem prioribus sæculis, ut supra docuimus cap. 3. & c. 17. ne scilicet spiritales animæ vires sine Eucharistico cibo deficerent.

Tertiò, Patres communiter usum Eucharistiæ commendant, uti quotidianum panem, Tertull. lib. de Oratione cap. 6. Sanctus Cyprianus in expositione Orationis Dominicæ. Sanctus Chrysostomus hom. 60. ad populum, declarat eum non debere sacris mysteriis adesse, qui à perceptione corporis Domini abstinet, *non es hostia dignus, vel communionem: ergo nec orationem*. Sanctus Hieronymus epistola ad Pammachium, *scio Romæ hanc esse consuetudinem, ut fideles semper (id est, quotidie) Christi corpus accipiant*. Et ad Lucinium: *De Eucharistia, quod quæris an accipienda quotidie, quod Romanæ Ecclesiæ & Hispaniæ observare perhibentur, &c.* Improbatur quidem quòd conjugati post actum conjugalem

galem ab ingressu Ecclesiæ abstinere, & nihilominus domi Eucharistiam perciperent. Sanctus Ambrosius vel auctor operis de Sacramentis, *ille panis quotidie sumitur in remedium quotidianæ infirmitatis*, lib. 5. cap. 4. & lib. 4. cap. 6. *Debeo semper accipere, qui semper pecco, debeo semper habere medicinam*. Sanctus Augustinus epist. 118. ad Januarium, vocat Eucharistiam quotidianam medicinam. Et lib. 2. de Sermone Domini in Monte, intelligit per hæc verba Orationis Dominicæ, *panem nostrum quotidianum*, Sacramentum corporis Domini.

Quartò, quæ referuntur dist. 2. de consecratione, quamvis non sint Apostolorum, aut antiquiorum Pontificum secundi sæculi & tertii sæculi, quorum nomina præ se ferunt, attamen testantur tempore mediæ ætatis fideles solitos refici corpore Domini, si non diebus singulis, saltem solemnibus. *Peracta consecratione omnes communicent, qui noluerint Ecclesiasticis carere liminibus: sic enim Apostoli statuerunt, & sancta Romana tenet Ecclesia*. Quinam autem fuerint illi dies, quibus fideles ad Ecclesiam convenire tenebantur, atque idèd solemnes dici solebant, explicat Sanctus Epiphanius lib. 3. contra hæreses, his verbis: *Communiones autem, sive synaxes fieri ordinata sunt ab Apostolis quarta feria, Sabbato & Dominica*. Concilium Agathense sexto sæculo canone 18. & Turonense sub Carolo Magno canone 50. præcipiunt, *si non frequentius, saltem in anno ter laici homines communicent, nisi forè quis majoribus criminibus impediatur in Pascha videlicet, & Pentecoste, & Natali Domini*. Hæc referuntur titulo de consecratione. Nicolaus primus sæculo nono, ad consulta Bulgarorum sic respondet: *Corpori & Sanguini Dominico quotidie in*
Qua-

*Quadragesima majori, si debeatis communicare, consulti-
tis. Quod ut fiat, Dominum omnipotentem suppliciter
exoramus, & vos omnes vehementissimè exhortamur, si
tamen mens in affectu peccandi non sit.*

Quintò, eandem hodie esse Ecclesiæ mentem
probant, 1. Concilium Basileense decimo quinto
sæculo his verbis: *Quod autem sapere accedere dignè
& devotè, & cum discussione debita sit utile, & valdè
proficuum, imò summe necessarium cupienti & desideran-
ti in via Domini non regredi, sed progredi, omnes Do-
ctores Catholici laudant, hortantur, admonent & obse-
crant incessanter fidelem populum.* 2. Concilium Tri-
dentinum sess. 13. c. 8. *Demum, inquit . . . pa-
terno affectu admonet sancta Synodus, hortatur, rogat,
& obsecrat per viscera misericordiæ Dei nostri . . . ut pa-
nem illum supersubstantialem frequenter (fideles) susci-
pere possint, &c. Et sess. 22. cap. 6. Optaret quidem
sacrosancta Synodus, ut in singulis Missis fideles astantes,
non solum spirituali affectu, sed sacramentali etiam Eu-
charistiæ perceptione communicarent.* 3. Catechis-
mus Romanus sub Pio V. editus, multa congerit
ad suadendum frequentem Eucharistiæ usum par.
2. ubi inter cætera expendens illud Orationis Do-
minicæ: *Panem nostrum quotidianum da nobis hodie,*
quærit cur Eucharistia dicatur panis quotidia-
nus? & sic respondet: *Quia quotidie sumendus est,
vel certè ita vivendum, ut quotidie quoad fieri possit di-
gnè sumere queamus.* Additque: *Parochi partes erunt,
fideles crebrò adhortari, ut quemadmodum corpori in sin-
gulos dies alimentum administrare necessarium putant; ita
etiam quotidie hoc Sacramento alendæ & nutriendæ animæ
curam non abjiciant: neque enim minus spirituali cibo
animam, quàm naturali corpus indigere perspicuum
est.*

Enim.

Enimverò hic recurrit ratiocinium S. Thomæ quæst. 79. art. 4. *Hoc Sacramentum, inquit, sumitur sub specie cibi nutrientis. Nutrimentum autem cibi est necessarium corpori ad restaurandum id, quod quotidie per actionem caloris naturalis. Spiritualiter autem quotidie in nobis perditur ex calore concupiscentiæ per peccata venialia, quæ diminuant fervorem charitatis. Cum ergo instituta sit Eucharistia ad excitandum & conservandum illum fervorem, in quo consistunt animæ vires, & alacritas, contingit, ut, dum quis à sacra mensa diutius abstinet, langueat ejus animus tepescente charitate, sitque minùs idoneus ad colligendos affectus, regendos sensus, continendum appetitum, comprimendas passiones, totusque effluat circa temporalia, æternorum oblitus. Hunc defectum passim experiuntur fideles testanturque se aliquot diebus post perceptam Eucharistiam feliciter incessisse in viis Domini, sed de priori studio sensim remisisse, tandemque altera subsequente hebdomada omninò defecisse. Quibus monentur animarum Rectores sibi incumbendum ut ii, quorum curam gerunt, parati sint singulis diebus Dominicis necessarium viaticum accipere ad hebdomadam sanctè transigendam, ut præscribitur in libro de Ecclesiasticis Dogmatibus apud S. Augustinum, referturque distinct. 2. de consecratione cap. 7. his verbis: *Eucharistiæ communionem quotidie percipere, nec laudo, nec vitupero; omnibus autem Dominicis diebus suadeo, & hortor, si tamen mens sine affectu peccandi sit.**

Dices; Concilium Lateranense IV. an. 1215. præcepit Eucharistiam semel in anno, idque tempore Paschatis accipiendam: Ergo Communio non debet esse frequentior.

Distin-

Distinguo anteced. Præcepit ad duritiam eorum, qui à cibo Eucharistico per plures annos abstinebant, Conc. Præcepit quasi esset conveniens Dominico instituto, & fidelibus utile semel in anno communicare, Nego anteced. Itaque Patres Lateranenses sua lege cavere intenderunt, idque sub interdicti pœna ferendæ sententiæ, ne Fideles ultra annum communionem differrent. Unde Theologi communiter colligunt hoc esse discrimen inter præceptum illud, & pleraque alia, quale est præceptum audiendi Missam die festo; quòd qui omiserit interesse sacro, tempore ab Ecclesia præfixo, non teneatur die sequenti implere quod pridie fuerat prætermisum; quia lex directè cadit in ipsum diem festivum, quem Ecclesia sanctificari voluit per oblationem sacrificii, uti circumstantiam solemnitatis. At verò tempus Paschatis est terminus Communionis præceptæ, nec ultra annum differendæ. Quare qui non satisfecit tempore Paschatis, similis est ei, qui non solvit debitum, termino per contractum præfinito; sicut enim peccat ille, dum elapso termino, solutionem sine causa differt; sic & ille peccatum auget, & multiplicat, qui post Pascha textit moras: quod animarum Rectores notare & docere oportet.

Secunda pars responsionis, nempe Communionem debere esse rariorem, vel frequentiore, spectatis fidelium dispositionibus; probatur, quia indigni non sunt admittendi ad Eucharistiæ perceptionem, atqui non dispositi sunt indigni: Ergo

Majorem nullus negaverit: constat enim ex testimoniis SS. Patrum jam laudatis tum in hoc capite,

pite, tum in duobus prioribus, quibus addendus est S. Chrysostomus, qui hom. 66. sic scribit: *Hæc, non ut temere communicetis, dico, sed ut vos dignos reddatis.* Et hom. 67. *Si quis non est sanctus non accedat non peccatorum tantum liberatio, verum & Spiritus præsentia sanctum facit, & bonorum operum divitiæ.* Item hom. 28. in 1. ad Cor. *Tempus Adventus, vel Epiphania, vel Quadragesima dignos accedere non facit, sed animæ puritas & sinceritas.* Cum hac igitur semper accede, sine hac nunquam. Eandem doctrinam expressis verbis tradit S. Thomas qu. 80. art. 10. *Ex parte Sacramenti, inquit, utile est quotidie sumere, ut homo quotidie ejus fructum percipiat . . . sed quia multoties in pluribus hominum multa impedimenta hujus devotionis occurrunt, propter indispositionem corporis vel animæ; non est utile omnibus hominibus quotidie ad hoc Sacramentum accedere, sed quotiescumque se ad illud homo invenerit præparatum.* S. Thomæ concinit S. Bonaventura in 4. dist. 12. part. 2. art. 2. *Si videat se esse in statu primitivæ Ecclesiæ, laudandum est quotidie communicare: si autem in statu Ecclesiæ finalis, utpote frigidum & tardum, laudandum est quod raro; si autem medio modo, medio modo debet se habere.*

Confirmatur eadem major propositio ratione duplici. Prima, nullo prætextu cujuscumque utilitatis privatæ, & fructus spiritualis peccare licet contra reverentiam Christo Domino debitam. Hæc propositio sine impietate non potest negari: atqui est contra reverentiam Christo Domino debitam, si indignus ad sacram mensam accedat. Hinc est quod Patres Lateranenses legem suam de Eucharistia tempore Paschatis percipienda, non nisi verbis conditionatis conceperunt: *Nisi forte, inquit, de proprii Sacerdotis consilio duxerit abstinen-*
dum.

dum. Sécunda ratio, indignus non tam reficitur cibo Eucharistico, quàm gravatur, ut fusè probavimus, cap. 19. pag. 595. & seq. Ergo indignus ne quidem prætextu percipiendi fructus spiritalis ad Eucharistiam accedet. Caveat itaque fidelis, juxta consilium sancti Ambrosii in cap. 9. *Luce*, *ne aut infirmum validior cibus opprimat, aut validum exilia alimenta non satient*; memineritque responsionis sancti Bonaventuræ citat. dist. utrùm homo justus recipiat efficaciam Sacramenti: *Dicendum*, inquit, *quòd si se debite præparet, recipit: alioquin si ex quodam torpore, vel ex distractione non se debite præparet, aut nullam, aut modicam reportat efficaciam, quamvis non incurrat peccatum mortale.* Atque ne fideles hanc responsionem ægrè ferant, subdit sanctus Doctor: *Majorem efficaciam credo quòd accipiat homo in una manducatione cum bona præparatione, quàm in multis, si non se præparet diligenter.*

Minor syllogismi nostri propositio, nempe, *non dispositi sunt indigni*, patet ex dictis de dispositionibus cap. præced. nam tota dignitas aut indignitas repetitur ex dispositionibus, juxta illud Apostoli 1. Cor. 11. *probet seipsum homo, & sic de pane illo edat qui enim manducat & bibit indignè, &c.*

Dices 1. Eucharistia dicitur à sanctis Patribus supra laudatis, Ambrosio & Augustino, medicina ad sanandas animæ infirmitates, inter quas numerandus est ille languor & torpor, quo fidelis censetur minus dispositus. Et revera sæpè contingit eos, qui tepidè accesserant, ferventes recedere. Ergo propter defectum dispositionis Communio non debet esse rarior.

Respon-

Respondeo duplicem hic distinguendam esse devotionem : alia sensum afficit, delinit & quadam suavitate perfundit : alia est interior, quæ mentem in bono firmat contra membrorum inobedientiam, & erratica sensus phantasmata.

Prior, utpotè quæ à voluntate non semper pendeat, absolutè necessaria non est, & sine ea licitè, & cum fructu Eucharistia percipi potest, modò adsit posterior; imò; ea supposita, fidelis, qui orationi & meditationi vacavit quantum necesse erat ad compescendos sensus, qui ex negotiorum tractatione agitari solent, non debet ab Eucharistia abstinere, ex eo quod illum devotionis sensum non experiatur; maximè cùm Deus nonnunquam illum subtrahat ad virtutis exercitium, & ut discamus exercitis viribus regere navem mentis contra fluminis ictum, & sæculi tempestates. Præterea exterior illa devotio oritur sæpè vel ex corporis temperie, præsertim in mulieribus, vel ex astutia Dæmonis, ut advertit Thomas de Argentina, Ordinis sancti Augustini Præpositus Generalis. Quare nihili facienda est illa devotio, ubi deest interior, cæteræ supradictæ dispositiones.

Duplex quoque distinguenda est animi infirmitas : alia nascitur ex affectu ad peccatum, & hanc non sanat Eucharistia, sed pœnitentia, ut dictum est cap. 19. alia ex peccatis quotidianis, de quibus sincerè dolet; & propter hujusmodi languorem institutum est Sacramentum, ut medicina; delet enim peccata venialia, & excitat fervorem charitatis, qui est animæ robur. Hujusce duplicis infirmitatis exemplum cernere est in corpore humano : namque infirmum quandoque est propter

febrem actu vires exhaurientem, tuncque interdicitur solidior cibus: quandoque verò vel ex morbo, ex qua convalescit, vel ex nimia defatigatione, quo in casu validioribus alimentis reficiendum est.

Dices 2. ex auctore libri 5. de Sacramentis cap. 4. apud S. Ambrosium, qui non meretur quotidie accipere, non meretur post annum accipere. Ergo Communio non debet esse rarior spectatis dispositionibus fidelium.

Distinguo anteced. Si perseveret cupiditatibus indulgere, & per viam latam ambulare, Conc. Si vitam emendare studeat, amplectaturque poenitentiam, quæ ob quotidiana peccata post Baptismum, continua esse debet; *Maximè in iis*, inquit S. Augustinus hom. 50. cap. 7. *qui propter administrationem rerum familiarium, & conjugiorum arctissima vincula tam multa peccant, ut non tam de illius mundi pulvere aspergi, quam luto obliniri videantur*: Nego anteced. Hæc distinctio est ad mentem S. Hieronymi in Apol. contra Jovinianum, ubi adhortatus conjugatos, ex Apostoli verbis, *probet autem seipsum homo*, &c. ut per aliquot dies à percipiendi corpore Christi abstineant, subdit; *Non quòd dilata communione unus dies aut biduum sanctiorem efficiat Christianum, ut quod hodie non meruerat, cras mereatur; sed quòd dum dolet se non communicasse corpori Christi, abstineat se paulisper ab uxoris amplexu, ut amoris conjugis amorem Christi præferat.*

Tertia responsionis pars, nimirum reprehensione dignos esse fideles, qui non sunt semper parati ad Eucharistiam percipiendam, sequitur ex dictis in confirmationem primæ partis; namque fideles debent esse semper dispositi ad suscipiendum
illud

illud Sacramentum, quod Christus Dominus instituit in cibum & remedium quotidianum : atqui ex dictis tale est Sacramentum Eucharistiæ : ergo ad illud suscipiendum fideles debent esse semper dispositi.

Confirmatur ex S. Cypriano in expositione Orationis Dominicæ, ubi sic scribit ad illa verba ; *Panem nostrum quotidianum da nobis hodie. Hunc panem dari nobis quotidie postulamus ne qui in Christo sumus, & Eucharistiam quotidie ad cibum salutis accipimus, intercedente aliquo graviore delicto, dum abstenti, & non communicantes, à pane cælesti prohibemur, à Christi corpore separemur ut manifestum est eos vivere, qui corpus ejus attingunt, & Eucharistiam jure communicationis accipiunt : ita contra timendum est & orandum, ne dum quis abstentus separatur à Christi corpore, procul remaneat à salute, communicante ipso, & dicente : Nisi ederitis carnem Filii hominis, & biberitis sanguinem ejus, non habebitis vitam in vobis.*

CAPUT XXII.

De necessitate Sacramenti Eucharistiæ.

Duplex est necessitas, alia medii, alia præcepti.

Illud dicitur necessarium necessitate medii, si ne quo finis obtineri nequit, sic ad vitam animalem conservandam necessaria sunt alimenta, quia sine iis vivere non possumus. Illud verò est necessarium necessitate præcepti tantum, quod præcipitur, quamvis res præcepta per se non sit necessaria, sed aliquando merè indifferens ad finem

consequendum : sic v. gr. abstinencia à carnibus diebus Veneris , per se indifferens est ; sed per præceptum Ecclesiæ fit necessaria ad salutem consequendam. Cùm autem præceptum aliud sit divinum, aliud Ecclesiasticum seu humanum, quædam necessaria sunt necessitate præcepti divini, alia necessitate præcepti Ecclesiastici, seu humani.

Porro advertendum est ea, quæ necessaria sunt necessitate medii, esse quoque necessaria necessitate præcepti ; namque ratio naturalis dicitur iis utendum, sine quibus ad finem perveniri non potest ; qui v. g. voluntariè abstineret ab alimentis absolutè necessariis ad mortem vitandam, vel negligeret Sacramentum Baptismi, aut Pœnitentiæ, ad remissionem peccatorum consequendam, procul dubio peccaret ; quia eo ipso, quo media sunt necessaria ad hujusmodi fines obtinendos, eorum usus censetur præceptus. Sed è converso non sequitur rem præceptam esse necessariam necessitate medii ; quia præceptum ut sic non obligat, quando observari non potest. Unde qui non potest abstinere à carnibus diebus Veneris, nihilominus salvari poterit ; quia abstinencia illa necessaria est necessitate præcepti duntaxat : contra verò parvulus, cui impossibilis est Baptismus, non salvabitur, quia caret medio necessario ad salutem.

Q. I. *Eucharistia estne necessaria necessitate medii ?*

Græci recentiores asserunt. Novatores docent id persuasum fuisse omnibus sanctis Patribus, atque idèò universali Ecclesiæ, quæ sollicitè infantibus Eucharistiam subministravit usque ad duodecimum sæculum, atque inde concludunt in rebus

bus fidei, solam Scripturam esse consulendam omissa Traditione. Quin & Maldonatus post Concilium Tridentinum scripsit in cap. 6. Joan. opinionem de hac Eucharistiæ necessitate per 600. annos in Ecclesia obtinuisse.

Hunc Græcorum & Novatorum errorem proscriptit Concilium Tridentinum sess. 21. cap. 4. his verbis : *Denique eadem sancta Synodus docet parvulos usu rationis carentes, nulla obligari necessitate ad Sacramentalem Eucharistiæ communionem neque tamen ideo damnanda est antiquitas, si eum morem in quibusdam locis aliquando servavit. Ut enim sanctissimi illi Patres sui facti probabilem causam pro illius temporis ratione habuerunt, ita certè eos nulla salutis necessitate id fecisse, sine controversia credendum est. A qua doctrina Maldonatum recessisse credibile non est. Et can. 4. ejusdem sessionis, rem tanquam de fide sic definiunt Patres : Si quis dixerit parvulis, antequam ad annos discretionis pervenerint, necessariam esse Eucharistiæ communionem; anathema sit. Quare ad propositam quæstionem*

R. De fide est Eucharistiam non esse necessariam necessitate medii.

Probatur 1. ex Scriptura, quæ perspicue tribuit Baptismo virtutem delendi omnia peccata, sanctificandi fuscipientem, illumque efficiendi membrum Christi & Ecclesiæ, hæredem quoque regni cœlestis, Rom. 8. *Nil . . . damnationis est iis, qui sunt in Christo Jesu, Galat. cap. 3. Quicumque baptizati estis, Christum induistis, ad Titum. 3. Salvos nos fecit per lavacrum regenerationis, 1. Cor. 6. Et hæc quidam fuistis, sed abluti estis, sed sanctificati estis, sed justificati estis in nomine Domini nostri Jesu Christi.*

Probatur 2. ex Patribus, tum Græcis, tum Latinis, qui una voce asserunt Baptismate ablui omnia peccata, ut S. Cyrillus Jerosolymitanus in catech. S. Basilius in exhortatione ad Baptismum, S. Gregorius Nazianzenus orat. de Baptismo, Sanctus Chrysostomus hom. ad baptizandos, S. Augustinus pluribus in locis, sed disertissime lib. 1. de pecc. meritis cap. 19. sic scribit: *Si percepto Baptismate de hac vita migraverit (parvulus) soluto reatu, cui originaliter erat obnoxius, perficietur in illo lumine veritatis, quod incommutabiliter manens in æternum, justificator præsentia Creatoris illuminat. Peccata enim sola separant inter homines & Deum.*

Ex quibus conficitur sequens syllogismus.

Illud Sacramentum absolutè non est necessarium necessitate medii, sine quo fideles a peccatis abluuntur, sanctificantur, Christum induunt, efficiunturque membra Ecclesiæ, quæ est corpus Christi mysticum; atqui fideles per Baptismum, & sine Sacramento Eucharistiæ hæc beneficia consequuntur. Ergo.

Frustra Novatores opponunt Ecclesiam secundum pristinum morem, Baptismum non contulisse sine Eucharistia; namque Sacramentum Confirmationis simul etiam conferebat, nec inde sequitur Ecclesiam credidisse utrumque Sacramentum esse necessarium necessitate medii, aut sine illis Baptismum nullam habere virtutem. Ideò autem Ecclesia simul cum Baptismo duo illa Sacramenta parvulis contulit, quandiu id licuit sine periculo irreverentiæ, & sine nimia difficultate; quia effectum Baptismi perficiunt, maximè verò Eucharistia, in qua fideles perfectiori modo Christo incorporantur, & fiunt ejus membra; unde
ab

ab auctore libri de Ecclesiastica Hierarcha, dicitur omnium Sacramentorum perfectivum. Cum ergo res quælibet tendat ad sui perfectionem, & cætera Sacramenta inchoent quod in Eucharistia perficitur, Ecclesia etiam nunc optat, hortaturque adultos, ut corpori Christi communicent (nisi aliqua obstet ratio) quoties aliquod Sacramentum suscipiunt.

Dices: Christus Dominus iisdem planè verbis præcipit sacram Communionem, quibus Baptismum, & Pœnitentiam; quemadmodum enim ait: *Nisi quis renatus fuerit ex aqua & Spiritu Sancto, non potest introire in regnum Dei.* Joan. 3. Item, *nisi pœnitentiam habueritis: omnes similiter peribitis*, Luc. 13. Sic de Eucharistia; *Nisi manducaveritis carnem Filii hominis, & biberitis ejus sanguinem, non habebitis vitam in vobis*, Joan. 6. atqui priora verba innuunt Baptismum & Pœnitentiam esse necessaria necessitate mediis: ergo & posteriora eandem necessitatem Eucharistiæ exprimunt.

Respondeo 1. retorquendo argumentum contra Novatores, qui parvulis & adultis in periculo mortis constitutis Eucharistiam denegant. Nec ita facile ac Catholici ejusmodi difficultatem solvere possunt, utpotè qui rejiciant Ecclesiæ Traditionem, ex qua haurimus Scripturæ sensum qui ibi obscurior est. Adde quòd mala fide illum textum objiciant, cum de Eucharistia non esse intelligendum contendant.

Respondeo 2. Distinguendo maj. Iisdem verbis diverso sensu intelligendis, Conc. Eodem sensu intelligendis, Nego maj. Namque eadem verba pro varietate materiæ variam intelligentiam exigunt. Quis v. gr. ex illis verbis Joan. cap. 13.

Si non laverō te, non habebis partem mecum, colliget lotionem pedum esse paris necessitatis, ac Baptismum & Pœnitentiam, adeo ut, sine illa lotionē, sive in re, sive in voto, nullus possit consequi salutem?

Sicut ergo particula (nisi) in postrema propositione non denotat necessitatem medii; quia lotio pedum non habet virtutem delendi peccata, & primam gratiam conferendi, sine qua non potest obtineri salus; nec in ista propositione: *Nec manducaveritis*, &c. quia Eucharistia perficit solum charitatem, & unionem cum Christo, quam Baptismus & Pœnitentia inchoant. Porro sine illa perfectione potest quis salvari.

Instabis; Sine perseverantia nullus salvatur: atqui Eucharistia instituta est ut medium necessarium ad perseverandum; idē enim datur sub ratione cibi & potus, sine quibus vita conservari non potest. Ergo.

Nego min. Namque 1. parvuli (de quibus præsertim est controversia) gratiam, quam in Baptismo consecuti sunt, amittere nequeunt, ac proinde actu & de facto perseverant sine Eucharistia. 2. Adulti innumeri statim post perceptum Sacramentum vel Baptismi, vel Pœnitentiæ decesserunt, etiam sine voto saltem explicito Eucharistiæ, de qua non cogitabant, neque propterea Ecclesia de eorum salute unquam desperavit, aut dubitavit. 3. Adulti sine Eucharistia absolute perseverare possunt. Dico, absolute, nam capite præcedenti fusè probavimus adultos sine frequentiori usu tanti Sacramenti diu gratiam difficile conservare. Ex quo sequitur Eucharistiam esse iidem medium ad perseverandum secundum quid
necef-

necessarium; cum contra cibis materialis sit absolute necessarius ad conservandam vitam animalem, etiam in parvulis; quia defectum cibi materialis nihil omnino supplet: at verò, ubi Eucharistia haberi non potest, multa alia suppetunt auxilia.

Instabis iterum, S. Augustinus cit. lib. 1. de pecc. mer. cap. 20. ut astruat existentiam peccati originalis contra Pelagianos illud negantes, expresse probat verba illa: *Nisi manducaveritis*, &c. non esse intelligenda de præcepto solos adultos spectante, uti contendebant illi hæretici, sed de medio absolute necessario, sine quo etiam parvuli vitam æternam consequi non possunt. Ita etiam Innocentius primus epist. ad Patres Concilii Milevitani inter Augustinianas 182. aliàs 93. quam Innocentii sententiam laudat S. Augustinus, quasi sit fides totius Ecclesiæ libro 1. contra Julianum: *Vide, inquit, quid respondeas . . . qui parvulos definivit, nisi manducaverint carnem Filii hominis, vitam prorsus habere non posse. Huic responde, imo ipsi Domino, cujus ille Antistes usus est testimonio. His concinit Gelasius Summus Pontifex, qui sedit anno 492. epist. 7. ad Episcopos per Picenum, his verbis: Ipse Dominus Jesus Christus cœlesti voce pronuntiat, qui non manducaverit carnem Filii hominis, &c. ubi utique neminem videmus exceptum, nec ausus est aliquis dicere parvulum sine hoc Sacramento salutari ad vitam æternam posse perducì. Ergo.*

Respondeo 1. Quidam Theologi ex allatis textibus colligunt S. Augustinum, & laudatos Summos Pontifices fuisse in sententia, quam impugnamus. Sed immerito, quoad S. Augustinum, qui clare & constanter docet salvari parvulos, qui præcepto Baptismo decedunt. Ex pluribus

in hanc rem ejus textibus, unum ex cap. 19. libro 1. de pecc. meritis selegimus in confirmationem Doctrinæ Catholicæ, cui addere liceat interpretationem S. Fulgentii ejus Discipuli, qui ante mille annos in epist. ad Ferrandum Diaconum, sic respondit ad testimonia, quæ ex S. Augustino nobis objiciuntur: *Arbitror, sancte Frater, disputationem nostram præclari Doctoris Augustini sermone firmatam, nec quicquam aliquatenus esse ambigendam, tunc unumquemque fidelium participem corporis & sanguinis fieri, quando in Baptismate membrum corporis Christi efficitur; nec alienari ab illo panis consortio, etiamsi, antequam panem illum comedat, de hoc sæculo in unitate corporis Christi constitutus discedat.*

Sanctus itaque Augustinus, interprete sancto Fulgentio, vult parvulos eo ipso manducare carnem Christi in vitam æternam, quò in Baptismo membra ejus efficiuntur & corpori ejus mystico sociantur; & ad confirmandam hanc explicationem, Discipulus appellat sermonem Magistri ad infantes, nunc 272. aliàs 16. de diversis, ubi sanctus Doctor quærenti, quomodo panis est corpus Christi, sic respondet: *Apostolum audi dicentem fidelibus, vos estis corpus Christi, & membra, 1. Corinth. 12. Si ergo vos estis corpus Christi, & membra, mysterium vestrum in mensa Dominica positum est, mysterium vestrum accipitis.* Ergo in sententia Sancti Augustini, juxta S. Fulgentium, fideles spiritualiter manducant corpus Christi, cum ejus membra efficiuntur, quod inchoatur in Baptismo, perficiturque in sacra mensa. Hæc explicatio pluribus sæculis præcessit controversiam, quam Græci, & Pseudo-Reformati moverunt, valetque ad intelligendos allatos textus Innocentii & Gelasii. Quare in forma Re-

Respondeo 2. Distinguendo anteced. Parvuli vitam æternam consequi non possunt sine Eucharistiæ perceptione spiritali, & in voto implicito, seu interpretativo, Concedo : Sine Eucharistiæ perceptione Sacramentali, vel in voto expresso, Nego antec. Porro parvuli, quamvis carnem Christi sacramentaliter non manducent, tamen eo ipso, quod baptizantur, spiritaliter manducant; quia fructum Eucharistiæ percipiunt; per Baptismum enim Christo uniuntur, fiuntque membra corporis ejus; atque idè Baptismus est quoddam votum interpretativum Sacramenti Eucharistiæ quatenus unio ad Christum in Baptismo inchoata tendit ad sui perfectionem, quæ per Eucharistiam habetur. Hinc primis Ecclesiæ sæculis duo illa Sacramenta simul conferebantur.

Confirmatur hæc solutio ex statu controversiæ, quæ calamum S. Augustini, & aliorum Patrum movebat contra Pelagianos negantes peccatum originale. Cum hæretici illi premerentur argumento ducto ex necessitate Baptismi, sine quo nullus, Domino contestante Joan. 3. potest introire in regnum Dei, ex fictione quadam distinguebant inter regnum Dei, & vitam æternam, contendebantque parvulos sine Baptismo decedentes, non ingressuros quidem regnum Dei, quod in eorum mente est quædam gloria eximia, & non baptizatis indebita, sed habituros, utpote innocentes, vitam æternam. S. Augustinus cum Innocentio I. supposita, non admissa fictitia illa distinctione, urget illos ex capite 6. Joan. aitque parvulos non baptizatos, privandos etiam vitam æternam; ait enim Dominus: *Nisi manducaveritis carnem Filii hominis . . . non habebitis vitam in vobis,* quod

quod præceptum S. Doctor cit. lib. de pecc. mer. cap. 20. probat extendendum ad parvulos : atqui parvuli, nisi baptizentur, non possunt fieri participes corporis Domini : Ergo parvuli sine baptismo defuncti, privantur & regno Dei, & vita æterna. Ex quibus evincitur existentia peccati originalis ; absit enim ut sub justo Deo creatura innocens misera credatur. Itaque ad elucidandum quod obscurum inesse potest textibus in objectione allatis, diligenter observare necesse est S. Augustinum, & alios Patres agere de solis parvulis nondum baptizatis, & in hypothese quod vita æterna sit aliquid distinctum à regno cælorum, ut somniabant Pelagiani ; namque 1. nusquam in scriptis sancti Doctoris reperietur parvulum damnari, aut carere vita æterna, qui post Baptismum mox decessit, cum deesset tempus aut facultas ministrandæ Eucharistiæ, quod prioribus sæculis nonnunquam contingebat. 2. Quia S. Augustinus postea scribens contra Semipelagianos (qui admissio peccato originali : & rejecta distinctione inter regnum Dei & vitam æternam, cum Pelagianis tamen sentiebant prædestinationem Sanctorum, & perseverantiam esse ex meritis) eos imprimis refellit exemplo parvulorum, qui licet nulla habeant propria merita, aut demerita, sed æqualiter peccatum originale trahant, alii tamen perseverant, & salvantur, cæteris rejectis ; ad quod demonstrandum nullatenus urget necessitatem Eucharistiæ, quemadmodum contra Pelagianos, sed solius Baptismi, quo prædestinatis antequam exeant, subvenitur, non casu, sed Deo miserante : *Absit*, inquit libro de dono persever. cap. 12. *ut causam parvulorum sic relinquamus,*
ut

ut esse nobis dicamus incertum, utrum in Christo regenerati: si moriantur parvuli, transeant in æternam salutem: non regenerati autem transeant in mortem secundam. Et infra: Quid etiam quod aliquando parvulis infidelium filiis potuit, ne irent in perditionem, & filiis fidelium non potuit Baptismate subveniri? Ubi certe ostendit quod personarum apud Deum non sit acceptio, alioquin cultorum suorum potius, quam inimicorum filios liberaret. Ex quibus nullum potest superesse dubium, quin S. Augustinus cum aliis Catholicis agnoverit solum Baptismum parvulis sufficere, nec in Scriptis contra Pelagianos necessitatem Eucharistiæ commendasse, nisi in eorum hypothese, & in eo sensu, quem diximus.

Q. 2. *Eucharistia estne necessaria necessitate præcepti?*

R. Est necessaria necessitate præcepti tum Divini, tum Ecclesiastici.

Prima pars constat ex cap. 6. Joan. sæpius laudato, *nisi manducaveritis*, &c. Secunda verò ex Concilio IV. Lateranensi sub Innocentio III. Can. *Omnis utriusque sexus*, qui refertur tit. de Pœnitentiis & remissionibus. Confirmaturque ex Concilio Trident. sess. 13. can. 9. his verbis: *Si quis negaverit omnes & singulos fideles utriusque sexus, cum ad annos discretionis pervenerint teneri singulis annis, saltem in Paschate, ad communicandum, juxta præceptum sanctæ Matris Ecclesiæ; anathema sit.*

Q. 3. *Quinam tenentur præcepto divino?*

R. Primo, non tenentur parvuli, quia præcepti capaces non sunt.

R. Secundo, tenentur omnes adulti, sive baptizati, sive non; quia præceptum illud, *nisi manducaveritis*, &c. universalissimum est, & tam latè

late patet, quam præceptum Baptismi, *nisi quis renatus fuerit*, &c.

Dices 1. Non baptizati capaces non sunt Sacramenti Eucharistiæ: ergo ad illud non tenentur.

Nego conseq. Possunt enim, & debent baptizari, peccantque contra utrumque præceptum, si neglexerint. Quemadmodum fidelis, qui defectu sufficientis dispositionis arcetur à sacra mensa tempore Paschatis, peccavit contra Ecclesiæ præceptum, si cum advertentia noluit disponere.

Instabis; Qui baptizati non sunt, minimè tenentur peccata sacramentaliter confiteri: ergo nec Eucharistiam sumere.

Nego paritatem; Quia Confessio Sacramentalis non præcipitur, nisi pro peccatis gravioribus post Baptismum commissis.

Dices 2 Si Communio esset necessaria Præcepto Divino omnibus adultis, peccaret Ecclesia, quæ eam non administrat pueris jam ætatem adultam ingressis, reis ad mortem damnatis: falsum consequens, ergo & antecedens.

Nego sequelam majoris; Namque ex Conc. Tridentino sess. 21. cap. 2. sæpius laudato, hanc Christus potestatem Ecclesiæ concessit, ut in Sacramentorum dispensatione, salva illorum substantia, ea statueret, quæ Sacramentorum venerationi expedire judicaret. Hac potestate fretus Sanctus Cyprianus in Concilio Episcoporum statuit, peccatorem, qui in periculo mortis cœpisset veniam deprecari omnino à communione in morte repellendum, indignum eum pronuntians accipere solatium, qui se non cogitavit moriturum.

rum. Idem sanxit quarto sæculo Concilium Arelatenſe I. cap. 23. quãtò magis hæc ſervanda eſt diſciplina erga damnatos ad mortem, & uſque ad illud extremum impœnites; nec pueris Eccleſia Euchariftiam concedit, donec juxta præceptum Apoſtoli, corpus Domini dijudicare poſſint, quod de ipsis non præſumitur in primo rationis crepuſculo, ſed expectandum cenſuit, (niſi ea ætate periculoſo morbo corripiantur) quoaduſque judicium matureſcat. Differendum tamen non eſt ultra annum decimum quartum, modo ſint ſufficienter diſpoſiti. Peccant vero parentes & Paſtores, niſi curent, ut in pueris creſcente rationis lumine, creſcat & reverentia & devotio erga tantum Sacramentum.

Q. 4. *Quo tempore obligat divinum communicandi præceptum?*

R. Primo obligat in probabili mortis periculo. Conſtat ex univerſalis Eccleſiæ Traditione, quæ ſolicite hoc ſalutare & neceſſarium Viaticum infirmis hætenus adminiſtravit, atque in hanc rem Euchariftiam ſervare conſuevit, ut ſupra cap. 3. probatum eſt. Hinc qui prævidet ſe non habiturum opportunitatem Euchariftiæ ſumendæ ob probabile mortis periculum, tenetur eam ſumere.

Quid ſi aliquis communicaffet paulo antequam in morbum incideret?

R. Ex Theologis quidam, ut Sotus & Suarez, negant hujusmodi teneri iterum communicare, alii affirmant, & quidem probabilius, ut nobis videtur; namque præcepto non ſatiſfit per opus non præceptum, ut videre eſt in eo, qui ſacræ menſæ particeps factus eſt Sabbato Dominicam

nicam Palmarum præcedente, forte quia in illud incidebat festum Annuntiationis Dominicæ: debet enim ille iterum accedere, ut satisfaciat Ecclesiæ præcepto communicandi in Paschate. Si tamen eodem die communicasset, quo morbo correptus est statim moriturus non videtur obligatio rursus communicandi, maximè cum sit contra Ecclesiæ praxim bis in die Eucharistiam sumere, nisi in casibus exceptis, inter quos iste non numeratur. Idem dicendum de infirmo, qui post acceptum Viaticum, in grave peccatum lapsus est; aliàs daretur occasio de eo malè suspicandi. At si aliquot diebus supervixerit, manente eodem mortis periculo, expedit iterum Viaticum ad illum deferre; quia, ut diximus capite præcedenti, licet sæpius in eodem morbo lethifero illud ministrare, etiam non jejunis.

R. Secundo, præceptum divinum sumendi Eucharistiam, aliquoties obligat extra mortis periculum; quia ex dictis capite præcedenti, ideo Christus Dominus eam instituit sub signis cibi & potus, ut identidem sumeretur.

Q. 5. *Qui prævideret sibi defuturam opportunitatem communicandi in Paschate, tenereturne prævenire tempus?*

R. Teneretur, si ab anno abstinuit. Duo enim includuntur in præcepto Ecclesiæ. Primum ut semel in anno adulti participes fiant corporis Domini. Secundum, ut in festis Paschalibus huic debito satisfaciant. Porro quemadmodum is, qui die festo non poterit audire Missam post horam decimam, tenetur eam prius audire, Sic qui per annum à sacra mensa abstinuit, nec poterit accedere in solemnitate Paschali, tempus præveniat necesse est.


Q. 6.

Q. 6. *Satisfitne præcepto communionis annuæ per communionem sacrilegam?*

R. Communiter affirmarunt Casuistæ hac ratione ducti, quoddam modum præcepti non cadat sub præceptum. Verum hanc doctrinam Innocentius XI. uti scandalosam proscripsit anno 1679. & Clerus Gallicanus anno 1700. illam pronuntiavit erroneam, impietati & sacrilegio faventem, & præcepto Ecclesiæ illudentem. Enimvero modus præcepti in ipso præcepto expressus pertinet ad substantiam præcepti: atqui Ecclesia disertis verbis præcipit, ut omnis fidelis adultus corpus Domini semel in anno, idque in Paschate devote & reverenter accipiat: ergo ipsa reverentia & devotio pertinet ad substantiam hujus præcepti. Quin & Dominus ipse Joan. 6. explicat quomodo observandum sit suum præceptum: *Nisi manducaveritis, &c.* subdit enim: *qui manducat carnem meam, & bibit meum sanguinem, in me manet, & ego in illo.* Adeo ut ex Sancto

Augustino, manducare carnem Christi, sit in illo manere.





SECUNDA PARS.

De Eucharistia, ut Sacrificium est.

Sacrificium Eucharisticum dicitur *Missa* à verbo *Mitto*, sive quia, ut vult sanctus Thomas quæst. 83. art. 4. ad nonum, *per Angelum Sacerdos preces ad Deum mittit, sicut populus per Sacerdotem: sive quia Christus est hostia nobis missa à Deo. Unde & in fine Missæ Diaconus in festivis diebus populum licentiat dicens, Ite, Missa est; scilicet, hostia ad Deum per Angelum; ut scilicet, sit Deo accepta, sive quia peracto Sacrificio populus dimittitur; hinc prima pars liturgiæ, quæ ad offertorium protenditur, Missa Catechumenorum vocatur, ex eo quod ea parte expleta, olim catechumeni, & pœnitentes foras mitterentur, remanentibus fidelibus per Baptismum, vel per Pœnitentiam purgatis, quam ob causam, quod supererat liturgiæ, dicebatur Missa fidelium, qua absoluta, exhibant fideles intonante Diacono, *Ite, Missa est*, exceptis tamen Quadragesimæ diebus, & aliis feriis, tum maximè, cum in iis indictum erat jejunium; in iis enim Sacrificium serò offerebatur, & continuo officium vespertinum peragebatur, ad quod decurrendum Diaconus astantes hortabatur, dicens, *Benedicamus Domino*, loco, *Ite, Missa est*.*

Quod autem Missæ nomen sit perantiquum, patet ex veteribus Scriptoribus, apud quos est frequens, aut apud sanctum Gregorium, homil. 8.

in

in Nativit. Domini, sanctum Augustinum serm. 91. de tempore, si tamen Opus illius sit. Et sanctum Ambrosium libro 5. Epistola 33. ad Sororem.

Frustra objiciunt Novatores Missæ nomen non reperiri in Scripturis; satis enim est rem eo nomine significatam in iis contineri, quemadmodum Catholici demonstrarunt contra Arianos, qui eo prætextu Concilium Nicænum primum rejiciebant, quòd identias substantiæ Patris & Filii per nomen, *consubstantialia*, Apostolis incognitum exprimeretur. Porro Missæ nomine significant Catholici preces, benedictiones, præsertimque consecrationem corporis & sanguinis Domini sub speciebus panis & vini, quæ in Scripturis Apostolorum leguntur, & exhibent verum & propriè dictum Sacrificium, quod demonstrandum nobis incumbit. Sed præmittendum est quid sit Sacrificium, & quæ ejus necessitas. Sit itaque

CAPUT PRIMUM.

Quid est Sacrificium.

R. Sacrificium tripliciter sumitur: 1. Latissimè pro omni actione, quæ in Dei gloriam cedit, ut erogatio eleemosinæ, psalmodia, &c. *Sacrificium laudis honorificabit me*, Psal. 49. *Sacrificium salutare est attendere mandatis, & discedere ab omni iniquitate*, Eccl. 35. Unde S. Augustinus libro X. de Civitate Dei cap 9. scribit, *verum Sacrificium est omne opus, quod agitur ut sancta societate in-*
T t 2
hærea-

hæreamus Deo, relatum scilicet, ad illum finem boni, quo veraciter beati esse possimus.

2. Sacrificium pressius sumitur pro oblationibus, quæ fiunt in usum sive templi, sive ministrorum ejus. Quo sensu primitiæ & decimæ nunquam Sacrificia vocantur.

3. Propriè pro oblatione soli Dei facta cum destructione, seu immutatione victimæ. De Sacrificio in hac tertia acceptione solum hic agimus, alia enim impropriè dicuntur Sacrificia.

Dices, ex S. Augustino mox laudato, omne opus bonum est verum Sacrificium: atqui verum Sacrificium est Sacrificium propriè dictum: ergo bona opera sunt Sacrificia propriè dicta, ac proinde sola in Religione Christiana retinenda. Ita Novatores.

Distinguo major. Est verum Sacrificium, hoc est, præcipue à Deo intentum, & sine quo per Sacrificia exteriora non placatur, Conc. Est Sacrificium propriè dictum, ad quod offerendum consecrantur Sacerdotes, Nego maj. Itaque licet bona opera, quibus inhæretur Deo, metaphoricè sint Sacrificia, possunt tamen dici vera Sacrificia; quia ut cap. 2. explicabitur, pertinent ad Sacrificium interius, quod Deus in Sacrificio exteriori requirit; *Spiritus enim est Deus, & eos, qui adorant eum, in spiritu & veritate oportet adorare, Joan. 4.* Sic Christus Dominus, quamvis non sit, nisi impropriè & metaphoricè vitis, de seipso tamen dicit: *Ego sum vitis vera, Joan. 15.* Quia excellentiori modo influit in fideles sibi charitate conjunctos, quàm vitis in suos palmites. Quod autem Sanctus Augustinus agnoverit in Religione Christiana, aliquod speciale Sacrificium, ab omnibus

bus aliis bonis operibus distinctum quod à nullo licet offerri, nisi à Sacerdotibus, patet tum ex cap. 16. primæ partis, pag. 552. & seq. tum ex iis, quæ infra dicentur cap. 4.

Q. 2. *Quomodo definitur Sacrificium propriè dictum?*

R. Definitur Oblatio rei sensibilis cum ejus destructione, seu immutatione, soli Deo facta per legitimum Ministrum, ad recognoscendum ejus supremum dominium in omnes creaturas.

Dicitur 1. *Oblatio*, quæ est veluti genus, in quo Sacrificium convenit cum aliis oblationibus primitiarum & bonorum operum, quæ ad Deum referuntur; differtque à Sacramentis, quæ ut talia sunt, ad hominum sanctificationem diriguntur. Eucharistia v. g. ut Sacramentum est, tendit ad homines sanctificandos; ut Sacrificium vero respicit Deum colendum. Uno verbo, Deus in Sacramento gratiam nobis offert: nos verò in Sacrificio supremum cultum Deo exhibemus.

Dices; Deus per Sacrificium nobis confert peccatorum remissionem, & innumera alia beneficia. Ergo.

Distinguo antec. Confert consequenter & secundario, Concedo: Sacrificium enim est propitiatorium, & impetratorium: confert directè & primario, Nego antec. Namque directè & primario Sacrificium ordinatur ad supremum cultum Deo exhibendum, ex quo nobis eum conciliamus; namque reuso ipso, quod plenam & perfectam satisfactionem exhibet personæ læsæ, eam placat: amicus quoque, dum amico dona largitur, illum amplius sibi devincit, quamvis ista primario fiant in illius honorem, & commodum.

Dicitur 2. *Rei sensibilis*; quia homines per Sacrificia in unius ejusdemque Religionis cultum coadunantur. Porro homines non communicant inter se, nisi signis sensibilibus manifestent, quod intus in animo gerunt. Sacrificium itaque propriè dictum, quatenus est rei sensibilis, distinguitur à Sacrificio contriti cordis, & interiorum animæ affectuum, quibus Deo inhæretur.

Dicitur 3. *Cum ejus destructione*; quibus vocabus Sacrificium differt à cæteris oblationibus, in quibus res oblata non est necessario destruenda. Additur, *seu immutatione*; quia ad rationem Sacrificii propriè dicti sufficit, quod in viçtima fiat aliqua immutatio, ut patet ex Sacrificio capri emissarii, qui non occidebatur, sed tanquam exul in desertum ejiciebatur, Levit. 16.

Dicitur 4. *Soli Deo*; quis enim sacrificandum esse censuit, ait S. Augustinus lib. 29. de Civ. Dei cap. 19. *nisi ei, quem Deum aut scivit aut putavit, aut finxit? . . . sed nec ob aliud fallaces illi (spiritus) superbe sibi hoc exigunt, nisi quia vero Deo deberi sciunt.* Et libro 20. contra Faustum Manichæum cap. 21. *Quamvis in memoriis Martyrum constitua-
mus altaria, quis Antistitum in locis sanctorum corpo-
rum assistens altari, aliquando dixit: offerimus tibi Pe-
tre, aut Paule, aut Cypriane? Sed quod offertur, of-
fertur Deo, qui Martyres coronavit.*

Quare oblatio Sacrificii propriè dicti soli Deo fieri potest, cum cæteræ oblationes licite fiant hominibus? v. g. offertur theca argentea ad recludendas reliquias Martyrum, decimæ sunt quedam oblationes in sustentationem Clericorum.

R. Quia per viçtimæ maçtationem, sive physicam, sive moralem, agnoscimus Deum esse re-
rum

rum omnium auctorem & dominum, profite-
murque nos totos divinæ Majestati devovere cum
victima, cujus sanguinem in hujusce nostri affe-
ctus signum offerimus. Qui sane honos creatu-
ræ non potest deferri: *illo cultu, qui græcè latría di-*
citur, ait S. Augustinus cit. cap. 21. contra Fau-
stum, *cùm sit quædam propriè divinitati debita servitus,*
nec colimus, nec colendum docemus, nisi unum Deum.
Cum autem ad hunc cultum pertineat oblatio Sacrificii,
unde idololatria dicitur eorum, qui hoc idolis exhibent,
nulli tale aliquid offerimus, aut offerendum præcipimus,
vel cuiquam Martyri, vel cuiquam sanctæ animæ, vel
cuiquam sancto Angelo. Sed hæc pars definitionis
fufius explicabitur capite fequenti.

Dicitur 5. *per legitimum Miniftrum*; cùm enim
Sacrificium fit actio publica & in Religione excel-
lentiffima, requirit personas fpecialiter deputatas.
Hoc videtur à natura hominibus inditum, nam pa-
gani femper fe habuerunt ut Sacerdotes. In lege na-
turæ illud munus competebat patribus familias, &
eorum primogenitis juxta communiorem fenten-
tiam, utpote qui effent in fua familia veluti Prin-
cipes, Noe, Abraham, Job, & alii deinceps fagri-
ficia obtulerunt. Nec obftat quod Cain & Abel vi-
ctimas incenderint; etenim fratres illi jaciebant
fundamenta diftinctarum familiarum, rei familiari
feperatim confulebant, aliàs locus non fuiffet in-
vidiæ, qua Cain exarfit in fratrem. In lege fcri-
pta prohibuit Deus, ne quisquam, nifi ex ftirpe
Aaronica oriundus, ad altare ascenderet. Etc. 16.
primæ partis probavimus folos Sacerdotes in lege
Evangelica habere poteftatem conficiendæ Eucha-
riftiæ, ac proinde offerendi Sacrificii; folvimus-
que momenta, quæ folent contra proferri.

Difficultas hic nascitur ; cujus Ministri sint in hac parte Sacerdotes , an Christi Domini , an Ecclesiæ , & populi Christiani ?

R. Ministri sunt. utriusque ; 1. Christi Domini qui est principalis offerens in Missæ Sacrificio , ut infra dicetur ; quia cùm maneat in æternum , *semper æternum habet sacerdotium* , Heb. 7, vers. 24. Aaron idcirco habuit successores , quòd morte prohiberetur permanere , ut habetur ibidem. At Christo semper viventi ad interpellandum pro nobis , nullus succedit ; habet solùm Ministros , quibus tanquam instrumentis utitur , ipse Princeps Sacerdos secundum ordinem Melchisedech , ad offerendum corpus & sanguinem suum sub speciebus panis & vini. 2. Sacerdotes licèt divinitus instituti & consecrati , sunt tamen fidelium Ministri ; *omnis namque Pontifex* , inquit Apostolus Hebr. 5. *ex hominibus assumptus , pro hominibus constituitur in iis , quæ sunt ad Deum ut offerat dona & sacrificia*. Ratio est , quia fidelis quisque sicut tenetur ore confiteri ad salutem , quod corde credit ad justitiam , Rom. 10. sic & signo externo profiteri debet suam erga Deum servitutem , quæ latria dicitur : atqui Sacrificium proprie dictum est illud signum a natura veluti inditum , & apud omnes gentes determinatum : ergo quilibet fidelis debet illud offerre. Non potest autem per seipsum id præstare , præsertim in Lege Evangelica : necesse est itaque ut alterius ministerio utatur , nempe Sacerdotis ad illud officium divinitus deputati. Hinc ipse Sacerdos stans ad altare ait , *Orate fratres , ut meum ac vestrum Sacrificium acceptabile fiat*. Tum ad Deum conversus , subdit , *Memento , Domine , famulorum... pro quibus tibi offerimus , vel qui tibi offerunt , &c.*
Et

Et infra, *Hanc igitur oblationem servitutis nostræ, sed & cunctæ familiæ tuæ, &c.* quibus verbis agnoscit se esse Ministrum Ecclesiæ, & per suum ministerium fideles vota sua Deo reddere. Nam quod specialiter agitur ministerio Sacerdotum, hoc universaliter agitur voto fidelium, inquit Innocentius III. lib. 3. cap. 6. de Missæ Sacrificio.

Dicitur 6. *ad recognoscendum supremum Dei dominium*, quod ex dictis satis intelligitur.

Q. 3. *Quotuplex est Sacrificium proprie dictum?*

R. Quadruplex vulgo distinguitur, primum dicitur latreuticum, quia specialiter offertur ad testandam omnimodam nostram dependentiam à Deo omnium rerum auctore, & supremo Domino. In hoc Sacrificio victima apud Judæos igne prorsus consumebatur, ideoque dicebatur holocaustum, omnium sacrificiorum præstantissimum. Secundum est Eucharisticum pro gratiarum actione. Tertium propitiatorium pro peccatorum remissione. Quartum impetratorium & pacificum pro novis beneficiis à Deo obtinendis.

Q. 4. *Unde nascitur illa Sacrificiorum multiplicitas?*

R. Ex quatuor Dei perfectionibus, quæ nos specialiter ipsi obstringunt.

Prima est suprema ejus Majestas, sub cujus dominio cuncta sunt tam absolutè posita, ut possit absque injuria & auferre concessa, & negare expetita, quantumcunque nobis necessaria; totum enim quod sumus, ipsius est. Hoc testamur per holocaustum in quo sincero affectu exinanimur tanquam victima igne charitatis totaliter flagrans; memores scriptum esse. *II. 61. Ego Dominus . . .*

odio habens rapinam in holocausto : rapina autem est, si quid veluti proprium retinemus, nec ad Deum referimus.

Secunda est immensa Dei erga nos bonitas, qua 1. nos immeritos eduxit è nihilo, & hætenus conservavit innumera inter pericula. 2. si nos dilexit, ut Unigenitum suum daret, in quo habemus propitiationem, & nova quotidie beneficia consequimur. Hoc grato animo recolentes singulis diebus Sacrificium Eucharisticum, seu gratiarum actionis offerimus, præcipua enim Religionis cura est, secundum S. August. ut Deo non sit ingrata. Unde Sacerdos ad populum sic præfatur, *gratias agamus Domino Deo nostro* : ad Deum verò conversus, *dignum & justum est, æquum & salutare, nos tibi semper & ubique gratias agere. Semper & ubique*, ait, quia omnia, etiam quæ videntur adversa, diligentibus Deum convertuntur in bonum, Rom. 8. solaque cupiditas in malum ea transvertit.

Tertia est justitia infinita, quam ingrati incessanter offendimus. Hinc continuus animi nostri dolor, hinc sincerum desiderium plene satisfaciendi Sacrificio propitiatorio expressum, in quo confitemur nos vita indignos, paratosque cum exteriori victima immolari.

Quarta est perfecta beatitudo, qua Deus in plenitudine divinarum suarum perfectionum quiescit infinitè beatus, & cujus nos participes esse voluit, præstituens illam, tanquam nostrum ultimum finem. Huic divinæ perfectioni respondet Sacrificium impetratorium, in quo, anhelantes ad tantam felicitatem, postulamus quæcunque utilia ad illam consequendam. Hæc igitur quarta species

species Sacrificii non inservit fovendæ cupiditati, ut carnales Judæi existimant, sed extinguendæ, utpote quæ beatitudini nostræ adversetur. Offeritur quidem illud Sacrificium ad impetranda quælibet bona etiam temporalia, sed quatenus ea nobis Christus Dominus promeritus est, hoc est, in hypothesi; quodd Deus per prospera ad beatitudinem nos deducere præelegerit.

Q. 5. *Quatuor illæ Sacrificii species existuntne in Religione Christiana?*

R. Existunt eminentiori modo in Missæ Sacrificio, quod est unicum Christianorum Sacrificium, quod offerunt ob quatuor illos recensitos fines, est enim latreuticum & holocaustum, Eucharisticum, propitiatorium, & impetratorium. *Huius Sacrificii inquit Sanctus Augustinus lib. 10. de Civit. cap. 20. multiplicia variaque signa erant Sacrificia prisca sanctorum: cum hoc unum per multa figuraretur, tanquam verbis multis res una diceretur, ut sine fastidio multum commendaretur. Et in Psal. 39. nu. 12. cum datum est, quod promissum est, ablata sunt verba promissiva, data sunt completiva quid est, quod datum est completivum? Corpus quod nostis, quod non omnes nostis (propter Cathecumenos, quibus hoc mysterium celabatur) quod utinam, qui nostis, omnes non ad iudicium noveritis.*

Licet ex dictis jam innotescat, qua mente, & quo fine fideles Sacrificium offerre debeant, hoc est, ad Missam audiendam convenire, expedit tamen præcipuum istud servitutis nostræ debitum accuratius explicare. Quamobrem sit

CAPUT II.

Quæ spectanda sunt in Sacrificio ?

R. Duo in Sacrificio spectari debent. Primum, id quod significat tantum. Secundum, quod significatur.

Quod significat tantum, est oblatio exterior rei sensibilis, quæ à S. Augustino lib. 10. de Civit. c. 5. dicitur *Sacrificium visibile invisibilis sacrificii Sacramentum, id est, sacrum signum.* Sacrificium ergo est in genere signi, sicut suo loco diximus de Sacramento. Sed diversa sunt illa signa; quia diversa significant.

Quod significatur in Sacramento, est gratia sanctificans: quod verò significatur in Sacrificio, quodque vocari potest res Sacrificii, est cor contritum, charitas, qua Deus plus omnibus diligitur. Ita S. August. cit. loco, *nec quod ab antiquis Patribus talia Sacrificia facta sunt in victimis quæ nunc populus legit, & non facit aliud intelligendum est, nisi rebus illis eas res fuisse significatas, quæ aguntur in nobis, ad hoc tantum, ut inhæreamus Deo, & ad eundem finem proximo consulamus quod ab omnibus appellatur Sacrificium, signum est veri sacrificii; porro misericordia verum Sacrificium est, id est res Sacrificii, res significata & expectata & expectata per signum visibile, seu sacrificium exterius.* Subdit S. Doctor de charitate Dei, *quæcunque . . . in ministerio tabernaculi, sive templi multis modis de sacrificiis leguntur divinitus esse præcepta, ad dilectionem Dei & proximi significandam referuntur: quod probat Epist. 120. & in Psal. 87. Pietas, inquit, cultus Dei est, nec colitur ille nisi amando. Hoc enim colitur, quod diligi-*

diligitur; quia Deus rebus omnibus major & melior invenitur, plus omnibus diligendus est, ut colatur. Hic est Dei cultus, ait lib. 10. de Civit. c.4. hæc vera Religio, hæc vera pietas, hæc tantum Deo debita servitus. Atque ex his concludit in Psal. 77. eum, qui ad Deum per Sacrificium recurrit, ut consequatur bona terrena, quibus adhæret cupiditate, Deum non colere. Anima ipsa; cum se refert ad Deum, ut igne amoris ejus accensa, formam concupiscentiæ sæcularis amittat, eique tanquam incommutabili forma subdita reformetur, fit sacrificium, lib. 10. de Civ. cap. 6.

Ex his sequitur

1. Sacrificium exterius sine interiori esse signum falsum; significat enim quod non est, nempe cor contritum, humiliatum, Deo totaliter deditum, & ex amore serviens, cum tamen in superbis & peccatoribus longè sit à Deo. In quo differt sacrificium à Sacramento: utrumque, ut diximus, signum est; Sacramentum signum, quo Deus significat se gratiam conferre obicem non ponenti, atque ideo semper verum & infallibile; est enim Deus verax, nec falli nec fallere potest. Sacrificium verò est signum, quo homo exterius significat, profiteturque Deo se totum mancipatum esse illius servituti, in quo falsitas & mandacium esse potest; est enim omnis homo mendax, & ita contingit in omnibus peccatoribus, qui cupiditatibus suis serviunt, non Deo, atque ita sacrificia eorum derisionis speciem præ se ferunt. Hinc sequitur

2. Sacrificia carnalium Judæorum, quamvis à Deo instituta & præcepta, meritò fuisse rejecta, tanquam Deo ingrata. Quo mihi multitudinem
victi-

viſtinarum veſtrarum, ait If. 1. quis quæſivit hæc de manibus veſtris? incenſum abominatio eſt mihi . . . Sabbathum & feſtivities alias non feram. Nunquid manducabo carnes taurorum, aut ſanguinem bircorum potabo? Pſal. 49. Miſericordiam volui & non ſacrificium, Oſeæ cap. 6. Quæ expendens S. Auguſtinus lib. 10. de Civit. Dei cap. 5. ſic ſcribit: *Intueamur, quemadmodum ubi Deum dixit (Propheta Pſ. 50.) nolle ſacrificium, ibi Deum oſtendit velle ſacrificium. Non vult ergo ſacrificium trucidati pecoris, ſed vult ſacrificium contriti cordis. Ille igitur, quod eum nolle dixit, hoc ſignificatur, quod eum velle ſubjecit . . . In huius Prophetæ verbis utrumque diſtinctum eſt, ſatiffique declaratum, illa ſacrificia non requirere Deum, quibus ſignificantur hæc ſacrificia quæ requirit Deus. . . Et l. 3. de Doctr. Chr. ea demum eſt miſerabilis animæ ſervitus, ſigna pro rebus accipere: & ſupra creaturam corpoream oculum mentis ad hauriendum æternum lumen levare non poſſe.*

Dixi, *Sacrificia carnalium Judæorum*, namque ſacrificium Chriſtianorum etiam carnalium, per ſe & ratione principalis offerentis, nempe Chriſti Domini, ſemper eſt acceptabile; quia ſemper verum; Chriſtum verum ſub ſignis externis panis & vini, verè & ex charitate eximia ſe totum offert. Sed peccatores illud exterius offerentes imitantur ludum, quo milites illuſerunt Domino, Matth. 27. Neſciunt re vera, quid faciant, ac propterea minus ſunt rei; ſed quis excuſabit Paſtores, quorum negligentia hæc neceſſaria communiter ignorantur?

CAPUT III.

Utrum in vera Religione debeat esse Sacrificium proprie dictum ?

Quotquot ex hæreticis realem Christi præsentiam in Eucharistia negavere, ut Petrobrussiani, Albigenes, Zwingliani, & Calvinistæ, ii sacrificium ab Ecclesia Catholica amoverunt.

Lutheranis, qui corpus & sanguinem Domini realiter in Eucharistia contineri confitentur, difficilius visum fuit non admittere verum sacrificium; nam ex Hospiniano par. 2. Missæ Sacramentariæ *Corporalis præsentia fons est Missæ Pontificiæ*. Lutherus non erubuit scribere anno 1534. in lib. de Missa privata tandem sibi à dæmone persuasum Missæ Sacrificium esse abrogandum. Philippus Melancton Lutheri assecla existimavit se invenisse medium efficax ad expungendum Missæ sacrificium, salva reali præsentia, nempe si negaretur ejus permanentia, uti eam negant Lutherani, asserentes Christum non esse realiter præsentem in Eucharistia, nisi cum actu sumitur. Quod ubi rescivit Lutherus in Collatione Ratisbonensi anno 1541. sic exclamavit: *Maße virtute & pietate, mi Philippe, tibi debetur gratia, qui Pontificiæ Missæ potuisti Sacramentum adimere, quod ego tentavi, & aggredi non fui ausus*, ex eodem Hospiniano cit. opere. Hujusmodi itaque Pseudo-Reformatores verè dixeris esse cum Antiocho præcessores Antichristi, qui ablaturus est juge sacrificium, Dan. 8. 11. & 12.

Capite sequenti perpendemus, utrum Eucharistia sit verum & proprie dictum Ecclesiæ Catholicæ

licæ sacrificium ; nunc respondendum generatim ad propositam quæstionem. Itaque

R. In vera Religione debet esse Sacrificium proprie dictum.

Probatur ; quia in vera Religione debent observari , quæ sunt legis naturalis : atqui Sacrificium proprie dictum est juris naturalis : ergo. Major est evidens.

Minorem probat S. Thomas 2. 2. q. 85. art. 1. *Sicut in rebus naturalibus , inquit , naturaliter inferiora superioribus subduntur , etiam naturalis ratio dicitur homini secundum naturalem inclinationem , ut ei , quod est supra hominem , subjectionem & honorem exhibeat secundum suum modum. Est autem modus conveniens homini , ut sensibilibus signis utatur ad aliqua exprimenda. Et ideo ex naturali ratione procedit , quod homo quibusdam sensibilibus rebus utatur , offerens Deo in signum debitæ subjectionis & honoris , secundum similitudinem eorum , qui dominis suis aliqua offerunt in recognitionem domini.*

Præterea in omni Republica specialis exterior honos supremo Principi ita determinatus est , ut nulli alteri absque crimine læsæ majestatis exhiberi possit. Cum ergo Religio ad hoc sit instituta , ut cultus Deo debitus reddatur , necesse est , ut in omni Religione reperiatur Sacrificium proprie dictum , utpote unicus exterioris patriæ cultus.

Nec dicas per interiorē perfectæ charitatis motum , quo homo se totum , & cætera ad Deum refert , exhiberi supremum cultum , qui dicitur patriæ. Namque spectato agendi hominis modo , actus charitatis , aut alterius virtutis non censetur perfectus & consummatus , nisi per opus æternum se prodatur ; neque enim perfectè misericordem ,

cordem, fortem, & humilem dicimus, qui data occasione, contentus voluntatis affectu miserum non subleuat, mortis pericula declinat, & illatas calumnias diluit. Cruentas quidem victimas cædit charitas, quando usque ad sanguinem pro veritate certamus ex Sancto Augustino lib. 10. de civit. cap. 4. Verum cum opus illud sit speciale Dei donum, nec dispositioni Ecclesiæ subiaceat, necesse est, ut societas fidelium intimum illum animi sui sensum sanguine alieno, victimæ scilicet immolatione testetur, cum non possit suo.

Confirmatur; quia quod observatum est apud omnes gentes, ad legem naturalem est revocandum: atqui *in qualibet ætate*, ait S. Thomas cit. art. 8. *apud quaslibet hominum nationes, semper fuit aliqua sacrificiorum oblatio.* De statu quidem innocentiae nihil legitur, quia brevissimus fuit, quanquam S. Doctor non dubitat quin Adam Sacrificium obtulerit, atque exemplo præverat filiis suis, de quibus S. August. cit. cap. 4. lib. 10. de civit. sic scribit: *Quam antiquus sit in sacrificando Dei cultus, duo illi fratres Cain & Abel satis indicant.* Et cap. 19. *sed nec ob aliud fallaces illi spiritus (dæmones) sibi hoc exigunt, nisi quia vero Deo debere sciunt.*

In sanam ergo mentem nunquam venerit Christum Dominum, qui non venit legem naturalem solvere, sed adimplere & perficere, Matth. 5. Religionemque cæteris longè præstantiorem instituere, ab ea expunxisse quæ sunt juris naturalis, quale est Sacrificium propriè dictum, adeo ut in Religione Christiana nullus exterior cultus Dei proprius, & ipsi soli debitus reperiat. Contra eos, qui ita desipiunt, clamat Apostolus, *habemus altare, de quo edere non habent pote-*

statem, qui tabernaculo deserviunt. Heb. 13. Porro altare non est, nisi propter Sacrificium, nonne qui edunt hostias, inquit idem Apostolus 1. Cor. 10. participes sunt altaris? Ubi vult hæc duo, scilicet hostiam & altare esse correlata, & necessario connexa, unde subdit, non potestis mensæ Domini participes esse, & mensæ demoniorum. Mensa demoniorum hic est altare propriè dictum: ergo & mensa Domini. Ergo in eo offertur hostia propriè dicta; quæ autem sit illa hostia, explicat, non potestis calicem Domini bibere, & calicem demoniorum, ibid.

Altaria à temporibus Apostolorum in Religione Christiana permansisse constanter docent SS. Patres. S. Cyprianus Epist. 66. *ne quid Sacerdotes & Ministros Dei, altari ejus & Ecclesiæ vacantes, ad sæculares molestias revocet*: S. Cyrillus Jerosolymitanus cap. 5. S. August. lib. 10. Confess. cap. 11. & lib. de cura pro mortuis. Quis verò esset usus altarium, patet tum ex Sacerdotibus, qui in iis soli offerebant, ut dictum est cap. 16. primæ partis: tum ex Liturgiis perantiquis, in quibus ipsi Novatores agnoscunt ritum Sacrificii propriè dicti. Calvinus lib. 4. Instit. c. 18. fatetur à SS. Patribus non tantum Sacrificii nomen fuisse usurpatum, sed etiam ad actionis rationem accessisse. Lutherus in lib. de abroganda Missa, ait se contra omnes SS. Patres scribere; & lib. contra Regem Angliæ non curat, si mille Augustini contra se stent. Ex qua confessione reos illos habemus manifesti schismatis.

Dices 1. quod est pœna peccati, non est à natura inditum: atqui est pœna peccati, quod homo rebus inferioribus subjiciatur, & signis quibusdam exterioribus indigeat ad Deum prome-

ren-

rendum. Unde Apostolus Galat. 4. docet Christum Dominum nos ab hac servitute liberasse, quem admodum prædixerat mulieri Samaritanæ, Joan. 4. *venit hora, & nunc est, quando veri adoratores adorabunt Patrem in spiritu & veritate, non in signis & symbolis*: Sic Adam & Eva in statu innocentiae Deum colebant: *Primi homines*, inquit S. Augustinus cit. lib. 10. de civitate, *in Paradiso puri atque integri ab omni sorde ac labe peccati, seipsos Deo mundissimas hostias offerebant*. Nulla pro illo statu instituta sunt Sacramenta, ut in tractatu de Sacramentis in genere probatum est. Ergo Sacrificium non est à natura inditum.

Nego conseq. non enim sequitur ex præmissis, in quibus nihil de Sacrificio. Ut ergo argumentum sit in forma, sic concludendum est: Ergo quòd homo rebus inferioribus subjiciatur, non est à natura inditum, quod verum est, sed non pugnat contra doctrinam nostram; neque enim homo per Sacrificium externum servit rebus inferioribus, sed iis utitur ad significandam suam erga Deum reverentiam; naturale autem est homini cordis intima signis exterioribus exprimere, v. g. suam animi propensionem erga amicum beneficiis, suam commiserationem erga pauperem eleemosynis, suam erga Deum devotionem psalmodia & aliis canticis. In eo itaque Sacrificium differt à Sacramento, quòd in Sacramento gratiam & inferioribus signis hauriat, quod ipsi non est naturale, sed præsupponit peccatum, in cuius remedium instituta sunt Sacramenta; æquum enim erat, ut qui per superbiam à Deo recesserat, per humilitatem revocaretur. Pleraque autem Sacrificia in veteri lege erant etiam Sacramenta,

ut diximus in tractatu de Sacramentis in genere, utpote quæ essent ordinata ad sanctificationem hominum legalem & exteriorem quidem ex opere operato, interiorem verò & propriè dictam ex opere operantis; unde meritò dicit Apostolus homines in iis serviisse vacuis & egenis elementis. At per Sacrificia, tanquam per signa & voces homo significat qua sit affectus erga Deum pietate & reverentia, quod est ipsi naturale. Fuissent ergo sacrificia in statu innocentiae, si perseverasset, non verò Sacramenta. Nec S. Augustinus in alato textu à sacrificio interiori excludit sacrificium exterius. Namque in ejus mente, *ea tantum animæ est miserabilis servitus signa pro rebus accipere, & supra creaturam corpoream oculum mentis ad hauriendum æternum lumen levare non posse*, lib. 3. de doctr. Christ. cap. 1. Hac servitute laborabant carnales Judæi, à qua brevi liberandos Christus præmonet mulierem Samaritanam, *adorabunt*, inquit, *Patrem in spiritu & veritate*. Quibus verbis Christus non eliminat à nova lege omne signum sensibile; alias nec Adversariis liceret laudes divinas ore decantare, aut Sacramenta Baptismi & Eucharistiæ celebrare; hæcenim sunt signa sensibilia. Sed quemadmodum qui non verborum sono, sed eorum sensu delectatur, spiritualiter intelligit, sic qui non signis sacrificiorum, sed veritate significata afficitur, Patrem in spiritu & veritate adorat. Sacrificia Judæorum, ex S. Augustino lib. 10. de Civit. cap. 20. erant tanquam verba significantia, quæ Dominus completurus erat: verba, quibus serviebant Judæi tanquam infantes sine intelligentia, transierunt; veritas significata per Christum facta est, Joan. 2. hanc

Chri-

Christiani possident sub Sacramentorum tamen involucris. Hinc Patres Religionem Christianam spectant in statu veluti medio Synagogam inter & Ecclesiam triumphantem. In Synagoga tantummodò erant signa & figuræ; in Religione Christiana habentur res significatæ & promissæ, sed signis & symbolis obvolutæ: in patria verò cœlesti omnia nuda & aperta erunt, flagrans charitas, qua singuli totos se ad Deum referrent omnibus patet.

Instabis: ex Apostolo Hebr. 10. *sanctificati sumus per oblationem corporis Jesu Christi semel una enim oblatione consummavit in sempiternum sanctificatos.* Ergo, inquit Pseudo-Reformati, in Religione Christiana præter sacrificium crucis non est aliud agnoscendum, nisi fortè sacrificium cordis, & improprie dictum, de quo idem Apostolus v. 16. *hoc autem testimonium, quod testabor ad illos post dies illos, dicit Dominus, dando leges meas in cordibus eorum & peccatorum & iniquitatum eorum jam non recordabor amplius. Ubi autem horum remissio, jam non est oblatio pro peccato.* Ecce quo tendebant multiplices leges sacrificiorum Judæis impositæ, nempe ad interius cordis sacrificium, per cruentam Christi oblationem præparatum. Jam ea peracta, non est alia pro peccato, atque in eo ponit Apostolus discrimen inter legem veterem, & novam; quòd in illa sæpius repeteretur oblatio, in hac verò Christus semel fuerit oblatus. *Et omnis quidem Sacerdos, inquit v. 11. præsto est quotidie ministrans, & easdem sæpe offerens hostias hic autem unam pro peccatis offerens hostiam, in sempiternum sedet in dextera Dei.* Et cap. 9. docet Christum introisse in cælum, non ut sæpe offerat semetipsum; quia

semel in consummationem sæculorum per hostiam suam apparuit. Ergo contra doctrinam Apostoli, nec sine injuria sacrificii crucis, Sacerdotes in Religione Christiana quotidie offerunt eandem hostiam, scilicet corpus & sanguinem Domini.

R. I. Retorquendo argumentum contra Adversarios. Ex Apostolo per unicum Christi oblationem in cruce cruenta sanctificati sumus, & consummati, vetus Testamentum ablatum est, & novum sancitum in cordibus scriptum in remissionem peccatorum: ergo non sine injuria sacrificii crucis baptizantur, & cœnam celebrant in remissionem peccatorum. Ipsimet sternunt nobis viam ad solvendam objectionem quæ similiter eos impetit.

Respondent itaque Christum Dominum re vera per cruentem crucis sacrificium, plenam Deo satisfactionem pro peccatis obtulisse, novum testamentum confirmasse, & omnia bona nobis promeruisse; sed inutilem fore fructum tanti sacrificii, nisi nobis applicetur: nobis autem applicari per fidem, & certam fiduciam, ad quam excitanda instituta sunt Sacramenta Baptismi & Eucharistiæ. Quod illustrari potest exemplo eorum, quæ in humanis contingunt: aliquis virum potentem gravibus injuriis sibi infensum reddiderit, mediator verò pro eo intercedat, atque satisfactionem ex propriis condignam offerat, reus propterea non reconciliabitur, nisi peccatum retractat pœnitens, atque supplicem se cum mediatore adjungat. Sic Mediator Dei & hominum homo Christus Jesus, in sanguine suo redemptionis nostræ pretium plusquam sufficiens obtulit, sed ut ad peccatores usque copiosa illa redemptio per-

perveniat, necesse est ut uniantur Christo five per solam fidem, seu fiduciam in Sacramento, ut falsò docent Adversarii, five juxta Catholicos per sinceræ pœnitentiæ motum, Sacramentorum virtutem & efficaciam, sacrificiique oblationem. Itaque.

R. 2. directè ad singula.

Ad primum, distingo: una oblatione consummavit, in hypothesi quòd meritum ejus mediis ab ipso præscriptis fuerit applicatum, Concedo; secus, nego. Nam peccatores obstinatos non sanctificavit, neque consummavit.

Ad secundum Christus Dominus in cruce sanxit quidem novum testamentum, in quo nobis concessit jus ad immensa gratiæ & gloriæ dona, sed illam hæreditatem non capebimus nisi per infusionem Spiritus sancti, & donorum ejus ad quam instituta sunt Sacramenta, & Sacrificium.

Ad tertium, distingo: ubi horum (peccatorum) remissio, jam non est oblatio pro peccato, non est oblatio novi sacrificii, Concedo: non est oblatio ejusdem Sacrificii, nego. Namque ex eodem Apostolo Hebr. 7. Christus est *semper vivens*, ad interpellandum pro nobis, ut appareat nunc vultui Dei, c. 9. non quidem ut iterum se offerat cruento modo, quemadmodum in veteri lege Sacerdotes quotidie easdem hostias, agnos scilicet non quidem numero, quod erat impossibile, sed specie eosdem offerebant, sed ut sacrificium crucis semel oblatum, intercedendo pro nobis, Deo exhibeat. Porro in Religione Christiana idem sacrificium offertur, quod Christus in cruce obtulit, ut dicetur c. 5. & sic patet solutio ad quartum & quintum.

Uu 4

Dices

Dices 2. apud Minutium Felicem Ethnicus Christianis exprobrat, quòd nec aras, nec simulachra, nec templa haberent. Ergo iis Ecclesiæ sæculis, non erant altaria apud Christianos.

Nego conseq. namque S. Cyprianus Minutio coætaneus Epist. jam laudata meminit oblationum, quæ fiebant ad altare. Potuit autem id ignorare Ethnicus: tum quia Christiani mysteria sua occultabant, tum quia propter persecutiones in domibus rem sacram furtivè faciebant. Nonne etiam nunc in Anglia idem posset objici Catholicis ibi degentibus? An propterea rectè concluderetur illos esse sine altari & sacrificio?

CAPUT IV.

Utrùm Eucharistia sit Sacrificium propriè dictum?

R. **D**e fide est Eucharistiam esse Sacrificium propriè dictum. Ita enim definiit Concilium Tridentinum sess. 22. canone 1. his verbis: *Si quis dixerit, in Missa non offerri Deo verum & proprium Sacrificium anathema sit.* Can. 3. *Si quis dixerit, Missæ sacrificium tantum esse laudis, & gratiarum actionis, aut nudam commemorationem sacrificii in cruce peracti, non autem propitiatorium, &c. anathema sit.* Et Canone 4. *si quis dixerit, blasphemiam irrogari sanctissimo Christi sacrificio in cruce peracto, per Missæ sacrificium, aut illi per hoc derogari; anathema sit.*

Probatur 1. ex dictis cap. præcedenti de sacrificio in genere, ex quo sic argumentari licet; In vera Religione necessario existit aliquod sacrificium

crificium propriè dictum : atqui Religio Christiana est vera Religio : ergo in Religione Christiana existit sacrificium propriè dictum. Porro nulum tale sacrificium in ea assignari potest præter Eucharistiam : ergo Eucharistia est revera sacrificium propriè dictum.

Probatur 2. ex Scriptura & Traditione simul.

1. Christus in ultima cœna, Luc. 22. postquam benedixit panem, & gratias egit, sic alloquitur Apostolos, *hoc est corpus meum, quod pro vobis datur.* Non ait, vobis datur, sed, pro vobis datur, id est offertur. Similiter & de calice dixit, *Hic est calix novum testamentum in sanguine meo, qui pro vobis funditur, ut habet græcus textus.* Addit S. Matthæus c. 26. *pro multis effunditur.* Pro vobis nunc funditur, pro multis vero in cruce effundetur.

Apostolus 1. Cor. 10. hac institutione Domini nixus sic scribit, *Calix benedictionis, cui benedicimus, nonne communicatio sanguinis Christi est? &c.* Quòd autem in illa benedictione sacrificium propriè dictum intelligat, patet ex sequentibus ejus verbis, *Quæ immolant gentes, dæmoniis immolant, & non Deo. Nolo autem vos socios fieri demoniorum: Non potestis calicem Domini bibere, & calicem demoniorum. Non potestis mensæ Domini participes esse, & mensæ demoniorum.* Ubi opponit altare Christianorum altari Gentilium, in eo quod in altari Christianorum oblationes fiant vero Deo, in altari verò Gentilium imoletur dæmoniis. Quæ autem fiat oblatio in altari Christianorum aperit Apostolus, nempe panis & calicis. Ergo in mente Apostoli Christus consecrans in ultima cœna corpus & sanguinem suum obtulit, instituitque verum sacrificium.

Uu 5

Hanc

Hanc Apostoli interpretationem secuti sunt Patres tum Græci, tum Latini. S. Ignatius Epistola ad Smyrnenſes contra hæreticos, sic ſcribit, *Eucharistias & oblationes non admittunt, quòd non confiteantur Eucharistiam eſſe carnem Salvatoris noſtri Jeſu Chriſti.* S. Gregorius Nyſſenus oratione 1. de Reſurrectione, *pro ineffabili arcanoque ſacrificii modo præoccupat impetum violentum, ac ſeſe oblationem & victimam offerre pro nobis Sacerdos ſimul & Agnus Dei. cùm corpus ſuum ad comedendum, & Sanguinem ad bibendum familiaribus præbuit.* S. Chryſoſtomus hom. 24. in 1. ad Cor. *pro brutorum cæde (Sacerdotio Aaronico) ſeipſum offerendum præcepit.* S. Leo ſerm. 7. de Paſſione, *Dominus corporis & ſanguinis ſui ordinans Sacramentum, docebat qualis Deo hoſtia deberet offerri.*

Scio quibusdam Theologis in Concilio Trid. primùm non conſtituiſſe, num Dominus ſeipſum obtulerit in ultima cœna, ut refert Cardinalis Palavicinus in lib. 18. hiſt. Concil. cap. 2. At omnes tandem eandem iniere ſententiam tum exemplo Melchifelech, de quo poſtea; tum iſto Chriſti præcepto, *hoc facite in meam commemoratio- nem.* Quibus verbis conſtituit illos Sacerdotes ad celebrandum idipſum; quod præmiſit. Omnis autem Sacerdos aſſumitur ad offerendum dona & ſacrificia; hæc enim ſunt correlata, & ita inter ſe connexa, ut Sacerdos non ſit, qui nihil habet offerendum, ut fuſè probat Apoſtolus in epiſt. ad Hebr. cap. 8. & ſeq. *Omnis enim Pontifex ad offerendum munera & hoſtias conſtituitur; unde neceſſe eſt & hunc habere aliquid quod offerat.* Ergo Chriſtus Dominus verum inſtituerat ſacrificium. Vix itaque alia diſceptatio fuit inter Patres Tri-
denti-

dentinos, quàm de fine oblationis Christi in ultima cœna, num scilicet fuerit propitiatoria, an Eucharistica tantum, & gratiarum actionis, cum nondum esset peractum cruentum sacrificium Crucis. Concilium quidem tanquam de fide definit can. 3. Missæ sacrificium esse propitiatorium. Utrum autem tale fuerit à Christo Domino oblatum, quæstionem non attigit, verba illius sunt. *In cœna novissima, qua nocte tradebatur, ut dilectæ sponsæ suæ Ecclesiæ visibile, sicut hominum natura exigit, relinqueret sacrificium, quo cruentum illud, semel in Cruce peragendum repræsentaretur; ejusque memoria in finem usque sæculi permaneret, atque illius salutaris virtus in remissionem eorum, quæ à nobis quotidie committuntur; peccatorum, applicaretur; Sacerdotem secundum ordinem Melchisedech se in æternum constitutum declarans, corpus & sanguinem suum sub speciebus panis & vini Deo Patri obtulit, ac sub earundem rerum symbolis Apostolis, quos tunc novi Testamenti Sacerdotes constituabat, ut sumerent, tradidit; & eisdem, eorumque in Sacerdotio successoribus, ut offerrent, præcepit per hæc verba, hoc facite, &c. nam celebrato veteri Pascha, quod in memoriam exitus de Ægypto multitudo filiorum Israel immolabat, novum instituit Pascha, seipsum, &c. fess. 22. cap. 1.*

2. Apostolus cap. 7. & sequentibus epistolæ ad Hebr. probat Christum Dominum esse Sacerdotem in æternum secundum ordinem Melchisedech, sicut prædictum est Psal. 109. ex quo sic argumentari licet. Sacerdos secundum Ordinem Melchisedech debet offerre sacrificium eo ritu, quo Melchisedech obtulit, quemadmodum Sacerdotes secundum Ordinem Aaron offerebant sacrificia ritu Aaronico; nam ex dictis, omnis Sacerdos

cerdos primario instituitur ad offerenda dona & Sacrificia : atqui Melchisedech obtulit sacrificium in pane & vino, Gen. 14. v. 18. Ergo & Christus Dominus.

Respondent Novatores negando min. scilicet Melchisedech sacrificium obtulisse in pane & vino : namque, inquit, ex Philone lib. 1. Allegoriarum, Josepho l. 1. Antiquit. c. 11. Melchisedech tanquam Rex protulit panem & vinum ad reficiendum exercitum Abrahæ, quibus astipulatur Ainhrosiaster, seu Auctor Commentariorum in Epistol. S. Pauli, inter opera S. Ambr. tanquam verus Sacerdos benedixit Abrahæ. Ad Sacerdotes enim maximè pertinet benedicere, quamvis & alii id possint. Unde in textu Hebraico non legitur, *erat enim Sacerdos* ; quasi ea esset causa cur panem protulerit ; sed, & *erat Sacerdos Altissimi*, atque ideo benedixit Abrahæ.

Confirmatur responsio ex Apostolo, qui laudata epist. probat 1. Christum Dominum verè fuisse Sacerdotem, ex eo quod obtulerit sacrificium, quo cætera fuerunt consummata : ubi autem oblatum fuit illud sacrificium ? In ultima cœna ; ne verbum quidem de pane & vino, sed meminit solummodo cruenti sacrificii in Cruce oblatis. Deinde quærit Apostolus, secundum quem ordinem Christus fuerit Sacerdos ? An secundum Aaron ? Minimè, quia Sacerdos secundum ordinem Aaron debet esse oriundus ex tribu Levi, & ex familia Aaron. Christus verò ortus est ex tribu Judæ. Ergo secundum ordinem Aaron non potest dici Sacerdos ; unde Psalmista cecinit eum surrecturum Sacerdotem secundum ordinem Melchisedech, Psal. 109. Tum expendit Apo-

Apostolus in quo Melchisedech fuerit assimilatus, Filio Dei. Hic sanè non erat prætermittendum sacrificium panis & vini, si tale obtulisset Melchisedech, & in eo præsertim ritu adumbrasset Christum Sacerdotem : nihilominus omiſſa illa analogia, in qua constituimus Sacerdotium secundum ordinem Melchisedech, Apostolus aliàs prosequitur, nempe quod non solum esset Sacerdos, sed etiam Rex justitiæ : quod major fuerit Abrahamo, ac proinde Aarone ejus pronepote, cùm ei benedixerit, decimasque ab eo acceperit ; quòd ejus genealogia non retexatur, prodeatque quasi nec initium, nec finem dierum habens, quamvis re vera omnium hominum legem fortitus sit, suspicenturque multi eum fuisse Sem primogenitum Noe. Ergo ex Sacerdotio Melchisedech nihil prorsus concludi potest pro sacrificio Missæ.

Contra 1. cibo non indigebant copię ingenti præda ditatæ, & satiatae, ut habetur cit. cap. 14. v. 24. 2. Melchisedech oblato sacrificio panis & vini, in gratiarum actionem ob victoriam potuit dividere reliquias inter astantes, juxta morem ; nam in sacrificiis gratiarum actionis veteres epulabantur, ut patet ex 1. Reg. c. 9. v. 13. & 1. Paral. cap. 16. v. 3. nec resistit Ambrosiaſter : sic enim scribit cit. Commentario de Melchisedecho : *Hujus ordinem sacrificii justissimus Rex per similitudinem instituit quando panis & vini fructus Domino obtulit.* 3. Particula, &, apud Hebræos nonnumquam sumitur pro, nam, &, quia, sic Gen. 20. *en morieris*, inquit Deus ad Abimelech Regem Geraræ, *propter mulierem quam tulisti, & ipsa* (id est, quia ipsa) *habet virum.* Psalm. 42. *non avertas faciem*

faciem tuam à me, & similis, (id est, quia similis) ero descendantibus in lacum. 4. Apostolus expressè monet cap. 5. ad Hebræos, se grandiora & difficiliora de Melchisedech prætermittere: *de quo, inquit vers. 11. nobis grandis sermo & ininterpretabilis ad dicendum; quoniam imbecilles facti estis ad audiendum.* Cap. tamen 13. v. 10. subobscurè perstringit quæ pertinent ad sacrificium incruentum, quæque reservavit Corinthiis laudato cap. 10. epist. 1. *habemus altare, de quo edere non habent potestatem, qui tabernaculo deserviunt.* 5. Denique omnes veteres tam unanimi consensu agnoscunt Christum Dominum in eo fuisse Sacerdotem secundum ordinem Melchisedech, quod, sicut ille, panem & vinum obtulerit, ut dubitare non liceat eos tradere quod ab Apostolis acceperant. Ex innumeris paucos appellabimus.

S. Clemens Alexandrinus lib. 4. Stromatum circa finem, sic habet: *Rex Salem Sacerdos Dei altissimi, vinum & panem sanctificatum dedit nutrimentum in typum Eucharistiæ.*

S. Cyprianus epist. 63. expendens illud Psal. *tu es Sacerdos in æternum secundum ordinem Melchisedech*, ait, *qui ordo utique hic est de sacrificio descendens, quod Melchisedech Sacerdos Dei summi panem & vinum obtulit . . . nam qui magis Sacerdos Dei summi, quam Dominus noster Iesus Christus, qui sacrificium Deo Patri obtulit? & obtulit hoc idem, quod Melchisedech obtulerat, id est, panem & vinum, suum scilicet corpus & sanguinem.*

Eusebius Cæsariensis, qui sedit in Concilio Nicæno ann. 325. l. 5. Demonstrationis Evangelicæ cap. 3. *Christus, inquit, Melchisedech ritu ea, quæ ad Sacerdotium in hominibus gerendum spectant, per suos*

suos ministros perfecit. Nam quemadmodum ille, qui Sacerdos gentium erat, nusquam videtur sacrificiis corporalibus functus, vino solo & pane, dum ipsi Abraham benedixit; ita primus Salvator, deinde qui ab eo profecti sunt Sacerdotes in omnibus gentibus spirituale Sacerdotii munus obeuntes vino ac pane corporis illius, ac salutaris sanguinis mysteria repræsentant. Quid clarius? Quare in hanc rem

S. Augustinus lib. 1. contra Adversarium legis cap. 2. ad illud Psalmi, Tu es Sacerdos in ætænum secundum, &c. ait, Noverunt qui legerunt quid protulerit Melchisedech. Vident nunc tale sacrificium offerri Deo toto orbe terrarum; Dei autem juratio est incredulorum increpatio, & quòd Deum non pœnitebit, significatio est, quia hoc Sacerdotium non mutabit. Mutavit quippe Sacerdotium secundum Ordinem Aaron. Similia tradit lib. 16. de Civitate Dei cap. 22. & lib. 17. cap. 17. Animadvertant autem Adversarii ex textu Eusebii, Patres ita asserere sacrificium Christianæ Religionis esse spirituale, ut non excludant signa corporalia, & proprietatem sacrificii strictè sumpti.

S. Hieronymus epist. 26. eadem docet, additque hanc fuisse sententiam Martyris Hyppoliti, S. Irenæi, Apollinarii.

3. Malachias cap. 1. sacrificium Missæ clarè prædixit his verbis: Non est mihi voluntas in vobis, dicit Dominus exercituum, & munus non suscipiam de manu vestra; ab ortu enim Solis usque ad occasum magnum est nomen meum in gentibus, & in omni loco sacrificatur, & offertur nomini meo oblatio munda, quia magnum est nomen meum in gentibus.

Frustra Novatores tam apertum vaticinium detorquere conantur, vel ad eleemosynas, & alia bona

bona opera, vel ad cruentum Crucis sacrificium, namque Patriarcharum bona opera semper Deo placuerunt, nec abrogata sunt, ut alia succederent: præterquamquod in principiis Adversariorum, bona opera non possint etiam nunc dici oblatio munda, utpote qui doceant omnia esse peccato infecta, & reputari coram Deo quasi pannum menstruatae. Deinde oblatio, de qua Malachias, frequentanda est in omni loco apud gentes, sacrificium verò Crucis semel tantum Jerosolymis est peractum. Deinde Traditio Apostolica hanc Prophetiam constanter retulit ad Missæ sacrificium.

S. Justinus in Dialogo cum Tryphone, *de nostris gentium, quæ in omni loco offeruntur, sacrificiis, hoc est, pane Eucharistiæ, & poculo similiter Eucharistiæ jam tum locutus Malachias prædixit.* A quo verò S. Justinus hanc doctrinam didicit, nisi ab Apostolis? qui, si non cum ipsis, saltem cum eorum discipulis conversatus est; scripsit enim circa annum 150.

S. Irenæus S. Polycarpi Discipulus, l. 4. c. 32. *eum, qui ex creatura est, panem accepit, & novi Testamenti docuit novam oblationem, de quo & in duodecim Prophetis Malachias sic præsignavit, non est mihi voluntas in vobis.* Ibi panis est nova oblatio novi Testamenti, non preces, non incensum, licet illam comitentur, dicanturque à Tertulliano lib. 4. contra Marcionem cap. 1. Sacrificium mundum. Offeritur ab omnibus, quia ex dictis sacrificium fit nomine totius Ecclesiæ, sed per Ministrum deputatum & consecratum.

S. Chrysostomus in Psal. 39. locum Malachiæ tractans ait, *vide quàm luculenter atque dilucidè mysticam interpretatus est mensam, quæ est incruenta hostia.*

Sanctus

Sanctus Augustinus lib. 18. de Civitate Dei cap. 35. sic habet : *hoc sacrificium per Sacerdotes secundum ordinem Melchisedech in omni loco, à Solis ortu usque ad occasum Deo jam videant offerri : sacrificium Judæorum, de quibus dictum est mihi voluntas in vobis, jam cessasse negare non possunt.*

Mitto alios Patres, ut Hieronymum, Theodoretum in 1. Malachiæ, & Joannem Damascenum lib. 4. de fide cap. 14. qui eodem sensu prophetiam intelligunt.

Dices, in vero sacrificio debet fieri immolatio, seu destructio victimæ : atqui in Missæ sacrificio nulla est immolatio : Ergo.

Nego minor. Ejus autem falsitas patebit ex capite sequenti.

CAPUT V.

In quo sita est Sacrificii Missæ essentia ?

Imprimis notandum est litem propriè nullam hic esse Catholicos inter & Novatores, sed gravem controversiam existere in Schola, in qua parte Missæ sita sit Sacrificii essentia.

Certum est Missæ Sacrificium non consistere in Liturgiæ parte, quæ est ab Ecclesia instituta ; quia Sacrificium Missæ ex dictis est divinitus institutum. Ergo ejus essentia non est reponenda in iis, quæ sunt institutionis humanæ, qualis est Missa Catechumenorum.

Controversia itaque solum esse potest inter Theologos circa ea quæ in Missa sunt institutionis divinæ, talis est consecratio, &, ut multis videtur, Communio Sacerdotis.

D. Habert Theolog. Tom. V.

X x

Circa

Circa consecrationem autem plura quæri possunt. Primum, utrum conversio panis & vini præcise sumpta, habeat rationem veri Sacrificii; est enim realis mutatio, & quædam destructio panis & vini, ad quam Ecclesia videtur respicere, cum per celebrantem ita precatur, *suscipe, sancte Pater . . . hanc immaculatam hostiam*, &c. quæ non nisi de pane transmutando, quem offert Sacerdos, intelligi videntur. Secundum, utrum consecratio, quatenus ponit corpus & sanguinem Domini sub speciebus panis & vini, sola habeat rationem sacrificii? an Communio, in qua Christus amittit esse sacramentale, sit ei necessario adjungenda? Tertium, an salvetur ratio sacrificii in consecratione unius speciei? quæ quidem Scholæ quæstiones, diversas inter Theologos, & oppositas pariunt sententias.

Nec dicant Novatores, vel ex ipsa opinionum veritate, qua inter se pugnant Catholici, certò colligi Missæ sacrificium esse figmentum humanum. Namque 1. si valeret consequentia, rectè concluderent Ariani & Sociniani, processionem Filii in divinis non esse veram regenerationem ex substantia Patris; quia Catholici non conveniunt in explicanda ineffabili illa generatione: Baptismum & Eucharistiam non habenda à Novatoribus pro veris Sacramentis, utpotè qui variè opinentur, & circa materiam Baptismi, & circa naturam Eucharistiæ, affirmantibus aliis esse meram figuram corporis Domini, aliis virtutem ejus spiritualem, aliis ipsummet corpus. 2. Duo certissima sunt apud Catholicos, quæ evincunt dogma de existentia Sacrificii Missæ apud eos esse firmum & inconcussum.

Primum,

Primum, in Liturgia, seu in ordine Missæ contineri & observari omnia, quæ necessaria sunt ad rationem Sacrificii propriè dicti, quod nec ipsi Adversarii dissitentur. Unde Lutherus censuit non retinendam, nisi Missam Catechumenorum. Sic in ritu administrandi Sacramenta Confirmationis, Ordinis, & Matrimonii, Catholici adhibent quidquid pertinet ad essentiam Sacramenti, quamvis dissentiant, ubi designandum est quid in quolibet ritu sit essentialiale, quid verò accidentale. Secundum, consecrationem esse Sacrificio essentialiam: de ea enim potissimum intelligenda Christi verba ad Apostolos: *Hoc facite in meam commemorationem*, & alia momenta, quæ capite præcedenti protulimus pro existentia Missæ Sacrificii. Sed ubi explicandum est, quo sensu consecratio habeat rationem sacrificii; quia id non fuit expresse revelatum, sed ex aliis revelatis, cum quadam obscuritate colligendum: hinc in Schola nascitur sententiarum diversitas: quæ autem sit præferenda, quaestio est, cui nunc satisfaciendum sequentibus responsionibus. Itaque

R. Primo, neque in oblatione panis & vini, neque in eorum immutatione præcise sumpta, consistit essentia Sacrificii Missæ.

Probatur: Essentia sacrificii Missæ in hujusce rei oblatione & immutatione reponi debet, quæ est sacrificii victima: atqui panis & vinum nullatenus sunt victima Sacrificii Missæ: ergo in eorum oblatione & immutatione nullatenus reponi debet essentia Sacrificii Missæ.

Major certa est; quia tota ratio & essentia Sacrificii consistit in oblatione, & immutatione victimæ.

Minor probatur tum ex Scriptura, 1. Cor. 5. *Pascha nostrum immolatus est Christus*, quod extendendum ad Sacrificium incruentum docent S. Chrysostomus, Beda, & alii in cap. 22. Lucæ ad illa verba, *hoc est corpus meum, quod pro vobis datur*: tum ex Conc. Trid. sess. 22. cap. 2. *in divino hoc Sacrificio idem ille Christus continetur, & incruente immolatur*. Tum ex sanctis Patribus, S. Ambrosio c. 1. Lucæ, *cum sanctificamus, Christus adest, Christus immolatur*: S. Gregorio Nysseno orat. 1. Paschali, *arcano Sacrificii modo idem est Sacerdos & Agnus*. Tum denique quia vel panis & vinum essent tota sacrificii victima, seu hostia, vel pars illius: atqui neutrum dici potest. Non primum, tum quia certum est ex dictis Christum esse Sacrificii victimam: tum quia Sacrificium Religionis Christianæ non esset præstantius Sacrificiis veteris legis, in quibus Deo offerebantur agni & boves, qui sunt aliquid præstantius pane & vino. Non secundum, quia sancti Patres, ut Chrysostomus hom. 7. in Epistola ad Hebræos, & Augustinus Epistola 120. docent sacrificii cruenti & incruenti esse eandem hostiam: atqui panis & vinum non sunt in Cruce oblata, nec immolata: Ergo.

Nunquid saltem species panis & vini pertinent ad hostiam Sacrificii Missæ?

R. Pertinent per modum conditionis, ut scilicet sit victima sensibilis, & offeratur secundum ordinem Melchisedech, hoc est, sub symbolis panis & vini, non verò per modum partis; quia ex dictis Christus est tota sacrificii victima.

Dices, species panis & vini ex dictis in prima parte, pertinent ad rationem Sacramenti: ergo ad rationem Sacrificii.

Nego

Nego conseq. Disparitas est, quod Sacramentum essentialiter est signum sensibile gratiæ producendæ, & quidem per se efficaciter, si sit Sacramentum novæ legis : atqui species panis & vini, ut diximus, significant, (non quidem sine corpore & sanguine Christi) gratiam nutritivam : ergo & eam producant, ac proinde pertinent ad substantiam Sacramenti. At sacrificium non consistit nisi in oblatione & immolatione victimæ sensibilis in signum supremi Dei dominii, & nostræ ab eo dependentiæ. Porro species nec offeruntur, nec immolantur : ergo non sunt de substantia victimæ, nec proinde sacrificii : sed meræ sunt conditiones, sine quibus victima non esset sensibilis, nec sacrificium posset sensibilibus offerri. Oblatio itaque consecrationem præcedens, est solummodo præparatoria remotæ sacrificii materiæ, quam Sacerdos vocat immaculatam hostiam, quia sub illius speciebus ponendus est Christus, ad quem Sacerdos respicit.

Instabis : Illud est de essentia alicujus rei, sine quo res illa nec esse, nec concipi potest : atqui sine speciebus exterioribus victimæ, sacrificium propriè dictum nec esse, nec concipi potest : Ergo.

Distinguo maj. Sine quo tanquam parte essentiali, & primo principio ejus operationis, Conc. Sine quo tanquam conditione, sine qua non, Nego major. Namque homo nec esse, nec concipi potest sine unione animæ & corporis. Et tamen illa unio non est pars naturæ & essentiæ hominis ; quia unio non est in homine primum principium ejus operationum : porro nec accidentia agni in veteri lege, nec species panis & vini in nova censerunt consecratio,

in qua consistit supremus Dei cultus : quod evidentius cernitur in speciebus Eucharisticis, quæ nec sunt pars victimæ, nec offeruntur, nec ulla-tenus immutantur.

R. Secundò, communio Sacerdotis non est pars essentialis sacrificii Missæ, sed solum integrans.

Prima pars probatur, tum quia ex dictis cap. præcedenti, certum est Christum Dominum obtulisse sacrificium in ultima cœna: at non ita certum est ipsum sacramentaliter communicasse, quamvis communis sit sententia quòd fuerit in illa cœna cibus & conviva: tum quia actio sacrificativa est propria Sacerdotis: atqui communio talis non est; nam & laici communicant, & Diaconi tanquam Ministri extraordinarii Eucharistiam distribuunt: ergo.

Dices: Ad sacrificium necesse est ut Sacerdos de victima participet. Hinc dicitur cap. *Relatum*, de consecr. dist. 2. *quale erit sacrificium, cuius neque ipse sacrificans particeps esse dignoscitur?* Et S. Augustinus lib. 10. de Civit. Dei cap. 5. docet sacrificium Christianorum esse manducare panem.

Nego antec. Nam holocaustum erat apud Judæos præstantissimum sacrificium, cum tamen hostia integra igne absumeretur. Ex cap. autem *Relatum*, ad summum colligitur communionem esse integram sacrificii partem; unde potuit dici à S. Augustino sacrificium Christianorum.

Instabis 1. Sacrificium Missæ est holocaustum: ergo hostia in eo totaliter debet consumi. Hoc autem non fit, nisi in communione: Ergo.

Respondeo 1. Alius contra sic concluderet. In holocausto nulla pars victimæ cedebat in usum Sacerdotis: ergo in Sacrificio Missæ Sacerdos non debet hostiam sumere.

Respon-

Respondeo 2. Distinguendo anteced. Holocaustum, secundum etymologiam & vim nominis Græci, quod significat totalem combustionem, item secundum ritum Aaronicum, est totalis victimæ consumptio, Conc. Secundum acceptionem & usum nominis, Nego antecedens: Namque sacrificium crucis fuit perfectum holocaustum, quamvis in eo corpus Christi non fuerit penitus igne consumptum. In eo itaque holocaustum præcisè distinguitur ab aliis sacrificiis, quod offeratur in signum supremæ Dei Majestatis & dominationis, perfectæque ab ea nostræ dependentiæ: alia vero sacrificia sint ad colenda ejus attributa, scilicet misericordiam, seu beneficentiam, justitiam, & bonitatem. Beneficentiæ respondet sacrificium Eucharisticum: justitiæ placandæ propitiatorium: bonitati à qua beatitudinem speramus, impetratorium. Hæc omnia Religionis officia perfectè implentur per sacrificium cruentum & incruentum novi Sacerdotis, qui surrexit secundum ordinem Melchisedech. Ex quo sequitur Sacrificium Eucharistiæ complecti quatuor species distinctorum sacrificiorum apud Judæos, esseque holocaustum seu latreuticum, Eucharisticum, propitiatorium, & impetratorium, ut observat sanctus Augustinus lib. 17. de Civit. cap. 20. ubi sic scribit: *Id Sacrificium successit omnibus illis sacrificiis veteris Testamenti, quæ immolabantur in umbra futuri, propter quod etiam vocem illam ejusdem Mediatoris agnoscimus: Sacrificium & oblationem noluisti: Corpus autem perfecisti mihi: quia pro illis omnibus sacrificiis & oblationibus corpus ejus offertur, & participantibus ministratur.* Hinc à Trident. Concil. sess. 22. cap. 1. dicitur omnium sacrificiorum naturæ & Legis consummatio, & perfectio.

Instabis 2. Post consecrationem fit commemoratio, seu oblatio pro defunctis. Ergo tunc nondum perfectum est sacrificium, sed solum inchoatum.

Distinguo conseq. Nondum perfectum integraliter, Transeat: Nondum perfectum essentialiter, Nego conseq. Namque fit commemoratio æque pro vivis ac defunctis; & ante consecrationem, & post consecrationem. Omnes igitur illæ orationes vim habent tantum ex opere operantis, & per modum impetrationis; consecratio vero ex opere operato.

Quod objicitur, solam communionem repræsentare sepulturam Domini, ac proinde essentialem esse partem sacrificii, nullius est momenti; nam sepultura nullatenus fuit pars sacrificii cruenti. Unde concessio antecedit. Neganda est conseq.

Secunda pars responsionis, nempe communionem pertinere ad integritatem sacrificii, probatur, quia in veteri lege sacrificia ab holocausto distincta, quæ pacifica dicebantur, sic fuerunt à Deo instituta, ut offerentes deberent fieri hostiæ participes. Quodd autem Christus Dominus tale instituerit suum incruentum sacrificium, patet tum ex verbis ipsius, *hoc facite in meam commemorationem*, quæ Apostolus I. Cor. II. extendit ad communionem: tum ex Traditione Ecclesiæ, quæ vult, ut, si contingat celebrantem repentino morbo corripì ante sumptionem utriusque speciei, alius substituatur Sacerdos, etiam non jejunos, si alter desit, qui utramque speciem sumat, ut perficiatur sacrificium, ait S. Thomas quæst. 83. art. 3. ad 6. quod arguit communionem celebrantis non solum esse præcepti divini, sed etiam pertinere ad integritatem sacrificii; nam

nam ad administrandum viaticum, quod est præcepti divini, in periculo mortis, Ecclesia non permittit Sacerdotem non jejunum conficere. Hinc capite *Comperimus*, de consecratione distinct. 2. dicitur immane esse sacrilegium, si celebrans utramque non sumat speciem. Et capite *Relatum*, quale erit sacrificium, cujus neque sacrificans particeps esse dignoscitur? Quæ verba innuunt celebrantem alterius sacrificii hostiam sumere non posse, servata, quam recens obtulit: quod si appareret veneno infecta, monent Rubricæ aliam esse consecrandam. Propterea novis Sacerdotibus, qui in die Ordinationis suæ cum Episcopo concelebrant, communio juxta Pontificale distribui debet ex præsentis sacrificio, non ex pyxide, in qua asservantur hostiæ olim consecratæ.

Fideles, qui præsentibus adsunt Missæ Sacrificio, tenentur jure divino oblationis participes fieri? namque & illi offerunt per Sacerdotem, tanquam per Ministrum publicum.

R. Affirmant Lutherus & ejus asseclæ, probantque 1. ex Scriptura Lucæ 22. ait Dominus, *hoc facite in meam commemorationem*: atqui distribuit astantibus, ne quidem Juda excepto: Ergo. Unde Apostolus 1. Corinth. 11. reprehendens Corinthios, qui non communiter Cœnam celebrabant, jam, inquit, non est Dominicam Cœnam manducare. Hic certè locus, ait Kemnitius, tanquam fulmen proster nit privatas Pontificiorum Missas, in quibus solus Sacerdos celebrans sacramentaliter communicat. 2. Ex S. Chrysostomo, qui homil. 3. in epist. ad Ephes. Fideles, qui mysteriorum non sunt participes, increpat his gravissimis verbis: *Quisquis mysteriorum consors non est, impudens & improbus astat . . .*

annon satius fuerit, eum qui talis est, prorsus non comparuisse?

Verum contra ejusmodi fulmina, non ex Scripturis, sed è Kemnitii cerebro emissa veritas Catholica stat inconcussa, nempe Fdeles Missæ assistentes, non teneri præcepto Divino sacramentaliter communicare; nec proinde illicitas esse Missas, in quibus solus Sacerdos sit hostiæ sacramentaliter particeps, quod ultimum fide credendum sanxit Concil. Trident. can. 8. sess. 22. his verbis: *Si quis dixerit, Missas in quibus solus Sacerdos sacramentaliter communicat, illicitas esse, ideoque abrogandas; anathema sit.*

Probatur. Præceptum divinum extat vel in Scripturis, vel in Traditione divina: atqui præceptum, de quo agitur, neque in Scripturis, neque in Traditione extat: ergo merè fictitium est.

Minor probatur,

Quoad Scripturas, siquidem nullam hætenus proferre potuerunt Adversarii. Namque, ut demus illis Lucæ 22. præcipi Apostolis, & eorum in Sacerdotio successoribus, ex victima non solum comedere, sed etiam aliis distribuere, an propterea ministrabunt indignis contra Domini præceptum Matth. 7. *Nolite dare Sanctam canibus,* vel etiam (si S. Hilario credamus,) contra Domini exemplum, qui Judam proditorem ad convivium Eucharisticum non admisit? Scio alios Patres contrarium docere: saltem habemus sanctum Hilarium, (cujus scripta inoffenso pede percurri posse testatur Hieronymus,) non existimasse sacrificium illicitè offerri, nisi astantes sacramentaliter communicent. Quid si nolint communicare? an ex illo Lucæ textu Sacerdotes à sacrificio debent absti-

abstinere? Ridicula est illa consequentia. Ad summum colligere licet Sacerdotum esse hortari & urgere Fideles, ut altaris fiant participes, quod hodie præstant Pastores verbis iisdem, quibus olim S. Chrysostomus ab Adversariis laudatus. Sed in hypothese quòd non audiuntur, non cessant offerre, sicut nec Adversarii probare præsumunt S. Chrysostomum cessasse: *Rogo vos*, inquit, *non ut non adsitis, sed ut præsentie & habitu vos reddatis dignos*; cum vix semel aut bis per annum communicarent, ut ipse advertit.

Textus Apostoli, quo ambitiosè gloriatur Kemnitius, nullatenus attingit Eucharistiam, sed cœnam communem, in qua omnes fideles simul accumbent pauperes cum divitibus, atque idèò Agape, hoc est, convivium charitatis nuncupabatur. Cum autem Corinthii divites seorsim laute epularentur, exclusis pauperibus, hunc abusum reprehendit Apostolus, dicitque, jam non esse Dominicam Cœnam manducare, id est, Dominum imitari, qui præter cœnam legalem & Eucharisticam, aliam communem cum Apostolis celebravit. Hic sensus planus est, & legenti obvi-
vius. Unde videas quàm impudenter Pseudo-Reformati Scripturis abutantur ad incautos decipiendos.

Quoad Traditionem, eadem minor probatur, non solum negativè, sed etiam positivè; multa siquidem tradunt sancti Patres, & Concilia, quæ fulciunt doctrinam Catholicam, nihil verò quod patrocinetur Pseudo-Reformatorum errori. Canon 9. eorum, qui sub nomine Apostolorum circumferuntur, statuit Clericos excommunicandos, ita tamen ut qui facta oblatione, non communi-
caverint,

caverint, si causam non communicandi dixerint, quæ rationabilis fuerit, veniam consequantur. Ex S. Chrysostomo hom. 67. ad populum, Diaconus Communionis tempore, *terribili clamore, quasi quidam præco, manum in altum tollens, clamabat, Sancta Sanctis; si quis non sanctus, non accedat.* Ergo non omnes urgebantur ad Communionem. Concilium Agathense anno 511. vult omnes Fideles adesse Missæ Sacrificio singulis diebus Dominicis, communicare verò ter in anno, scilicet in Natali Domini, Paschate, & Pentecoste. Denique semper licitum fuit pluribus interesse Sacris eodem die, atque in eam rem idem Sacerdos in Natali Domini ter Missarum solemnia celebrabat, ut testatur S. Gregorius, qui sedit sexto sæculo; prohibitum vero fuit laicis sæpius eodem die Sacramentum sumere. Ergo ex Traditione constat Fideles, qui in Ecclesiam conveniunt, præcepto divino non teneri Eucharistiam percipere, nec illicitas esse Missas, in quibus solus Sacerdos sacramentaliter communicat.

Cæterum ponderanda sunt hæc Concilii Tridentini verba cit. sess. 22. cap. 6. *Optaret quidem sacrosancta Synodus, ut in singulis Missis fideles astantes, non solum spirituali affectu, sed sacramentali etiam Eucharistiæ perceptione communicarent, quo ad eos sanctissimi huius Sacrificii fructus uberius proveniret.* Hoc Ecclesiæ votum Eucharistiæ institutioni convenire docuimus cap. 21. primæ partis huius Tractatus. Sed & illud prætereundum non est, Concilium ibi supponere fideles astantes teneri saltem spiritualiter communicare, hoc est; amore sic affici ad Christum, ut in illo maneant, & propter illum vivant, quemadmodum supra dictum est.

Enim.

Enimverò ad sacrificium non conveniunt Fideles, quasi ad spectaculum, sed ut suas partes agant. Quæ autem debet esse eorum actio, nisi ut per Sacerdotem, tanquam Ministrum publicum, Christum offerant sub speciebus panis & vini? Porro sacrificium visibile signum est veri sacrificii, ex S. Augustino supra, hoc est, sacrificii interioris, quo anima mundo moritur, ut Deo vivat. Fideles ergo fictè visibile & tremendum Religionis Christianæ sacrificium offerunt, nisi per amorem una hostia cum Christo effecti se se Deo spiritualiter immolent. Hæc est necessaria sacrificii integritas, & spiritualis communio. Sed adhuc insoluta manet proposita quæstio, in qua Missæ parte sita sit essentia sacrificii. Quare

R. Tertiò, tota Sacrificii incruenti essentia in sola consecratione consistit. Hæc responsio sequitur ex præcedentibus; namque ex dictis sacrificii essentia non consistit in aliis Missæ partibus: ergo tota est in consecratione. Sed ulterius

Probatur 1. ex sanctis Patribus, S. Irenæo lib. 4. cap. 32. *Christus dicendo, hoc est, corpus meum, docuit novam novi Testamenti oblationem.* S. Chrysostomo hom. de proditiōe Judæ, *Verbum Domini, hoc est corpus meum, usque ad mundi consummationem præstat sacrificio firmitatem.* S. Gregorio lib. 4. Dial. *Quis nescit ipsa immolationis hora ad vocem Sacerdotis cælum aperiri?*

Probatur 2. ratione: in ea actione perficitur sacrificium, quæ est Sacerdotis propria, in qua & Sacerdos agit nomine Christi, qui est principalis offerens, ex Concilio Tridentino sess. 22. cap. 2. & fit repræsentatio cruenti sacrificii: atqui talis est consecratio; nam ex omnibus Missæ partibus

tibus sola jure divino est propria Sacerdotis, in ea sola Sacerdos, tanquam Christi minister, loquitur in ejus persona, *Hoc est corpus meum*, *Hic est calix sanguinis mei*; quæ verba tanquam à Christo proferri intelliguntur: in ea denique sola passio repræsentatur: ergo in ea sola sita est sacrificii essentia.

Utrum verò consecratio utriusque speciei ad essentiam sacrificii pertineat? non conveniunt Theologi.

Negant alii, nitunturque 1. auctoritate sancti Bernardi, qui in epist. 69. respondet Sacerdotem, qui post consecrationem in decursu Liturgiæ, advertit aquam solam infusam fuisse in calice, non teneri infundere vinum, & consecrare. 2. Quia vera est consecratio panis sine consecratione calicis: atqui in vera consecratione panis Christus offertur; nam ponitur in altari tanquam victima, immolatur quoque, & cruentum Crucis sacrificium repræsentatur, cum vi verborum corpus ejus sistatur sine sanguine, ac proinde mortuo modo, & quale erat, cum in Cruce expiravit. Ergo consecratio calicis non pertinet ad essentiam sacrificii, sed tantum ad ejus integritatem.

Communior tamen sententia est consecrationem utriusque speciei esse de sacrificii essentia: tum quia utramque Christus instituit: tum quia sicut in Baptismo debet fieri expressa Trinitatis professio; quamvis baptizando in nomine Dei aut Jesu Christi, tres personæ intelligantur; sic in sacrificio Missæ requiritur clarissima Passionis repræsentatio, qualis non est si repræsentetur solum Christi corpus exangue. Nec mirum quod S. Bernardus sic responderit, cum res nondum esset elucidata

cidata ab Ecclesia, quæ tandem præscripsit in illa hypothese calicem, infuso vino, esse consecrandum. Quod verò refert Vollandus, Innocentium VIII. cum Norvegis dispensasse, ut calix absque vino consecraretur, fictitium est; qualis enim consecratio calicis absque vino?

CAPUT VI.

Quomodo in consecratione intelligitur veri Sacrificii essentia?

Duo ad sacrificii propriè dicti essentiam requiruntur, oblatio scilicet, & immolatio victimæ sensibilis.

Certum est apud omnes Theologos in consecratione esse veram oblationem; quia eo ipso victima Deo offertur & consecratur, quod ad altare immolanda adducitur. Atqui per consecrationem Christus Dominus, tamquam verus Agnus & victima per species panis & vini sensibilis sistitur in altari: Ergo per consecrationem verè offertur.

Sed non conveniunt Theologi, qua ratione dici possit Christum in consecratione immolari. Etenim *jam non moritur; mors illi ultra non dominabitur*, Rom. 6.

Alii benemulti docent Christum hoc ipso immolari, non quidem cruentè, sed mysticè, quo vi verborum consecrationis corpus ejus sine sanguine ponitur sub speciebus panis, & sanguis sine corpore sub speciebus vini, licèt per concomitantiam utrumque sub qualibet specie actu & de facto contineatur, ut supra demonstravimus; namque ajunt illi, in hypothese quòd durante le-
ge

ge veteri, Agnus per Sacerdotem accepisset vulnus lethale, & per se efficax ad fundendum ejus sanguinem, verè immolatus fuisset Agnus, quamvis Deus per miraculum sanguinem in venis hostiæ continuisset, vitamque ejus conservasset: atqui ita res se habet in hoc mysterio; nam Sacerdos per verba consecrationis tanquam per gladium spirituales separet sanguinem à corpore & vicissim (verba enim id tantum operantur, quod significant) licèt Deus per suam omnipotentiam impediatur, ne ista separatio actu & de facto contingat: ergo in consecratione vera fit immolatio, sed mystica.

Nec dicas, consecrationem esse actionem productivam, seu adductivam corporis & sanguinis Christi Domini, ac proinde non esse destructivam, cum contradictorium sit eandem actionem esse productivam simul & destructivam. Distinguendum enim est consequens. Ergo non est destructiva rei jam præexistentis, Conc. Rei ponendæ, Nego conseq. Nam ex Tertulliano, homicidii festinatio est prohibere nasci, id est, abortum procurare. Ergo hoc ipso, quo Sacerdos, quantum in se est, ponit corpus exangue, censetur destruere aliquod esse quod erat ponendum, nempe corpus vivens.

Hic explicandi modus exhibet quidem veram immolationem mysticam, quæ sufficit ad sacrificium propriè dictum. Sed aliis Theologis videtur subtilior, nec satis fundata in Scriptura, aut Traditione, ut dicatur Christum in ea reposuisse incruenti essentiam Sacrificii. Quare

Altera sententia negat ullam fieri immolationem in consecratione, sed contendit in ea offerri,
sub

sub speciebus panis & vini Christum Dominum jam in Cruce immolatum, idque sufficere ad perfectam rationem sacrificii commemorativi. Ut autem probetur illa sententia,

Advertendum est, cum sacrificium non habeat, nisi esse morale, ad ejus essentiam & existentiam non requiri, ut partes ejus, scil. oblatio & immolatio physice conjungantur; sed sufficere unionem moralem, quæ fit per intentionem offerentis. Hoc cernere est in sacrificiis veteris legis, in quibus mactatio aliquo tempore interdum præcedebat oblationem, alias subsequēbatur; nam Levitici 16. duo hirci ad expianda populi peccata assumuntur, quorum unus primo loco mactatur, dehinc Summus Pontifex oblaturus ejus sanguinem, ingreditur Sanctuarium. Alter verò prius offertur vivens, tum emittitur periturus in deserto. Similiter Christus Dominus ingrediens mundum, seipsum Deo obtulit his Psalmistæ verbis: *Quia hostias . . . & holocausta pro peccato noluisti . . . tunc dixi, ecce venio*, Hebr. c. 10. In ultima quoque cæna, oblato agno legali, seipsum verum Agnum sub speciebus panis & vini Deo exhibuit, in Passione paulò post immolandum, ac denique post Resurrectionem, servatis plagarum cicatricibus, assistens Summus Pontifex, per proprium Sanguinem introivit semel in Sancta; id est, in cælum, Hebr. 9. unamque pro peccatis offerens hostiam, sedet in sempiternum in dextera Dei, Heb. 10. vers. 12. Ex his autem sic argumentari licet.

In Sanctuario per Sacerdotes Aaronicos nulla fiebat immolatio, & nihilominus in figura Sacrificii Christianorum verum offerebatur Sacrificium, quia oblatio sanguinis victimæ præsupponebat, &

sensibiliter repræsentabat immolationem jam præteritam, & extra Sanctuarium factam : ergo ut apud Christianos veritas figuræ respondeat, quærenda non est in consecratione nova immolatio, sed sufficit oblatio victimæ, jam in Cruce immolatæ, & in altari sensibiliter positæ sub separatis speciebus panis & vini, in quibus repræsentatur effusio & separatio sanguinis à corpore, quæ in reali mactatione Agni immaculati præcessit.

Præterea Christus Dominus, ex dictis, tam in Ecclesia, quam in cælo manet in æternum Sacerdos secundum ordinem Melchisedech; quatenus utrobique non cessabit seipsum offerre. Ergo cum in cælo, quò ingressus est in proprio sanguine, (quemadmodum Aaron ingrediebatur Sanctuarium in sanguine alieno,) non iterum imolet seipsum, sequitur ad officium hujusce Sacerdotii necesse non esse, ut semper fiat nova immolatio; sed satis esse, si victima semel in cruce mactata, semper offeratur, sive in cælo, sive in terra.

Confirmatur : Sacrificium crucis, & sacrificium altaris sunt unum & idem sacrificium, differuntque solum in modo offerendi : atqui non esset unum & idem sacrificium, nisi esset eadem immolatio : ergo in sacrificio Missæ nova non est immolatio.

Major probatur tum ex sanctis Patribus, tum ex Concilio Tridentino.

S. Cyprianus epistol. 63. sic scribit : *Passionis ejus mentionem in sacrificiis omnibus facimus : Passio enim Domini, sacrificium quod offerimus.*

S. Chrysostomus homil. 17. in Epist. ad Hebr. probat sacrificium Christianorum non esse diversum

sum à sacrificio crucis, quemadmodum Judæorum sacrificia; sed esse planè idem.

S. Ambrosius in Psal. 38. *Et si, inquit, nunc Christus non videtur offerre, tamen ipse offertur in terris, quando Christi corpus offertur: imò ipse offerre manifestatur in nobis, cujus sermo sanctificat sacrificium, quod offertur.*

Concil. Tridentinum sess. 22. c. 2. sic docet: *Una . . . eademque est hostia, idem nunc offerens Sacerdotum ministerio, qui seipsum tunc in cruce obtulit, sola offerendi ratione diversa: non ait mactatione, sed oblatione diversa.*

Minor declaratur. Ad sacrificium propriè dictum, tria requiruntur ex dictis. Primum est mactatio victimæ sensibilis: Secundum, oblatio ejus exterior: Tertium, oblatio interior in offerente. Tertium illud requiritur quidem, ut sacrificium exterius sit acceptabile, sed non pertinet ad essentiam sacrificii: deestque nonnunquam ex parte Ministri, qui est minùs principalis offerens, sed semper adest, & quidem perfectissimè in Christo principali offerente. Unde Missæ sacrificium per se placet, & est semper Deo acceptissimum, *nulla indignitate, aut malitia offerentium inquinari potest*, ex Conc. Tridentino cit. sess. c. 1. At duo priora adeò necessaria sunt ad rationem Sacrificii propriè dicti, ut sine alterutro stare non possit; sed primum & præcipuum locum obtinet immolatio victimæ: tum quia est differentia essentialis, per quam sacrificium essentialiter distinguitur ab aliis oblationibus: tum quia per eam præcisè significatur supremum Dei dominium, nostraque ab eo omnimoda dependentia, & eatenus est signum determinatum supremi cultus, qui latria dicitur.

Porro ex iis deducitur unitatem sacrificii repetendam, non ex unitate oblationis exterioris, quæ pluries in eodem sacrificio potest iterari, sed ex unitate immolationis ejusdem victimæ; namque si eadem victima semel mactata divinitus revivisceret, ut iterum mactaretur, in illa hypothese non esset unum sacrificium, sed duplex; quia esset duplex mactatio, & duplex signum exterius nostræ à Deo dependentiæ. Hinc Apostolus Hebr. 9. v. 25. & seqq. concludit Christum uno sacrificio consummasse sanctificatos, ex eo quod semel sit mortuus & mactatus, *alioquin oportebat eum frequenter pati ab origine mundi*, nempe si pluries immolandus fuisset, quemadmodum in veteri lege nova quotidie fiebat victimarum immolatio.

Dices 1. Ergo sacrificia Judæorum eadem fuerunt cum sacrificio Crucis, quod in illis exprimebatur; unde Christus dicitur Apocal. 13. Agnus occisus ab origine mundi.

Nego consequ. Quia in illis sacrificiis victimæ aliæ mactabantur in signum quidem futuri sacrificii, tum cruenti, tum incruenti.

Dices 2. ex S. August. epist. 23. *Christus semel immolatus est in seipso: in Sacramento omni die populis immolatur*. Ergo in sacrificio Missæ est alia immolatio ab immolatione Crucis.

Distinguo consequ. Alia immolatio mystica, quæ dicitur à sancto Doctore immolatio in Sacramento, hoc est, in signo, nam Sacramentum, inquit sacrum signum est, Conc. Immolatio realis ad sacrificium propriè dictum necessaria, Nego consequ. Itaque omnes Theologi agnoscunt in consecratione immolationem mysticam, sine qua
Missæ

Missæ non esset sacrificium propriè dictum, qualis qui ex præsanctificationis celebratur die Parasceves. Sed quæstio est utrùm illa immolatio mystica per se, & sine ordine ad cruentam Crucis immolationem sufficiat ad rationem veri Sacrificii. Et hoc negat posterior sententia.

CAPUT VII.

De causa finali Sacrificii Missæ.

Q. *Cum Missæ sacrificium sit idem cum sacrificio crucis, cur debuit institui?*

R. Quadruplici de causa, ut colligere est ex Conc. Tridentino sess. 22. cap. 1.

Prima ducitur à necessitate sacrificii exterioris in hominum societate, ut probavimus cap. 3.

Secunda ab imperfectione sacrificiorum legis, tum naturæ, tum scriptæ, per Religionem Christianam expungenda.

Tertia, à grata memoria, quæ inter Christianos debet esse continua passionis & mortis Redemptoris nostri.

Quarta, ab uberrimo Passionis fructu, qui per Missæ sacrificium, tanquam per canalem ad nos defluit. Gravissimæ autem ejusmodi causæ hic breviter sunt exponendæ.

Circa primam, multa diximus c. 3. ubi ex professo demonstravimus sacrificium esse juris naturalis, ideoque veram Religionem sine eo non posse consistere. Sacrificium quidem Crucis tanquam proprium sibi vindicat Religio Christiana, utpotè quæ ex latere novi Adam in cruce dormientiseducta sit; nova viventium verè mater. Sed

præter illud sacrificium, quod redemptionis merito nuncupatur, cum in eo Mediator Dei & hominum Christus Jesus pretium solverit plusquam sufficiens ad redimendum genus humanum; necesse fuit institui sacrificium Religionis, in quo fidelium pietas sese exerceret, exteriusque profiteretur patriæ cultum erga supremam Dei Majestatem, aliasque divinas perfectiones, ficut fusè exposuimus cit. cap.

Altera causa Missæ instituendæ, ab excellentia Christianæ Religionis ducta, sic declaratur. Quamdiu Christus Dominus egit in terris, id sibi potissimum proposuit: *Ut exhiberet ipse sibi gloriosam Ecclesiam; quæ est corpus ipsius, & plenitudo ejus*, Ephes. cap. 5. v. 27. & c. 1. v. 23. Atqui Religionis excellentia petitur ex perfectione cultus, quæ in ea exhibetur Deo. Hinc rejecta est Synagoga, propter inutilitatem sacrificiorum ejus; *Reprobatio quidem fit præcedentis mandati propter infirmitatem ejus, & inutilitatem*, Hebr. 7. Idipsum prædixerat Malachias cap. 1. *Non est mihi voluntas in vobis, dicit Dominus exercituum, & munus non suscipiam de manu vestra; ab ortu enim Solis usque ad occasum, magnum est nomen meum in gentibus, & in omni loco sacrificatur, & offertur nomini meo oblatio munda.* Si ergo, subsumit Apostolus cit. cap. 7. *consummatio per Sacerdotium leviticum erat quid adhuc necessarium fuit secundum ordinem Melchisedech alium surgere Sacerdotem? Translato enim Sacerdotio necesse est, ut & legis translatio fiat.* Finis siquidem legis est cultus Dei, qui oblatione sacrificii consummatur. Ergo summa Christianæ Religionis excellentia requirit sacrificium præstantissimum, & superma Dei Majestate dignum.

Jam

Jam verò honos & cultus æstimantur, tum ex dignitate offerentis, tum ex magnitudine rei oblatæ: atqui omnes gentes, quasi non sint, sic sunt coram eo, & quasi nihilum, Isaïæ 40. v. 17. à fortiori quæcunque possunt offerre, cùm illa sint ipsis inferiora. Ergo necesse fuit ut surgeret Sacerdos secundum ordinem Melchisedech, qui utrique defectui occurrit per sacrificium Missæ, in quo ipse est offerens & hostia. Sed audiat S. Augustinus in Psalm. 109. ubi sic loquitur: *Quid inveniret homo quod daret? mundam victimam? quid mundum potest offerre peccator? ò inique! ò impie! quidquid attuleris, immundum est. Et si aliquid mundum pro te offerendum est; quære apud te, non invenies; quære extra te quod offeras; non delectatur arietibus, nec hircis, nec tauris. Offerat ergo seipsum mundus Sacerdos (Christus Dominus) ut mundet hoc quod Deus fecit. Felix victima, vera victima, munda victima, hostia immaculata.* De offerente verò talem victimam scribit lib. 10. de Civ. Dei cap. 20. Sacerdos, inquit, est ipse offerens, ipse & oblatio, cuius rei Sacramentum quotidianum esse voluit Ecclesiæ sacrificium, cùm ipsius corporis ipse sit caput, & ipsius capit is ipsa sit caput, tam ipsa per ipsum, quàm ipse per ipsam suetus offerri. Nimirum, quia secundum, doctrinam sancti Doctoris, quam in eo libro fusius explicat, sacrificium exterius est signum sacrificii interioris; ideoque fideles offerendo exterius sacrificium corporis & sanguinis Domini, seipsos cum Christo offerunt, tanquam unam & totalem hostiam Deo dignam, utpote infinitam, & quidem per ipsum, & in ipso, quia est principalis offerens etiam infinitè dignus.

Religionis itaque sacrificium in eo differt à redemptionis seu Crucis sacrificio, quod in Cruce

caput, hoc est, Christus sine Ecclesia, quæ est, corpus & plenitudo ejus, se solum obtulerit; in societate verò Christianorum totus ipse, caput, simul & corpus, offeratur conjunctim per ipsum Sacerdotem magnum, & per fideles qui tanquam ejus membra participes sunt regalis & spiritualis ejus Sacerdotii, ut si holocaustum sit ex omni parte integrum, nihilque totalis victimæ remaneat, quod non igne ardentissimi amoris incendatur.

Hujusce admirabilis Mysterii symbolum S. Cyprianus epist. 63. agnoscit in mixtione aquæ cum vino sacrificii, namque aqua ex Apoc. 17. populus est, & vinum sanguis Domini. Aqua sola est plebs sine Christo, neutra separatim debet esse materia sacrificii; sed mixtio utriusque sit universale Ecclesiæ sacrificium Deo acceptissimum.

Tertiam Missæ instituendæ causam, nempe ut grato animo fiat commemoratio Passionis, & aliorum Dei beneficiorum, commendant tum Scripturæ, tum sancti Patres: *Hoc facite*, ait Dominus Luc. 22. *in meam commemorationem*, juxta quod scriptum est Eccl. 29. *gratiam fidejussoris ne obliviscaris, dedit enim pro te animam suam*. Et Apostolus I. Corinth. 11. *Quotiescunque enim manducabitis panem hunc & calicem bibetis, mortem Domini annuntiabitis, donec veniat*. Sanctus Augustinus quoque libro de Spiritu & litt. cap. 11. *Cultus Dei*, ait, *in hoc maxime constitutus est; ut anima Deo non sit ingrata*. Quid vero retribuemus Domino pro infinitis donis, quæ retribuit nobis? Gratitude enim requirit, ut tantum referatur, quantum acceptum est. Per ipsum ergo offerimus hostiam
laudis

laudis semper Deo, Hebr. 13. vers. 15. nam ex S. Irenæo lib. 4. cap. 32. ne ingrati videremur, Christus instituit hujus sacrificii oblationem, in qua tantum rependimus, quantum accepimus, Christum scilicet, & nos totos cum ipso: *Quotidie immolatur in Ecclesia*, inquit sanctus Augustinus libro contra Judæos cap. 67. *quia in gratiarum actione perpetuo manere debemus.* Unde enim Deo majores gratiæ sunt exhibendæ, quam per Christum Dominum nostrum? *quod faciunt fideles Ecclesiæ sacrificio*, idem in Psal. 49. Hinc Missæ sacrificium maxime sibi vindicat nomen Eucharisticum ex omnibus, quæ ipsi conveniunt; & Sacerdos stans ad altare, alta voce graviter monet fideles his verbis, *Gratias agamus Domino Deo nostro.* Post hanc vero astantium responsionem, *dignum & justum est*, subsumit, *Verè dignum & justum est*, &c.

Quarta hujus sacrificii causa, ut scil. auxilia & dona, quæcunque Mediator noster per mortem suam promeruit, impetrentur, constat ex omnibus liturgiis antiquissimis, ex Apologia 2. Sancti Justini, ex Apologetico Tertulliani, & ex aliis scriptis SS. Patrum, ubi legimus Ecclesiam semper consuevisse offerre illud sacrificium cum obsecrationibus, postulationibus, gratiarum actionibus pro omnibus hominibus, juxta Apostoli præscriptum 1. ad Tim. cap. 2.

Enimverò si absque sacrificii cruenti injuria, Christus Summus Sacerdos secundum ordinem Melchisedech, cælum ingressus est in proprio sanguine ut appareat vultui Dei, interpelletque pro nobis, Hebr. cap. 9. vers. 24. & c. 7. v. 25. dubitandum non est, quin idipsum præstet in hoc sacrificio, quod celebratur in memoriam Passionis ejus.

Dices : Per Sacramenta fructus Passionis Christi nobis sufficienter applicatur : Ergo frustra sacrificium.

Nego antec. Tum quia Sacramenta aliis non profunt, quàm suscipientibus : tum quia adultos non disponunt, sed supponunt dispositos, aliàs non illos sanctificant, sed inquinant. At sacrificium pro omnibus offertur, omnibus prodesse potest, etiam infidelibus, & peccatoribus obstinatis, ut dicetur cap. seq. Ex his

Sequitur 1. Religionem Christianam per Missæ sacrificium supra cæteras eminere, quantum veritas figuram, corpus umbram præcellit.

Sequitur 2. Quæ debeat esse fidelium devotio, cum ad Missæ sacrificium conveniunt, quæve mentis applicatio, nempe ut charitate Christo uniti, una totalis hostia efficiantur, atque per ipsum & cum ipso pari affectu se totos Deo immolent in testimonium suæ dependentiæ, gratitudinis, & pœnitentiæ pro peccatis ; cum enim sacrificium exterius sit signum sacrificii interioris, falsum & mendax darent signum, nisi hoc in se sentirent quod in Christo Jesu, iisdemque erga Deum moverentur affectibus, ut observat Petrus Blesensis epist. ad Richard. Episcopum : *Sacerdotem, inquit, hoc sentire oportet, quod in Christo Jesu, non solum ut se per humilitatem exinaniat, sed ut crucifixionem Domini repræsentans, stigmata ejus portet in corpore suo, & in ara cordis seipsum Domino crucifigat. Verbum Salomonis est, sedisti ad mensam divitis, scito, quia eadem te præparare oportet. Et in Levitico Sacerdos pellem hostiæ retinet ; quia ordo Sacerdotalis postulat, ut dum in mensa altaris hostiam immolat salutarem, quadam contritionis cruce hostiæ se conformet,*

met, ejus veluti pelle indutus. Quod autem de Sacerdotibus scribit, ad fideles extendendum est, qui una cum ipso sacrificium offerunt. Quam ergo derisoria est eorum cæremonia, qui cum fastu & arrogantia interfunt Missæ Sacrificio! quam intempestivus eorum risus, qui confabulantur eo tempore, quo per hostiam laudis, & propitiationis profitentur perfectam suam servitutem, animi dejectionem, usque ad mortem, & intimum cordis dolorem ob peccata præterita! Nam qui cuncta, quæ sunt mundi, deserunt, inquit S. Gregorius homil. 12. in Ezech. & totam mentem igne divini amoris accendunt, hi nimirum omnipotenti Domino sacrificium & holocaustum fiunt.

Sed nesciunt plurimi quid faciant, negligentia & culpa Pastorum, qui ovibus suis Mysterium illud, in quo præcipua & frequentior eorum debet esse actio, non aperiunt contra expressum Concilii Tridentini præceptum, his verbis conceptum, sess. 22. cap. 8. *Mandat sancta Synodus Pastoribus & singulis curam animarum gerentibus, ut . . . inter Missarum celebrationem . . . inter cætera, sanctissimi hujus sacrificii mysterium aliquod declarent, diebus præsertim Dominicis & Festis.*

CAPUT VIII.

Quinam sunt Missæ Sacrificii effectus?

Concilium Trid. sess. 22. cap. 2. hæc de virtute & efficacia Missæ sacrificii docet. *Non solum, inquit, pro fidelium vivorum peccatis, pœnis, satisfactionibus, & aliis necessitatibus, sed & pro defunctis in Christo, nondum ad plenum purgatis, rite:*
juxta

juxta Apostolorum Traditionem, offertur. Quæ verba, & aliis necessitatibus, cum sint indefinita, ad omnia, quæ ad salutem possunt esse utilia, extendi debent. Quare ad propositam quæstionem

R. Primo, Missæ sacrificium est propitiatorium, valetque ad peccatorum veniam & satisfactionem. Propositio est de fide expresse definita can. 3. ejusdem sess. 22. *Si quis dixerit, Missæ sacrificium . . . non (esse) . . . propitiatorium . . . neque pro vivis, & defunctis, pro peccatis, pœnis, satisfactionibus, & aliis necessitatibus offerri debere; anathema sit.*

Probatur 1. ex Scriptura Hebr. 5. *omnis namque Pontifex ex hominibus assumptus, pro hominibus constituitur . . . ut offerat dona & sacrificia pro peccatis; atqui Christus Dominus est Pontifex secundum ordinem Melchisedech: ergo sacrificium, quod obtulit & offert in Ecclesia secundum ordinem Melchisedech, est pro peccatis. Hinc Matth. 26. ait, Hic est sanguis meus . . . qui pro multis effundetur in remissionem peccatorum.*

Probatur 2. ex constanti Ecclesiæ Traditione.

S. Cyrillus Jerosolymitanus catechesi 5. ait, *Christum pro peccatis nostris mactatum offeramus, & nobis eum, qui benignissimus est, propitium reddamus.*

Sanctus Ambrosius lib. 1. de offic. cap. 48. *offert Christum seipsum quasi Sacerdos, ut peccata nostra dimittat.*

S. Augustinus q. 57. in Leviticum, *in multis sacrificiis quæ pro peccatis offerebantur, unum hoc nostrum sacrificium signatur, in quo fit vera remissio peccatorum.*

Dices: ex Apostolo Hebr. 10. *voluntariè . . . peccantibus . . . jam non relinquitur pro peccatis hostia.* Ergo.

Dist.

Dist. ant. hostia alia ab ea quam Christus in cruce obtulit, Concedo : eadem, Nego ant. Porro ex dictis eadem est sacrificii cruenti & incruenti hostia, quam Sacerdos secundum ordinem Melchisedech offerre non desinit.

Instabis : si per sacrificium Missæ habeatur remissio peccatorum sine labore peccatoris pro quo offertur, frustra sunt Sacramenta Baptismi & Pœnitentiæ. Ita Kemnitius.

Distinguo, si habeatur eodem modo, Concedo : si diverso, Nego.

Quomodo ergo per Missæ sacrificium remittuntur peccata?

R. In peccato duo sunt distinguenda, scilicet reatus culpæ, & reatus pœnæ temporalis sæpe remanens, dimissa culpa.

Reatus culpæ per Sacramenta immediatè remittitur, per sacrificium vero mediatè tantum, quatenus nempe intuitu hujus sacrificii Deus largitur peccatori gratias actuales, quibus movetur ad pœnitentiam, disponiturque ad Sacramentum sive Baptismi, sive Pœnitentiæ, per quod immediatè remissionem culpæ consequitur. Duo namque reconciliationi obstant ; scilicet indignatio & ira personæ læsæ ex una parte : ex altera verò contentiosa lædentis malignitas ; quare pacis conciliandæ mediator agere debet, 1. apud personam læsam, ut placata iram deponat ; deinde apud eum qui læsit, ut culpam agnoscat, pœnitensque & supplex ad eum, quem offendit, accedat. Duo illa cumulativè præstat Mediator noster in Missæ sacrificio, 1. placat divinam justitiam per oblationem Sanguinis sui ; 2. peccatori gratiam impetrat ; quia nisi Deus misericorditer præveniat, nunquam

nunquam ad eum recurret supplex, nec à malitia recedet; quod satis non advertunt ejus Ministri, qui, ut peccatorem Deo reconcilient, vix ad Deum per preces recurrunt, cùm totum opus ab ipso pendeat; sed peccatori unicè incumbunt monitionibus & adhortationibus. Non sic Mediator noster qui prius Deum placare satagit, & eatenus sacrificium est propitiatorium. Deinde ab ipso gratias impetrat, quibus peccator moveatur ad pœnitentiam, quo sensu sacrificium est impetratorium. Et hæc juxta doctrinam Concilii Trid. sess. 22. cap. 2. *hujus quippe (sacrificii) oblatione placatus Dominus, gratiam & donum pœnitentiæ concedens, crimina, & peccata etiam ingentia dimittit*, scilicet quatenus per donum Pœnitentiæ sacrificii intuitu concessum, peccator dispositus ad Sacramenta accedit, in quo immediatè fit peccatorum remissio.

Reatus pœnæ temporalis per sacrificium immediatè solvitur saltem ex parte. Nam ex dicendis Missæ sacrificium legitimè offertur pro defunctis, qui cùm in statu merendi non sint, nihil conferunt ad illam pœnæ relaxationem. Enimverò creditor potest debitum remittere debitori etiam de eo non cogitanti, in quo differt pœnæ relaxatio à culpæ remissione, quòd hæc non possit fieri sine interiori peccatoris mutatione, & dispositione, si adultus sit; illa verò sit merè exterior condonatio.

R. Secundò. Sacrificium Missæ prodest justis ad gratiæ sanctificantis augmentum, non quidem immediatè sicut Sacramenta, sed mediatè, quatenus per illud conceduntur gratiæ actuales, per quas justis eliciunt bona opera de condigno meri-

meritoria hujus argumenti ; patet ex dictis. Nemo autem nescit gratias actuales ad bene operandum, & ad perseverandum esse auxilia.

R. Tertiò. Per sacrificium Missæ impetrantur bona temporalia, v. g. sanitas, salubris aeris temperies, in hypothesi quòd ex Dei ordinatione conferant ad salutem.

Probatur ex continua universalis Ecclesiæ praxi. *Pro infirmis*, inquit S. Chrysostomus hom. 71. in Joan. & terræ, & maris, & universi orbis fructibus, sacrificamus. S. Augustinus refert c. 8. libr. 22. de Civit. Dei, Missæ sacrificio vexationem spirituum malignorum cessasse in quibusdam ædibus.

Dices ; Christus nobis per mortem non meruit bona temporalia : atqui sacrificium Missæ ea solum nobis impetrat : quæ Christus promeruit : ergo sacrificium Missæ non impetrat bona temporalia, ac proinde frustra pro iis obtinendis videtur offerri.

Confirmatur 1. Absurdum est in eo Mysterio commoda temporalia petere, in quo communicantes Christi passionibus, & æmulantes similitudinem mortis ejus, nos totos & nostra Deo immolamus. 2. Non sine injuria tantum mysterium refertur ad res vilissimas, v. g. ad avertendam pestem animalium. 3. Ne discipuli terrena in votis haberent, quemadmodum, carnales Judæi, Magister noster eorum contemptum semper docuit, *ne solliciti sitis*, inquit *quid manducetis . . . quærite ergo primum regnum Dei, & justitiam ejus.* Matth. 6. ad quem locum S. August. libr. 2. de serm. Domini in monte, notat, Christum non addidisse, secundo loco ista temporalia quærite, ne

ne propter illa cor nostrum dividatur, & eo ardentius talia desideremus, quo non superflua, sed necessaria videntur. Hinc per panem quotidianum, quem in oratione Dominica petimus, monet S. Doctor non cibum corporalem, sed cibum spiritualem esse intelligendum.

Dist. maj. non meruit temporalia, si absolute considerentur, Concedo; neque enim mortuus est, ut homines nasceremur, aut simpliciter longævi essemus super terram, sed ut ex peccatoribus iusti & beati efficeremur: non meruit temporalia in hypothese, quòd Deus ab æterno præordinaverit per eorum usum & administrationem salvos facere credentes, Nego maj. hoc enim sensu temporalia subsunt ordini divino prædestinationis, quæ facta est in Christo. Porro fideles sive in oblatione sacrificii, sive in privatis orationibus solam beatam vitam intuentur, ut finem cui adhærent: cætera ut media, quorum alia, ut fides simpliciter necessaria sunt; alia non nisi ex Dei ordinatione; & idè in omnibus ad Deum tanquam ad omnium bonorum auctorem recurrunt, & quidem in laudem sacrificii nostri, quòd ad tam multiplices se extendat effectus. Quòd si hæc terrena non concedantur, utpotè non necessaria, nec à Deo ordinata ad salutem, non molestè ferunt fideles, imo gratulantur sibi datum pro Christo, non solum ut in eum credant, sed ut etiam pro illo patiantur temporalium privationem, & quæ inde sequuntur incommoda. Ex quibus patet responsio ad tria momenta in confirmationem objectionis proposita.

Ad primum, distingo, absurdum petere temporalia ex cupiditate & animo his fruendi,
Conce-

Concedo : ex charitate & desiderio Deum adipiscendi per media ab ipso ordinata, sive suavia illa sint, sive aspera, Nego.

Ad secundum, distinguo similiter. Injuria afficitur Missæ sacrificium, si referatur ad temporalia, sicut medium ad finem, v. g. medicina ad sanitatem, adeo ut sine cessante, nulla habeatur ratio medii, Concedo : si referatur tanquam causa ad effectum, Nego. Annon pars est cultus divini ad ejus omnipotentiam in omnibus recurrere ?

Ad tertium : qui multa ad unum sic refert, ut pro nihilo ea duceret, si ad istud adipiscendum nullatenus conferrent, certe unum diligit, unum quærit, unum propriè æstimat necessarium, quamvis alia quædam secundum quid dicantur necessaria, v. g. cibus ad vitam corporalem conservandam ; attamen cum quærenti regnum Dei, ut Magister noster præcipit, necessarium non videatur vitam diutius producere, Christianus ex Tertuliano famem non timet, nec panem quotidianum petit tanquam simpliciter necessarium. Per panem autem S. Augustinus intelligit utrumque, spirituales, & corporales ; sed spirituales præferit, hoc est, gratiam, sine qua corporali uti non possumus ad salutem.

CAPUT IX.

Pro quibus offerendum est Missæ sacrificium ?

Diximus generatim superiori capite Sacrificium Missæ prodesse justis, & peccatoribus. Sed quæstio hic movetur, utrum profit omnibus etiam

D. Habert Theolog. Tom. V.

Zz

infi-

infidelibus, excommunicatis, & defunctis, liceatque pro iis Missam celebrare?

R. 1. Certum est sacrificium Missæ offerendum esse pro universis fidelibus baptizatis, non excommunicatis; quia sacrificium offertur nomine totius communitatis per Ministrum publicum. Hinc in lege veteri summus Sacerdos ingrediens Sanctuarium, ad pectus insculpta ferebat nomina duodecim tribuum in recordationem & memoriale filiorum Israel. Exodi 28. & in Liturgia Latina sic legitur, *tibi offerimus pro Ecclesia tua sancta Catholica & omnibus orthodoxis, atque Catholicae & Apostolicae fidei cultoribus.* Peccaret ergo Sacerdos, si contra Ecclesiæ ritum aliquem ex his, non excommunicatum, à sua oblatione excluderet.

Dixi, *non excommunicatis*; quia eos excommunicatos, qui dicuntur non tolerati, hoc est, per sententiam Judicis nominatim ut tales declarat, Ecclesia excludit à suis orationibus & suffragiis, prohibetque ne ad altare nominentur, *C. A nobis*, de sententia excommunicationis. Possunt tamen Fideles & ipse Celebrans pro iisdem privatim orare.

R. 2. Potest offerri sacrificium saltem indirectè pro non baptizatis, sive infideles sint, ut pagani; sive fideles, ut Catechumeni. Probatur ex communi usu Ecclesiæ, quæ semper oravit, & sacrificium obtulit pro tranquillitate publica, pro extirpatione hæresum, extinctione schismatum, quæ preces directè quidem tendunt ad bonum publicum Ecclesiæ, sed indirectè ad conversionem infidelium.

Dixi, *saltem indirectè*; tum quia hic orandi modus pro infidelibus est conformior Ecclesiæ disci-

disciplinæ, quæ hodie nomina infidelium non solet appellare nisi die Parasceves, quo die etiam fit publica memoria excommunicatorum, ob specialem commemorationem sanguinis Domini pro omnibus effusi; tum quia nulla est expressa prohibitio universalis Ecclesiæ orandi pro non baptizatis, *sacrificamus pro salute Imperatoris pagani*, ait Tertull. lib. ad Scapulam c. 2. & S. Ambr. in Oratione de obitu Valentiniani Imperatoris catechumeni: *Date, inquit, Manibus ejus sancta mysteria*. Innocentius quoque III. C. *Apostolicam*, de Presbytero non baptizato, vult iuges pro eo preces & hostias offerri. Prohibet quidem Concilium Braccarense I. ne offeratur pro catechumenis defunctis; sed præterquam quod illa lex est particularis Ecclesiæ, cum nos loquamur de lege universali, potuit esse ratio specialis hujusce sanctionis, fortè ad terrendos catechumenos, qui Baptismum suscipere negligebant.

R. 3. Non licet offerre sacrificium pro defunctis damnatis; quia capaces non sunt fructus sacrificii. *Quis offerat corpus Christi, nisi pro eis, qui sunt membra Christi?* ait S. Augustinus de infante defuncto, Baptismate nondum percepto, lib. de anima, & ejus origine, cap. 9. Porro damnati nullatenus sunt membra Christi, nequidem potentia, ut infideles, qui possunt ad agnitionem veritatis venire.

Dices: Ecclesiæ suffragiis & oblationibus pœnæ damnatorum mitigantur, ex S. Augustino lib. Enchir. c. 110. & 112. Imo S. Joannes Damasce-nus in oratione de mortuis, docet orationibus Sanctæ Theclæ, animam Falconillæ paganæ à pœnis inferni liberatam; similiter & animam Trajani precibus S. Gregorii. Ergo.

Nego ant. namque 1. S. Augustinus non loquitur de damnatis, sed de animabus in purgatorio detentis; verba ejus sunt, *cum ergo sacrificia, sive altaris, sive quarumcunque eleemosynarum pro baptizatis omnibus defunctis offeruntur, pro valde bonis gratiarum actiones sunt, pro non valde malis propitiationes sunt, pro valde malis etsi nulla sunt adjumenta mortuorum, qualescunque vivorum consolationes sunt.*

2. S. Joannes Damascenus expresse docet lib. 2. de fide c. 4. mortem id esse hominibus quod fuit Angelis casus. Unde opus illud in objectione appellatum non est S. Joannis Damasceni: fabulæ quoque sunt historiæ Falconillæ & Trajani, sicut & ea, quæ ibidem referuntur de conversione damnatorum ad prædicationem Christi Domini, cum illic commoratus est per triduum mortis. Quis vero crederet Sanct. Gregorium orasse pro defuncto Trajano nominis Christiani persecutore; qui lib. 34. Moral. cap. 13. disertè docet non magis orandum pro infidelibus defunctis, quàm pro diabolo?

R. 3. Licet offerre sacrificium in honorem Sanctorum. Responsio est de fide contra Pseudo-Reformatos definita sess. 22. can. 5. Concilii Tridentini *Si quis dixerit, imposturam esse, Missas celebrare in honorem Sanctorum, & pro illorum intercessione apud Deum obtinenda, sicut Ecclesia intendit; anathema sit.*

Probatur ex universalis Ecclesiæ Traditione.

S. Cyrillus Jerosolymitanus catechesi 5. *Cum hoc sacrificium offerimus, inquit, mentionem facimus eorum, qui ante nos obdormierunt, primum Patriarcharum, Prophetarum, Apostolorum, Martyrum,*
ut

ut Deus orationibus illorum, & deprecationibus, suscipiat preces nostras.

S. Augustinus tractatu 84. in Joan. sic scribit: *Non sic Martyres commemoramus (ad altare) quemadmodum alios, qui in pace requiescunt, ut etiam pro iis oremus, sed magis ut orent ipsi pro nobis.*

Omnes Liturgiæ Græcæ, sicut & Latinæ, memoriam faciunt SS. *ut assiduas preces pro nobis offerant*, ait Liturgia Sancti Basilii.

Dices: Christus non dixit, hoc facite in Sanctorum, sed in mei commemorationem: ad quæ verba ait Kemnitius in examine Concilii: hæc certè impia profanatio Cœnæ Dominicæ adversa fronte repugnat ejus institutioni, idque non tam apertè, quàm palpabiliter.

Respondeo 1. Christus non prohibuit fieri in Sanctorum commemorationem. 2. in Missæ sacrificio fit commemoratio ita Christi propria, ut nulatenus ad Sanctos extendatur; nam consecratio utriusque speciei est repræsentatio mortis ejus, non verò ullius Sancti.

Instabis: in honorem Sanctorum Ecclesia Romana offert sacrificium, *ut illis proficiat ad honorem*, ait nostra Liturgia; idipsum agnoscunt Patres Tridentini sess. 22. cap. 3. *quavis*, inquit, *in honorem & memoriam Sanctorum nonnullas interdum Missas Ecclesia celebrare consueverit*, &c. atqui ex dictis oblatio sacrificii est honor supremus & latreuticus: ergo mera videtur superstitio & cultus indebitus sacrificium offerre in honorem Sanctorum.

Distinguo: in honorem SS. Ecclesia offert Sacrificium Deo, tanquam auctori virtutum,

quas per Sanctos operatus est, Concedo; offert ipsis Sanctis, Nego. Unde ex sacrificio quod est gratiarum actionis, supremus honos Deo accedit, non verò Sanctis; quanquam & ad aliquam eorum gloriam cedat, quod fuerint veluti instrumenta in manu Domini virtutum, quemadmodum & in Republica ob reportatam victoriam solemnes Deo gratiæ referuntur, quod aliquo modo vertitur in honorem hominis victoris. Quod autem hæc sit mens Ecclesiæ, patet tum ex laudato textu Concilii Trid. sess. 22. cap. 3. *Quamvis in honorem... Sanctorum... Missas Ecclesia celebrare consueverit, non tamen illi sacrificium offerri docet, sed Deo soli... de illorum victoriis gratias agens, eorum patrocinia implorat.* Tum ex S. Augustino l. Enchiridion c. 110. *cum ergo sacrificia... altaris... offeruntur, pro valde bonis gratiarum actiones sunt.* Scriptum est enim, *qui autem gloriatur, in Domino gloriatur, non in se, 2. Cor. 10.*

Urgebis: ideo Christus Dominus corpus & sanguinem suum nobis tradidit in cœna, ut adituri thronum gratiæ ejus misericordiam consequamur per merita unicæ oblationis ejus: ergo profanatur Cœna Domini, cum à Deo petitur, ut per merita & preces Sanctorum in omnibus divinæ protectionis muniamur auxilio. Ita Kemnitius cit. loco. Hinc etiam Sanctus Augustinus lib. 22. de Civit. cap. 10. quamvis agnoscat ad altare fieri memoriam Sanctorum, negat tamen ibi Sanctos invocari.

Dist. conf. profanatur cœna Domini, si merita & preces SS. adjungantur, ut oblatio sit perfectior, & majoris meriti, Concedo: si adjungantur tantum, ne indignitas nostra obstet (ut non-

nonnunquam contingit) quo minus meritum rei oblatae per se infiniti valoris nobis applicetur, Nego conseq. alias preces etiam, quibus implo-ramus oblationis effectum, non minus profanarent cœnam Domini, quàm Sanctorum intercessio; offerendumque esset tremendum illud mysterium animo indevoto & impœnitenti, ut misericordia divina magis eluceret, quo nihil fingi potest absurdus.

Quoad S. Augustinum, Martyres nominantur à Sacerdote, qui sacrificat, *ut orent ipsi pro nobis*, cit. tract. 84. in Joan. non ut invocentur per ipsam oblationem, *Deo quippe, non ipsis sacrificat; quia Dei Sacerdos est, non illorum*, cit. lib. 22. de civit. cap. 10. ubi loquitur de invocatione, quæ soli Deo competit, tanquam auctori omnium bonorum.

R. 5. Sacrificium Missæ ritè offertur pro defunctis in Christo; nondum plenè purgatis. Est de fide. *Si quis dixerit, Missæ sacrificium . . . neque pro vivis, & defunctis . . . offerri debere; anathema sit.* Conc. Trid. sess. 22. can. 3. & sess. 25. decreto de Purgatorio, docet *Purgatorium esse, animasque ibi detentas, Fidelium suffragiis, potissimum verò acceptabili altaris sacrificio, juvari.*

Probatur 1. ex Scriptura, 2. Macchabæor. 12. *fortissimus Judas . . . duodecim millia drachmas argenti misit Jerosolymam offerri pro peccatis mortuorum sacrificium. . . . sancta ergo & salubris est cogitatio pro defunctis exorare, ut à peccatis solvantur.*

Respondent Novatores hunc librum non esse Canonicum, nec valere, ex Sancto Hieronymo in prologo in librum Proverbiorum, ad auctoritatem Ecclesiasticorum dogmatum confirmandam.

Contra 1. meretur auctoritatem gravissimi Historici etiam apud Judæos, ac proinde sequitur Ecclesiam Romanam nihil in hac parte innovasse, cum constet Judæos sacrificia obtulisse pro defunctis.

Contra 2. ex eodem S. Hieron. prologo in lib. Machab. *licet non habeantur in canone, tamen ab Ecclesia inter divinorum voluminum annotantur historias.* Enimverò Concilium Carthaginense III. eos reposuit in catalogo librorum Canonicorum, sicut & Innocentius I. Epist. ad Exuperium, & S. Aug. lib. 18. de Civit. cap. 36. *Machabæorum libros, inquit, non quidem Judæi, sed Ecclesia pro canonicis habet.* Ergo auctoritatem habent, si non apud Judæos, saltem apud Christianos ad confirmanda fidei dogmata.

Probatur 2. ex Traditione.

Tertull. lib. de Corona militis c. 3. sic habet, *oblaciones pro defunctis annua die facimus: docetque id traditum esse ab Apostolis.*

S. Cyprianus Epist. 66. de quodam Victore, qui cum moriens ad tutelam Presbyterum nominaret, sic scribit: *Episcopi antecessores nostri... censuerunt, quod si quis hoc fecisset, non offerretur pro eo, nec sacrificium pro dormitione ejus celebraretur... & ideo non est, quod pro dormitione ejus apud vos fiat oblatio.*

S. Cyrillus Jerosolymitanus catech. 5. *maximam esse credimus animarum juvamen, pro quibus offertur obsecratio sancti illius tremendi, quod in altari positum est, sacrificii.*

S. Chrysostomus hom. 69. *non temere ab Apostolis hæc sancita fuere, ut in tremendis mysteriis defunctorum agatur commemoratio.*

S. Epi-

S. Epiphanius lib. anacephaleosis, & S. August. lib. de hæresibus cap. 35. scribunt Aerium inter hæreticos damnatum, quòd negaret pro mortuis offerendum; sacrificium, idque contra consuetudinem universalis Ecclesiæ ab Apostolis derivatam, ut idem S. Augustinus testatur lib. de cura pro mortuis.

Dices; fictitius est tertius locus, quod purgatorium dicitur, repugnatque Scripturæ textibus; nam Ecclesiastæ 9. legitur, *quodcumque facere potest manus tua, instanter operare, quia nec opus, nec ratio . . . erunt apud inferos, quò tu properas.* Et c. 11. *si ceciderit lignum ad Austrum, aut ad Aquilonem ibi erit.* 2. Cor. 5. *omnes enim nos manifestari oportet ante tribunal Christi, ut referat unusquisque . . . prout gessit, sive bonum, sive malum.* Hinc SS. Ambrosius lib. de bono mortis cap. 2. Chrysostomus hom. 2. de Lazaro, Cyprianus contra Demetrium, & Augustinus passim docent, post mortem nullum esse pœnitentiæ aut satisfactioni locum, nec consolationem accepturos, qui in hac vita non abluerunt peccata: Ergo,

Nego ant. namque tertius ille locus necessario colligitur ex textibus mox allatis, nec quidquam probant, quæ afferuntur in contrarium.

Non primum; si quidem ex eo ad summum concludi potest, bona opera post mortem non esse meritoria; quare dum tempus est, bonum instanter operandum.

Non secundum, quod sic retorquetur contra Adversarios; ergo SS. Patriarchæ & Prophetæ in æternum erunt, ubi ceciderunt; nec Christus ex inferis eduxit eos. Quod Novatores dabunt responsum, ut se ab hac difficultate expediant,

nostrum erit. Nempe in quo statu, siue iustitiæ; siue peccati, morietur homo, in eo manebit in æternum; quia post mortem non est pœnitentiæ locus, sed quisque referet prout gessit in corpore, siue bonum, siue malum, & sic patet solutio ad cetera momenta.

Confirmatur 1. ex c. 12. Matth ubi de peccatis in Spiritum Sanctum dicitur, quod non remittentur, neque in hoc sæculo, neque in futuro, *in qua sententia*, ait S. Gregorius lib. 4. Dialog. c. 39. *datur intelligi quasdam culpas in hoc sæculo, quasdam vero in futuro posse relaxari.* Præiverat S. Aug. lib. 21. de Civit. c. 24. *neque enim de quibusdam veraciter diceretur, inquit, quod non eis remittatur, neque in hoc sæculo, neque in futuro, nisi essent, quibus etsi non in isto, tamen remittetur in futuro.* Sic etiam ratiocinatur S. Bernardus ferm. 66. in Cant. contra Henricianos, *non credunt, inquit, ignem purgatorium restare post mortem quærant ergo ab eo, qui dixit, neque in futuro remittetur, cur hoc dixerit, si nulla manet in futuro remissio, purgatiove peccatorum.*

Confirmatur 2. ex c. 3. 1. ad Cor. *in igne revelabitur (dies Domini) & uniuscujusque opus quale sit, ignis probabit Si cuius opus arserit, detrimentum patietur: ipse autem salvus erit, sic tamen quasi per ignem.* In quem locum sic scribit S. August. commentario in Psalm. 6. *Arguuntur in die judicii omnes, qui non habent fundamentum, quod est Christus. Emen-
dantur autem, id est, purgantur, qui huic fundamen-
to superædificant, lignum, fœnum, stipulam. Detri-
mentum enim patientur, sed salvi erunt, tanquam per ignem.* Et hom. 16. ex lib. quinquaginta homilia-
rum, quæ nunc est in appendice ser. 251. tanquam S. Cæsarei, qui illum composuit ex verbis S. Augustini:

gustini : Qui temporalibus pœnis digna gesserunt, de quibus Apostolus, si cuius opus arserit, &c. quanta fuerit peccati materia, tanta & pertranseundi mora: quantum exegerit culpa, tantum sibi ex homine vindicabit quædam flammæ rationabilis disciplina, & quantum stulta iniquitas suggesserit, tantum sapiens pœna deserviet. Illic sermones odiosi, & cogitationes iniquæ, quæ puritatem nobilis animæ infecerant, exundabunt. Ita Sanctus Ambrosius in Psal. 118. & Origenes hom. 6. in Exodum.

Nec dicat S. Augustinum pluribus in locis, ut lib. de fide & operibus c. 16. & Enchir. c. 88. per ignem, de quo Apostolus, intelligere pœnas hujus vitæ, quibus probantur fideles, utrum cum cupiditate res hujus mundi possideant; quatenus scilicet, qui sine dolore eas amittunt, nulla se cupiditate fuisse detentos demonstrant; *quoniam sine dolore non pereunt, quæ cum amore possessa sunt.* Quos verò rerum amissarum exurit dolor, ita tamen ut non amittant Christum, salvi erunt, sed detrimentum patiuntur per ignem tribulationis. Namque S. Doctor ubique agnoscit locum Apostoli posse intelligi de pœnis temporalibus alterius vitæ, sed quia nonnullis verbis Apostoli abutebantur ad stabiliendum suum errorem, nempe fidem sine operibus sufficere ad salutem, reprobosque non esse in æternum cruciandos, modò fidem servaverint, textum Apostoli ad pœnas præsentis vitæ extendit. Sed præterquamquod in citatis agnoscat posse intelligi de pœnis alterius vitæ, de iisdem ex professo alibi exponit, ut in Psal. 37. his verbis: *Neque in ira tua emendes me: ut in hac vita purges me, & talem me reddas, cui emendatorio igne non opus sit, propter illos qui salvi erunt, sic tamen per ignem*

*ignem . . . Et quia dicitur , salvus erit : contemnitur ille ignis . Ita planè quavis salvi per ignem , gravior tamen erit ille ignis , quàm quidquid potest homopati in hac vita . Ubi S. Aug. ex illo Apostoli textu , colligit ignem purgatorium planè diversum à tribulationibus , quibus justi nunc exercentur . Sic S. Gregorius in Psal. 3. *Illum ignem transitorium omni tribulatione præfenti existimo intolerabiliorem . Et S. Anselmus Commentario in eum Apostoli locum , Sciendum est , inquit , quia gravior est ille ignis , quàm quidquid homopati potest in hac vita . Omnia enim tormenta , quæ hic sunt , faciliora sunt ; & tamen homines ne ea patiantur , quidquid ab homine fuerit jussum , faciunt . Quantò melius est facere , quæ Deus iubet , ne illa graviora patiantur .**

At, inquires, Apostolus loquitur de igne comitante secundum adventum Domini : atqui ignis non subsequetur , sed præcedet mortem . Ergo ex illo textu non potest probari post hanc vitam medium locum existere , in quo aliqui justi temporaliter puniantur .

Resp. I. distinguendo maj. Apostolus loquitur de igne comitante secundum adventum , ita ut in illo igne necessariò intelligenda sit etiam pœna , quam ob leviores culpas subeunt justi in judicio particulari , quemadmodum SS. Patres intellexerunt , Concedo : ita ut ignis ille solum spectet eos qui superstites erunt , cùm Dominus secundò adveniet , Nego . mai. namque Apostolus eo loci manifestè docet eos , qui congerunt tanquam lignum aut stipulam leviores maculas , à Deo justè vindicante esse temporaliter puniendos , quod sanè non minùs cadit in justos , qui nunc fato funguntur , quam in eos qui in generali
con

conflagratione corpus exuent. Hos autem præfertim denotat, quia solet commonere Auditores de secundo Adventu Domini, tamquam in corpore permansuri sint, usque ad illum diem; sic enim scribit 1. ad Theff. c. 4. *Quia nos qui vivimus, qui residui sumus in adventum Domini ... & mortui qui in Christo sunt, resurgent primi. Deinde nos, qui vivimus, qui relinquimur, simul rapiemur cum illis, &c.*

Respondeo 2. negando min. ignis enim & præcedet, & sequetur mortem cujusque, ac secundum nonnullos Theologos non purgabit paleas, nec cruciabit justos qui eas collegerint, nisi post eorum mortem; sed communior est sententia, illos cruciandos & purgandos in ipsa generali conflagratione, ut resurgant plenè purgati. Quidni mors tam acerba, & perfecto contriti cordis affectu excepta, Deo interius ita movente, idipsum præstaret, quod martyrium? Peraçto autem iudicio, inquit Estius in hunc locum, ignis in densitatem se colligens, involvet, ac secum rapiet reprobos ad ima terræ in æternum cruciandos, nec jam supererit locus Purgatorius.

Q. 1. *Animæ in Purgatorio detentæ, suntne securæ de sua salute?*

R. Sunt omnino, quia statim post mortem iudicium acceperunt, juxta illud Eccli. 11. *In fine hominis denudatio operum illius.*

Q. 2. *Ut quid ergo in Officio Defunctorum precatur Ecclesia, ne absorbeat eas tartarus, & ut eruantur de ore leonis?*

R. Ita precatur Ecclesia, quia Fideles repræsentat tanquam animam exhalantes, & contra mortem conflictantes, non sine magno periculo suæ

suæ salutis, idque ad excitandam astantium devotionem. Idem videre est in omnibus fere solemnitatibus: in Nativitate exhibet Christum nascentem, in Passione patientem, &c.

CAPUT X.

Quomodo operatur Missæ Sacrificium?

R. Primò, non operatur in ratione signi, quia ex dictis non est institutum, quemadmodum Sacramenta, ad significandam gratiam, sed ad cultum Deo exhibendum. In Baptismo v.g. ablutio corporis significat interiorem animæ mundationem à peccato, & eatenus eam efficit; Sacramenta enim novæ legis efficiunt quod significant. At Sacrificium, ut sic præcisè, non significat gratiam; vel enim sumitur inadæquatè pro exteriori oblatione victimæ, vel adæquatè pro exteriori simul & interiori oblatione tum victimæ sensibilis, tum ipsiusmet offerentis, qui spiritualiter se totum Deo devovet, ac mysticè immolat. Priori modo, Sacrificium est quidem signum, sed Sacrificii interioris, non vero gratiæ. Posteriori autem modo est exhibitio summi honoris erga divinam Majestatem, & bonitatem: hæc autem actio, cum sit eximiæ charitatis erga Deum, est gratiæ impetratoria; imò, si fiat ab homine justo, est & meritoria de condigno. Itaque

R. Secundò, Sacrificium operatur per modum impetrationis, ac veluti quædam excellens & præcipua oratio, namque ad preces, quibus homines benevolentiam & gratiam præpotentis ambiunt,
mune-

munera solent addere, utpote quæ efficacius moveant. Hunc autem operandi modum Patres Tridentini Missæ sacrificio tribuunt sess. 22. c. 2. his verbis : *Hujus quippe oblatione placatus Dominus, gratiam & donum pœnitentiæ concedens, crimina & peccata etiam ingentia dimittit. Una enim eademque est hostia, iam nunc offerens Sacerdotum ministerio, qui seipsum tunc in Cruce obtulit.*

R. Tertiò, impetratio, quæ habetur per Missæ Sacrificium, est ex opere operato; quia illud dicitur opus operatum, quod non repetitur ex dispositionibus hominis ministrantis, aut offerentis: atqui talis est illa impetratio; nam Patres Tridentini cit. cap. illam repetunt, tum ex dignitate infinita hostiæ, tum ex persona Christi eam offerentis. Et cap. 1. ejusdem sessionis : *Et hæc quidem illa munda oblatio est, inquit, quæ nulla indignitate aut malitia offerentium inquinari potest.*

Sed alia hic nascitur difficultas, utrùm virtus Sacrificii sit infinita, quemadmodum Christus Sacerdos & hostia est meriti infiniti? Si sacrificium efficaciam habeat infinitam, æquè prodest si pro pluribus, ac si pro uno offeratur: secus si habeat finitam. Circa quam difficultatem Theologi abeunt in sententias oppositas.

Alii contendunt Missæ Sacrificium ex institutione Christi Domini habere virtutem finitam & limitatam, probantque 1. ex communi Catholicorum sensu, qui eleemosynas largiuntur, ut Missæ sacrificium sibi specialiter applicetur; ergo Catholica sententia est Missæ Sacrificium pro uno oblatum, plus ipsi prodesse, quam si pro pluribus offerretur, ac proinde non habere virtutem infinitam. 2. Summi Pontifices Urbanus VIII. & Ale-

Alexander VII. prohibent ne Sacerdos, qui plura accepit stipendia ad celebrandas totidem Missas, per unum Sacrificium debito suo satisfacere præsumat, declarantque eum, qui id præsumpserit, peccare contra iustitiam, & ad restitutionem teneri. 3. Si Missæ efficacia esset infinita, frustra ad eandem rem impetrandam innumera offerrentur Sacrificia, 4. Sicut Sacramento inest virtus applicandi uni merita Passionis Christi, sic Sacrificio applicandi pluribus: atqui virtus illa finita est in Sacramento: Ergo & in Sacrificio.

Probatur min. exemplo parvulorum, in quibus Sacramenta Confirmationis & Eucharistiæ agunt quantum possunt, cum in iis nullum reperiunt obicem; & tamen gratiam finitam, eamque æqualem producunt. Nihilominus

R. Verior videtur eorum sententia, qui docent Missæ Sacrificium esse valoris infiniti, quia ex dictis idem est cum Crucis sacrificio: Ergo sicut sacrificium Crucis vim habet infinitam ad promerenda nobis divina beneficia; sic sacrificium Missæ ad ea nobis impetrandam seu applicanda; institutum enim est ad applicanda, quæ Christus per passionem suam nobis promeruit.

Confirmatur 1. ex praxi universalis Ecclesiæ secundum quam Sacerdos tenetur offerre sacrificium pro omnibus vivis & defunctis, etiamsi stipendium ab aliquo acceperit, ut pro eo specialiter celebretur. Fieret autem ei injuria, si sacrificium pro pluribus oblatum, minus ipsi prodesset. Ergo in Ecclesiæ sententia valor sacrificii non minuitur, dum in plures dividitur, ad proinde infinitus est. Favet c. *Non mediocriter*, de consecr. dist. 5. in quo sic legitur: *Dum pro cunctis animabus*

animabus Psalmus, vel Missa dicitur, nil minus, quam si pro uno quolibet ipsorum diceretur, accipitur. Prætereà optat Ecclesia, hortatur, imò præcipit, ut fideles frequenter ad Missam Parochialem conveniant. Porro si ex ea propter astantium multitudinem minor fructus à singulis esset percipiendus, præferenda esset Missa privata, cui pauciores adfunt: quod est absurdum.

Respondent Theologi Morales, quos Casuistas vocant, triplicem Sacrificii fructum esse distinguendum, scilicet generalem pro omnibus; specialem pro eo, qui stipendium solvit; & specialissimum, qui proprius est Celebrantis: docentque virtutem Sacrificii esse infinitam in ordine ad primum effectum, finitam verò ad alios. Sed ejusmodi divisio triplicis fructus supponit quod probandum est, nempe valorem Sacrificii Missæ esse finitum sub uno respectu, & sub alio infinitum.

Confirmatur 2. si idem numero Sacramentum posset pluribus applicari, quemadmodum Sacrificium, æque prodesset omnibus. Deinde licet ad unum dicat ordinem, non videtur habere virtutem limitatam & finitam. Enimverò sicut accedens potest magis & magis in infinitum esse dispositus; sic Sacramentum vim habet producendi gratiam majorem, & majorem in infinitum; nullus enim dixerit accedentem posse esse tam perfectè dispositum, ut Sacramentum nihil in eum agat.

Ad momenta sententiæ oppositæ sigillatim respondetur.

Ad primum, majorem fructum ex Sacrificio percipiunt, qui melius sunt dispositi, quales cen-

sentur qui eleemosynas conferunt, & curant ut pro se specialiter offeratur. Item, qui intermissis negotiis, ad Sacrificium conveniunt, & in eo ministrant; hi enim majorem fidem & devotionem præferunt.

Ad secundum, idè Summi Pontifices prohibere, ne plura stipendia pro uno Sacrificio acciperentur: 1. Quia opposita sententia probabilitate non caret. 2. Quia minueretur cultus divinus, si Sacerdos uno Sacrificio vellet satisfacere pro largis eleemosynis oblatis, ut singulis anni diebus celebretur. 3. Quia hæc sordida Sacerdotum avaritia in grave Fidelium verteretur scandalum.

Dices: Sacerdos, qui sic ageret, contra justitiam non peccaret, nec ad restitutionem teneretur, cum in nostra sententia Fideles non damnum paterentur.

Nego sequelam; namque Sacerdos non accipit stipendium tanquam Sacrificii pretium; hoc enim esset impium & simoniacum, sed tanquam eleemosynam suo ministerio respondentem; quia Dominus ordinavit iis, qui altari deserviunt, de altari vivere, 1. Cor. 9. Lex autem Ecclesiastica aut usus communiter receptus, fixit quid & quantum Sacerdos pro quolibet ministerio debeat accipere; unde peccat contra justitiam, & ad restitutionem tenetur, si plus accipiat pro uno ministerio, quam lege præfixum est, nisi ultro offeratur ab iis, qui sciunt legem.

Ad tertium nimis probat illud argumentum; ex illo enim concludere liceret Missæ Sacrificium nullam habere efficaciam ex opere operato, cum aliquando frustra repetatur ad unum & eundem effe-

effectum obtinendum. Vera itaque hujusce defectus ratio repetenda est ex indignitate eorum, pro quibus offertur. *Dicendum*, inquit S. Thomas q. 79. art. 7. ad secundum, *quod sicut Passio Christi prodest quidem omnibus, quantum ad sufficientiam, sed effectum non habet, nisi in illis, qui Passioni Christi conjunguntur per fidem & charitatem; ita & hoc sacrificium, quod est memoriale Passionis Dominicæ. Et art. 5. Quamvis ergo hæc oblatio ex sui quantitate sufficiat ad satisfaciendum pro omni pœna, tamen fit satisfactoria illis, pro quibus offertur, vel etiam offerentibus secundum quantitatem suæ devotionis, & non pro tota pœna.* Hinc Cajetanus docet Sacrificia, & alia suffragia, non prodesse infallibiliter omnibus animabus in Purgatorio detentis, sed iis duntaxat, quæ dum in corpore existerent, hoc subsidium per bona opera sunt promeritæ. Confirmari potest nostra responsio exemplo Indulgentiarum, quæ secundum verriorem sententiam, plenè non solvunt à reatu pœnæ temporalis, nisi eos, qui Deo per seipso satisfacere curant, adeo ut Indulgentiæ sint ipsis supplementum quoddam infirmitatis, & impotentiae, vel saltem merces egregii alicujus operis; alias fideles, præsertim divites, pœnitentiæ labores, & alia bona opera prætermitterent sub obtentu Indulgentiarum, & Missarum magno numero post suum obitum celebrandarum.

Ex hac responsione non sequitur Missæ Sacrificium non prodesse, nisi dispositis; id enim falsum est, cum ex cap. præcedenti, utiliter offeratur ad obtinendam primam conversionis gratiam pro infidelibus & peccatoribus etiam obduratis. Sed sensus nostræ responsionis est tantam posse esse peccatoris indignitatem, ut Deus per Sacri-

ficium exoratus, nihil suæ indignationis remittat. Addendum est etiam nullatenus pœnam temporalem remittere, nec gratiam sanctificantem augere in his, qui soluti non sunt à reatu peccati mortalis; quia hi duo effectus remissionem peccati mortalis necessario supponunt. Ergo Missæ Sacrificium licet per se efficax, non habet infallibilem effectum.

Ad quartum, nihilinde concludi potest, nisi quòd Sacrificium & Sacramenta non habeant infinitum effectum, quod verissimum est; quia nihil creatum potest esse infinitum. Sed quemadmodum ex eo quòd Deus creaturam infinitam producere non possit, non licet negare infinitam ejus omnipotentiam; sic nec Sacrificii & Sacramentorum infinitam virtutem: quia non nisi finitos effectus possunt habere. Ratio autem cur in infantibus æqualis gratia producat per Sacramenta, cùm in adultis producat inæqualis, ea est, quòd virtus activa Sacramenti per dispositiones adulti majores aut minores determinetur ad intensius aut remissius operandum: at verò parvuli æqualiter se habent ad Sacramenta, quorum capaces sunt; vel enim nondum sunt baptizati, vel jam baptizati; si primum, nullam habent dispositionem: si secundum, Baptismus in illis est æqualis dispositio. Quare cùm ex illorum parte nihil determinet virtutem activam Sacramentorum ad intensiorem, vel remissiorem effectum, ad Deum qui illum determinet, recurrere necesse est.

CAPUT XI.

Utrum extet aliquod præceptum offerendi
Missæ Sacrificium?

R. **O**mnes Fideles præcepto naturali, divino & Ecclesiastico tenentur offerre Missæ Sacrificium, saltem per Ministrum publicum, ei præsentia sua & votis cooperando, nisi obstet Ecclesiæ interdictum in pœnam gravioris delicti.

Dixi 1. *saltem per Ministrum publicum*: quia c. 16. primæ partis hujus Tract. evicimus contra Novatores, solos Sacerdotes habere potestatem consecrandi, ergo per se immediatè offerendi; nam ex dictis cap. 5. hujus secundæ partis oblatio in consecratione consistit. Utrum autem Sacerdotes aliquando teneantur celebrare, expendemus in decursu hujus capituli.

Dixi 2. *ei præsentia sua, & votis cooperando*; quia Fideles ea intentione ad Missæ Sacrificium convenire debent, ut per celebrantem, tanquam per Ministrum publicum, Christum verum Agnum, & Hostiam immaculatam novi Testamenti, & seipsos veluti ejus membra Deo offerant, eique supremum cultum exhibeant, ut cap. 7. fusè explicuimus.

Dixi 3. *nisi obstet Ecclesiæ interdictum*: quia Pœnitentes antiquitus hora Sacrificii è conventu Fidelium ejiciebantur; nunc quoque excommunicati Sacris interduntur, sed congrua satisfactione impedimentum quamprimum remove tenentur. His explicatis,

Prima responsionis pars, quæ est de præcepto naturali, manifestè colligitur ex c. 3. nam ex ibi

dictis Sacrificium propriè dictum, Deo debetur lege naturali : atqui in Religione Christiana, Missa est unicum Sacrificium propriè dictum : ergo Fideles lege naturali tenentur illud offerre, præsentia sua & votis celebranti se adjungentes.

Secunda pars, quæ est de præcepto divino, sequitur ex præcedenti; namque naturalem sacrificandi legem Christus Dominus determinavit ad hoc unicum Sacrificium : ergo Fideles & lege naturali, & lege divina illud offerre tenentur.

Tertia pars, quæ est de præcepto Ecclesiastico, neminem latet. Quis enim non didicit ab infantia illud Ecclesiæ præceptum : *Les Dimanches Messes ouïras, & Fêtes de commandement* ? ubi Ecclesia determinat tempus audiendi Missam, quod nec lex naturalis, nec divina præfixerant.

Q. 2. Obligatne illud præceptum sub peccato mortali?

R. Dubium non est quin obliget sub mortali; sic enim habetur can. 10. Apostolorum : *Omnes Fideles, qui conveniunt in solemnitatibus sacris ad Ecclesiam, scripturas Apostolorum, & Evægelia audiant : qui autem non perseverant in oratione, nec sanctam communionem percipiunt, convenit communionem privari, idest, excommunicari.* Et Can. 27. Concilii Agathensis circa initium sexti sæculi, referturque C. *Missas, de consecratione dist. 1. Missas die Dominico sæcularibus totas tenere speciali ordine præcipimus, ita ut ante benedictionem Sacerdotis populus egredi non præsumant, qui si fecerint, ab Episcopo publicè confundantur. Gravis autem pœna supponit gravem culpam.*

Q. 3. Satisfacitne præcepto, qui duas aut tres partes simul audit à totidem celebrantibus?

R. Affirmarunt nonnulli Moderni, quibus obstitere suis censuris primùm Lovanienses anno

1657. Archiepiscopi Senonensis & Parisiensis anno 1658. Dehinc Innocentius XI. anno 1679. ac demum Clerus Gallicanus anno 1700.

Q. 4. *Qui Missa jam inchoata Ecclesiam ingressus est, satisne est ad implendum præceptum, si partem alterius Missæ audiat, quemadmodum Clericus, qui omisit primum nocturnum Officii divini, satisfacit recitandi præcepto, si partem omissam suppleat, nec tenetur integrum Officium repetere?*

R. Non satisfacit, sed aliam Missam integrè audiat necesse est, quantumcunque reclament plures Moderni, quia Liturgiæ partes magis sunt inter se ordinatæ & connexæ, quàm partes Canonici Officii; aliæ enim sunt præparatoriæ ad Sacrificium, aliæ pertinent ad ejus essentiam, aliæ sunt fructus & participatio Sacrificii, aded ut ordo ille inverti nequeat.

Q. 5. *Sufficitne ad peccatum mortale non interfuisse cuilibet Liturgiæ parti?*

R. Minimè; quia levitas materiæ excusat à graviore culpa.

S. autem Antoninus 2. parte existimat mediam aut tertiam partem esse materiam gravem.

Ergo, qui ex negligentia accedit inchoata Missa venialiter saltem peccat, quemadmodum Beneficiarius, qui aliquam partem leviozem Officii Canonici prætermittit; quia præceptum integrè non implet, nec totam Missam tenet, ut colligitur ex laudato can. Concilii Agathensis.

Dixi: *Ex negligentia*; Quia si nulla sit in his levioribus negligentia, nulla quoque erit culpa. Hinc excusandi sunt inferiores Ministri, qui identidem ad facellum recurrunt, ut afferant ad Sacrificium necessaria, puta, vinum, thus, &c.

modò in facello, aut in alijs locis sine necessitate non immorantur, nec confabulationibus vacent.

Duo tamen hic sunt observanda. Primum, ante Missam paranda esse, quæ solent præsupponi; ut dum peragitur Sacrificium; Ministri his tantum actionibus incumbant, quas Officii sollemnitatis requirit; nam si accidentali occasione vinum v.g. extra Ecclesiam esset quærendum, nec tam citò afferendum, dum interim celebrans profequitur Sacrificium usque ad tertiam partem, Minister aliam Missam, si possit, audire tenetur. Secundum, nonnulli Theologi, ut Suaresius hic, probabile censent, eum non satisfacere præcepto, qui abest, licet per breve tempus, cum Sacerdos consecrat, aut communicat; quia, inquit illi hujusmodi actiones sunt de essentia, aut integritate Sacrificii. Unde censendi sunt abfuisse à Sacrificio, qui his partibus non interfuerunt.

Q. 6. *Quæ ex parte adstantium requiruntur, ut satisfaciant Ecclesiæ præcepto?*

R. Quatuor, nempe præsentia, intentio, seu voluntas, attentio, & pia voluntatis affectio, si-ve devotio.

Præsentiam exigunt verba legis: intentionem seu voluntatem obedientia præcepto debita, quæ est actus voluntatis, præterquamquod actio, quæ fit præter voluntatem, non est humana, nec rationalis: attentionem verò & devotionem exigit ipsa actionis natura; auditio enim Missæ ex dictis 1. est cultus Dei supremus. Deus autem non colitur nisi amore. 2. Est oblatio Sacrificii: oblatio vero est species orationis excellentissimæ, quæ nulla est sine applicatione mentis ad divina.

Dices:

Dices : *Attentio & devotio sunt actus merè interiores : atqui Ecclesia nec ulla humana potestas potest præcipere actus merè interiores, cùm de his judicari non possit. Ergo.*

Distinguo min. Non potest præcipere directè, Transeat : Indirectè, quatenus præcipit actum exteriorem, qui non potest perfici sine actu interiore, Nego min. & conf. Namque pater aut herus, dum opus externum imperat Filio, aut famulo, indirectè eum obligat ad eliciendum interiorem voluntatis actum, qui dicitur intentio, & sine quo obedientiam præstare nequit. Nullus enim dixerit non peccare filium, aut famulum, qui invito & reluctante animo opus injunctum perficit. Porro Missæ auditio, quæ propriè oratio est cum oblatione, non potest consistere sine intentione, attentione, & pia aliqua affectione.

Ergo præceptum non implet, graviterque peccat, nisi supleverit aliam Missam audiens, qui toto tempore sacrificii, vel saltem tertia ejus parte confabulatur, nec reverentiam exteriorem exhibet, oculos huc & illuc circumferens, vel mente divagatur cum advertentia, sive supina negligentia, contrariamque Casuistarum opinionem Clerus Gallicanus temerariam, scandalosam, erroneam, & impietati faventem declaravit anno 1700. vel denique astat ex mera curiositate spectandi, aut studio addiscendi cæremonias, suavitatem cantus percipiendi. His annumerandi sunt, qui lectioni incumbunt solo discendi desiderio.

Difficultas circa attentionem superest, utrum satisfaciat præcepto audiendi Missam, qui inter Missarum solemnia peccata sacramentaliter deponit ?

Bonacina primum affirmaverat, sed postea re maturius expensa, sententiam mutavit, negavitque hujusmodi satisfacere, quod verum videtur, ubi proluxior est confessio, occurruntque nonnulla discutienda, non sine magna tum Confessarii, tum pœnitentis contentione, quæ excludit attentionem, & piam animi affectionem ad Sacrificium requisitam.

Q. 7. *Quid attendere debet Fidelium religio & pietas, dum Missæ Sacrificio interfunt?*

R. Meminisse debent 1. se ad Missam convenire, ut Sacrificium Deo offerant per Sacerdotem, tanquam per Ministrum publicum. 2. Sacrificium exterius esse signum sacrum sacrificii interioris, adeò ut signum mendax exhibeant, nisi sincero animo se ut victimam offerant. 3. Cum Christus sit in hoc sacrificio principalis offerens, & præcipua victima, Fideles in hoc tremendo mysterio, cum ipso conjungi tanquam membra capiti, ut per ipsum & in ipso fiant unus offerens, unaque totalis hostia infinite digna. 4. Missam esse unicum Christianorum Sacrificium, eminenterque continere quatuor sacrificiorum veterum species propter totidem Dei perfectiones continuò ab homine colendas, ut explicuimus cap. 1. pag. 666. & seq. Ex his autem sequitur Missam esse audiendam eo mentis affectu, quem fusè exposuimus cap. 7. pag. 709. & seq. ad quam brevitati consulentes remittimus Lectorem, non solum ut discat, sed opere compleat, & aliis prædicet, ubi se dabit occasio, quæ ibi tradita sunt.

Diximus etiam cap. 21. 1. part. astantes Missæ Sacrificio debere communicare spiritualiter,
Eccle-

Ecclesiam quidem vehementer optare, ut & sacramentaliter communicent; sed hac de re nullum esse præceptum divinum, nec Ecclesiasticum.

Q. 8 *Utrum ad Missæ Sacrificium solis justis accedere liceat?*

R. Primò, certum est Sacerdotem celebrantem graviter peccare, si sit alicujus criminis conscius: tum quia in hac actione Eucharistiam, ut Sacramentum est, conficit & recipit: tum quia ipsamet sacrificii oblatio præcise sumpta, utpotè quæ sit sacratissima, & nomine totius Ecclesiæ facta, sanctitatem exigit in Ministro ad eam deputato & consecrato, juxta illud Exodi 19. v. 22. *Sacerdotes . . . qui accedunt ad Dominum, sanctificentur, ne percutiat eos.* Quodsi, necessitate urgente, Sacerdos criminis reus, absque sacramentali confessione defectu Confessarii contritus celebraverit, quamprimum confiteatur ex Conc. Tridentino sess. 13. cap. 7.

R. Secundò, certum est Ecclesiam à sacrificio removisse peccatores, qui pœnitentiæ publicæ gradus decurrebant, nisi ultimum, qui dicebatur consistentium, attigissent.

R. Tertio, constat excommunicatis etiam toleratis, non licere Sacrificio interesse; quia excommunicatio definitur censura, qua baptizatus separatur ab Ecclesiastica Fidelium Communionē. Ergo excommunicatus, qui cum eis in Sacrificio communicaret, censuram violaret, graviterque peccaret. Verum quidem est ex Decreto Concilii Constantiensis & Basileensis, Fideles non teneri vitare excommunicatos, qui ut tales non fuerint nominatim declarati, Sacerdotemque posse absque peccato celebrare, præsentē v. g.

Hære-

Hæretico, nondum expresse denunciato ; sed Decretum illud nullatenus favet hujusmodi excommunicatis toleratis, ut ibidem declaratur.

R. Quartò, peccator nullo excommunicationis aut interdicti vinculo ligatus, non est à Missæ Sacrificio repellendus, quia Missa est sacrificium propitiatorium. Ergo peccator ad illud recurrere debet, ut Deum sibi propitium reddat.

R. Quintò, irreverenter & sine debita dispositione accedit, nisi de peccatis doleat, vel saltem donum pœnitentiæ sincerè & suppliciter petat. Probatur 1. auctoritate.

Conc. Tridentinum sess. 22. cap. 2. hanc à peccatoribus exigit dispositionem : *Docet sancta Synodus, Sacrificium istud verè propitiatorium esse, per ipsumque fieri, ut, si cum vero corde, & recta fide, cum metu, & reverentia, contriti, ac pœnitentes ad Deum accedamus, misericordiam consequamur.*

Sanctus Gregorius lib. 4. Dialog. cap. 65. *Cum hæc agimus, inquit, nos ipsos Deo in cordis contritione faciæmus.*

Concilium III. Mediolanense, tit. de his quæ spectant ad Sacrificium Missæ, sic habet : *Cum audiendæ Missæ rationem populum docet Parochus, eum sæpe admoneat, ut se quisque colligens, si sibi alicujus mortiferi peccati reatu mortuus est, summo ex eo dolore affectus, supplex à Deo veniam petat.*

Angelus à Clavasio, verbo *Feriæ*, scribit, *Fidelis audiat Missam integram, & conteratur, vel saltem atteratur, qui est in peccato mortali.*

Denique, ordo Liturgiæ Latinæ præscribit, ut antequam Sacerdos ad altare ascendat, stet infra gradum infimum, ubi inclinatus, publicè se peccatorem confiteatur, veniam precetur, circum-

circumstantesque roget, ut pro se apud Deum intercedant cum omnibus sanctis, quos invocat; tum circumstantes exemplo celebrantis, similem confessionem emittunt; & sic omnibus per pœnitentiam præparatis, altare conscendit, & Missam inchoat.

Meminit S. Augustinus serm. 35^L. num. 6. aliàs hom. 50. non absimilem ritum sua ætate observari solitum; sic enim scribit: *Unde quotidie tundimus pectora? Quod nos quoque Antistites ad altare assistentes cum omnibus facimus.*

Probatur 2. ratione duplici.

Prima: Oblatio Sacrificii species est orationis excellentissimæ. Scriptum est autem, Proverb. 28. vers. 9. *Qui declinat aures . . . ne audiat legem, oratio ejus erit execrabilis.* Atqui qui vult obstinatus permanere in peccato, declinat aures ne audiat legem. Ergo.

Secunda: Qui satisfactionem exterius exhibet pro offensa, quam vult retractare, sed repetere proponit, is certè personam læsam non placat, sed offendit, irridetque: atqui talis est peccator, qui in proposito peccandi permanens, offert propitiatorium Missæ sacrificium: videturque imitari sacrilegos illos milites, qui in derisionem flectebant genua coram Christo Domino, & surgentes dabant ei alapas, Joan. cap. 19.

Dices: Ergo ejusmodi peccator à Missæ Sacrificio abstinere debet.

R. Absurdè, ne dicam impiè, ejusmodi conclusio elicitur. Quid enim tam absurdum, quàm docere mandata non esse implenda; sed prorsus rejicienda, ex eo quòd peccatum sit ea malè exequi: v. g. Horas Canonicas à Clericis non esse

esse recitandas, quia peccant, si absque attentione ac devotione eas persolvant: peccatorem ab oratione Dominica debere abstinere; quia, ut notat Bellarminus libro 2. de bonis operibus cap. 6. mendaciter, & veluti mimicè petit ut fiat Dei voluntas, & sanctificetur nomen ejus, dum obstinato animo contra voluntatem Dei pugnat, nomenque ejus blasphemare facit suis scandalis. Annon rectius concluditur & orandum in spiritu, & Missæ sacrificium offerendum, ut Deus inde propitius factus, voluntatem à servitute peccati liberet? alioquin non sine offensione Fidelium prædicatur peccatorem obstinatum debere abstinere à Missæ sacrificio; maximè cum constans sit Ecclesiæ doctrina sacrificium diebus Festis non posse negligi sine gravi peccato, nec hætenus Ecclesia definierit peccatorem gravius peccare, si permanente affectu peccandi, sacro interfuerit.

Q. 9. *Satisne est Sacerdotibus, si Missæ Sacrificium offerant laicorum more?*

Cajetanus Commentario in art. 10. q. 82. S. Thomæ, scripserat de Sacerdotibus, qui raro, aut nunquam celebrant omni impedimento cessante, peccare quidem, & venialiter tantum; sed Pius V. hanc doctrinam utpotè molliorem expungi voluit. Quare juxta sanam doctrinam

R. Primò, Sacerdotes jure divino tenentur aliquando celebrare. Probatur ex Scriptura Hebr. cap. 5. *Omnis namque Pontifex ex hominibus assumptus, pro hominibus constituitur in iis, quæ sunt ad Deum, ut offerat dona & sacrificia pro peccatis*; Luc. 22. *Hoc facite in meam commemorationem*. Quibus verbis Patres Tridentini sess. 22. cap. 1. docent Chri-

Christum apostolis, & eorum in Sacerdotio successoribus præcepisse, ut offerrent: *Uti, inquit, semper Catholica Ecclesia intellexit, & docuit.*

Dices: Sacerdotes non magis tenentur offerre, quam prædicare, & confessiones audire, atqui Clementina, *ne in agro*, optat Monachos ad Sacerdotium promoveri, etiamsi spes non sit, fore ut Hierarchicis functionibus sub Episcopis dent operam: Ergo.

Nego maj. Namque Sacerdoti non incumbit prædicare, aut confessiones audire, nisi jurisdictionem acceperit, & plebs curæ ejus demandetur. Quare sufficit, ut ad illa munera obeunda sit idoneus, & paratus Episcopo præcipienti obtemperare. At in Sacerdotem assumitur, ut sacrificia offerat: ergo ex sua assumptione celebrare tenetur.

Instabis: Sacerdotes sanctitate & miraculis conspicui, prorsus sacrificandi munus sibi interdixerunt: Ergo.

Nego conseq. Quia paucorum factum, quod, ut bonam in partem interpretemur, facit eorum virtus non vulgaris, in exemplum trahendum non est: contra verò tenendum illud S. Ambrosii apud S. Thomam quæst. 81. art. 10. *Grave est quòd ad mensam tuam mundo corde & manibus innocentibus non venimus; sed gravius, si dum peccata metuimus, etiam sacrificium non reddamus.* Denique tepidis illis Sacerdotibus, cum S. Bernardo epist. 91. num 3. respondendum, *si de sanctis & bonæ memoriæ Patribus gloriantur, imitentur certè sanctitatem, quorum indulgentias dispensationesque pro lege defendunt.*

R. Secundò, præcepto Ecclesiastico Sacerdotes aliquando celebrare tenentur. Sic enim habet.

habetur in Concilio Lateranensi IV. sub Innocentio III. cap. *Dolentes referimus . . . Sunt qui Missarum celebrant sollemnia vix quater in anno, & quod deterius est, interesse contemnunt hæc igitur & similia sub pœna suspensionis, penitus inhibemus. Hæc autem pœna graviolem culpam supponit.*

Q. 10. *Quoties Sacerdos celebrare tenetur?*

R. 1. Circa quoslibet Sacerdotes sic sanxit Concilium Tridentinum sess. 23. cap. 14. de reformatione: *Curet Episcopus, ut ii saltem diebus Dominicis, & Festis sollemnibus; si autem curam habuerint animarum, tam frequenter, ut suo muneri satisfaciant, Missas celebrent. Et Concilium primum Mediolan. part. 2. de frequenti divini Sacrificii oblatione, Tridentini Concilii auctoritatem secuti præcipimus Sacerdotibus, cujuscunque gradus sint, ut Dominicis & reliquis Festis diebus Missam celebrare non omittant. Item, Concilium Remense anno 1583. Sacerdotes, inquit, non tantum diebus sollemnibus, sed etiam Dominicis, sæpiusque, si fieri potest, sacrificent.*

R. 2. Pastores tam frequenter celebrare debent, ut suo muneri satisfaciant, & Tridentino citata sess. 23. cap. 14. Richulfus Sveffionensis anno. 889. art. 3. statutorum sic Parochos alloquitur: *Habete, quæsumus, studium in Missarum quotidiana celebratione, & invitate Parochianos vestros, ut si ad alios conventus venire non sufficiant, saltem Missas frequentius audire non prætermittant. Enimverò si Synagoga ex divino præcepto jube Sacrificium, hoc est, quotidianum, manè scilicet & vesperè, obtulit; in præcipuis Religionis Christianæ Ecclesiis, quales sunt Parochiales, parem cultum deesse non convenit. Hinc Apostoli quotidie*
circa

circa domos frangebant panes, Act. 2. Prioribus etiam sæculis bis in die celebrabatur: *Liturgias*, inquit Theodoretus epist. 145. sæculo quinto, in *Ecclesia obimus tam ineunte die, quam desinente*. Et S. Cyprianus tertio sæculo epist. 61. sic scribit: *Decimas ex fructibus accipientes (Clerici) ab altari & sacrificio non recedant, & die ac nocte cælestibus rebus & spiritualibus serviant*. Quin & Valfridus cap. 21. de rebus Ecclesiasticis, refert summum Pontificem Leonem una die septies, vel novies, Missarum solemniam celebrasse, cum sanctus Bonifacius Moguntinus semel tantum per diem. At Alexander II. circa annum 1061. sic statuit apud Yvonnem Carnotensem 2. parte decreti, & Gratianum de consecrat. *sufficit Sacerdoti unam Missam in die uno celebrare, quia Christus semel passus est, & totum mundum redemit quidam tamen unam faciunt pro defunctis, & aliam de die, si necesse fuerit*. Ex his autem concludimus Pastores teneri, non quidem quotidie, ut vult Scotus, sed sæpius, quàm Dominicis & Festis, Sacrum facere. De Episcopis speciatim dicitur cap. ult. de Privilegiis in sexto, non decere illos ullam diem transire sine Missa absque rationabili causa.

R. 3. Capellanus toties celebrare tenetur, quoties fundator præscribit. Sed hic advertendum est onus Missæ quotidianæ impositum Capellano vel ratione loci, in quo vult fundator quotidie celebrari, vel sine respectu ad locum: si primum, Capellanus debet celebrare singulis diebus, nullo dempto, vel per se, vel per alium, si aliquo impedimento, v. gr. morbo, detentus sit. Si secundum, adhuc observandum, quid ferat contractus foundationis; si enim in eo legi-

tur, vel per se, vel per alium quotidie celebret, nulla dies sine sacrificio debet prætermitti: sed si Capellanus simpliciter ad quotidianam Missam astringitur, intentio fundatoris præsumitur, ut id fiat 1. salva honestate & devotione, adeò ut Capellanus tum possit juxta communem Theologorum doctrinam sacrificium non offerre, cum minus se dispositum sentit, ut colligitur ex cap. *Significatum*, de Præbendis: Quod tamen rarius contingere oportet. 2. Nisi obstet Capellani corporalis infirmitas unius aut alterius hebdomadæ; namque herus famuli sui stipendia haud minuere solet, si brevi ægitudine detentus sit. Quod si diutius duraret infirmitas, substituendus esset Vicarius, nisi nimia beneficii tenuitas excusaret.

Q. II. *Expediutne singulos Sacerdotes quotidie celebrare?*

R. 1. Expediit quotidie celebrare cum debitis dispositionibus. 2. Peccat Sacerdos, reusque existit corporis & sanguinis Domini, si sine debitis dispositionibus offerat. 3. Deest officio suo, si ex negligentia ab altari abstineat, vel mores corrigere non curet, quò semper sit dispositus ad offerendum. Patet ex dictis capite 21. 1. partis, confirmaturque ex S. Bonaventura cap. 5. de præparat. ad Missam, ubi sic Sacerdotem alloquitur: *Proba te ipsum ex quanta charitate, & quali fervore accedis. Non solum cum mortalia vitanda sunt, sed etiam venialia peccata per negligentiam & otium multiplicata, & per inconsiderationem, sive distractionem dissolutæ vitæ, & malæ consuetudinis. Licet non occidant animam, tamen reddunt hominem tepidum, gravem, & obnubilatum, & indispositum, & ineptum*

ineptum ad celebrandum, nisi dicti pulveres, & stipulæ per afflatum Spiritus & flammam charitatis consumantur. Ideo cave ne nimis tepidus, & inordinatus accedas & inconsideratus; quia indigne sumis, non accedis reverenter, circumspicte, & considerate. Unde Apostolus, iudicium sibi manducat & bibit. Quod apertius insinuat, cum dicit, idè inter vos multi imbecilles sunt per fidei inconstantiam, & infirmi, id est, gravi peccato sauciati, scilicet per teporem, & desidiam. O quam graves angustiae me undique affligentes! accedere indignè, horrendum est iudicium: non accedere ex notabili negligentia, vel contemptu, damna-bilis est culpa. Nam cum Sacerdos non ex reverentia, sed ex negligentia celebrare omittit, tunc quantum in ipso est, privat Trinitatem laude & gloria, Angelos lætitia, peccatores venia, iustos subsidio & gratia, in purgatorio existentes refrigerio, Ecclesiam Christi speciali beneficio, & seipsum medicina & remedio contra quotidiana peccata & infirmitates. Item non complet sibi injunctum magnæ dignitatis obsequium, nec officium exercet debitæ servitutis Dei, & tamen scriptum est, maledictus, qui facit opus Dei negligenter, Ultimo, quantum in se est, evacuat divinum cultum, & latriam Creatori debitam, ingratus de beneficiis. Ergo quantum potes, toto conatu per exercitium boni operis, lacrymarum contritionem, & devotionis flammam, expelle à te omnem teporem & negligentiam, ne inveniaris respuere tantorum charissimum dona.

Enimverò Sacerdotes, & alii Clerici non à publicis Reipublicæ oneribus eximuntur, neque fidelium oblationibus sustentantur, ut otio disfluant, & propriis cupiditatibus indulgeant; sed ut, quæ Domini sunt, curent, sancti corpore &

spiritu permaneant, continuo rebus divinis incumbant, mediatoresque pro populo apud Deum precibus & sacrificiis semper agant; quibus si defuerint, nullum hominum genus in Republica tam inutile, tamque superfluum fingi potest, ut latè prosequitur S. Bernardus tract. de vita & moribus Clericorum.

Objiciunt Novatores: Christus cœnam in Apostolorum cœtu celebravit, & ut ita facerent præcepit, *hoc facite*, inquit. Idem præstiterunt Apostoli 1. Corinth. 11. & successoribus observandum tradidere. Unde S. Ignatius Epist. ad Smyrneneses, *ubi Episcopus fuerit, ibi & plebs congregetur*. Et S. Basilius in Psal. 115. circa finem, *non in latebris delitescens sacrificabo, sed publicum exhibebo tibi sacrificium, assumpto mecum universo populo*. Ergo usus Missarum privatarum est illicitus.

Nego consequentiam, utpotè quæ ex antecedente nullatenus erui possit. Namque 1. Dominus, ut sæpe monuimus, non præcepit nisi substantiam operis, circumstantias verò reliquit Ecclesiæ dispositioni, quod ipsimet adversarii agnoscere coguntur, cùm in sua cœna non observent omnia quæ cœnam Dominicam comitata sunt; non lavant pedes, non panem azymum assumunt, non cœnam communem præmittunt, nec horam expectant vespertinam. 2. Ad summum ex allatis textibus colligi posset, fideles ex præcepto divino aliquoties in unum convenire debere ad Eucharistiam celebrandam, quod Ecclesia hætenus observavit. Sed nullo Scripturæ, aut veterum Patrum testimonio probari potest Missas privatas absolutè fuisse prohibitas,

quan-

quanquam nec propriè privatæ, sed communes dici debent, cum à publico Ministro non pro se tantum, sed pro omnibus Fidelibus, licet absentibus & dispersis, celebrentur, ut ait Tridentinum Conc. sess. 22. cap. 6.

Dixi, *absolutè*; Namque improbantur imprimis Missæ Schismaticorum, & Acephalorum, qui à legitimis Pastoribus se segregant, de quibus SS. Ignatius & Basilius in objectione laudati, & Concil. Laodicensem cap. 55. Deinde, quæ in privatis oratoriis in præjudicium Ecclesiæ Parochialis celebrantur. His casibus exceptis,

Privatarum Missarum usus in Ecclesia semper fuit probatus, & retentus. Tempore persecutionis fideles privatim in omni loco & tempore Dominica solemnia celebrabant, ex Tertull. lib. de fuga in persecut. cap. 14. *Sit tibi, inquit, & in tribus Ecclesia.* S. Ambrosius Romæ trans Tiberim in domo clarissimæ Matronæ sacrificium obtulit, ex Paulino in ejus vita. Sanctus Augustinus lib. 22. de Civit. Dei cap. 8. refert unum ex suis Presbyteris ad domum quandam à spiritibus malignis vexatam perrexisse, *ibi, inquit, obtulit sacrificium Corporis Christi. . . Deo protinus miserante, cessavit vexatio.* Concil. Agathense initio sexti sæculi permittit can. 21. oratoria privata, in quibus Missæ peragantur *propter fatigationem familiæ.* Similem licentiam eodem sæculo concessit S. Gregorius lib. 2. Epist. 9. & lib. 5. Ep. 45. testaturque lib. 5. Ep. 50. Palladium in Ecclesia à se extructa altaria tredecim collocasse Concil. Moguntinum anno 847. pro Ludovico Rege Germaniæ Missarum tria millia & quingentas celebrari jussit. Et eodem circiter tempore Angelbertus Abbas S. Richarii præcepit ut sin-

gulis diebus ad minus triginta à Fratribus per diversa altaria Missæ agerentur, exceptis duabus conventualibus, & solemnioribus in Chronico Centullensi lib. 2. cap. 11. tom. 4. Spicilegii.

CAPUT XII.

Quando & ubi offerendum est Missæ Sacrificium ?

R. Primò, quolibet die celebrare licitum est, excepto die Parasceves, quo Ecclesia sacrificium cruentum veluti præsens ante oculos exponit, adeo ut consentaneum non videatur per incruentum sacrificium, commemorationem illius facere tanquam rei præteritæ, cum præsens exhibeatur illo die & sabbato sequenti, usque ad noctis crepusculum, quo Stella in cælo apparere incipit, ex capite *Sabbato*, dist. 3. de consecratione; tunc enim solemnitas Resurrectionis Dominicæ, quæ nocte contigit, canticis lætitiæ, & Missæ sacrificio celebratur, ex ordine Romano, Rabano, Hugone Victorino, & aliis. Sed cum hodie refriguerit Fidelium devotio, Ecclesia nunc solemnitatem Resurrectionis anticipat circa meridiem. Utrum autem manè liceat Missam privatim celebrare, non una est Ecclesiarum disciplina.

R. Secundò, jure communi Missa non debet ante auroram absolvi, & post meridiem inchoari. Ita Pius V. Constitutione sua, quæ incipit *Sanctissimus*, & in Rubricis Missalis.

Dixi, *jure communi*; Namque 1. cap. *nocte sancta*, de consecrat. dist. 5. licitum est nocte Nativ-

tivitatis à galli cantu, non solum semel, sed & ter Missam celebrare, dummodo ablutio non sumatur in duobus primis sacrificiis. Nullum tamen extat præceptum trinam Missam sive celebrandi, sive audiendi. 2. Propter necessitatem potest hora vel præveniri, ut si æger esset viatico reficiendus, & populus peregrinaturus tempus auroræ non posset expectare: vel differri, ut si die solemni concio publica ultra meridiem fuerit producta. Si Sacerdos die festo viarum difficultate detentus, non potuit ante meridiem, ut sperabat, pervenire ad locum, ubi sacrificium erat facturus, potest Missam inchoare ante primam horam post meridiem. 3. Episcopus dispensare potest, ut hora licitè præveniatur, aut differatur, præsumiturque ejus dispensatio in quibusdam regni partibus, ubi hyeme Missa celebratur tribus aut quatuor horis ante lucis ortum.

R. Tertiò, regulariter sacrificium Missæ non debet offerri, nisi in domo Deo consecrata; vel saltem auctoritate Episcopi benedicta. Ita decrevit Concilium Tridentinum sess. 22. Decreto de vitandis in Missæ sacrificio. Habetur etiam cap. *Nullus*, de consecratione, sub comminatione depositionis, quæ pœna supponit gravem culpam. Domus autem illa Deo dicata apud Scriptores Ecclesiasticos, dicitur 1. domus oratoria, Græcè Basilica, Latine Regia: 2. Memoria; quia in memoriam SS. Martyrum solebat erigi: 3. Titulus, quia Christiani solebant demonstrare aliquo signo, nimirum Crucis, hanc domum esse cultui divino mancipatam, quemadmodum locus fisco addictus, aliquo titulo, puta imagine Imperatoris, aut inscriptione

denotabatur : 4. Templum, nunquam verò fanum aut delubrum. 5. Ecclesia, per quam vocem sumitur contentum pro continente, Ecclesia enim idem est ac congregatio, quæ apud Judæos dicitur Synagoga.

Dixi, *regulariter* ; Quia in casu necessitatis : ut si Ecclesia, quæ in pago unica est, subito corruat, aut igne absumatur, vel si in itinere positis Ecclesia defuerit, licet offerre in loco profano, cum dispensatione tamen Episcopi, nisi instet necessitas, v. g. dies festus, nec ad Episcopum recurri possit. Habetur cap. *Concedimus*, de consecratione.

Q. 2. *Debetur ne templis aliqua reverentia ?*

R. Debetur ; quia ex Concilio Nicæno II. rebus sacris convenit Religionis honos : atqui Temppla inter res sacras numerantur : Ergo. Unde apud omnes Theologos irreverentia in locum sacrum, est una ex speciebus sacrilegii.

Q. 3. *Quandonam peccatur contra reverentiam locis sacris debitam ?*

R. Cum in usus communes & profanos convertuntur (nisi adsit evidens necessitas) multo magis si in usus per se malos. Hinc S. Hieronymus in cap. 3. Danielis, de Baltafiare Babylonis Rege, qui ad mensam profanam sacra vasa adhibuit, sic scribit : *Quamdiu vasa fuerant in idolio Babylonis, non est iratus Dominus ; videbantur enim (Babylonii) rem Dei, secundum pravam quidem opinionem, divino cultui consecrasse : postquam autem humanis usibus divina contaminant, statim pœna sequitur post sacrilegium.*

Probatur I. ex Scriptura, Marci II. Christus Dominus non sinebat, ut quisquam transferret vas per Templum, idest, per extimum Templi atrium, quod erat via commoda & compendiosissima,

ssima, inquit Cornelius à Lapide, pergentibus in superiorem urbem, vel in regiam Joan. 2. & Matth. 21. de Templo ejecit vendentes & ementes columbas, licèt ad usum Templi: *Nusquam reperitur*, inquit Alexander II. cap. *Ex multis Dominum tanta severitate peccatores corripuisse sicut illos vendentes & ementes in Templo.* 1. Cor. 11. de comestationibus profanis in Templo; *Nunquid domos non habetis ad manducandum & bibendum? aut Ecclesiam Dei contemnitis? &c.*

Probatur 2. ex jure Ecclesiastico. Consilium II. Lugdunense sub Gregorio X. can. 25. multos actus communes prohibet: *Nullus, inquit, in locis iisdem seditionem excitet (id est, bellum gerat) conclamationem moveat (id est, tripudia & ludos clamoros, ut habetur cap. Cum decorem, de vita & honestate Clericorum) cessent in illis Universitatum & Societatum quarumlibet consilia, de rebus sæcularibus, & politica gubernat.) Cessent vana, & multò fortius fœda & profana colloquia; cessent confabulationes quælibet . . . ne ubi peccatorum venia est postulanda, ibi peccandi detur occasio, aut deprehendantur peccata committi. Cessent in Ecclesiis earumque cœmeteriis negotiationes. In his sæcularium judiciorum strepitus conquiescat & processus judicium sæcularium, ac specialiter sententiæ prolatae in iisdem locis, omni careant robore firmitatis. Cap. qua fronte, prohibentur placita Ecclesiastica.*

Innocentius III. C. Relinqui, de custodia Eucharistiæ, *firmiter, inquit, prohibemus, ne bujusmodi supellectilia, tam Clericorum, quàm aliorum, in Ecclesia admittantur nisi propter hostiles incursus, & alias necessitates urgentes.*

Concilium Tridentinum multa ex recensitis prohibet Decreto de vitandis & observandis in

Missæ Sacrificio, Episcopisque injungit, ut cætera ab ipso non expressa corrigant, quod imprimis sanctus Carolus executus est in Concilio Mediolanensi primo & quarto, in quibus minima quæque reprehenduntur, placetque ea exscribere, ut Clerici discant, quomodo debeant in domo Dei conversari, & exigere sacris locis reverentiam.

Concilium itaque Mediolanense primum à Sede Apostolica approbatum, sic habet de locis sacris: *Nemini cum venaticis canibus, vel volucribus in Ecclesiam ingredi liceat; neque hastam, aliave hujusmodi in eam inferre; ne mendici eleemosynarum causa in Ecclesia vagentur, sed extra Ecclesiam consistant. Adhibeatur diligentia, & gravi pœna multaue agatur, ut & Ecclesie, & oratorii & cœmeterii parietes ab urina, aliisque cujusvis generis sordibus mundi conserventur.*

Ex cœmeteriis vites, arbores frugiferae, & aliæ etiam infrugiferae cujusvis generis, aut arbuta excidantur.

Nec fœnum ex his succidatur, neve herba virescens, quæ bestiis pabulo sit. Stabula armentorum, & cujusvis animalium inde procul sint.

In iisdem ne lignorum strues fiat, nec cœmentorum vel lapidum acervus sit, nec denique quidquam loci illius decori & sanctitati repugnans.

Ne omnino cujusquam rei profanae schedulae Ecclesiarum aut cœmeteriorum foribus, parietibus, aut in quovis loco sacro in posterum affigantur.

Ne Officinae tabulaeque quovis materiae genere, vel ipsis parietibus inhærentes, vel in cœmeteriis construantur.

Ne Ecclesie aut Capellæ tecta palearum acervis, neve aliqua lignorum strue onerentur.

Ne item à parte superiori cœnaculum, vel cubiculum, vel omnino locum habeant, ubi aut dormiatur, aut habitetur, aut quidquam profani fiat: quæ verò loca jam ejusmodi sunt, omnino amoveantur.

Ne

Ne frumentum ullumve tritici, aut leguminum genus, ne poma item, ne instrumenta ad prædiorum rusticorum usum comparata; ne denique quidquam à domo Dei alienum in Ecclesia Deo consecrata, aut in Oratorio, aut etiam cæmeterio reponi, aut acervari ab ullo quovis homine liceat. Vetitumque præterea sit, nisi cum interdum aliter Episcopus censuerit, clavem ullius Ecclesiæ aut Oratorii etiam ruralis laicis hominibus, præsertim verò colonis committi.

Ne campanæ in iis consentur.

Ne in cæmeterio frumentum quasi in area ventiletur, fruges expendantur; ne verò telæ, pannive linei aqua madefacti ad Solem ibi exponantur; neque in eo fœminæ maresque colo quidquam neant, aut aliud opus faciant sacrorum locorum rationi alienum, Ecclesiæ ostia, cæmeteria item, aut Rectori, aut etiam aliis usui ne sint, res profanas, onerave asportantibus, quasi per viam publicam transfœuntibus: cui rei planè ut occurratur, cautionem omnem Episcopus adhibeat.

Ne grammaticæ humanarumque Literarum rudimenta, quæ sæpè inanibus gentiliū fabellis traduntur, aut aliæ omninò Literæ præter sacras, in Ecclesia exponantur.

Altaria, sacræ tabellæ, & imagines, ac parietes ipsi perpetuo niteant; pavimentum autem, saltem octavo quoque die diligenter verratur. Hæc omnia præstari cujusvis Ecclesiæ sit cura Rectoris.

Dixi in responsione, nisi adsit evidens necessitas hunc enim casum excipit Innocentius III. cit. cap. de custodia Eucharistiæ.

Q. 5. Omnis actio per se mala, si fiat in Ecclesia, contrahitne circumstantiam sacrilegii in sacramentali Confessione necessario exprimendam?

R. Primò, certum est, quòd si actio mala specialiter prohibita in Ecclesia, pertingat ad malitiam

tiam peccati mortalis, circumstantia illa loci sacri in sacramentali Confessione necessariò sit exponenda; & ratio est, quia hæc loci circumstantia novam addit peccati speciem, utpotè quæ pugnet contra specialem Religionis virtutem.

R. Secundò, omne peccatum, saltem externum, in Ecclesia, etiamsi specialiter lege Ecclesiastica non sit prohibitum, sacrilegii malitiam continet; quia ex dictis actus profani, & alibi liciti, repugnant sanctitati loci sacri, fiuntque illiciti ex eo præcisè, quòd locum Deo consecratum ad usum profanum, contra ejus propriam institutionem convertant: ergo à fortiori actus per se mali, si in loco sacro exercentur, fiunt sacrilegi; quia multò magis repugnant sanctitati loci, quàm actus ex objecto indifferentes. Unde si mortaliter sint mali, in sacramentali Confessione videntur cum illa circumstantia exprimendi; præsertim quando non sine gravi injuria loci sacri in eo exercentur.

Dixi 1. *Si ad malitiam peccati mortalis pertingat*; Quia actus malus, etiamsi specialiter prohibitus in loco sacro, potest esse tantum venialis, vel ex defectu deliberationis, vel ex levitate materiæ; namque furari unum aut alterum assem in Ecclesia, est peccatum tantum veniale, contrahitque sacrilegii speciem solummodo venialem, quæ necessario in sacramentali Confessione non est exprimenda. Hinc docet Suarez, colloquia otiosa in loco sacro contrahere quidem specialem malitiam ex circumstantia loci, sed venialem; quia materia est levis, nisi id fiat cum aliquo scandalo.

Dixi 2. *Peccatum saltem externum*; Nam de peccato merè interno, non ita constat apud omnes
Theo-

Theologos. Suarez cum quibusdam aliis existimat cogitationem v.g. castitati contrariam, nullam contrahere malitiam ex circumstantia loci, ac proinde non esse sacrilegam; quia, inquit, actus interior, cum sit merè spiritualis; non fit propriè in loco sacro & sensibili, nec ullam ad eum habet rationem, ac proinde nullam irreverentiam contra illum continet. Sed ratio illa non convincit, videturque irreverenter se gerere, qui turpia in loco sacro mente revolvit.

Q. 5. *Quinam actus mali specialiter prohibentur in loco sacro?*

R. Quatuor.

Primus, est furtum, Cap. *Quisquis*, dist. 17. qu. 4. ubi Joannes Papa observat furtum sacrilegum tripliciter committi posse, nempe auferendo sacrum de sacro, vel non sacrum de non sacro, aut sacrum de non sacro, ut si quis calicem in Parochi domicilio furaretur: in quo jus canonicum invenitur contrarium juri civili statuenti, quod si res privatorum in æde sacra depositæ subreptæ fuerint, furti actionem non esse sacrilegii, idest, furti hujusmodi reos non esse puniendos pœna sacrilegorum; sed malè inde colligunt nonnulli, furari rem profanam in loco sacro, non esse sacrilegium.

Secundus, est injuriosa sanguinis effusio cap. *Si Ecclesia*, de consecratione.

Tertius, est homicidium voluntarium & injuriosum cap. *Proposuisti*, de consecratione.

Quartus, est pollutio voluntaria, seu feminis humani effusio: quod extendendum est etiam ad copulam conjugalem, quæ licèt per se sit honesta, tamen specialiter prohibetur in loco sacro.

Q. 6.

Q. 6. *Suntne aliqui actus ita prohibiti in loco sacro, ut propter eos polluatur, reconciliationeque indigeat?*

R. Quinque numerantur.

Primus, est sanguinis effusio, cap. *Proposuisti*, de consecratione. Debet autem illa effusio esse injuriosa, & mortaliter mala, alioquin non polluit Ecclesiam.

Dixi: *effusio*; Quia mutilatione, quæ est sine sanguinis effusione, non violatur Ecclesia; nomine autem effusionis intelligitur copia sanguinis. Unde aliquæ guttulæ non polluunt Ecclesiam.

Secundus, est homicidium voluntarium & injuriosum cap. *Proposuisti*, & cap. *Si motum*, de consecratione. Injuria autem fieret loco sacro, violareturque Ecclesia, si in ea Judex reum suspenderet, non vero si ad mortem eum condemnaret; aut si quis ob justam defensionem ibidem alium occideret.

Ex his sequitur, non pollui Ecclesiam, si quis extra percussus ad eam confugeret, ibique vel occumberet, vel magnam sanguinis copiam emitteret: contra vero Ecclesiam pollui, si in ea vulnus infligatur, & percussus tam celeriter exeat, ut sanguis non profluat, aut mors non sequatur, nisi in loco profano. Hoc posterius tamen negat Suarez.

Tertius, est adulterium, & qualiscunque humani seminis effusio voluntaria. Quodd si sit involuntaria, non polluit Ecclesiam, ex sancto Antonino 3. parte.

Quartus, est sepultura nominatim excommunicati, Cap. *Consulvisti*, de consecratione. Unde licet prohibitum sit etiam sub anathemate in Concilio Turonensi anno 1583. sepelire in loco sacro publi-

publicum hæreticum, non pollueretur tamen in hypothefi, quod non fuisset nominatim denunciatus.

Quintus, est sepultura Infidelis non baptizati (excipe, nisi Catechumenus fit, cap. *Ecclesiam*, dist. 1. de consecratione.) Quod multi extendunt ad infantem non baptizatum, nisi in utero matris mortuus & inclusus sit; sed hanc extensionem alii probabilius rejiciunt, quamvis illicitum sit infantes non baptizatos in loco sacro sepelire, & inde cadavera illa, si fieri possit, sint extrahenda. Advertes

1. Ecclesiam non censeri violatam, si aliquid eorum, quæ dicta sunt, contigerit in loco sejuncto proprio muro, aut tabulato fixo, à reliquo Ecclesiæ corpore: qualis est locus supra Ecclesiæ fornicem, aut campanile.

2. Cœmeterium violari & pollui iisdem modis, quibus Ecclesia.

3. Ecclesia violata, censeri etiam cœmeterium violatum, si contiguum sit; nam principale trahit ad se accessorium, contra verò violato cœmeterio, non ideò violata Ecclesia censetur; nam quod minùs est, non trahit ad se majus, capite *Una*, de consecratione Ecclesiæ, in sexto, ubi additur: *Si plura cœmeteria sint coherentia, sed medio pariete sejuncta, eorum altero violato, alterum propterea non reputatur violatum.*

Dixi, *si contiguum sit*; Nam violata Ecclesia, non violatur cœmeterium ab ea distans.

4. Si Ecclesiæ violatio sit secreta, Ecclesiam non esse reconciliandam; quia sicut nemo amittit jus conservandæ suæ famæ, quamdiu crimen ejus manet occultum; sic ne Ecclesia minùs idonea censeri debet, quominùs in ea celebretur Officium divinum,

vinum , ex eo quòd in ea aliquid clam contigerit.

At , inquires , si postquam Sacerdos celebravit in Ecclesia secreto violata res postea in aliorum notitiam veniat , indigebitne Ecclesia reconciliatione?

R. Non una est Theologorum sententia ; alii enim affirmant Ecclesiam in hac hypothese non indigere reconciliatione ; quia Sacrificium in ea oblatum haberi debet pro reconciliatione. Alii contra contendunt Ecclesiam esse reconciliandam.

1. Quia opposita sententia nullo jure nititur. 2.

Quia si celebratio Missæ instar reconciliationis esset habenda , Sacerdos mala fide celebrans in Ecclesia polluta , censendus esset eam reconciliare.

3. Quia si Episcopus dispenset ad tempus , ut in Ecclesia violata celebretur (quod ob causam necessariam fieri posse communiter docent) tempore elapso Ecclesia nihilominus reconcilianda erit.

Q. 7. *Quale est peccatum celebrare in Ecclesia , quam celebrans novit esse pollutam ?*

R. Est grave peccatum : Quia materia est gravis , nullam tamen propterea celebrans incurreret censuram aut irregularitatem ; quia nulla in jure est expressa.

Q. 8. *Quid faciet Sacerdos , si , dum celebrat , Ecclesia violetur ?*

R. Si violatio contingat post Canonem incœptum , perficienda est Missa ; quia jam censetur quasi substantialiter inchoatum sacrificium , quod non debet intermitteri. Si autem ante Canonem violetur , relinquendum est altare , donec Ecclesia fuerit reconciliata.

Q. 9. *Per quem fieri potest reconciliatio Ecclesiæ violatæ ?*

R. Si

R. Si ab Episcopo fuit consecrata, docent communiter Theologi non posse reconciliari, nisi per Episcopum, aut saltem per Sacerdotem, ex speciali mandato Summi Pontificis: quod si fuerit tantum benedicta, posse reconciliari per simplicem Sacerdotem ab Episcopo delegatum. At inolevit consuetudo in Galliis, ut Sacerdotes Ecclesias consecratas ex delegatione Episcopi reconcilient etiam cum aqua, communi benedictione sanctificata.

Q. 10. *Quandonam Ecclesia consecrata execratur, seu consecrationem amittit?*

R. Cum parietes secundum majorem partem destructi, aut absumpti sunt: c. *Ligneis*, de consec. Ecclesiæ, vel altaris ubi habetur: *Si tecta, aliaque ligna Ecclesiæ combusta sint illæsis parietibus, consecrationem non amittit, quia consecratio in parietibus consistit.* Hæc autem destructio duobus modis contingere potest. 1. Si Ecclesiæ parietes brevi temporis intervallo ita absumantur incendio, ut omnis crusta, vel major pars auferatur, licet parietes non corruant; quia consecratio potissimum consistit in exterioribus crustis. 2. Si Ecclesiæ parietes secundum majorem partem de repente corruant; quia tunc Ecclesia, quæ consecrata fuerat, non censetur permanere. Secus si minor pars Ecclesiæ corruat, vel si minores partes crustarum aut parietum sensim, & per temporum intervalla corruant & reficiantur, quia moraliter censetur eadem Ecclesia subsistere: multominus Ecclesia suam amitteret consecrationem per solam dealbationem superficiei.

Advertes 1. discrimen esse inter Ecclesiæ pollutionem, & execrationem. Nam polluta Ecclesia, polluuntur etiam omnia altaria, quæ in

ea fixa sunt, quemadmodum & vice versa altare pollui non potest, quin etiam Ecclesiæ corpus polluitur. At verò si Ecclesia excretur combustis, aut destructis parietibus, non ideo altaria execrantur, sicut nec altari per fractionem execrato, Ecclesia execratur.

Advertes 2. prohibitum esse dirutam Ecclesiam, quæ consecrata fuerat, ad sæculares usus convertere. Regula enim generalis est: quæ semel sunt consecrata, non debent in usus profanos converti, c. *Ligna*, de consecr. ubi habetur, *Ligna Ecclesiæ dedicatæ, vel igni esse comburenda, vel ad aliam Ecclesiam, vel ad profectum Monasterii esse adhibenda.*

Q. II. Quid est immunitas Ecclesiarum?

R. Est privilegium locis sacris jure canonico & civile concessum, ut sint loca refugii, ex Concilio Aurelianensi I. ubi sic habetur: *Id constituimus observandum quod Ecclesiastici Canones decreverunt, & lex Romana constituit, ut ab Ecclesiæ atriis, vel domo Episcopi reos abstrahere omnino non liceat.* Nec etiam prohibere potest quominus ad eos victus & vestitus deferantur, lege *Præsenti*, codice de his, qui ad Ecclesiam confugiunt. Potest tamen Judex custodiam Ecclesiæ apponere ne reus effugiat.

Excipiuntur tamen in jure nonnulli casus, in quibus reum ab Ecclesia abstrahi licet: primus, si crimen in ipsa Ecclesia commiserit. Secundus, si publicus latro fuerit, vias publicas paratis insidiis obsidendo, vel nocturnus depopulator agrorum, cap. *Inter alia*, de immunitate Ecclesiarum. Tertius si per industriam occiderit proximum suum, seu per insidias, seu venenum cap. *I. de homicidio.*

Advertes 1. hanc immunitatem esse tantum introductam, respectu Judicum sæcularium, non ve-

ro Ecclesiasticorum, Clericosque delinquentes posse auctoritate Ordinarii extrahi ex Ecclesia ad Judicium Ecclesiasticum. 2. Ejusmodi juribus derogatum esse in Galliis.

CAPUT XIII.

Quid observandum circa altare, & ejus suppellectilem?

R. In quocumque loco Missa celebretur, altare lapideum ab Episcopo consecratum requiritur, c. *Altaria*, de consecr. dist. 1. *Quædam novellis & Ecclesiasticis regulis*, inquit S. Leo ep. 82. ad Episcopos Germaniæ & Galliæ, *sibi prohibita noverint* (Presbyteri) *sicut Presbyterorum, aut Diaconorum, aut Virginum consecratio, sicuti constitutio altaris, ac benedictio vel unctio.* Attamen cum hæc dispositio sit juris Ecclesiastici, Summus Pontifex ex plenitudine potestatis suæ, potest concedere Abbati, vel simplici Sacerdoti, facultatem consecrandi altaria.

Q. 2. *Quandonam altare censetur execratum, & amisse benedictionem?*

Duplicis generis est altare: aliud fixum, quod alicui loco seu basi affixum est: aliud portatile seu mobile, quod etiam dicitur viaticum; consistitque in simplici tabula lapidea, eaque angustiore. His præsuppositis,

R. 1. Altare fixum execratur, si motum fuerit è loco suo sine sua basi, Cap. *Quod in dubiis*, de consecr. ubi sic habetur: *Tabula, cui consecrationis benedictio Pontificali ministerio adhibetur, si mota vel enormiter fracta fuerit, debet non immeritò consecrari.* Mobile autem altare consecrationem non amittit;

etiam si à ligno, in quo inclusum est separetur, nisi fortè in ligno locus Reliquiarum inclusus sit. In hoc enim casu execraretur secundum plures Theologos; sed Reliquiæ solent recludi in ipso lapide.

R. 2. Utrumque altare, siue fixum, siue portatile consecrationem amittit per enormem, seu notabilem effractionem, ut habetur in citato cap. *Quod in dubiis*. Fractio autem censetur notabilis, si in nulla parte confracti lapidis Calix cum hostia reponi possit. Utrum autem ablato cornu, in quo signum Crucis solet unctiōe imprimi, altare execratum censeatur, alii affirmant, alii probabilius negant, standum est iudicio Episcopi. Certum est manere execratum, etiam si partes, quæ separatæ non sufficiunt ad continendum Calicem & hostiam, calce aut alio modo coadunentur.

Addere liceat, prohiberi cap. ult. dist. 2. de consecratione, ne in altari, in quo Episcopus celebravit, Presbyter eodem die celebrare præsumat, idque ob Episcopi reverentiam; sed excipi debet, nisi Episcopus licentiam ipsi dederit, vel necessitas urgeat.

Monet S. Carolus altare portatile ita collocandum esse supra tabulam non consecratam, ut tantisper emineat, quo facilius Celebrans cavere possit, ne Calix, siue hostia deponatur extra lapidem consecratum.

Q. 3. *Estne necesse ad consecrationem altaris, ut Reliquiæ sanctorum in eo recludantur?*

R. Res non est omninò certa, multi Theologi contendunt, sine Reliquiis SS. altare non posse consecrari, consecratumque execrari ablatiis Reliquiis, vel fracto sigillo loculi, in quo sunt re-

con-

conditæ, probantque suam sententiam, 1. ex c. *Ad hæc*, de consecr. in quo sic legitur: *Si altare motum fuerit, aut lapis ille, qui sigillum continet, confractus, aut etiam diminutus, debet denuò consecrari.* 2. Ex Can. 7. Concilii Nicæni II. ubi prohibetur, ne templa sine sacris Reliquiis consecrentur. 3. Ex usu Ecclesiæ, quæ sic orat ad Introitum Missæ, *Oramus te, Domine, per merita Sanctorum tuorum, quorum Reliquiæ hic sunt.* Alii, ut Suarez, Sotus, Conincus & cæteri, negant Reliquiarum inclusionem esse essentialem consecrationi altaris, ac proinde censent altare manere consecratum, etiam si extractæ sint Reliquiæ, quia multa reperiuntur altaria sine Reliquiis consecrata, monentque Rubricarum Interpretes hæc verba laudatæ Orationis, *quorum Reliquiæ hic sunt*, esse omittenda, quando nullæ sunt Reliquiæ in altari, quod signum est Reliquias ad consecrationem altaris non requiri tanquam aliquid essentialē, citatosque canones non vigere. Sed facile non est recedendum à communi Ecclesiarum praxi, firmata communiori Theologorum sententia, nempe altare sine Reliquiis non esse consecratum. Quare cura sit Parochi ineuntis possessionem Ecclesiæ, diligenter inspicere num altaria sint integra: experientia enim constat plures Sacerdotes in hac parte esse admodum negligentes, solitosque celebrare in altaribus confractis.

Q. 4. *Quibus instructum debet esse altare, ut in eorite celebrari possit?*

R. Requiritur Calix cum patena, mappæ, quæ dicuntur pallæ & toballiæ, corporale, purificatorium, velum, Crux, lumen, Missale, pulvinar, bursa, circa quæ nonnulla sunt observanda.

De Calice cum Patena?

Q. 1. *Ex qua materia Calix debet esse confectus?*

R. Calix cum patena debet esse non ligneus, nec vitreus, nec æreus, sed aureus, vel argenteus, & ab Episcopo consecratus; sic enim habetur cap. *Vasa*, de consecr. dist. 1. *Quondam Sacerdotes aurei ligneis Calicibus . . . nunc è contrario lignei Sacerdotes aureis utuntur Calicibus . . . ne decus matris Ecclesiæ imminuatur, sed magis cumuletur & amplifictetur, statuimus, ut deinceps nullus Sacerdotum sacrum mysterium Corporis & Sanguinis Domini nostri Jesu Christi in ligneis vasculis ullo modo conficere præsumat.* Et cap. *ut Calix*, de consecr. dist. 1. *Ut Calix Domini cum patena, si non ex auro, omnino ex argento fiat. Si quis autem tam pauper est, saltem vel stanneum Calicem habeat. De ære, aut aurichalco non fiat Calix, quia ob vini virtutem æruginem parit, quæ vomitum provocat; nullus autem in ligneo aut vitreo Calice præsumat Missam cantare. Posset tamen fieri pes Calicis ex cupro sive ære; sed cuppa debet esse argentea, intus inaurata, simul cum patena.*

Cùm consecratio Calicis sit juris merè Ecclesiastici; potest simplex Sacerdos ex dispensatione Summi Pontificis Calicem consecrare, hancque dispensationem habent nonnulli Abbates & Superiores Regularium; sed observandum est hujusmodi dispensationes consecrandi altaria & Calices, ipsis concedi pro Oratoriis sui Ordinis tantum.

Q. 2. *Quomodo execratur Calix, sive Patena?*

R. Primò, per notabilem fractionem, ut si pes fixus separetur à cuppa; de pede autem tornatili secus judicandum est; quia eo separato, Calix fractus non censetur.

R. Se-

R. Secundò , si interior cuppæ superficies in-
auretur ; quia consecratio præcipuè intelligitur
esse in hac superficie. Si tamen ex longo usu illa
superficies sensim deperdatur , tandemque nihil
auri remaneat , Calix non amittit suam consecra-
tionem. De patena sicut de Calice sentiendum
est.

Q. 3. *Calix , vel Patena amittitne suam consecra-
tionem , si ab Aurifice tangatur , in ignem mittatur , &
resarciatur ?*

R. Non amittit , si nulla fiat fractio , nec mu-
tetur superficies interior sive cuppæ , sive pate-
næ ; quia nullo Canone statuitur execrari Calicem
in his casibus , vel etiam in hypothesi , quod eo
quis sacrilegè usus fuisset in mensa communi.

Q. 4. *Si Sacerdos celebrasset , Calice aut altari non
consecrato , censereturne illa consecrata ?*

Non conveniunt Theologii : alii negant , alii
affirmant , & pro sua quisque sententia easdem
ferè proferunt rationes , quas præcedenti cap. ad-
duximus ad quæstionem ; an Ecclesia polluta ha-
beatur pro reconciliata , eo ipso quò in ea sacri-
ficium fuit oblatum. Ad suadendum tamen al-
tare præsertimque Calicem in hac hypothesi con-
secrari , urget hæc ratio , quòd contactus Cor-
poris Domini , & aspersio Sanguinis ejus , in quo
omnia mundantur , majorem efficaciam habeat
ad sanctificandum altare & Calicem , quàm ulla
Ecclesiæ oratio & benedictio. Scio opponi pos-
se exemplum Baptismi sine cæremoniis ab Eccle-
sia præscriptis administrari ; illæ enim supplen-
dæ sunt propter rationes alibi allatas , etiamsi
certum sit infantem esse plenè purgatum & sancti-
ficatum. Major quippe reverentia altaribus &

vasis sacris conciliatur, si ritu ab Ecclesia præscripto sanctificentur.

Sanbovius tamen tom. 2. casu 79. distinguit inter altare & Calicem, contenditque altare non manere consecratum ex sacrificio super illud oblato; quia opposita sententia nullo jure, nullave auctoritate fulcitur: Calicem verò consecrari ex solo contactu Sanguinis Christi; quia S. August. conc. 2. in Psal. 113. de vasis aureis & argenteis, quæ Ecclesia in ministerium sacrificii adhibet, sic scribit: *Pleraque instrumenta & vasa ex ejusmodi materia, vel metallo habemus in usum celebrandorum Sacramentorum, quæ ipso ministerio consecrata, sancta dicantur.*

De Mappis, Corporalibus, & aliis linteaminibus.

Rubricæ Missalis requirunt,

Primò, tres mappas, quarum una saltem sit auctoritate Episcopi benedicta. Altera potest duplicari, & pro duabus reputari. In quibusdam Diœcesibus unica duplicata adhibetur. Conveniunt omnes Theologi gravis culpæ reum esse Sacerdotem, qui sine mappa offerret; sed nonnulli, ut Suarez, non tantam culpam agnoscunt, si non esset benedicta, nec alia haberi posset.

Secundò, Corporale auctoritate Episcopi benedictum. Habetur c. *Consulto*, de consecr. dist. 1. Satiùs & commodius est, si in ejus extremitate nulum sit ornamentum, sed mundities in eo imprimis est servanda. Immunditiem gravem in Corporalibus & Calicibus vulgò damnant peccati mortalis. *Præcipimus*, inquit Innoc. III. de Custodia Eucharistiæ, *ut oratoria, vasa, corporalia, & vestimenta munda & nitida conserventur. Nimis enim absurdum est in Sacris sordes quærere, quæ dedecorent etiam in profanis.*

Tertiò,

Tertiò , pallam , quæ cùm sit quædam pars Corporalis, olim indivisa, nunc autem separata, debet benedici eadem benedictione, qua Corporale, & confici ex eadem materia, scilicet lino, saltem ex ea parte, quæ tangit Calicem.

Quartò, purificatorium, velum, & bursam, pro quibus nulla extat benedictio, quod signum est ea non necessario esse benedicenda. Imò de velo nihil habetur in jure, nec apud antiquos Auctores, forsitan quia Corporali operiebant oblata. In quibusdam Ecclesiis Cathedralibus etiam nunc velum non adhibetur, tam in Missis privatis, quàm in solemni.

Denique requirunt Missale cum pulvinari, Crucem & lumen. Sine Missali nullus celebrare debet, quantumvis in memoria confidat. Crux debet esse exsculpta, in qua imago Crucifixi dependeat; sine gravi peccato omitteretur: imo sine ullo, si commodè haberi non posset. Lumen præcipitur cap. ultimo de celebratione Missarum. Præceptum illud sub mortali obligat, secundum communem Theologorum doctrinam: duas candelas requirunt Rubricæ Missalis, in necessitate una sufficeret. Debent esse ex cera, non ex sebo, & alia viliori materia; neque pro candela adhibere licet lucernam ex oleo. Meminit Gavantus cujusdam Decreti Congregationis sacrorum Rituum, quo statuitur ne in Missis privatis, etiam Vicariorum generalium, plusquam duo cerei ardeant, ut consulatur modestiæ Celebrantis. Monet quoque Concilium Trident. sess. 22. Decreto de observandis & vitandis in celebratione Missæ, ne certus candelarum numerus ex aliquo superstitioso cultu adhibeatur.

Q. 1. *Estne antiquus mos accendendi lumina inter Missarum sollemnia?*

R. Colligitur esse antiquissimum 1. ex Concilio IV. Carthaginensi quarto sæculo, ubi habetur, Acolythum in Ordinatione sua accipere ab Archidiacono candelabrum cum cereo, ut sciat se ad accendenda Ecclesiæ lumina mancipari. 2. ex Sancto Hieronymo, qui contra Vigilantium scribit, in Ecclesia Catholica solere accendi cereos in meridie, quando Evangelium canitur: *non ad fugandas tenebras*, inquit S. Isidorus, *sed ad signum lætitiæ demonstrandum*, ut sub typo luminis corporalis, illa lux ostendatur, de qua in Evangelio, *erat lux vera, quæ illuminat omnem hominem*.

Q. 2. *Quibus personis competit sacra vasa & lintea contingere?*

R. 1. Quamdiu in iis Corpus, aut Sanguis Domini continetur, nullus, præter Sacerdotem aut Diaconum, contingere potest sine gravi peccato, desumitur ex Cap. *Non oportet*, dist. 23. 2. Eadem vasa sacra, etsi vacua sint, sicut corporalia & purificatoria, fas non est laicis & fæminis etiam Sanctimonialibus attingere, cap. *Etiam sancta*, dist. 1. de consecr. & cap. *Sacratas*, dist. 23. hujus præcepti transgressio, si contemptus absit, est tantum venialis, imo nulla erit culpa, si adsit aliqua necessitas, aut honesta causa. Nam Cap. *Nemo*, de consecrat. statuitur, ut corporalia & purificatoria, antequam laicis dentur, prius à Diacono laventur in pelvi ad id præparata: Acolythis olim concedebatur contingere Calicem vacuum, sed standum est hodiernæ consuetudini. 3. Alia ornamenta benedicta, quæ Corpus & Sanguinem Domini immediatè non
contin-

contingunt, cum reverentia omnibus etiam laicis tangere licitum est.

CAPUT XIV.

Utrum Ecclesia mysticas vestes licitè instituerit ?

Valdenses, dehinc Lutherani & Calvinistæ, sacrarum vestium usum rejecerunt, uti verbo Dei contrarium : tum quia Christus Dominus communibus vestibus Cœnam celebravit : tum quia omnes Eucharistiæ benedictiones ut meras superstitiones abominantur.

Contra hos Hæreticos Concilium Tridentinum doctrinam Catholicam asseruit sess. 22. c. 5. nempe vestes sacras ex apostolica disciplina & Traditione esse utiles ad Sacrificii Majestatem commendandam, & mentes fidelium piè excitandas. Et can. 7. sic definiit : *Si quis dixerit, caeremonias, vestes, & externa signa, quibus in Missarum celebratione Ecclesia Catholica utitur, irritabula impietatis esse magis, quàm officia pietatis : anathema sit.*

Probatur I. hæc definitio ex Traditione. Concilium IV. Carthaginense Can. 41. prohibet, ne Diaconi utantur alba, nisi in sacro ministerio. S. Hieronymus lib. 1. contra Pelagianos, scribit, omnem Clerum in sacrificii celebratione candidis vestibus uti. Idem testatur S. Chrysostomus hom. 83. in Matth. Concilium Braccarense III. cap. 3. vult, ut Sacerdos Sacrificium oblaturus, aut Sacramentum Corporis & Sanguinis Domini sumpturus, non aliter accedat, quàm orario utroque humero circumseptus, ut qui imperturbatus

batus confitere debeat inter prospera & adversa. Concilium Toletanum IV. cap. 39. sanxit debere Levitam in sinistro humero orarium portare; quia prædicat; dexteram autem partem habere liberam, ut expeditus ad ministerium Sacerdotale discurrat. In Concilio Laodiceno cap. 22. & 23. Subdiaconi prohibentur uti orario. S. Gregorius in Brittanniam, præter sacra vasa, misit etiam vestimenta Sacerdotalia & Clericalia, ex Joanne Diacono in ejus vita lib. 2. cap. 27. & Beda lib. 1. Historiæ cap. 29.

Probatur 2. ratione ducta à simili. Reges ac Magistratus in publicis actionibus, non vulgari utuntur vestitu, sed alio angustiore, quo & reverentia ipsis concilietur, & simul imperium eorum, & potestas repræsentetur. Decebat ergo, ut in hac sacratissima actione Sacerdos peculiari & splendidiori habitu uteretur, tum ad reverentiam mysterii, tum ad Passionem Domini idoneè repræsentandam, tum ad sui ipsius commonitionem. *Sunt enim hæc ornamenta*, inquit Yvo Carnotensis serm. de rebus Ecclesiasticis, *virtutum insignia, quibus tanquam Sacramentis utentes, admonentur quid debeant appetere, quid vitare.*

Confirmatur ex omnium gentium usu, quæ semper in veste splendori sua sacra perfecerunt.

Q. 2. *Quotuplicis generis sunt ornamenta Sacerdotalia?*

R. Sex numerant, eorumque significationes mysticas prosequuntur Scriptores octavi & noni sæculi; scilicet Alcuinus cap. de vestibus sacris, Rabanus lib. 1. de institutione Clericorum, Amalarius lib. 2. de Officiis Ecclesiasticis. Sunt autem illa ornamenta, amictus, alba, cingulum, manipulus, stola seu orarium, casula seu planeta, quo-

quorum significationes morales indicant preces, quæ pro singulis induendis ordinatæ sunt. Amictus est veluti galea spiritualis, significatque spem, & firmam Sacerdotis in Deum fiduciam. Alba perfectam munditiam; cingulum castitatem; manipulus cordis compunctionem, estque velut sudarium ad lacrymas defluentes colligendas. Stola seu orarium aliquando sumitur pro veste talari, sine qua Clerici procedere non debent, Cap. *Nullus*. Hic autem accipitur pro veste sacra, estque symbolum innocentiae per jugum Christi reparandæ. Est etiam signum jurisdictionis & oneris, quo premuntur Pastoris humeri. Casula denique, seu planeta repræsentat charitatem, quæ omnibus virtutibus supereminet, eas protegit, illustrat, & suaves reddit.

Q. 3. *Estne necesse ut singula Sacerdotalia ornamenta benedicantur ab Episcopo, vel ab habente facultatem?*

R. Affirmant communiter Theologi; quia inquirunt, universalis consuetudo in hac parte vim habet legis, obligatque sub mortali, à quo tamen nonnulli excusant, si solum cingulum benedictionem amisisset.

Q. 4. *Quandonam ornamenta Sacerdotalia amittunt benedictionem?*

R. Amittunt per fractionem, & eam immutationem, quæ pristinam formam tollat. Hinc non remanet benedictio, si manica albæ dissuatur, licet mox denuo consuenda; si cingulum totaliter ita rumpatur, ut nulla pars ad cingendum sufficiat. Dixi, *totaliter*; nam si antequam facta esset partium divisio, inter se connecterentur, benedictione sua non privaretur. Contra verò, si hæ vestes duplices sint, id est ex duplici parte inte-

interiori, & exteriori constantes, singulæ partes etiam separatæ manent benedictæ; quia retinent suam integram formam. Idem dicendum, si pars interior sit detrita, exterior verò integra, & vice versa; sola enim detrita execrata est. Sed observandum est hujusmodi vestes posse esse ita laceras, ut etiamsi formam ac proinde benedictionem non amittant, iis tamen uti non liceat.

Q. 5. *Quid faciendum de iis vestibus detritis, & ad Sacrificium ineptis?*

R. Non possunt in usus profanos converti, sed sunt igni tradendæ, vel defodiendæ, Cap. *Altaris* dist. 1. de consecratione. Vasa verò argentea, vel aurea igne transmutata possunt deservire usibus profanis, quia moraliter non remanent eadem.

Q. 6. *Res, quæ usibus profanis deservierunt, possuntne altaribus consecrari?*

R. Possunt, præsertim si earum mutetur forma, ut advertit S. Augustinus delubra Paganorum in templa conversa sunt.

Q. 7. *Si aliqua ex vestibus Sacerdotalibus desit, nec haberi possit, omittendumne est Missæ Sacrificium etiam in casu necessitatis?*

R. Pensandum est, quatenus ex una parte sit defectus, & ex altera quanta sit celebrandi necessitas. Namque 1. in communi & profano vestitu nunquam licet offerre: quod etiam verum est, si desit altare consecratum, sive calix, sive patena, sive corporale. 2. si tanta sit celebrandi necessitas, puta si frequens populus sine scandalo dimitti non posset, celebrare liceret sine manipulo, aut cingulo. Si autem tanta non sit necessitas, si v. g. Sacerdos aliter satisfacere non possit

possit præcepto audiendæ Missæ ex S. Antonino, præstat non audire, quam indecenter celebrare. Monent communiter, in casu necessitatis licitum esse uti stola pro cingulo, vel manipulo pro stola.

Q. 8. *In vestibus induendis preces pro singulis in Missali descriptæ, suntne ex præcepto recitandæ?*

R. Communis est Theologorum sententia, paucis repugnantibus, hujusmodi preces ex præcepto recitandas, nec sine peccato posse omitti, quia ita expresse præscribunt Missalis regulæ. Levitas tamen materiæ à peccato mortali excusaret, quidquid in contrarium dicant nonnulli. Idem videtur dicendum de Officio nocturno cum Laudibus ante Missam præmittendo, nisi causa honesta excuset, v. g. si instet hora celebrandi, & populus aut persona gravis expectet, vel commodum celebrandi tempus elabatur. Preces autem, quæ vulgo dicuntur, *Præparatio ad Missam*, non obligant, quia in Missali proponuntur pro opportunitate Sacerdotis dicendæ, quod præceptum non sonat.

CAPUT XV.

Utrum Ritus Sacrificii sit probandus?

Novatores quatuor in nostra liturgia reprehendunt. Primum, quod constet cæremoniis, quæ nec in natura, nec in Scriptura fundamentum habent, sed sunt meræ hominum Traditiones. Secundum, quod peregrina & ignota, non vulgari lingua peragatur. Tertium, quod nonnulla secreto pronuntientur. Quartum, quod multa erronea, & superflua, quæ sapiant verborum bosita-

bositatem, contineat. De quibus sigillatim dicendum.

DE CÆREMONIIS.

Aliæ sunt à natura institutæ, ut inter orandum levare oculos in cœlum, tundere pectus, genuflectere; aliæ in Scripturis mandatum, aut exemplum habent, ut Psalmos cantare: aliæ denique sunt institutionis humanæ, & ab Ecclesiæ Pastoribus præceptæ. Pseudo-Reformati postremas solummodo impetunt.

Atque ut justam rixandi causam prætexant, multa comminiscuntur mendacia. Dicunt 1. Catholicos in hujusmodi cæremoniis præcipuum Dei cultum reponere, quamvis Concilium Tridentinum sess. 22. cap. 5. doceat post Tertullianum & Sanctum Augustinum, cæremonias esse adminicula, quibus fidelium mentes ad rerum altissimarum, quæ in hoc sacrificio latent, contemplationem sustollantur: ad essentialia Religionis se habere, sicut arborum folia ad fructus conservandos, atque esse refecandas, si multitudine obruant, ut ait S. Augustinus Epistola 55. olim 19. 2. Catholicos docere peccatum esse mortale, & anathemate dignum, si minimum quid in his cæremoniis mutetur, cum tamen Concilium Tridentinum hanc mutationem prohibeat solis inferioribus sess. 7. canone 13. constansque sit Theologorum doctrina, levitatem materiæ in iis, sicut in aliis præceptis, excusare à peccato mortali. 3. quod aliquibus cæremoniis tribuamus Sacramentorum efficaciam, licet omnium Catholicorum una sit sententia, nullam cæremoniis convenire virtutem ex opere operato,

operato, sed solum vel ex opere operantis, vel ex suffragiis Matris Ecclesiæ, quæ quibusdam cæremoniis nobis applicantur. 4. Concilium Tridentinum approbare quoscunque ritus ab hominibus excogitados, licet absurdissimos; quod est manifesta calumnia; nam cit. can. 13. non loquitur nisi de receptis, & approbatis Ecclesiæ Catholicæ ritibus, contra quos disputare insolentissimæ insanix, & ex S. Augustino Epist. 54. aliàs 118.

Ecclesiæ auctoritatem instituendi & præcipiendi hoc tertium genus cæremoniarum fusè probavimus tract. de Sacramentis in genere, ubi etiam expendimus justas causas, cur Ecclesia prohibuerit usum vulgaris linguæ in publicis precibus. Quare circa cæremonias solum hic breviter subjicienda sunt, quæ praxim spectant.

Primum. Peccatum est omittere aliquam cæremoniam, & quidem mortale, si ommissio fiat in re gravi, nisi invincibilis inadvertentia excuset; quia illa ommissio est transgressio præcepti, *Caveant, ne Sacerdotes*, inquit Concilium Trid. sess. 22. Decreto de observandis, &c. *ritus alios aut alias cæremonias, & preces in Missarum celebratione adhibeant, præter eas, quæ ab Ecclesia probatæ, ac frequenti, & laudabili usu receptæ fuerint.* Et Pius V. in principio Missalis, sic habet: *mandantes, & strictè omnibus & singulis in virtute sanctæ obedientiæ præcipientes, ut Missam juxta ritum, modum, & normam, quæ per Missale hoc à nobis nunc traditur, decantent, ac legant.*

Quæ autem materia censeatur gravis, non ita facile definiri potest. Quare periculosum est, ne, quæ nobis videntur minoris momenti, oculis di-

vinæ Majestatis gravissima censeantur, & quæ fortasse levia cæteris in rebus haberi possent, ea multo graviora sint, collata cum augustissimo sacrificio, cujus finis est supremus omnipotenti Deo cultus deferendus; nam si constans Scholæ doctrina peccati mortalis obnoxios facit, qui tantillum aquæ cum vino admiscere in calice neglexerit, quæ omissio levis hic censebitur?

Præter mixtionem aquæ satis conveniunt Theologi gravem esse materiam, Epistolam, Evangelium, Præfationem, & hostiæ fractionem, non vero canticum, *Gloria in excelsis*, symbolum, unam aut alteram collectam. A graviore autem peccato excusari non possunt, qui truncant & deglutiunt magnam verborum partem, vixque ullam collectam, & orationem præsertim Canonis integram pronuntiant, in quo peccato Superiores etiam communicant, qui moniti tantam irreverentiam non impediunt.

Dixi, *præsertim Canonis*, strictius enim obligat; quamvis levitas materiæ à peccato mortali etiam hic excusare possit.

Advertes præceptum Ecclesiæ etiam transgredi Sacerdotes, qui proprias preces fundunt sive dum levant, sive dum percipiunt Christi Corpus; nam Pius V. post citata verba, *mandantes & præcipientes*, subdit, *ne etiam in Missæ celebratione, alias orationes, & preces addere, vel recitare præsumat*. Et Concil. Trid. cit. decreto, *ne . . . preces . . . adhibeant præter eas*, &c. Notat tamen Suarez non peccaturum directè contra hoc præceptum, qui non animo mutandi ritum, sed privatæ devotioni satisfaciendi, nonnulla interfereret. Sed hæc singularitas nec probari, nec tolerari potest.

Atque

Atque ut Sacerdotes intelligant, quantum ad ministerii sui decorem, majestatemque pertineat, vel minimas cæremonias accuratius observare, meminisse eos oportet mysteriorum nostrorum cæremonias institutas esse veluti loquentes picturas, quæ rerum latentium sanctitatem sensibilibus signis repræsentant. Jam vero quis neget tabelam paucis, iisque rudioribus lineis exaratam, oculos insuaviter verberare, donec perita artificis manus lineis tenuibus iisque penè infinitis colorem, situm, umbras, distantiam, propinquitatem singularum partium repræsentaverit? Idem prorsus in mysteriorum nostrorum tractatione cernere est; alii scitè & ornatè, alii indecenter ea peragunt; quia illi diligenter curant singula, isti nonnisi graviora, quæ juvantur minutioribus, & ab iis mutuantur splendorem suum. Sic Sacerdos v. g. indecorè astantem populum salutat; quia quatuor aut quinque prævias omisit cæremonias tanquam leviores, quas præscribit Rubrica, ut salutatio compositè & decenter fiat. Quo uno exemplo declaratur minutioribus hujusmodi omissionibus, non modicam deformitatem in Missæ sacrificium induci.

Secundum. Satis non est nullas omisisse cæremonias, nisi & ipsi suum pondus, gravitasque affuerit, remota præcipitatione omni, quæ earum dignitatem corrumpit. Qui commotior, ac celerior justo celebrat, gravem corporis situm amittat necesse est: omnes motus ejus agitationes sunt incompositæ, circumstantium oculis graves. Exemplo sint repetita Crucis signa super oblatis: si fuerint impressa celerius, quis ludicram gesticulationem histrionis alicujus non dixerit

risum moventis, non pietatis sensum excitantis, adeò ut levius peccasse videri posset omisisse omnino, quam ita percurrisse festinanter ?

Similiter impensiori studio animadvertendum, singulas voces eo pronuntiare affectu, ut ex celebrantis corde exire videantur, sintque sinceræ interpretes devotionis internæ, qua animatus ad sacrificium debet accedere. Quippe non loquitur, ut Deo intimos sensus aperiât, qui ei jam satis noti sunt; verum ut attentionem sui ipsius moveat, circumstantium pietatem accendat. Distinctè igitur singulas syllabas pronuntiet ea voce, quæ rerum repræsentatarum magnitudini respondeat; nempe volubilitas illa, qua nonnulli verba proferunt, ex natura sua ita mentem rapit, ut nulla ei relinquatur libertas assurgendi ad cogitationem rei per ejusmodi verba significatæ. Hinc debilitantur animæ vires, devotio extinguitur, fideles, qui adsunt, male de celebrante sentiunt, dum in id intentum vident, ut quàm celerrimè absolvat: manus provocatur vindicis Dei qui per Prophetam dixit, *maledicam benedictionibus vestris, quia non posuistis super cor.*

Tertium. Quantalibet reverentia exterior appareat, inanis est coram Deo, nisi comites animi affectus habeat. *Absque hoc*, inquit Sanctus Bernardus, *honor non habet gratiam; & qui de amore non venit honor, non honor est, sed adulatio.* Sedulitas, & diligentia singularis, qua Judæi cæremonias Mosaicæ legis observabant, non obstitit, quominus Deus eorum oblationes respuerit; quia externo illi apparatus, ac pompæ, cordis intima non respondebant. *Spiritus est Deus, & eos, qui adorant eum in spiritu & veritate oportet ado-*

adorare. Joan. 4. Enimverò quid cultus ille exterior in religione censeretur? Scilicet tanquam arborum folia, quæ foyent fructus, arcent à frigore, & à solis ardoribus illæfos præstant: cæremoniæ enim à Christo & ab Ecclesia institutæ sunt ad alendam pietatem, accendendum, fovendumque fervorem charitatis. Cui igitur satis fuerit externum corporis habitum ad decorem composuisse, timeat sortem illius ficulneæ, cui maledixit Dominus, cum inter exuberantium foliorum pulchritudinem nullos in ea fructus deprehendit. Quæ autem debeat esse Celebrantis devotio, diximus cap. 7.

De Ritu, quo nonnulla submissa voce dicuntur.

Lutherus lib. de formula Missæ, liberum reliquit an alta, an submissa voce pronuntientur verba cænæ, sed Kemnitius ejus discipulus in examine Conc. p. 2. contendit esse contra institutionem Dei, si secreto dicantur. 1. quia Christus Dominus voce intelligibili Cœnam instituit, præcepitque Apostolis, ut idipsum facerent. 2. quia hunc morem à primis sæculis Ecclesia observavit; nam ex S. Dionysio Alexandrino apud Eusebium lib. 7. hist. cap. 9. ad verba consecrationis populus respondere solebat, *Amen.* Unde Justinianus in Novella 123. præcepit, ut liturgia alta voce recitetur; nempe magici incantatoris est, inquit Pseudo-Reformati, nonnulla demurmurare. Sed contra.

1. Christus Dominus liberum reliquit Ecclesiæ alta, vel submissa voce sacrificium peragere.

Probatur, quia ex sæpius dictis hæc potestas perpetuò in Ecclesia fuit, ut in mysteriorum nostrorum celebratione, salva illorum substantia, ea statueret, vel mutaret, quæ utilitati fidelium, & ipsorum mysteriorum venerationi, pro rerum & locorum varietate magis judicaret expedire; atqui non pertinet ad substantiam Sacrificii modus ille verba recitandi: Ergo Dominus ita Apostolis rem ipsam, non modum præcepit. Voce elatiori usus est; quia docebat eos, quibus verbis sacrificium perficeretur, quod etiamnunc observant Episcopi in ordinatione Sacerdotum.

2. Ritus, quo nonnulla secreto in Missa dicuntur, non est damnandus. Ita definiit Concilium Tridentinum sess. 22. can. 9. *Si quis dixerit, Ecclesiæ Romanæ Ritum, quo submissa voce pars canonis, & verba consecrationis proferuntur damnandum esse anathema sit.* Et cap. 5. docet ejusmodi Ritu majestatem sacrificii commendari, fideliumque mentes ad rerum divinarum meditationem sustolli.

Probatur ex omnibus liturgiis antiquissimis, tum Græcis, tum Latinis, quæ præscribunt nonnulla silentio dicenda, & altiori voce concludenda his verbis; *per omnia sæcula sæculorum.*

Respondet Kemnitiuss cit. loco, hæc intelligenda de voce moderata & sine cantu, quæ possit percipi à circumstantibus.

Contra. Primo, vox græca significat rem omnino occultam, & ita Græci eam interpretantur, secreto Liturgiæ partem legentes. Secundò, Innocentius I. Epist. 1. dicit pacem dandam post omnia verba, quæ aperire non licebat. Porro

si ea

si ea populus circumstans audire consuevisset, non erat, cur Innocentius aperire timeret. Hunc secreto pronuntiandi morem Patres Tridentini vindicant tanquam laudabilem.

Nihil in Liturgia superfluum, nihilve erroneum.

Probatur. Tota nostra Liturgia constat actionibus, & verbis: atqui nihil fit in ea, nihilve dicitur, quod pietatem & reverentiam non spiret: ergo revera nihil in Liturgia reprehendi potest, tanquam superfluum, & erroneum. Ita declaravit & definiit Concilium Tridentinum sess. 22. can. 4. & can. 6.

Quoad actiones, quæ ad tres classes reduci possunt.

In prima habentur omnes actiones præscriptæ, ut tremendum mysterium cum decore & modestia peragatur. Ad hoc confert, quod Sacerdos ad altare procedat oculis demissis, & incessu gravi, quod pectus percutiat, dum dicit *mea culpa*, jungat manus ad illa verba, *in unitate Spiritus Sancti*, elevet verò dicens, *fursum corda*, quia ad venustatem & decorem pertinet, quod actio sit conformis locutioni. Vertit se ad populum, dum illum salutando monet his verbis: *Dominus vobiscum*, naturale enim & decens, ut convertamur ad eum, quem alloquimur; bis quidem salutando non se vertit, nempe in præfatione, & in fractione Hostiæ; quia nunc major debet esse attentio ad mysteria proposita, nec decet ab iis oculos declinare.

In secunda classe sunt actiones, quibus Sacerdos testatur suam erga Deum reverentiam & cultum;

Ddd 4

cultum; tales sunt inclinationes corporis, genuflexiones, elevatio oculorum & manuum in cœlum, *illuc suscipiunt Christiani manibus expansis, quia innocuis*, inquit Tertull. Apol. cap. 30. *capite nudo, quia non erubescimus; denique sine monitore, quia de pectore oramus*; ad hoc enim spectat elevatio sanctissimi Sacramenti statim post consecrationem, ut à populo adoretur, conjunctio etiam digitorum, quibus Corpus Domini tetigit Sacerdos, ne, si particulæ adhærerent, dispergantur; *Calicis enim, aut panis aliquid decuti in terram anxie patimur*, ait idem Tertullianus cap. 3. de corona Militis. In signum etiam reverentiæ Sacerdos osculatur altare, & Missale, finito Evangelio. Est & aliud osculum, quod datur à Sacerdote primo Ministro, & ab isto aliis successive, quod est signum amoris & benevolentiae, de quo fit mentio in antiquis Liturgiis & apud SS. Cyrillum catech. 5. Chrysostomum 77. in Joan. & Justinum Apologia 2.

In tertia classe habentur omnes illæ actiones, quæ propter significationem moralem, aut mysticam præscriptæ sunt. Tales sunt 1. translatio Missalis à parte dextra ad sinistram, per quam significatur translatum Dei verbum à Judæis ad Gentiles. 2. aquæ mixtio cum vino, quæ significat conjunctionem populi cum Christo, ex S. Cypriano Epist. 63. 3. ablutio digitorum, non ad abluendas corporis sordes, inquit S. Cyrillus Catech. 5. sed in symbolum oportere nos mundari à peccatis etiam levissimis. Unde notat S. Thomas non integras manus ablui, sed digitorum extrema. 4. extensio manuum super oblata in testimonium, inquit Eusebius lib. 1. demonstr. Evan-

Evangelicæ, reatus nostri in hostiam translati.
 5. usus frequens signi Crucis; quia ex Sancto
 Thoma consecratio hujus Sacramenti, & fructus
 ejus procedit ex Passionis Christi merito. Quæ
 autem significatio specialis respondeat unicuique
 signo Crucis, docent rubricarum interpretes.
 Addit idem S. Thomas Sacerdotem signo Crucis
 non benedicere oblata consecrata; nam quod
 majus est; non benedicitur à minore, sed so-
 lum commonere virtutem Crucis in hoc myste-
 rio operari. Quam autem antiquus sit usus signi
 Crucis in mysteriorum celebratione, patet tum
 ex omnibus Liturgiis, tum ex S. Basilio lib. de
 Spiritu Sancto cap. 27. S. Chrysostomo hom. 50.
 in Matth. & S. Augustino tract. 118. in Joan. 6.
 thurificatio, ad significandum Christi bonum odo-
 rem, quia ad fideles derivatur Ministrorum offi-
 cio, juxta illud 2. ad Cor. c. 2. *odorem notitiæ suæ
 manifestat per nos in omni loco.* Hujus thurificatio-
 nis meminerunt antiquiores Liturgiæ, & S. Da-
 masus in vita S. Sylvestri, inter vasa sacra nu-
 merat thuribula. De cereis accensis jam diximus.
 In Missa solemni procedente Sacerdote ad altare,
 Ministri cum lumine præcedunt, ut habetur in
 Liturgia S. Chrysostomi: quo significatur virum
 Ecclesiasticum lucere virtutum splendore. De-
 nique fit fractio Hostiæ, quæ secundum S. Tho-
 mam significat divisionem, quæ facta est in Pas-
 sione sive partium corporis per flagella, clavos,
 & lanceam, sive animæ à corpore. Porro in his
 nihil est, quod hæretici reprehendant, etiamsi
 de illis Ecclesia legem sanxerit; nam Calvinus
 ipse suas cæremonias præscripsit, docetque lib. 4.
 Institutionum, Ecclesiam dissolvi suis nervis,

deformari, & dissipari, si unicuique liceat mutare cæremonias.

Quoad verba, cum Lutheranis non displiceant, quæ dicuntur in Missa Catechumenorum, illamque partem retinendam olim censuerint, non est cur in illa diutius immoremur. Præit confessio peccatorum; quia exigit mysteriorum sanctitas, ut nonnisi cum magna humilitate, & conscientiae puritate ad ea Sacerdos accedat; nec est speciosa laus in ore peccatoris. Fideles quoque circumstantes peccatores & pœnitentes se profitentur; cum enim sacrificium eorum nomine sit offerendum, & obstinatus peccator sincerum cultum Deo exhibere non possit, necesse est ut accedant corde contrito, convenientissimumque fuit ut publicè hanc animi sui præparationem profiterentur. Auctorem hujus Confessionis faciunt alii Damasum, alii Pontianum Damaso antiquiorem. Similis Confessio reperitur in Liturgia S. Jacobi.

Oratio dirigitur ad Patrem, concluditurque per Filium, per quem accessum habemus ad Patrem ita sanxit Concilium III. Carthaginense: dicitur autem Collecta; quia nomine totius populi in unum collecti funditur, colligitque singulorum vota & attentionem. Unde Sacerdos præmittit, *Oremus*, & in fine populus respondet, *Amen*, id est, *fiat*, *fiat*. Hujusce cæremoniæ meminerunt Sanctus Justinus Apologia secunda, Hieronymus Præfat. in epist. ad Galatas.

Post Collectam sequitur lectio ex Propheta, vel ex Apostolo, deinde ex Evangelio: de his meminit S. Justinus citata Apologia can. 9. Apostolorum, Concilium Laodicenum, & Carthaginense

ginense IV. Post lectionem Epistolæ dicitur Responsorium, quia populus respondet Lectioni affectibus, præsertim pœnitentiæ: dicitur etiam Graduale, quia canebatur dum Diaconus gradum ascenderet ad Evangelium decantandum. Sequitur *Alleluja*; displicet Luthero, quòd omittatur diebus jejunii; illud tamen sanxit Concilium Toletanum IV. imò testatur S. Augustinus epist. 119. nunc 55. suo tempore non fuisse decantatum, nisi diebus Dominicis, in signum lætitiæ ob Domini resurrectionem, & singulis diebus à Paschate ad Pentecosten. Unde S. Gregorius aliquando reprehensus fuit, quòd extra tempus Paschale jusserit ad Missas cani *Alleluja*, in omnibus festis, exceptis iis, quæ incidunt inter Septuagesimam & Pascha, cui reprehensioni respondet lib. 7. epist. 63. usum illum non à se incœpisse, sed introductum tempore S. Damasi.

Ante offertorium Sacerdos astantium mentes excitat hac salutatione, *Dominus vobiscum*, & admonitione, *Oremus*.

Præfationem esse antiquissimam colligimus ex Sancto Cypriano, libro de expositione Dominica, ubi sic scribit: *Sacerdos ante orationem præfatione præmissa, parat fratrum mentes, dicendo, Sursum corda, ut dum respondet plebs, Habemus ad Dominum, admo- neatur nihil aliud se, quàm Dominum cogitare debere. Quàm verò aptè sequatur Canticum Angelicum, nemo non videt.*

Canon hìc inchoatur, protenditurque ad Orationem Dominicam exclusivè, ex sancto Gregorio citata Epist. 63. Canon autem idem est ac Regula non mutanda, quemadmodum aliæ Liturgiæ partes pro diversitate solemnitatum mutantur.

Ad

A Veteribus quoque vocatur actio, idest ritus, quo legitimè perficitur oblatio. Hinc commemoratio sanctorum Martyrum quæ interseritur in Canone, dicitur fieri infra actionem, hoc est, post Orationem, à qua cæpit Canon.

Antiquissimus est Canon, siquidem illum referunt Alcuinus, Amalarius, & alii Scriptores octavi & noni sæculi, eo ordine quo habemus. Non unum habet auctorem; nam ex Concilio Trident. sess. 22. cap. 4. quædam ejus partes ab Apostolis sunt traditæ, aliæ ab antiquioribus Pontificibus identidem institutæ; sanctus Leo addidit, ut in ejus vita legitur, *sanctum Sacrificium, immaculatam hostiam*; refertque Beda lib. 2. Historiæ, sanctum Gregorium inseruisse, *diesque nostros in tua pace disponat*. Unde cùm S. Gregorius cit. Epistola scribit quendam Scholasticum (sive illud nomen sit proprium, sive appellativum, idemque sonet ac Doctor) composuisse Canonem, sensus est, quòd in ordinem redegerit partes Canonis jam ante ipsum institutas, quemadmodum dicuntur sancti Basilii & Chrysostomi composuisse suas Liturgias, non enim credendi sunt auctores omnium precum, ex quibus Liturgiæ illæ constant.

Novatores multis capitibus impugnant Canonem, 1. quòd in eo fiat memoria SS. Martyrum. 2. Quòd pro animabus in Purgatorio detentis oret Sacerdos. Sed eorum objectionibus jam satisfacimus cap. 9. 3. Quod alia bene multa superflua, confusa, contradictoria, falsa, vel etiam impia in Canone contineantur. Contra quæ Novatorum probra Patres Tridentini sic habent sess. 22. cap. 4. *Ecclesia Sacrum Canonem multis ante sæculis instituit,*

stituit, ita ab omni errore purum, ut nihil in eo contineatur, quod non maximè sanctitatem ac pietatem quandam redoleat, mentesque offerentium erigat. Et Canone sexto : si quis dixerit, Canonem Missæ errores continere, ideoque abrogandum esse; anathema sit.

Probatur hujus doctrinæ veritas expendendo singula, quæ objici possunt.

Prima objectio, videtur falsum supponere hæc Oratio, & in electorum tuorum jubeas grege numerari, nempe electionem fieri in tempore, cum tamen facta sit ab æterno.

R. Sacerdotem non petere simpliciter, ut Deus nos eligat, sed ut consequatur effectum æternæ electionis.

Secunda, verborum continent hæc Orationes, quam oblationem tu Deus in omnibus, quæsumus benedictam, adscriptam, ratam, rationabilem acceptabilemque facere digneris : & peracta consecratione hostiam puram, hostiam sanctam, hostiam immaculatam.

R. His verbis exprimuntur perfectiones in hostia requisitæ, quas ipse Apostolus verborum non arguendus describit cap. 12. ad Romanos, his verbis, exhibeatis corpora vestra hostiam viventem, sanctam, Deo placentem, rationabile obsequium vestrum. Rogat itaque Sacerdos, ut Deus facere dignetur hostiam, benedictam, idest, ut ex profana, benedicta fiat per consecrationem; adscriptam; id est, adscribatur & numeretur inter dona, quæ Deo probantur : ratam, idest, ita firma sit, & stabilis illa Dei approbatio, ut fructum certum & perpetuum ex illa oblatione percipiamus : rationabilem, idest, ut bene, rationabiliter, & prudenter offeratur à nobis; & ita, juxta Apostolum, rationabile sit obsequium nostrum. Denique acceptabilem,

bilem, id est, digna sit, tum ex parte rei oblatae, seu doni, tum ex parte Ministri offerentis, quæ à Deo acceptetur: ita exponunt Alcuinus, & Innocentius tertius.

Tertia. Circa consecrationem dicitur quòd Christus Dominus elevaverit oculos suos in cælum, benedicendo panem & calicem, quòd porrigendo dixerit, *æterni testamenti, mysterium fidei*, quod tamen falsum est, cum apud nullum Evangelistam legatur.

R. Multa Christus dixit, quæ sola Traditione & sine scripto ad nos devenerunt. Porro credendum est juxta regulam S. Augustini, hæc verba ab Apostolis fuisse tradita, cum Ecclesia Romana iis semper usa fuerit.

Quarta. In Oratione, quæ ab his verbis incipit post consecrationem, unde & *memores, Domine*, multa absurda continentur. Namque 1. dum Sacerdos orat in hunc modum, *supra quæ propitio ac sereno vultu respicere digneris*, videtur velle reconciliare Christum Patri. 2. Præfert oblationem Abelis & Abrahæ, oblationi corporis Christi. 3. Supponit esse altare in Cælo, ad quod vult deferri solam oblationem per manus Angeli, quasi esset minus accipienda, si manibus Christi summi Sacerdotis offerantur.

Resp. ad singula. Non orat Sacerdos pro Christi reconciliatione, sed pro nostra infirmitate; quamvis enim oblatio ex parte rei, quæ offertur, & ex parte principalis offerentis, semper Deo placeat, tamen ex parte Ministri & populi astantis, potest non placere, & esse actio sacrilega. Rogat igitur Sacerdos, ut Deus tribuat nobis fidem, & religionem veterum Patriarcharum, ut debito

debito modo Sacrificium longè præstantius offeramus, succurrantque nobis sancti Angeli, qui orationibus fidelium præesse solent: & sic patet responsio ad secundum & tertium momentum; quòd autem dicatur sublime altare, metaphórica est locutio, desumpta ex capite sexto Apocalypseos.

Quinta. In commemoratione pro defunctis est manifesta contradictio; ibi enim dicuntur dormire in somno pacis, & tamen Sacerdos adprecatur illis locum lucis & pacis.

R. Qui in Purgatorio purgantur, jam quiescunt liberi à tentationibus, & de sua salute securi, sed perfectè non quiescent, nisi adepta visione beatifica, pro qua citius obtinenda orat Sacerdos.

Sexta. In ultima Canonis Oratione videtur Sacerdos negare meritum bonorum operum, *non æstimator meriti*, inquit, *sed veniæ, quæsumus, largitor*, quæ verba maxime placent Kemnitio.

R. Sensus hujus Orationis est, neminem in particulari fiduciam habere in suis meritis; cùm ex una parte ignoremus utrùm amore an odio simus digni, & ex altera parte conscii simus nos multùm peccasse.

In hac Oratione fit iterum commemoratio SS. Martyrum. 1. S. Joannis, an Baptistæ, an Evangelistæ, quæstio est. Probabilior videtur Walfridi sententia, intelligendum esse Joannem Baptistam, qui fuit Martyr; nam de S. Joanne Evangelista ante consecrationem facta est mentio. S. Stephanus licèt Diaconus præponitur S. Mathiæ Apostolo, quia hic observatur ordo Passionis, non dignitatis.

Cur

Cur autem fiat commemoratio SS. nisi Martyrum excepta B. Maria V. hanc rationem affert Innocentius III. lib. 3. cap. 10. quod cultus Martyrum in Ecclesia præcessit cultum aliorum Sacerdotum, institutaque est hæc Oratio antequam memoria SS. Confessorum publicè celebraretur. Aliam affert rationem Auctor Libri de sancta Virginitate apud sanctum Augustinum capite 45. nempe commendanda erat dignitas Martyrii, quod est aliquod genus sacrificii. Præmittitur B. Virginis memoria, tum propter ejus singularem excellentiam, tum quia plusquam Martyr passa est.

Septima. Hæc verba: *Per quem hæc omnia, Domine, semper bona creas, sanctificas, vivificas, benedixis, & præstas nobis*, absurdè dicuntur de Christo, sub speciebus panis & vini latente; ipse enim sanctitas & vita est, ac proinde nec sanctificari, nec vivificari potest.

R. His verbis olim Sacerdos benedicebat fidelium oblationes, & novos fructus, quos Deus semper creat, seu producit, sanctificat per preces Ministrorum; vivificat, dans eis accretionem, benedicitque, ut nobis profint ad sanitatem. Nunc verò Ecclesia has preces non absurdè aptat materiæ, ex qua corpus & Christi sanguis conficiuntur; namque Deus semper creat, sive producit frumentum & racemos, vivificat, sive perducendo ad maturitatem, sive convertendo panem & vinum; quæ ex his conficiuntur, in corpus & sanguinem Domini, qui est Panis vivus.

Hic desinit Canon. Reliqua Liturgiæ sunt vel præparationes ad Communionem, vel gratiarum actiones post Communionem.

Præmit-

Præmittitur Oratio Dominica juxta morem antiquissimum, ut constat tum ex Hieronymo lib. 3. contra Pelagianos : tum ex S. Gregorio cit. Epist. 63. ubi scribit, Apostolos ante Canonem institutum oblationis hostiam ad hanc solam orationem consecrasse, hoc est, alias preces verbis consecrationis non addidisse. Unde patet sanctum Doctorem hujusce ritus non esse Auctorem, sed retinendum sanxisse, fortè quia alicubi omittebatur.

Octava objectio est Lutheri contra hæc verba, *commixtio & consecratio corporis & sanguinis Domini nostri Jesu Christi, fiat accipientibus nobis in vitam æternam.* Absurdum est, inquit, dicere consecrationem hac mixtione fieri. Deinde blasphemia est dicere commisceri corpus Christi cum ejus sanguine; namque vivus est Christus & indivisus; denique perperam tribuitur illi commixtioni virtus conferendæ vitæ æternæ.

R. Primò, non petit Sacerdos, ut tunc fiat consecratio, sed ut jam facta, sit nobis ad vitam æternam: virtus autem conferendi hunc effectum non tribuitur mixtioni, sed corpori & sanguini Domini. Unde patet solutio ad tertium Lutheri momentum. Porro significatur per illam mixtionem, interprete Amalario, Resurrectio Domini, in qua anima per mortem separata rediit ad corpus. Potest etiam dici mixtionem illam esse consecrationem, quatenus est signum sacrum, adhibeturque ad significandum effectum spiritalem, quo sensu dicimus consecrari corpus Christi, quatenus ponitur in altari tanquam hostia Deo consecrata.

R. Secundo, corpus & sanguis Christi non
D. Habert Theolog. Tom. V. E e e miscen-

miscentur in propria specie, cum sub ea ratione sint indivisa, sed in specie panis & vini, secundum quam corpus dicitur frangi & tangi.

CAPUT XVI.

Satisfit nonnullis difficultatibus circa ritum Sacrificii Missæ.

Q. 1. *Missæ debetne esse conformis Officio diei?*

R. Debet, nisi gravis causa excuset, tum quia Cap. *Quidem*, de celebratione Missarum reprehenduntur Sacerdotes, qui prætermisso diei Officio, Missas, quas votivas vocant, frequentius celebrant: tum quia sacra rituum Congregatio prohibuit, ne Missæ votivæ dicantur in Festis solemnibus & duplicibus?

Dixi, *nisi gravis causa excuset*; Nam in exequiis v. gr. præsentis corpore, Missa de Defunctis celebranda est.

Ex his sequitur Sacerdotem, qui ratione beneficii, vel stipendii tenetur Missam celebrare de B. Virgine, vel de Defunctis, posse, imò debere diebus Dominicis & Festis duplicibus sacrum facere de die; quia præsumitur fundator Ecclesiæ filius juxta matris præscriptum suum legatum instituisse.

Q. 2. *Licetne Missam sine Ministro celebrare?*

R. Prohibetur Can. *Proposuisti*, & sess. 21. Concilii Basileensis ubi inter alios abusus notatur mos quarundam Ecclesiarum, in quibus Sacerdotes sine Ministro celebrant, prohibeturque ne in posterum id fiat. Refert tamen Laymanus hunc morem

rem viguisse suo tempore in quibusdam Germaniæ partibus, maximè in pagis.

Q. 3. *In casu necessitatis licetne uti mulieris ministerio?*

R. Non licet; nam. c. 1. de cohabitatione Clericorum habetur: *Nulla fœmina præsumat ad altare accedere, vel Presbytero ministrare; &* ita obtinuit usus, qui pro lege habendus est. Addit Suarez fatius esse sine Ministro celebrare, quàm fœminam habere adjutricem. Attamen in quibusdam Belgii partibus, fœminæ, etiam sine necessitate ministrant.

Q. 4. *Quid si sit aliqua celebrandi necessitas, poteritne Sacerdos sine Ministro Sacrificium offerre?*

R. Negat sanctus Antoninus loco jam citato; affirmat verò Soto, exemplumque affert hujus necessitatis, nempe si aliter Sacerdos non posset satisfacere præcepto audiendi Missam, probabilior videtur Soti sententia, in hypothesi quòd viaticum esset ministrandum periculosè ægrotanti.

Q. 5. *Missæ inchoata potestne aliquando intermitteri?*

R. Certum est non licere, nisi urgeat necessitas, ex cap. Nullus, de celebratione Missarum: *Nullus Sacerdos, cum cœperit: imperfecta officia præsumat omninò relinquere: si quis hæc temerariè præsumpserit, excommunicationis sententiam sustinebit.*

Dixi, *nisi urgeat necessitas*; Nam Theologi communiter docent, relinquendum altare etiam post consecrationem, ut Sacramentum Pœnitentiæ ministretur homini in extremis constituto.

CAPUT. XVII.

De stipendio Celebrantibus concessio.

Quæ graviora circa stipendium occurrunt, ea expendimus Tractatu de Religione, ubi de Simonia; utrùm scilicet honestum sit ac licitum eleemosynam seu stipendium accipere pro sacris functionibus, possitque aliquando in iis Simonia committi? Leviora quædam duntaxat supersunt hic examinanda.

Q. 1. Quod est honestum stipendium Sacerdotis celebrantis?

R. Quod taxatum est lege, vel consuetudine ab Episcopo probata.

Q. 2. Qui amplius requirit, quàm fuerit taxatum, teneturne restituere?

R. Tenetur; Quia nihil supra taxationem illi debetur; & quod ultra accipit, illud involuntariè conferri censetur.

Q. 3. Quid si amplius ultrò offeratur?

R. Vel offerens novit taxationem, vel ignorat: si novit, censetur gratis & liberaliter dare: si ignorat, Sacerdos tenetur illum monere tantundem sibi non deberi.

Q. 4. Qui minora stipendia accipit pro pluribus Missis, potestne licitè ea in unum sufficiens conjungere, & unica sacrificii oblatione satisfacere?

R. Affirmant nonnulli Theologi morales, probantque argumento à simili, nempe famulus, inquit, qui ob paupertatem coactus est pacisci pro minori mercede, potest damnum resarcire occultè, subripiendo è bonis domini sui. Verùm utraque propositio damnata est: prior quidem ab

Ur.

Urbano VIII. anno 1625. declaravitque ejusmodi Sacerdotes ad restitutionem teneri : posterior verò in probationem prioris assumpta, ab Innocentio XI. ann. 1679. & à Clero Gallicano anno 1700. & meritò, quia pacta sunt strictè servanda; alioquin nulla fides in humana societate.

Dices; Concilium Trident. sess. 25. cap. 4. de reformatione, permittit Episcopis Missas, pro quibus celebrandis tenuiores eleemosynæ à testatoribus sunt assignatæ, ad minorem numerum reducere : Ergo.

Distinguo anteced. permittit in diversa hypothefi, Concedo : In ea hypothefi, de qua est quæstio, Nego antecedens. Concilium itaque tum permittit reduci numerum Missarum, cum vel redditus pro illis celebrandis constituti, sunt imminuti, vel quod erat congruum stipendium propter raritatem pecuniæ tempore contractus, jam evasit incongruum & insufficiens; æquum enim est, ut imminuto stipendio, minuatur & Officium. Sed fidelitati & bonis moribus repugnat non servare pactum, etiamsi nulla supervenerit notabilis mutatio in re, pro qua initum fuit.

Q. 5. *Licetne Sacerdoti post acceptum stipendium, aliud iterum accipere pro eodem Sacrificio, cum intentione cedendi in gratiam offerentis eam fructus partem, quæ ipsi tanquam Ministro contingit?*

R. Non potest, probaturque ex Alexandro VII. qui anno 1665. hancce quorundam recentiorum propositionem proscripsit, *duplicatum stipendium potest Sacerdos pro eadem Missa licitè accipere, applicando petenti partem etiam specialissimam fructus ipsimet celebranti correspondentem, idque post Decretum Urbani VIII.*

Q. 6. *Beneficiarius, qui ratione Beneficii tenetur certis diebus Sacrificium offerre, v. gr. Curatus diebus Dominicis & Festis, potestne illud idem Sacrificium applicare offerentibus stipendium?*

R. Non potest, ex Decreto Urbani VIII. anno 1625. Et ratio est, quia duplicatum stipendium acciperet pro uno & eodem Sacrificio, fructus enim Beneficii habent rationem stipendii.

Q. 7. *Qui pinguius accepit stipendium, potestne partem stipendii retinere, & Missam quam celebrandam suscepit, alteri Sacerdoti committere, concedendo alteram stipendii partem, quæ sit sufficiens secundum Ordinarii taxationem?*

R. Idem Summi Pontifices Urbanus VIII. anno 1625. & Alexander VII. anno 1665. damnarunt hanc propositionem: *Potest Sacerdos, cui Missæ celebrandæ traduntur, per alium satisfacere, collato illi minore stipendio, alia parte stipendii sibi retenta.* Alexandro VII. præiverat eodem anno Academia Parisiensis: *Hæc propositio, ut jacet, inquit, falsa est & scandalosa, favet turpi lucro, avaritiæ & injustitiæ.* Et ratio est, quia Sacerdos ille vel Ecclesiæ administrator absque justo titulo illam partem retineret; neque enim gratuito illi donata est, sed cum onere celebrandi Missam: ergo cum illud onus in alium rejiciat, beneficium quoque in illum refundere debet, alioquin esset injustus, & ad restitutionem teneretur. Administratores tamen Ecclesiæ, ex eodem Urbano, aliud retinere possunt pro expensis cereorum, panis, vini, & paramentorum. Ita tamen, inquit Summus Pontifex, si expensis deductis supersint pecuniæ hoc modo comparatæ, Missæ celebrentur pro iis, qui illas obtulerunt.

Q. 8.

Q. 8. *An ista responsio sit extendenda ad Beneficiarios, Capellanos, & Parochos, si quando quæ sunt sui muneris, ut sacrificii oblatio, per alios exequantur?*

R. Minimè, quia titulo Beneficii plura onera sunt annexa, putà debitum persolvendi Horas Canonicas, cura animarum, & alia, ratione quorum pinguiores redditus Beneficiario sunt assignati.

Q. 9. *Licetne Sacerdoti anticipatè Missas celebrare pro iis, qui stipendia oblaturi sunt?*

R. Non licet; id enim prohibuit Paulus V. Rescripto ad suum Nuntium in Hispania, ubi hujusmodi abusus invalescebat contra antiquum Ecclesiæ morem, & gravi Fidelium scandalo, ac incommodo; supponatur enim quis oblaturus stipendium in remissionem peccatorum, quæ nondum commiserat, cùm pro eo Sacrificium peractum est, fructum ex eo intentum non percipiet; quia propitiatio seu indulgentia obtineri nequit pro peccatis secuturis.

Q. 10. *Estne licitum Sacerdoti, vel Ædituo, stipendia magno numero accipere pro totidem Missis, quas prævidet non posse celebrari, nisi, post diuturnum tempus?*

R. Minimè, nisi in id consentiant offerentes. Et ratio est, quia in ista stipendii collatione intercedit species contractus innominati, *do ut facias*, hoc est, ut sacrificium offeras pro peregrinatio, pro infirmo decumbente; pro lite justè suscepta, ut feliciter succedat, pro vincenda gravi tentatione, &c. Atqui procrastinando continget cùm offeretur sacrificium peregrinationem esse peractam, defunctum infirmum, causam perditam, tentationem prævaluisse, &c. Nec dicas apud Deum haberi rationem pii affectus, quo offertur

fertur stipendium ; namque conditiones contractus ex stricta justitia servari debent : atqui non datur stipendium , nisi ea conditione , quod Sacrificium , stante causa offeratur : Ergo. Atque hac ratione evincitur Missam celebrandam in Ecclesia ab offerentibus stipendium designata , quia hac conditione , & non aliàs obtulerunt.

Q. 11. *Parochi possuntne reducere vetera legata, quorum redditus ita sunt imminuti , ut non possint oneribus impositis suppositis sufficere?*

R. Non possunt ; sed ad Episcopum recurrere debent. Ita Concilium Tridentinum sess. 25. cap. 4. de reformatione.

F I N I S.



